

**PRIMARY SUNDAY SCHOOL
GNIGIPA BILSINI
LESSONRANG**



**BAPTIST BOOK ROOM
TURA, GARO HILLS, ASSAM
INDIA**

Acc. No. 8172

Class No.

Book No.

Author

Title Primary Sunday
School Grange Billie

DISTRICT LIBRARY

EAST GARO HILLS DISTRICT

WILLIAM NAGAR

Accession No.


1. Books may be retained for a period not exceeding *fifteen days* by members.
2. Books may be renewed on request at the discretion of the Librarian
3. Dog-eared the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

Help to keep the book fresh and clean

PRIMARY SUNDAY SCHOOL
GNIGIPA BILSINI
LESSONRANG

BAPTIST BOOK ROOM
TURA, GARO HILLS, ASSAM
INDIA

1960



PUBLISHED BY MRS. E. S. DOWNS
on behalf of
THE GARO HILLS DISTRICT SUNDAY SCHOOL COMMITTEE
and
PRINTED BY SRI G. C. RAY AT NAYANA PRINTING WORKS
PRIVATE LIMITED, 47 GANESH CHUNDER AVENUE, CALCUTTA 13

UIATANIRANG

MAGIPA PAGIPARANG

Nambatgipa biteko manna, Nok aro Mondoli damsan kam karinna nangchongmota. Maa-paarang uamangni dedrang baksa somoi gita Giljachi rena nanga. Uamang Giljana gisik nangdilna nanga. Uamangni dedrang Robibarni Schoolo (Sunday School) maiko skie raenga, uamang uno gisik nangna nanga. Nasimangni songo Robibarni Schoolo skiani gita, salanti jarikna joton kabo.

SKIGIPARANGNA

Nasimang nasimangni, aro uamangni nanganirangko uina nangchongmota. Daksoani gimikkon Robibar salna skang, tarie donsona nanga. Skigni mingprakna ongimin chanchianirangko, nasimang jarikna nanga.

Primary Bisarangna, dake mesokgimin Daksoani kamo mesokaha. Nasimangni olakiani somoiko dingtang dingtang donbo, indiba pangnan mesokgiminoni mingprakkon dakbo. Git ringanirangna, Achik Bisarangna tarigimin Kitaponikoson jakkalaibo. Golpoko ragimin Sastrooni bakko bisarangna poraiatnabe. Isolo biao, ua salni skignini gininsa biaibo.

Noksa mesokmitingo, dingtang dingtang bisarangko noksaona okamatbo. Uamang golpooniko manderangko mesokgen. Uamang maiko dakenga, uamangna aganbo, aro dingtangmancha maiba gisik nanganiko noksaoniko mesokbo.

Ia Skignirangko March jani 1 oni abachengchina tarimanaha. Unon 6, 7 aro 8 ko Jisuni chakatpilani somoirango skigen. Nasimang nasimangni Sunday Schoolko bilsini je somoioba abachengode, ia skignirangko watchangbo, aro Jisuni chakatpilani somoi ongkujana kingking donkubo.

Jisuni atchiani (Christmas) golporang 49, 50, 51 aro 52 onga. Uarangko December jaosa mangmang skina nanggen. Ua skignirangko December jao gaakna gita, watchangbo; unon watchanganggimin skignirangko, January jaoni rana nanggiparangko abachenge rapilbo.

PRIMARY SUNDAY SCHOOLNA TARISOGIMIN DAKSOANI

1. Napangani git (Riting riting dake gitko ringe Gilja Noko napgen).

2. Olakiani Git.
3. Isolo Biani.
4. Skiani gita Gitko ringgen.
5. Sastro poraiani (Olakianinasan)
6. Onanirangko onmitingo, olakie rebagen ba (Onanirangko olakie rabagen).
7. Uiatanirang.

SKIANI

8. Golpoko abachengani.
9. Golpo aganani.
10. Noksa Mesokani.
11. Sastroni podko mukosto kaani.
12. Jakni kam ba dake mesokani.
13. Skiani gita gitko ringgen.
14. Watgrikani git ba Biani.

UIATANIRANG

Nambatgipa biteko manna Nokdang aro Mondoli damsan karimna nangchongmota. Uan nasimangni bisarangko Kristianni biding janggi tanganio uamangni dalroroanina dilangna dakchakna, nokdango aro mondolioba dakna nanggni ongchongmota. Daalni bisarang knalna kadongsoani onga. Nasimangni jatni mikkangchi ongbagnia nasimangni bisaragon onga ba pangchaka. Knalni agilsakko nambatrrooatna nokdang aro mondoli damsan kam karimna nanga.

Jeko bisa mondolio ba gilja noko skianiko manaha uko nokdangoba ondappana nanga. Robibar prako mondolini schoolo maiko skienga singbo. Anti gimiko nasimangni salantini janggi tanganirango nasimangni bisarangni mikkango ua skianiko manani gita mesokgipa onga joton kabo.

Antiprako sal dokna nasimang nasimangni bisarangko skina nanga. Nasimangan skigiparang chongmot onga. Kakketgipa Toroma antisao salsini janggi tangani pilakon onga. Kristianni janggi tangani mesokanirangoniko uamang salantini uidapanirangko manna nanga.

PRIMARY BISARANG TOROMNI GIMIN MAI SKIANIKO MANNA NANGA

I. ISOLMU NANGRIMANI BA ISOL BAKSA NANGRIMANI

“Naa Jihova namgipa onga.” Git. 86:5.

Ua schoolchi rena skangan Isol namgipa onga, ua uni bisarang-na simsaka aro uamangoniko namako manna kadongsoa ine skianiko manna nanga. Ua gisiko nangatani, nitogipa aro aiao inmanronggipa agilsakko ongatgipa ine skie rana manna nanggen.

Primaryni bisa gita ua, Isol ia agilsako kam kaengpiti ine skie rana nanga. Ua ia agilsako Isolni mitam been ansenganini niamrangni gimin skie rana nanggen, uachin Isolni kasaani aro uni bilni gimin bangbatako masiatna dakchakgen. Anching Isol baksa kam karimpagiparang onga nanga.

Primary bisa, anching sakprakni janggi tanganina Isolni maiba mangsongani gnang ine skie rana nanga.

Isol antangni anchingna kasaaniko, anchingna nokdangrangko aro madrangrangko onanichi, anchingna simsakgipa aro dakchakgipa manderangchi aro anching antangtangna ongimin gisik aro skianirangko onanichi mesoka; jedakode anching antangtangko namrorobatna pangchakani aro chusokatna bil gnanganiko manna angen.

Ua Isolni kasaaniara anchingna mangmangsan ongaija indiba je biapo donggipa manderangnaba onga. Ua anchingko sakgipinrangna kasaatna, dakchakatna, aro sakgipinrangna uni kasaaniko uiatna dakchakchina kadongsoa.

Uamang Isol kakketgipa onga, paprang, guale dakaniranga anchingna uni ska ba namnikani ongja ineba skie rana nanga. Jerang Isolna kasara, uamanga Isolni kakketgipa dakani nam-srangano janggi tangna joton kagen. Isol anchingko kakketko see rana dakchakgen. Jensalo anching guale ba kragijako see raa unon antangko aro sakgipinrangko duk ongata. Isol anchingni guale dakanirangna duk onga indiba anching kakket ongchongmote bion ua kema kagen aro nambatako dakna anchingko dakchakgen. Isol sepangon, anching je somoioba, je biapoba unbaksa agangrikna ba bina mana.

II. JISU BAKSA NANGRIMANI

“Angan rama aro bebe aro janggi” ine Jisu aganaha. Johan 14:6.

Primaryni bisa Jisuni agilsako dingtangmanchagipa janggi tangani dakanirango bangen gisiko nangatako mana. Uni chongipa bakgitchak gita rebaani, uni Nazaretho mea bisa ongani aro jerango ua namako dake rerorohachim ua chol aro golporangni gimin aiao inmanani ongata. Un baksanaba Primary bisarang uamangni bilni amani kri Jisuni dakmesokani aro skianirango, uamangni salantini janggi tangani dakanirango jarike dalrorona nanga. Uamang Jisuni golporangko sakgipinrangna onskapana abachengna nanga.

Uamang Jisu Isolni Depante onga, Isol mai gita onga uko anchingna mesokna rebaaha, aro saksa sakgipinko Isolna kasachina dakchakna nanga ine uina nanga.

Anching uni siani aro chakatpilanini gimin skigen. Ua mangrakataniko ongchongmotanio talatgen jekon Bibleo Jisu tangkuenga aro anchingni Ripeng aro daalona kingking dakchakgipa ine anchingna agana. Uni kamrang matchotkuja. Uni kamko mikkangchiba dakangkuchina ua anchingna kadongsoa.

Anching ningtugipa gisik nangani aro kakketgipa jisuna kasanio rikgiparang ongna nanga. Uan, bisa dalbatroroahaon uko Jisu Kristoan uni Gitel aro Jokatgipa ine rachakatna dilani onngen.

III. BIBLENA NANGRIMATANI

"Nangni katarang angni jaarangna chakki aro angni ramadilna sengani onga." Git. 119:105.

Primaryni bilsiona sokna skangan bisa Bible dingtangmanchagipa Kitap jechi Isol anchingna agana ine skianiko manna nanga. Uan chiakolni chimik onga. Namnikgipa golporangchi, podrangchi aro uni skianirangchi maikai tangna nanga uko uina anchingko dakchaka.

Primaryni bisarang gita uamang bangbata golporang, podrang aro Bibleni manderangni janggi tangani aro somoirangni gimin maiba skianiko masibana skianiko manna nanga. Uamang Bibleni bebe onganirangko antangtangni bil aro changani kri, kragipa gadango nangrimate jakkalanio dalrorona nanga.

IV. MONDOLI BAKSA NANGRIMATANI

"Anching Jihovani nokona reangna hai ine angna aganon anga katchaaha." Git. 2:1.

Primaryni bisa gilja nokara, nok mangmangsan ongaija indiba meupa, mechikmarangni, mea bisa, mechik bisarangni kusi onggipa

madrangsan gita nangrimgrikanio damsan kam karam aro olakiram biap jeon ua antangba Jisuna kasagipa aro uni kamko kaangkuna jako raenggipa manderang baksa bak manrimpagipa aro rengsi manrimpagipa onga. Ia kam agilsak gimiko donggipa mondolirang gimikon bak manrimpagiparang onga ine chanchina nanga. Ia mondolini kamrangni gimin masina una tale agane masiatna nanga. Ua onanirangchi aro dangdike onanichi ba kamrangko kapaanichi aro uni katchaani uidapanirangko bak manatpana rimbaanichi cholrangko ampagipa onga nanga.

V. BISANI ANTANGKO UIATANIRANG

“Bisa antangni dakanirangchi antangko uiata.” Toe Eki. 20:11.

Maina bisarangba uni dakanirangchi uiatna mana. Bisarang uamangni bil aro uiani kri Kristian janggi tanganio nambate janggi tangna aro bilakgipa Kristianni cholono antangtango nambatroroatna salantion daloroenga ine anching ningtue chanchina nanga. Uamang bangbate kam kaanio, kalgrikanio, antangni ni-amrango, gisik onanio sakgipinrangna onskapana, manigipa, kakketgipa aro pilak dakanirangoba namgipa onga, sakgipinrang baksa kam karimna, sakgipinrangko namnikatna, dakchakgipa onga siggipa ongatna skianiko manna nanga.

Bisarang antangtangni dakna nangani, antangtango namrrobatatani, bamatani aro kakketgipa see raaniko dakna ambataniko antangni bil aro uianiko mananiko nikna abachengna nangaha. Uamang kakketko dakna nengnikani ongoba ba saoba saksani skatang dakaniko gimaatani chol ongoba nambate dakna bil amgipa onga nanga. Kadongsoani gita onggija dukko manna nangoba aro guale dakanirangko kurachakna nangoba uamang nambate dakna skie rana nanga.

Isol uamangni nambatsranggipa onganina kadongsoa aro uamangko nambatsranggipa dakna dakchakgen.

Primaryni bisarang uamangni salantini janggi tanganio nengnikanirang ba jajaanirangko gimaatna ba namatna Jisuni dake mesokanirang aro skianirang gita nambatrroe dakna amgipa onganina nanga.

VI. SAKGIPINRANG BAKSA NANGRIMANI

“Naa nangni songsulna antangna gitan kasabo.” Mark 12:31.

Primary bisa ongahaon ua schoolchi reahani gimin uni noktangni apalo donggipa manderangni aro uni sepango dongenggipa noksulrangna bateba bangbata manderangni gimin bangbatako skie

raenga uamang pilak manderangkon madrang ba jatni dintang-grikani gimin mamungkoba chanchigijan jongada noabirang gita kasana aro dakchakna aro sakgipinrangko manderaanio jakkalna uina dakchakaniko manbatrorona nanga. Gipin manderang mik-kang bimango, dakbewalrango uamangoni dintang ongoba indiba ia dintanggrikaniara janggi tanganina gamchatani, bangan ap-sangrik ongan aro nangbegiparang onga ine chanchina abacheng-na nanga.

Isolni mangsongani ba daksoania sakpraknan biapantinan onga. Agilsak gimikon uni kamko kana uko dakchakna Isol' uamangna kadongsoa ine skie onna nanga.

Uamang Jisuni gimin antangtangni uianiko onskapana sikna skie rana nanga aro ia uianiko maikai sakgipinrangna onskana mana uko uina dakchakna nanga.

Lesson 1

JISU SKIGIPA

Skiani Japang:—

Ia somoio bisarangko Jisu manderangko Isolko uibatatna dakchakna ska, aro ua jechi reanga uno uamangna skiaha ine uiatna dakchakna nanga. Jisu nangrimgipa skigipa ine namnikatna kasaatna bisarangko dilna nanga, aro uni skianiko jarikna cholko manna nanga.

Sastroni Bak :—Mati 5:1-2, 9; 6:25-30; 12:1-8; Mark 6:34-44; Luk 4:16-20; 5:1-3; John 4:4-7, 19-24.

Mukosto Kae Jakkalna :—Uni dakronga gita nengtakani salo ua torom nokchi reangaha. Luk 4:16.

Noksa Mesokani :—Jisuni skiani, abrini sambao, abao, torom noko skiani, Samariani mechik baksa agangrikani, sak hajal bongana alani.

Skiani gita git :—No. 43.

SKIGIPANI TARISOANI

Sastroni Bak :—Sastroni Golpoko Jisuni janggi tanganio manchape, Jisu skigipa onga ine mesoke skina nanga. Golpo Jisu nangrimgimin ripeng skigipa onga aro ua saksan ongoba Isolko uibatna dakchakgipa onga ine mesokna nanga.

GOLPONI ABACHENGANI

Jisu nangrimgipa skigipa, Isolko aro je mande uko nanga, saksana ba jinmana dakchakna ua pangnan tarie donga ine uianiko batroroatgen. Luk 5:1, 15 ko poraie nibo. Uko jechi reangoba skianirangko nikna mana, Abrio, abarango, ringoniko, chiakol sepango aro gilja nokrango. Iarangoni mitam aselrang uni skiani gita ua jeko agana mesoka, chongmotan manderang uoni ongkatgipa gamchatgipa katarangni gimin aiao inmanpila. Luk 4:22.

Mitamrangko uni dakanirangchi uni skianiko mesoka. "Nazarethni Jisu katao aro dakao Isolni aro mandeni mikkango bilakgipa katchinikgipa." Luk 24:19.

GOLPO AGANANI

DALGIPA SKIGIPA

Anching pangnan Jisuko dalgipa skigipa ine chanchironga. Haida ian uni agananichisan ongaigija indiba uni dakanirangchiba ua skiani gimin onga. Jisu banga biapरणon jeoba ongbo ba jensaloba nangnikenggipa manderangko grongbo ua skironga. Mitamrang duk onggiparang ongachim ba jajrenggiparang ongachim. Gipinrango singanirang gnanachim aro dingtang dingtang cholrangchi manderang uni dakchakaniko nangnikaha. Iano anching Jisuni abrini japao skiengako nika. (Pakmao Jisuni skianiko mesokbo).

Ua uni skianiko knatimgiparangko chaani aro bararangni gimin jajrenggiparang onga, ine uiaha. Jisu maikai doorangna aro pulrangna Isolni simsakanini gimin skiaha naa gisik raama? (Mati 6:25-30) ko poraibo. Ua salo Jisu antangni ripengrangna kusi onge janggi tangani mitam niamrangko onaha. Mingsa niamara dakgrikani aro jegrikani gri dongani maina Isol uni dedrangko tomtomao janggi tanganiko nangnika. Naa ua niamko gisik raama? Ua "Ansenggiparang" ine abachenga. (Mati 5:9) ko nibo, pilakan aganchina.

Nengtakani salsao Jisu aro uni ripengrang mini aba gita reangengachim. (Noksako mesokbo) Uamang okriaaha. Jisuni ripengrang miko ake reprepe birongko chaengachim, uko dakna mana ine niamo gnanachim. Indiba mitam bobilrang nitimengachim. Nibo, nangni ripengrang onggija dakenga ine uamang Jisuna aganaha. Jisu ia manderanga Isolni nengtakani salni mangsonganiko uija ine nikaha. Uni gimin ua uamangna maikai Isol anchingna nengtakani salko antio changsa rakkina nanga uni gimin skiaha.

Jisu pangnan nengtakani salo gilja nokrangko skirongachim. (Noksako mesokbo). Manderang dalgipa skigipani skianiko knatimna namnikronga. Sastro agana, pilak uni aganani nama aro uni katarango aiao inmanani onga. Changsao uni gilja noko nengtakani salo skimitingo indake aganani gnan. Uamang uni skianio aiao inmanaha. Sastrooba Jisu maikai gilja nokrangko olakianio dongpaa aro nengtakani salo pangnan skironga uko agana. (Luk 4:16) ko poraibo. Iano Jisu uni dakanichi skienga.

Salsao Jisu chibol samo skiengachim. Manderang uni skianiko knatimna sepangchape tombatokaha. Chibolni rikamo natok rimani ring bolgniko kachapachim ba donahachim. Ringni nokgiparang adita chelao chekrangko susrangengachim. Jisu ring bol-

sao gakataha. Ua natok ringgipa uni ripeng Pitorna agaoni adita chele ringko donchina geetaha. Unon ua ringo asonge manderangna skiaha. (Noksaoniko Jisuni ringo skianiko mesokbo).

Anching ua salo Jisu Isolni gimin maiko skiaha uijaha. Haida Isol anchingko saksa sakgipinna kasagrikna aro dakchakgrikna kadongsoani gimin skiahakon.

Skianiko matchotmanarion ua antangni ripengrangko natok rimna dakchakaha, jemangan natokrangko manjaengachim.

Basakoba Jisu saksanaba skiaha. (Samaria mechik aro Jisuni noksako mesokbo). Ia mechik chi basingko rae chiakoloniko chiko kona rebaahachim. Jisu uko Isolni gimin bangbate uina nanggipa onga aro Isol antangni dedrangko maikai jamano janggi tanganiko namnika uko uibatna nangenggipa onga ine uiaha. Maina Jisu mande sakantian gamchata ine chanchiachim, uni gimin ua mechikna anchingni Paa Isolni gimin aro Ua uni dedrangna miksonganani gimin skina somoiko raaha.

Changgipino Jisu banga manderangna skiaha. Salsao bangbea manderang Isolni gimin skianiko knatimna sikbee uko jarikbaaha. Ua aro uni ripengrang nengtakaniko nangnikoba, badiaba somoio pilak manderangan maikai Isolko uigen, kasagen uani gimin banga rokom skianirangko skiaha. Maina ua mande jinmao donggipa measa mechik, mea bisa aro mechik bisa sakantian gamchatgipa onga ine uie kasachakaha aro uamang okriaaha ine nikahaon, nontangtangchi rechakatna skang uamangna chaaniko onna nanga ine uiataha. (Measa bisani Jisuko dakchakahani noksako mesokbo). Ua salo ua dalgipa skigipara uni skianichisan ongaigija uni kamchi Isolni simsakaniko manderangna skiaha.

Golponi Jamano :—

Nengtakani salanti Jisu gilja nokchi reanichi anchingna Isol uni manderangko Robibar salanti giljachi reatna ska ine skiaha. Naa Robibar salanti giljachi ia jagimik rena joton kana nanga ine chanchiama? Haida anchingba ia dalbegipa skigipa gita nengtakani salo giljachi rerongani gita rerongpana joton kana nanga.

BIANI

Kasagipa Isol, chingni Paa, Nambatsranggipa onani, Jisuna chinga nangko mitela. Naa mai gita onga aro chingni pilak dakanio aro pilak agananio Nangko maikai kusi ongatna mana uko mesokna Ua rebaahani gimin chinga kusi onga. Mikkang Robibaro chingko Sunday Schoolona rimbataibo. Chinga Jisuni

skianirang gita janggi tangna joton kaon, agilsako chinga nambat-gipa biapo onga ine uina kusi onga. Uni bimungo bia. Amen.

Megap ba astechi gilja nokko dakbo. Bisarang matchotahaon uamangko gisik raatbo. Uamangni dakachi mesokaha gita jekai Jisu giljachina reangaha anchingba giljachi rena chanchina nanga.

Lesson 2

JISU ANCHINGKO RIPENG ONGCHINA SKIA

Skiani Japang :—

Ia skianichi bisarangko uiatna nanga je, Jisu antangan banga kamrangko uni skia gita dakaha, aro manderang uni agana aro kamchi dakchakaniko manbeaha. Uamangni ripeng ongani gimin uianiara, meligijagipa manderangko masibatatna aro uamangko daal dipet ripeng dakatna skina nanga.

Sastroni Bak :— Luk 19:1-10. "Jisu aro ripeng grigipa Mande Saksa".

Mukosto Kae Jakkalna :— John 15:12.

Noksa Mesokani :— Jisu aro Zakkeus.

Skiani gita glt :— No. 43.

SKIGIPANI TARISOANI

Ia Zakkeusni golpoara Sunday Schoolni skigiparangna aro bisarangna dakchakbeani onga. Iano mande saksa jean songjinmani manderangchi uni kragijagipa mandapanirangni gimin mitchiako manaha. Maina kajina gilgiparang kajinako agre songsulrang-oniko raanichi antangtango mane chaatachim. Kajina gilgiparanga Jerikoni manderang ongrongbatachim. Uamang Roman sorkarini kamko kaachim. Uamang Jihudirang ongoba jatangni manderangoni tangkako kajina rarongachim. Uni gimin Jisu Zakkeus baksa ripeng dakahaon uamang miteng miteng inaha.

"Ua papirangni sokgipa onga reangaha." Luk 19:7. Zakkeusna Jisuni kasaaniara una aro Jerikoo gimagimin banga ripeng-

rangna onga ine uiatahakon. Ua dalgipa skigipani ripeng onga-nichi ningtue dingtangatna mana ine nikaha. Ua antangni papko kurachakaha. Ua antangni bate raaoniko Jihudirangni niamna bate chang bri onpilachim. (Chanani 5:7) ko nibo.

Skigipani Zakkeusko kema kaaniara, uko janggi tanganio gamchatbatgipa ongataha. Uni katarangara knatimgiparangna kaonangani ongataha jedake daororo anchingna ongaha gitan. Daalo anching skigiparang gita bisarangni gualanirangko mesoke donugin kasaaniko saksasakgipinna mesokjawama? Indide anching skigipani skianiko ripeng gri onge dongenggipa manderangna kasaani jakuko jarikkuja.

Gimagiminko amna aro jokatna mandeni Depante rebaaha. Luk 19:10.

Anching Kristian skigiparang onge iani gimin chanchijawama? Hai anching bianichi Kristoni amani aro jokataniko chanchina. Anchingni bisa sakantian anchingni simsakanio Sunday School changantio onguja dipetna chuongnikkujana. Hai anchingni miksonganiba branggiparangko ame, antangtangko Zakkeus gita skigipani kasaanio dongkamatkujana kingking amangkuna.

GOLPONI ABACHENGANI

Jisu pangnan antangni skianio dongkamachim, changni chang ua manderangna kasagrikchina skibeaha. Anchingni daalni golpoara ua maikai antangni skianio dongkamaha uko mesoka.

GOLPO AGANANI

JISU ARO RIPENG GRIGIPA MANDE SAKSA

Salsao Jisu Jerusalemona rebamitingo Jeriko songjinmaona sokbaaha. Ritchabegipa guareni cholguga gesa gita songjinmaona napangmitingo, Jisu bangbea manderangko nikaha. Ua salo uamang Dalgipa Skigipa ua songjinma gita rebaenga ine knasoaha. Hai anching ia soroko Jisuko nisona ine manderang aganaha. Haida ua dongdike Isolni gimin skinaba donga.

Mande jinmao Zakkeus minggipa mande saksasak dongachim. Uaban Jisuko nikna skaha. Ua ichi uchi rerurae Jisuko nisona namgipa biapko amna joton kaengachim. Indiba ua bolkindikgipa mande onгани gimin mande jinmani skoni kosakko nibatatna manjaha. Manderang angko nina gita onode namgenchim ine ua chanchiaha. Indiba saksaba uko dakchakjaha. Zakkeus maina uko dakchakjaha, uko uiachim. Jerikoni manderang uko namnik-

jachim. Ua kajina gilgiparangoni ua songoni skotonggipa onga-chim aro uamang kakketgipa onga ine uiaha.

Zakkeus chabokgipa aro raseke ragipa ine uamang uiachim. Ua kajinani tangkako gilmitingo nanganina bate rarongachim. Ua uko antangna dintangmancha rakirongachim. Uni gimin Jerikoni manderang saksaba uni ripeng ongjachim. Ripeng gri onge chanchimitingo gambée chrikaniko knaaha, "Jisu rebaenga." Danganang Zakkeus! "Anga maiko dakginok? Anga skigipako nikna nanga," ine ua chanchiaha.

Sepango dalbegipa bol pangsa Jisuni repakanggnigipa sorokchina cheksirang gongdapgipa dongachim. Zakkeus gongrake ua bolona reangaha. Ua gakataha. Jisu aro uni ripengrang ua bolona sokeaha. Jisu nigitoaha. Zakkeus bakbak ongonbabo, maina anga daalo nangni noko donggen ine Jisu aganaha. Zakkeus aiao inmanpilaha aro mamungkoba aganna manjaha. Ua sket bakket boloni ongonbaaha. Ua noktangchina gongrake reangmitingo atangni gisiko beberana manja ine chanchiengachim. "Jisu ang baksa donggenne. Jerikoo mitchiako manbatgipa aro ripeng grigipa mande." Jisu Jerikoona sokahaon Zakkeus katchabee rimchaksoaha. Manderang kusi ongjahachim. Uamang uko namnikjaha. Nibo, Dalgipa Skigipa chabokgipa aro rasekgipani sokgipa onga reangaha.

Indiba manderang maiko aganaha, Jisu mamungba chanchijaha. Ua Isolni kasaako ua mandena mesokna manahani gimin kusi ongaha. Zakkeus Jisuni mikkango chadengaha. Ua Jisuni kasae ripeng onganiko mane uni namgijagipa katong dintangaha. Ua Jisuni jarikgipa ongbaaha. Skigipa, Anga antangni gamoniko adhako kangalrangna ona aro anga kajina gilmitingo saonikoba chaboke ba raseke raahaode una changbri bate angni kakketgijainina onpilgen ine ua aganaha. Dalgipa Skigipa mandechiko nie, uni kragijagipa dakanirangna ua dukko manchongmotenga ine nikahaon kusi ongbeaha. Nangko kema kaaha, Zakkeus ine Jisu aganaha. Naa Isolni de ongaha. Anga nang gita dakgipa mandeko amna aro dakchakna rebaaha ine Jisu aganaha.

Golponi Jamano :

Jisu aro Zakkeusni noksako mesokbo. Jisuni Zakkeus baksa ripeng dakahaon ripeng grigipa manderangna maikai kasachakna aro kasagipa onga nanga uko mesokengachim. Ua antangan antangni pilnihil skigimin gita dakengachim. Salsao ua antangni ripengrangna skimitingo indake aganaha, "Ian angni geetani. Anga jekai nasimangna kasaaha nasimangba saksa sakgipinna kasagrikbo." Jisuni geetani gita dakna ranta kachina bisarangko chanchiat-

na dakchakbo. Hai anching pilakan chanchibee Jisuni skianiko aganna ba mingna. John 15:12.

Biani :—

Kasagipa Isol, chingni Apa, chinga maikai tangna nanga, chingna mesokgipa Jisuna nangko mitela. Saksa sakgipinna kasagrikna ua chingko skiahani giminba nangko mitela. Chingna kasaskagipa manderangna kasana ripeng grigiparangmung ripeng dakna aro bobilrangnaba kasachina ua chingna mesokahani gimin kusi onga. Ia pilak cholrangon Jisu gita ongbabatna joton kana chingko dakchakpabo. Uni bimungo bia. Amen.

Lesson 3

JISU ANCHINGKO KEMA KAGIPA ONGCHINA SKIA

Skiani Japang :—

Ia chango Jisu sakgipinrangko kema kaanini gimin maikai skiaha aro bisarang maiko dakna nanga uarangni gimin skiatna aro didiatna bisarangko dakchakna nanga. Iachi bisarangko Jisu skigipani gimin uibatatna aro uni skianirangko jarikna sikatna bilakatna nanga.

Sastroni Bak :—Mati 18:21-22, Luk 22:54-62, John 21:15-17.

Mukosto Kae Jakkalna :—Eph. 4:32.

Noksa Mesokani :—Jisu kema kaanini ginin skia.

Skiani gita git :—Bisani git No. 43 aro Achik git No. 227.

SKIGIPANI TARISOANI

Sastroni golpoko aganon Jisu Skigipa maikai kema kaanini gimin aganaha aro dakaha uko mesokna nanga. Uan katarangchisan ongaigija indiba uni dakanirangchi uko mesoka. Indaken uan chongmotgipa aselko chongmotan ua anchingna Isol mai dakgipa onga aro ua anchingko maikai janggi tanganiko nangnika uko aganasan rebaijaha indiba ua antangan uni kasaaniko mesokna rebaaha. Johannni aganaha gita,

Kata been pilaha aro kasaan aro bebean gape anchingni gisepodongkamaha. John 1:14.

Skigipa Pitorko uni rangsan chanchigija dakanichi Giteltanko jechakaniko kema kaaniko mesokani sakirang gnan. Uni cha-katani pringo Jisuni ripengrangna katchaani katako raangchina gita Pitorkon bimung minge janapaha.

“Reange uni sninggiparangna aro Pitorna aganebo, Ua nasi-mangna skang Galiliona reangenga.” Mark 16:7.

Jamano apsan atamon Kleopas aro uni ripeng Jerusalemona rebapilmitingo, Kristoni mikkang pachenggiparangoni Pitorba saksongpaa ine uina manaha.

Beben Gitel chakatpilaha, aro Simonna mikkang paaha. Luk 24:34.

Adita salrangni jamano pringwalni warini rikamni walsamo Jisu Pitorko kema kaaniko banga katarangchi talatjachim. Ua gipin nambatako una aganangkuaha, uni mesrangko nirikna aro alduna una bilko onaha. Pitor Kristoni kakketgipa dangdike ongipa, mesnirikgipa, Pamong gita uni mes jakrangna skina aro simsakna nanganio chusokatgipa onga kamko onaha. Uni okamani uko gital ongataha.

GOLPONI ABACHENGANI

Jisu aro Zakkeusni noksako mesokbo. Reanggipa Robibaro anching ia golponi gimin chanchiaha. Jisu maikai ripeng onganigimin skiaha? Kasagrikani gimin Jisuni gectaniko gisik raama? ine singbo. John 15:12 ko apsan mingtaibo.

Anching saksasakgipinna kasaani gimin Jisu skiaha ine skieramanaha. Daalo anching sakgipinrangko kema kaanini gimin Jisu maiko aganaha aro dakaha nikgen.

GOLPO AGANANI

JISU KEMA KANINI GIMIN SKIA

Mati 18:21-22, Luk 22:54-62, John 21:15-17.

Jisuo dingtangmancha sakchigni ripengrang dongachim. Ua uamangko antangni kamo dakchakatna skaha. Uamang Jisu jechi rea uchinan reangpaachim. Ua uamangna abrirang gita reangmitingo agangrikrongachim. Jisu uamangna damsan kusi onge janggitangani golporangko aganrongachim. Ia gital cholko chanchina aro dakna skie rana gita altua ongjachim. Jisuni ripengrang ua maiko uamangna aganaha uko gualrongachim. Uamang saksasakgipinna kasae dakani cholko gisik rajachim.

Salsao uamang damsan reangmitingo Jisuni ripengrang uamangni gisepo sawa dalbata uani gimin agangrikna abachengaha. Angan nasimangna bate mongsongbatgipa onga ine Pitor aganahakon. Naa ongja ine saoba aganchakatengnaba dongakon. Jisu angkosan songrangchi aro sagalchi rena sejahama? Nasimang mongsonggipa aro dalgipa ongode maina nasimangoniko seokjaha? Ruutgijan uamang kaonange, uamangni gisepo jegrikbeani ongaha, jerangan uamangni kaonangani kasinahaon uamang duk ongpilna nanggenchim. Pitor sakgipinrangni chonnikaniko manahani gimin gisiko duk manahakon. Haida ua kaonange Jisuona aganna reangahakon. Gitel, angni jonggipa angni kosako pap dakode basik chang kema kana nanggenchim? ine ua singaha. Changsnina kingkingna? Haida ua reangmitingo gipin somoirangni gimin chanchiangenggenkon maina ia apsan ripengrangan basakoba uko gisik saataha ba uni gaoradeaniko champengrongachim. Anga uamangni giseponi ongpaa ine ua aganenggenkon. Anga uia, darangba indakgipa jakkalaniko rachakangkuna sikjawa. Anga changsnina kingking uamangko kema kaaha aro uan chuongaha. Anga uia Jisu ang baksa kumongpagen indiba anga uo kasachakgipa aro ruutana chakchikenggipa onga ine mesokchina molmolna nanggen. Gisiko duk mana gnang Pitor Jisuo singaha, Gitel basik chang angni jonggipa angni kosako papko dakode kema kana nanga? Chang snina? Anga chang sni ine aganja indiba sni chang sotsnina kingking ine Jisu aiao inmangipa aganchakaniko onaha. Uani ortoara mai? Pitor uko uiaha aro uni orto channa ampilgija kema kaani onga. Pitor kaonangchajaha. Ua agreba gisiko sajaha. Anga angni ripengrangko jedake angna namgijako daka ine chanchia, angaba uamangna pilnipil gualaniko dakronga ine ua gisiktango chanchiaha. Jisu pangnan kakket ongronga. Anga pangnan sakgipinrangko kema kana nanga.

Jisuni kema kaaniko nangnikani Pitorna sal sokaha. Jisuko bobilrangni rimani walo Pitor kenenba Jisuko uija ine jechakaha. Jamano ua duk manbeaha. Jisu chakatpilani adita salrangni jamano ua uni ripengrangna pringwalo mikkang paaha. Pitorba uamang baksa dongachim. Jisu Pitorna aganon, Jisu uko gipinrangko uni kema kana skiaha gita kema kaaha ine ua uina manaha.

NOKSA MESOKANI

Jisu kema kaanini gimin skiani noksako mesokbo. Bisarangko dikdiksa somoina nie chanchina onbo, unon singbo. Jisu sana aganenga? Pitor Jisuoniko mai singaniko singaha? Jisuni aganchak-

ani mai? Gisik rabo uamang maikai gisik nangbee agangrikenga. Nasimang ia noksao gipin manderangkoba nikama? Uamang sawa sawa ine naa chanchia? Uamang Jisuni skianiko jarikna nengnik-engga ine naa chanchiama? Haida Jisu uamangko uko dakna Isolni dakchakanichisan ama ine gisik raatenggen.

JAKNI KAM

Black-boardoniko uamangni slateo ba lekao katako sepachina. Rinok rinok dakgrikbo. Kata mingprakko rong nongbo.

Lesson 4

JISU ISOLNI KASAANINI GIMIN SKIA

Skiani Japang :—

Ia brigipa skianio Jisu Skigipani gimin skianio Isolni kasaanini gimin Jisuni skianiko bisarangko masiatbatatna dakchakna nanga. Ian Isolni kasaaniko sakgipinrangna mesokani chol ongchina.

Sastroni Bak :— Luk 15:11-24, "Kasagipa Paa."

Mukosto Kae Jakkalna :— "Ua anchingna kasaaha aro uni Depanteko watataha." 1 John 4:10.

"Isol anchingna inditan kasaahaode anchingba saksasakgipinna kasana nanga." 1 John 4:11.

Noksa Mesokani :— Kasagipa Paa, aro ia bakko skimitingo jakkalgipa noksarangkoba mesokbo.

Skiani gita git :— Achikni Git No. 227 aro Bisani Git No. 43.

SKIGIPANI TARISOANI

Sastroni Bak :—

Ia changni golpoan pilak serikgiparangni searangoni nambat-sranggipa onga ine uina mana. Naa uigen je iani mangsonganiara branggipa depantenisan ongaija, indiba kasagipa aro kema kagipa pagipani gimin onga. Ian Jisuni toe skiani golpo ming

gitamoni mingsa onga. Jekai branggipa mes, gimagimin suki aro branggipa depante. Gipin minggni gita ia golpo Pagipa Isolni kasaaniko mesoka. Ua bisa pagipaoni gisikchiba chelen brangang aha. Ua jensalo antang chanchina manaha ua inaha," Anga chakate angni Paaona reanggen, aro una ingen, Apa anga nangni depante ine mingna krajaha." Luk 15:18-19. Indiba pagipa ua depanteko uni brangmiting somoio gualjaha. Ua pangnan uko gisik rakamaha aro jringnan uni rebapilaniko nisorongaha. Uni chelengmitingon uni pagipa uko nikataha aro una kasachakaha aro katange uko gipake kudimaha. Luk 15:20.

Ia golpoo pagipani depanteni rebapilo kusi onganiko mesokaniara dalbegipa kusi onganiko mesoka. Hai anching dala alaniko dakna, maina ia angni depante siahachim aro tangpilaha, gimachim indiba manpilaha. Luk 15:23-24. Ia mukosto podrango Isolni kasaaniko mesoka. Uarang paisani sangni gita onga; mingsa anchingko gisik raata je, maina Isol anchingna kasaaha aro uni depanteko watataha. Minggipin anching Isolni kasaani gimin dakskana nanganiko chanchiata.

GOLPONI ABACHENGANI

Jisu aro Zakkeusni noksako jakkalbo. Sawa aganna mangen, Jisu maikai Zakkeusna uni kasaaniko mesokaha? Jisuni kema kaani gimin skiani noksako mesokbo. Ua maikai Pitorna kasaako mesokaha, sawa aganna mangen? Chongmotan Jisu uni ripengrangna, Isol kasagipa aro kema kaninggipa onga ine antangan kasagipa aro kema kagipa onganichi uko mesokaha. Jisu Isol kasagipa Pagipa onga ine manderangko masiatna dakchakgipa golpoko anching knagen.

GOLPO AGANANI

KASAGIPA PAA

Changsao manechagipa mande saksao dalgimin depante sakgni gnangchum. Uamang nitogipa noko dongachim. Kamrango dakchakna gita uamango nokol chakolrang gnangchim. Ua pante sakgnio antangtangko kusi ongatna gita pilakan dongachim. Indiba jonggipa ua pilakon kusi ongjachim. Ua nokko wate chela songrangko nina skaha. Ua antangni nokgipa onganiko aro jakgitel onge janggi tanganiko nangnikaha. Uni gimin salsao uni pagipa baksa agangrikaha.

Apa, chelachi rena ska. Anga ia biapo dongna nengnikaha.


Anga ^{chele} songrangchi songrena aro nirorona skaha. Anga uia naa angna aro angni adatangna jamano manrikna gita tangkako chimongenga. Angna angni bakko dao onbo ine ua aganaha. Angde, nangni nokko watnasiani gimin anga duk onga ine pagipa aganaha. Indiba nangni gisiko chele rena gita mangsongahaode naa jeko bia anga dakgen ine pagipa aganaha. Pagipa una tangkako سوالا. Depante sakprakan antangtangni bakko manaha. Ruutgijan jonggipa antangni watanggipa pagipako chanchigija, antangni giminsan chanchiari sorokko reangaha. Dao anga antangan nokgipa ongaha. Anga angni kusi ongani gita dakna manginok ine ua aganaha.

Ua banga salrangna songreangaha. Ua reroroangaha. Unon song damsana sokangaha aro uan uko kusi ongataha. Anga iano aditana donggen ine ua aganaha. Ua chela songo banga ripengrangko dakaha, indiba uamang pilakan kakketgipa ripengrang ongajachim. Uo banga tangkarang dongani gimin uko nampnikaha. Dao anga kusi onga. Anga angni pangnan dakna nangnigipako dakenga, anga kusi onganiko manenga ine ua aganaha. Indiba uni nangijagipa ripengrangni kusi ongipapa dolna uni onaniara aro namgipa chaaniara uni pilak tangkako koros katokaha. Uo paisa pelsaba dongjaha, aro ua okkrina abachengaha. Anga kam amna nanga. Anga okkrianiko rakina gita jekoba dakna nanga ine ua aganaha. Bonkamao ua una kam ongipa mande saksako grongaha. Anga sakoba angni wakrangko nirikatna nanga ine ua mande aganaha. Je kamba ongchina okkriakosan rakina nanga ine ua aganaha. Ua uni nokgipani wakrangko nirikna gita abarangona reangaha. Ua wakrangna chaaniko gopipraataha. Ua rangni chamitingon, anga okkria, anga wakrangni chaanimangchiba chae okkaatginok ine ua chanchiaha.

Unon ua pagipani nokni gimin chanchina abachengaha. Ua antangna aganaha, "Maina angni pagipani noko tangka rachakgipa an chuonge chana manenga. Anga iano okkrie sinasienga. Anga Apani nokchina regen."

Bakbakan ua pante nokchina rechakataha. Ua sina aro okkriachim. Ua bara surirangko ganachim aro rongtaljachim. Indiba ua reangmitingon pagipani gimin chanchiaha. Ua nokko watani na aro tangka gimikko koros kaanina kratchaaha. Ua maiko dakmanaha uni gimin dukko manbeaha.

Angni pagipa angna kasagenma? Anga uko angko depante ine changija nokol saksu ine chanchina agangen. Ua dinga, adimuarigipa sorokko reangnitingo salantion pagipana agangnigipa katako changni chang chanchitaitaiaha. Apa, anga namgijako dakmanaha. Anga duk onga. Anga nangni depante ine mingkuna kra-



jaha. Angko nangni nokol saksa gita chanbo ine ua aganahaha. Uni gimin ua pante antangni nokgitchamona sepangbarora rebaaha. Ua chelengpition uni pagipa uko nengamung aro duk onga mung dake nokona rebaaniko niksoaha. Ua uni depanteke gipag na adimuarigipa sorokko katangaha. Angde! Angde! Anga nangko nokona rimchaksoa ine ua grapaha. Ua uko gipake kudimaha.

Ua pante uni kurangko uina manahaon, ua antangni chanchie ranta kagimin katarangko agantaina abachengaha. Apa, anga namgijako dakaha. Anga kratchaa aro duk onga. Anga nangni depante ine mingkuna krajaha ine ua pagipana aganaha. Indiba ua jeko aganna mangsongaha uko agantokna skangan uni pagipa nokolrangko okamattokaha.

Angni depante rebapilaha. Bakbak nambatgipa cholako rabae uko ganatbo. Uni jakona jakstem aro jaona jakopko ganatbo. Angni depanteke mande raani gita nambatgipa alaniko taribo. Hai anching kusi onga aro katchana, maina angni depante siaha ine chanchiachim, indiba tangpilaha. Ua gimaahachim, indiba manpilaha. Angni kasabegipa depante rebapilaha ine pagipa kusi ongbec aganaha.

NOKSA MESOKANI

Pagipani depanteke rimchaksoani noksako mesokbo. Chanchibo, je uamang noksani gimini uamangni maa paana aganchina, chanchiatbo, tusiani somoio golphoko poraichina aro aganchina. Singbo—Jisu ia golphoko basako aganaha. Ua Isolni gimini maiko skiengachim? Anching namgijako dakahaoba Isol anchingna kasakuengama? Isolni kasaanio aro uni katchaanio dongkamkuna aro gualo dakanina duk mane nambatako dakna skahaon ia golphoko gisik rachina bisarangko gisik raatbo.

Mukosto kana :— 1 John 4:10-11.

Poraibo aro agangrikbo, anching maikai saksa sakgipinna kasaanichi Isolni kasaanio mitelna mana.

Biani :—

Chingni pilakni pagipa Isol, chinga pangman kasagipa ongja ine chinga uia. Chinga onggiya kamko dakon aro ripeng onggiyani bewalo dongon chingaba kusi ongja ukoba uia. Chinga namgijako dakon kratchana aro duk onga dakchakbo. Sakgipinrangko kema kaaniko molmolna chingko dakchakpabo. Iarangko chinga Jisuni bimungo bia. Amen.

JAKNI KAMNI PAL

KASAGIPA PAA

Skigipana :— Ia somoeo bisarangko noksako nie antangtangni katarangchi golpoko agantaiatna dakchakbo. Indiba naa antangan altue agane onnainabe. Maina bisarang nangni agangimin golpoko name knatimahama, uko masiama aro noksako gisik one, chanchie niengama, uarangko uina ska. Singanirangchi bisarangkosan ia golpoko aganatbo.

KAMAO UKO MESOKENGA

Pagipa saksao depante sakgni gnanchim. Jonggipa nokko watangaha. Ua chelgipa songo tangkako koros katokaha. Ua okkriaaha. Ua noktangchi repilna chanchiaha. Anga duk onga aro kratchaa. Anga nanga nangipa depante ongjaha ine ua antangni pagipana aganaha. Pagipa aganaha, "Ang de naa gimaahachim dao manpilaha. Anching kusi onga aro katchana."

Lesson 5

JISU MAIKAI BINA NANGA SKIA

Skiani Jepang :—

Ia bonkamgipa lessono Jisu bianini gimin maiko skiaha uko baisarangko masiatna dakchakna nanga, aro ua antangan biaha ine gisik raatna nanga. Ian Kristianni biani bewalona ranta kaani onga.

Sastroni Bak :— Mati 14:23, Mark 1:25, Luk 6:1228; 11:1-11, 23:34; John 15:16.

Mukosto Kae Jakkalna :— Wat. 10:38, Mati 4:23.

Noksa Mesokani :— Jisu bienga.

Skiani gita git :— "O Gitel Kristian onga ska." Achikni git No. 227.

SKIGIPANI TARISOANI

Mesokgimin sastroni bakrang daalo anchingna golpo aro rokom

gni dake mesokaniko mesokaha. Biani gimin Jisuni skiani aro ua antangan biani somoirangni gimin skiani onga. Ia mesokanirangko bilsni ongenggipa bisarangko uamangni janggi tangani bianichi dalroroanina dakchakna mangsongbatgiparang ongan gimin seokaha. Iarang pilakan anchingna mongsonggipa onga. Sastroni podrang Nama Kata ming brioniko seokaniara Jisuni janggi tanganio biani badita gamchata uko mesoka. Anching uia, Jisu banga somoirangko bianina jakkalbataha.

Ua bina gita abrirangona reangaha aro walgimik ua Isolo biaha. Luk 6:12. Pringwalo sengna skang ua chakate sikdikdik biapo bina reangaha aro uano ua biaha. Mark 1:35.

Bianini gimin Jisu mamungkoba aganjahaoba, Bianian uni janggi tanganio mongsongbatgipa dalnikani ongachim ine serikaniko uina manaigenchiin. Ua chubatgipa dakna nangani gita uko donaha. Ukon uni sninggiparang antangtangna skichina uo molmolna skataha.

"Gitel chingna bina skibo." Luk 11:11.

GOLPONI ABACHENGANI

Banga Robibar salrangna anching Jisuko Skigipa ine skie raenga. Sawa noksa kingsako amna mangen? Uan anchingko Jisuni manderangna skiran biap damsako gisik raata. Uni skiram gipin biapko naa gisik raama? Sawa uni dakanichi Jisu skironga ine mesokgipa noksako nika?

GOLPO AGANANI

CHINGNA BINA SKIBO

Salsao Jisu aro uni ripengrang damsan dongmitingo, uamangoni saksa una aganaha, "Skigipa chingna bina skibo. Unon ua Dalgipa Skigipa uni dingtangmancha ripeng sakgnina aganaha. Nasimang bion aganbo. (Luk 11:2b-4) ko poraibo. Anching uko Gitelni biani ine minga. Jisu aganaha, "Anchingni bianirang uni biani gita ongode uarangan Isolko kusi ongata."

Sal gipino Jisu uni ripengrangna aganaha, "Anching Isolo bion anchingko mitchigipa aro saknaatgiparangko kema kana nanga." (Mark 11:25) ko poraibo. Jisu skiaha, jerangan chol gri aro duk mangiparangnaba bina nanga.

Nasimangna kasinggijagipa manderangko kema kabo aro bichakbo ine Dalgipa Skigipa anchingna aganaijaha. Ua antangni skiani gita janggi tangaha. Uni janggi tangani bonkamgipa salo

uni bobilrang una kasaninggija mitchion Jisu uamangna ia kata-rango biaha, "Apa, uamangko kema kabo, maina uamang maiko dakenga uko uija".

Jisu anchingni nangbatgipa bosturangni giminsan bina nangja, indiba sakgipinrangni nanganirangnaba bina nanga ine anchingna bina skiaha. Ua anchingni Pagipa Isol nambatsranggiparango uni bisarangna onna aro nambatsranggiparang onatna manna ska, ine uiaha. Isol anchingna aro sakgipinrangna nangbatgipa bianirangko knachaka ine skiaha.

Changgipino Dalgipa Skigipa uni dingtangmancha ripeng sakchigni baksa agangrikmitingo, ua aganha, "Nasimang jeko Pagipao angni bimungo bigen. Ua uko nangna ongen." Ian anchingni Jisuni bimungo biani onga. Anching Jisu gita, anchingni bobilrangko kema kaode aro uni ska aro namnikarang gita antangtangna aro sakgipinrangna biode, Isol anchingni bianirangko ongen ine anching uia. Jisu Pagipa Isolo bangako anchingna biaha. Anching uarangko Sastroo poraina mana. Ua saksan abriona doange antangan birongachim. Basakoba ua antangni ripengrangko rimbite abriona bina reangachim. Pringsao sal nana skang ua sikdikdikgipa biapchi reange biaha. Changsao Jisu mongsongbatgipa kam mingsako salgipino dakna nangun ua abriona reange walgimik Isolo bichaaha. Indake ruute uni Pagipa Isol baksa agangrikani jamano ua sakchigni ripengrangko seokaha. Iamangkon ua uni kamo dakchakna, chongmotan skianio, aganprakanio, ansengatanio aro dakchakaniona skie tariaha.

NOKSA MESOKANI

Jisu Isolo biani noksako mesokbo. Hai anching uni Isolo biani somoirangni gimin chanchina. Hai anching uni Isolo biani cholrangni ginin skiako gisik rana joton kana.

Mukosto kaani :— "Nazarethoni Jisu namako dake reroroachim." Wat. 10:38. "Ua Galilini pilak biapchin skie, aganprake aro sagiparango ansengate reroroachim." Mat. 4:23.

Biani :— Isol nangni pilak namgipa onanirangna nangko mitela. Nangni kasaani aro kasae dakaniko onanina, Jisu chingni skigipa, dakchakgipa aro ripeng onganinaba nangko mitela.

JAKNI KAM

Bisa saksani Isolo biani noksako rong nongbo, ba Isolo bienggipa bisa saksako slateo ba lekao salbo.

Lesson 6

ISOL ANCHINGNA UNI NITOBEE DAKGIMINRANGCHI AGANA

Skiani Jepang :—

Ia tomanion uamangni agilsako nitobee nikenggiparangan Isolni dalgiminrang onga ine bisarangna uiataniko ona. Ian uamangko sam, bol, bijakrangni ritimkario Isolni gital janggi tanganiko onanina namnikpaaniko kusi onge mesokna dakchakani onngen.

Sastroni Bak :— Aganprakgipa 3:11a; Solomonni Ringanirang 2:11-13a; Mati 6:25-30; "Somoitango pilakan nitoaniko ona." Mark 11:1-11; "Skanggipa Palm Sunday (Robibar Sal)."

Mukosto Kae Jakkalna :— Aganprakgipa 3:11.

Noksa Mesokani :— Bolrang, pulrang, doorang aro mepliprang.

Bosturangko Mesokani :— Bimik nabaanirang, pulni manchoka-nirang, sambolrang aro bitchrirang.

Skiani gita git :— No. 58.

SKIGIPANI TARISOANI

Palestine asongo sam bol bijakrangni ritimkari onganiko Sastroni biap dam gitam dingtang dingtang bakaniko poraina mana.

Solomonni Ringanian Sastroni bako nambatsranggipa bak onga. Basakoba basakoba Solomonni nambatsranggipa ringanikon "Gitrangni Git" aro "Poido" ine minga. Ia podrangan segipani Palestine asongo ritimkarini nitoaniko mesokna seokgimin onga.

Palestine asongo bilsu kari ongani, bilsio chang gnisan ongaia. Apriloni Septemberona Arankari aro Octoberoni Marchona Wachikari onga. Wachikari bonangani aro Arankarini abachengani gisepe banggija dinggipa somoirango burungni bibalrang nitoe bala. April jao bibalrang balani somoi bonaha.

Palestineo rokom ritchasamang dongkamgipa doorang donga. Wachio aro sinkario somoi gita dongaigipa doorangan chang gni bangbata. Dokruan somoi gita donggipa doo onga. Uni rebaanian sam bol bijakrangni ritimbaaniko ba bilsu gital ongbaaniko mesoka. Uni mikoani namen dingtangsranga aro uni bewal namen sontol-gipa onga.

Dumbur bol, gipin biteni bolrangni gisepo dintanga. Uni bite bolni bipekrangonisa bibal manchoke bite nange dala. Uni bite gatengchipak kuchoka aro kisangchipak tambinga. Ua minkujana kingking uni bigil tangseka aro uan rinokbea. Abrrirango gadang gadang chogipa draka barirango draka budurang bilsini abachengo bibal bala.

Jisu manderangni nanganirangko aro sinteanirangko nike ua Isolni kasaaniko aro simsakaniko manderangna krabegipa skianirangko onaha.

"Sakoni doorangko nibo, uarang satja, aro raja, aro jamo chimongja; indiba nasimangni salgini Paa uarangna alenga. ... Abao donggipa bibalrang maikai chaa nie chanchibo. Uarang gamja, aro kildingba rikja; indiba anga nasimangna agana, Solo-monba, uni rasong gimikon, iarangoni gesa gitaba nitoe ganja chinjachim." Mati 6:26, 28.

Ua nambegipa katarang, ua somoio Jisuni skiani baksa onga. Skigipa Matini Sea Nama Kata 6:26-30 o segipa bak gimikkon bone poraisrangna nanga, jekon Jisu Skigipa uironggimin bosturangchi Isolni agilsako donggiparangna kasae simsakaniko talatna jakkalaha, chanchibo. Ia skanggipa tomanion Jisuni jakuko jarikna cholko ona.

GOLPONI ABACHENGANI

Bolrangni, doorangni, pulrangni aro mepliprangni noksarangko nibo. Bimikni nabaaniko ba adita bitchirangko ba adita pulni manchokanirangko mesokbo. Isol uarangko dakaha ine uamangna agane masiatbo. Isol anchingna onaha. Uarang nitobegipa onga ine masiatbo. Bol bijakrang ba pulrangko Isolsan dakna mana ine uamangna skibo.

Bimik nabaako mesoke, ianonisa bol ongbaa aro pulni manchokaniko mesokode, ianonisa nitobegipa pulni bibal ongbaa ine tale masiatbo.

Chongipa boloni bimika maikai aani ningo tange dongna mana aro ua chanasiahaon maikai uia; iani gimin anga aiao inmana. Sastroo aganchakani gnan. Nangni Sastrooniko poraibo (Skigipa poraina nanga). Aganprakgipa 3:11a "Ua darangkon karitango nitoe dakaha; aro uamangni katongo dongani salkoba donaha."

Jisuni donggipa Palestine asong sinkarini jamano sam bol bijakrangni ritinkari ba bilsu gitalni somoiba dongachim.

Angni poraimitingo knatimbo. Solomonni Ringani kitaponiko uani gimin anching poraina mana. (Skigipa poraina nanga). Solomonni Ringani 2:11-13a.

Daalni golpoara sam bol bijakrangni ritimkari ba bilsil gitalni somoi agangimin ongachim. Daalo Jisuni Jerusalema Napani (Palm Sunday) onga. Ruutbea bilsirang reangaha, Jisu Palestine asongo dongmitingo, ua Robibar salsao maiko dakahachim uko gisik rana anching iako indine minga.

GOLPO AGANANI

Mark 11:1-11. Jisu aro sninggiparang Jerusalemchi reangengachim. Uan sam bol bijakrangni ritimkari ba bilsil gitalni somoi ongachim. Doorang kusi ongbee ringengachim. Abarang gitchakgipa, rinitgipa aro tangsingipa bibalrangni nitoaniko manachim. Kejur bolrangni bijakrang balwa balani gimin moengachim.

Ua salo Jisu Jerusalemna rebaenga ine manderang knaaha. Uamang pilakan sorok samtangtango chadenge nisoengachim. Jisu uamangoni banga manderangko dakchakaha. Mitamrang saachim, mitamrang kanachim, mitamrang korachim. Jisu uamangko an-sengataha. Uamang uko nikna siktaitaiaha. Banga manderang unbaksa agangrikaha aro uamang indake daktaina mangen ine kadongaha. Bisarangba uno dongpaachim. Jisu uamangni Ripeng ongachim. Ua bakkakan rebagen ine uamang kadongaha.

Bakkakan saksu bisa Uko nambate nikna manna gita bolo gakate chrikaha, "Uake Ua. Ua rebaenga! Jisu rebaenga!"

Bisani mesokatahaon pilakan niataha. Uni Sninggiparang baksa gadani kosako gakate sorok konako rebangenggipaan Jisu ongachim.

Manderang indake ringna abachengaha, "Hojana! Gitelni bimungo rebagipa patia mangipa!" Mitamrang kejur bolni bijakrangko pee uarangko wingwangaha. Mitamrang antangtangni coatrangko oke soroko Jisuni rebaanina ansoaha. Manderang kusi ongbeaha. Uamang baditan Jisuni rebaanina kusi ongahachim uko uamang mesokna skaha. Bisarang kejur bolni cheksirangko aro pulrangko wingwange Jisuko grongna reangaha. Jisu bisarangni Ripeng ongachim. Uamang Una kasaa ine mesokna skaha.

Jisu songjinmaona sepangbaroroahaon, manderang bangroroaha. Bangbata manderangan ringpaaha, "Hojana! Gitelni bimungo rebagipa patia mangipa!"

Uamangni mikkang mangmangon songjinmani cholgugarang aro uarangni nalsa mangmangon salna chingchetenggipa Torom Nok dongachim. Manderang uamangni nitobegipa Torom Nokni gimin aro uamangni kasagimin Jerusalemni gimin rasong chabeaha. Jisu Jerusalema reangtaiengachim. Ruutbea chasongrangna nichaksoenggipa Dilgipara Uan ongachim. Uamang pilnipil gam-

bee chriktaitaie ringaha, "Hojana! Gitelni bimungo rebagipa patia mangipa; paa Daudni rebaenggipa songnok patia mangipa; Chubatao Hojana!"

Ia kusi ongghipa Salan manderangko panganan gisik raatgipa Sal ongachim.

JAKNI KAM

Pulrangni ba doorangni ba bol bijakrangni noksarangko salbo, aro uarangko Easter Sunday (Kristoni chakatpilani) salo pakmao sitee mesokbo.

Lesson 7

UA CHAKATJOK

Skiani Jepang :

Bisarang Jisuni tangchafilani (Easter) salo, Jisu tangenga ine ua salko kusi onge maniani gita uamang Kristian onge Jisuni tangchafilaniko (Easterko) maniano maikai unia orto chongmotko masina mangel indake ia skianichi uamangna masiataniko onna nanga.

Sastroni Bak :—Luk 24:13-35 "Kusi ongan katako Ripeng sakgni knaa."

Mukosto Kae Jakkalna :— Luk 24:35.

Noksa Mesokani :—Emmauso Jisuni meatamko chaani.

Skiani gita git :— No. 58.

SKIGIPANI TARISOANI

Anching Lukni Sea Nama Katao Emmausni golpoko nika. Una agreba Markni Sea Nama Kata 16:12-13 o iani gimin kandike agananikoba nikna mana.

Anchingni dao Jisuni tangchafilanio kusi ongan gita, ua Jisuni tangchafilani salo Sninggiparangna kusi ongan sal ongjachim. Nama Kata king brion "Kena," "Dildil onga," "Kalima," "Grapa," ia katarangkosa seaniko nikgen. Aiao inmanani, beberagijani, dao

gita kusi onganirangkode aganani gri. Bingbranganiko aro kadong-gijaniko kusi ongatgipa mejal atam ongkujana kingkingde ia ong-jachim. Anga kusi ongan baksa ua kusi ongan salko mania.

Josephni barini goprasona reanggiparangoniko Nama Katarangko knakujana kingking mail sniko Emmausona jaachi reanggipa mande sakgni duk ongbeahachim. Jisu uamangko ramao gronghaon, uamang uko nikjana gita, uamangni mikronrang rintipako manaha. Luk 24:16.

Jisu maikai anching baksa pilnipil ongoba, anching Uni sepanganiko uina manja.

Ua ripeng sakgnini agangrikanian, uamang maikai Jisuko banggijasan uiaiaachim ine tale mesokani onga. Jeko ua ripeng sakgni uijachim, Uamang Nazarethni Jisuni gimin indake aganaha.

"Ua Israelko piokgnigipa ine chingade kadongengachim". Luk 24:21.

Uamang jatni Messaiakoba nichaksoengachin. Haida iani gimin-sa uamang ua agital mandea Jisu ongachim ine nikna manjaha.

Uamang songona sokbaahaon, indake seanio agana,

"Ua mikkangchi reangkunaka gita dakaha." Luk 24:28.

Jisu maina iako dakaha? Un baksa ramako rerimgiparangni kasae Una soka chakchina gita didiatna ongachimma? Antangko okamaniko manana agrede Ua Uni ripengrangko draatna siggijani gimin ongachimma? Indake ongnaba gnan. Maina ianon ontisa dakkalakaniko serikanirangoni banggija katchaatgipa serikanisan ongaia.

Ua Kleopasni noko meatamko chana pitako rae mitelahaosa uamang Jisuko uiaha. Indiba rangsan "Ua uamangoni nikgija onga." Luk 24:31.

Uamang beberagiparangni dol baksa ongkujana kingking uamang Jisuko niktaijajok. Uamang ramao onganirangko, jeo "Uamang Uko nikjana gita, uamangni mikronrang rintipako manaha;" aro meatamko chanasio, jeo "Uamangni mikron oako manaha." Uarangko agane, ia gitalgipa katchaaniko uamang bak manpagiparang onga.

Tangenggipa Jisu, anchingni Ripeng aro Dakchakgipa onga ine katchaaniko anching anchingni bisarangnaba onna nanga.

GOLPONI ABACHENGANI

Ia agilsak gimikni Kristianrangna kusi ongbatsranggipa bilsini Sal onga ine aganbo. Jisuni tangchapilani Sal indakgipa kusi ong-gipa Sal onga ine naa chanchiama? (Ia Sal dingtangmancha gisik raani Sal onga). Anching ia Salo Jisuni agilsako dongmit-

ingo Uni janggi tanganiko chanchia, aro Ua tangkuengani gimin anching kusi onga. Anching jeko jeko Jisuni gimin gisik rana nangnika uarangko saksa sakgipinna aganbo. Iaol mai gita onga ine Jisuni aganania aro dakanio manderangna maikai mesokahachim, ua mingantikon bisarangna mesoke onna tarisochina. Jisu kasagipa aro kasachakgipa chanchininggipa aro kema kaninggipa ongani gimin Isolan kasaani Isol onga, uan anchingni gimin sim-saka, anchingni gualanirangna duk manpilon kema kana tarie donggipa onga aro anchingko nambatako dakatna sikkipa onga ine anching uia.

Nasimangni gisepo mitam Jisuni tangchapilani Sal, kusi onggipa Sal onga ine aganaha, maina ia Salon Jisu tangchapilaha. Ian duk ongippa Uni ripengrangna dalbea kusi onganiko rabaaha, jerangan uamangni kasabegipa Dilgipako gimaataha ine chanchiahachim. Ia golpo maikai Jisuni ripeng sakgni Uni tangchapilani skanggipa salo kusi onganirango kusi ongani bakko manpaaha uko agana.

GOLPO AGANANI

RIPENG SAKGNI KUSI ONGANI KATAKO KNAA

Luk 24:13-35. Ia skanggipa Jisuni tangchapilani Robibar sal ongachim. Mande sakgni Jerusalemoni uamangni chongipa song, Emmausona ramako songreangengachim. Uamang golpo kadugaa-hani gimin rama cheloba chelnikjaha, Kleopas aro uni rerimpagipara Jisuni ripengrang ongachim.

"Jisu siaoni dao sal gitam reagaha ine Kleopas duk ongbee aganaha. Sakgipin mande singaha, "Jisuko goppipa barini roongni akol bangbang ongaha aro Jisu tangchaaha ine aganani katarangko anching daalo knaaha!"

"Tarang maikai onga mana?"

Ua sakgni mande agangrikmitingo, sakgipin songregipaba reba-paaha.

Uaba aganaha, "Angnaba aganbo, nasimang maini gimin gisik nangbee agangrikenga?"

Ua ripeng sakgni aiao inmanaha. Iako aganchakgipa Kleopas ongachim. "Uano mai obosta ongaha uarangko uigijagipa maina naa mangmang Jerusalemo ropagipa ba dongpagipa ongaha!"

Ua singaha, "Mai ongachim? Angna aganbo."

Ua mande sakgni Nazarethni Jisuko, Uni kasae kam kae janggi tangani Uni skiani, Uni bobilrangni jako siani gimin aro ua tangchapilaha ine knaani gisik nangbee aganaha.

"Reanggipa banggija salrango Jerusalemo mai aselrang onghachim chinga uija," Kleopas aganaha. Jisu tangchapilaha ine chinga maidake uigen; maina anga aro angni ripengrangba Uko nikkuja ine duk ongbee ua agane bonataha.

Indiba nasimang uina nanga ine agital mande aganaha. Ua aganaha, "Nasimang ia asel onganirangni ortoko uina nanga. Anga iako nasimangna talatnane."

Ua sak gitam ramako reangengon, Kleopas aro uni ripeng agitalni agananiko knatinaha. Ua Sastroo segimin bakranganiko uamangna aganaha, jeo Jisuni rebaani gimin aganachim. Maikai Sastrooni bakrango Jisu agilsako dongmitingo maiko agangenchim aro dakgenchim uarangko ua uamangna agane masiataha. Reanggipa antio mai asel onghachim ua pilakkon agane ontokaha.

Emmausni songona sak gitaman sokahaon agital mande aganaha, "Anga chelbate rena nangkuani gimin, anga renahane." Indiba uni ripeng sakgni aganaha, "Ching baksa dongbo, maina dao atam ongaha aro sal bangjajok."

Uni gimin agital mande uni ripeng sakgni baksa uamangni nokona reangaha. Meatamko tariaha. Uamang chana asongaha. Agital mande uni jako pitani talako raaha. Ua una Isolni patianiko biaha. Talaoni rutiko chonchone petongtonge ua sakgipinna onaha. (Meatamko chaani noksako mesokbo).

Unon ripeng sakgni uamangni sokgipara Jisuan ongachim ine uiaha. Uamang kata mingsako agansrapgijan Jisu reangaha.

"Mamungchiba anchingni katongrangko jajrengatjawa ine anchingna agital mande ramao aganaha," ine Kleopas aganaha.

Somoi gimikon Jisu anching baksa ongachim ine uni ripeng aganaha. Anching uko uija! Anching Uko nikaha aro Un baksa anggrikaha!.

Rebabo, anching rena hai ine Kleopas aganaha. Anching ia Kusi onгани Katakao aganskana nangchongmota!

Jisu tangchapilaha! Chinga antangtangan Uko nikjok!

Uni gimin ua ripeng sakgni Jerusalemona gongrake repilangaha. Kusi onganian gape reangahani gimin uamang ruutgijan Jerusalemona sokaha, aro Jisuni ripengrang bano donge tomdakengachim ua nokona sorok joljol srik srik reangaha. Uamang napangaha.

Chinga Jisuko nikaha ine ripeng sakgni aganaha. Chinga nasimangna aganna rebapilaha. Uamang Emmausona reangmitingo ramao mai onganirang onghachim aro Uni pitako pee patiahaon uamang maikai Uko uiaha uko aganaha. Ching baksa repagipaan Jisu ongachim! Ching baksa chaanio dongpagipa Jisu antangan ongachim ine uamang kusi ongbee aganaha. Anchingni ripeng Jisu sikuja. Ua tangenga! Chinga nasimangna aganna chelbea.

ramako rebapilaha. Jisu tangenga ine chinga nasimangna uiatna skaha. Ua tangchapilaha.

Golponi Jamano :—

Jisuni tangchapilani Salan (Easter) Jisuni ripengrangna ba Kristianrangna kusi ongbeani Sal onga, maina Jisu ua Salni Pringo tangchaaha. Sastroo golponi bonachibara, Kristoni tangchapilani somoian (Easter) kusi onгани katako ona ine kata ming gitamko naa knaaha. Ua katarang iarang, "Beben, Gitel tangchapilaha." Luk 24:34. Hai anching ia katarangko apsan mingna. Jisu tangchapilaha ine anching uiahani gimin anching kusi ongbea. Ua daalo anchingni Ripeng aro Dakchakgipa onga.

JAKNI KAM

Anching Jisuko maidake chanchia uko noksa salna aro Jisu tangchapilaha ine sena hai, aro anchingni noksa salgiminko daalo Sunday Schoolona rebagijagiparangna anching onna hai.

Lesson 8

ESTERO KUSI ONGANIKO AGANKSAANI

Skiani Jepang :—

Eastero anchingni kusi onganian anching gipinrang baksa kusi ongrinaniko daka, jeon Jisuba antangni ripengrangko kusi ongchina geetaha. Ia tomanio bisarangni Nana Katako aganskana skaniko batroroatgen ba dakchakgen.

Sastroni Bak :— Luk 24:33-47; John 20:20-21. "Nama Katako Aganskaani."

Mukosto Kae Jakkalna :—John 20:20.

Skiani gita git :—No. 58 aro Achikni Ringani Git No. 227.

SKIGIPANI TARISOANI

Ia antini golpo reanggipa Robibaro agangipa golponi matchot-gijagipa onga. Anching Emmauso onganirangko Sastroo seaniko

poraina, "Unon uamang mikron oako manaha, aro uamang Uko uiaha, unon uamangoni Ua nikgija ongaha. Luk 24:31.

Saksa golpo segipa anchingni uiani gita apsanke seaha. Jensalo anching antangtangna aro Mondolitangtangna Jisuko dongatna chanchie joton kaa, unon Ua anchingoni nikgija onga. Kleopas aro uni ripeng uamang gipin ripengrangrangko uamang Jisuko niktaina skangan uamang tangchapilaha Gitel baksa Eastero rerimani aro agangrikrimani katako uiatapana mangen.

Iarangko uamang aganmitingo, Jisu antangan uamangni jatchio chedenge uamangna inaha. Luk 24:36.

Jisuni Sninggiparang Kleopasni Emmauso onganirangko aganoba aro uni ripeng Jisuni skanggipa agana katarangko nike knamanaha ine aganoba bebe rakujaengachim. Luk 24:38.

Emmausni ramako rerimanian aro Jerusalemo tomanio donganian orto gnanggipa onga, maina Jisu antangni siani aro tangchapilania maikai Sastroo agangimin gita chusokaha ine antangko jarikgiparangna mesokna aro uiatna dakchakaha. Jisu Niam Gitchamo agangimin Katarangkoba aganaha. Anching Uko uichongmotna skode anching uko poraina nanga.

GOLPONI ABACHENGANI

Pilakan nikna manna gita Emmauso meatam chaaniko noksako mesokbo. Ia noksako saksa noksa salna changbegipa sale rong nongaha, jedakode ua anchingni reanggipa Robibaro knagimin Easterni golponi bakko agangen (Ian Jisuni ripeng sakgnini noko donganiko mesoka). Ua golponi badia bakko agana? Anching dikdiksana agangrikgija noksachiko nigenma?

Bisarangko gisik nangatna gita didiatbo aro mainiba gimin gisik nangengode uamangna aganbo. Gipin uina nanganirangko agandapbo, jedakode bisarang noksako nike Eastero kusi onganiko namnikpae dakchakaniko uamangna chanchina ongen.

GOLPO AGANANI

NAMA KATAKO AGANSKAANI

Luk 24:33-47

Ian skanggipa Easter atam ongachim. Jisuni banga ripengrangan Jerusalemini nok gesani kuturi gesao apsan tomdake dongengachim. Uamang Jisuni gimin agangrikengachim.

Jisuko uni bobilrangchi sootaoni sal gitam reangaha ine uamang

aganahachim. Beben anchingoni mitam Ua tangchapilaha ine agana. Indiba iarangko bebe rana namen nengbeani onga.

Kleopas aro uni ripengrangba uano dongpaachim. Uamang Jisuni ripengrangna uamangni Emmausona regipa ramao ongarangko aganaha. Ua ching baksa ramao rerimaha aro agangrikaha ine uamang aganaha. Indiba chinga Uni pitako pee Isolni patianiko bikujana kingking Uko uijachim.

Kleopas aro uni ripeng uamangni kusi ongani katako gipinrangna agana matchotahaon, Jisu antangan ua kuturiona napbaaha. Uni ripengrangni jatchio chadenge Ua aganaha, "Nasimangna tomtom ongchina." Uni orto, uamang duk ongjachina aro jajrengjachina ine mangsongachim.

Jisuni ripengrang aiao inmanaha. Uni gimin uamang maidakode ian uamangni Dilgipa chongmot, Jisu ine uina manna gita ua aganaha, "Angni jakrangko aro jaarangko nibo, anga antangan onga. Angko rimdape nibo, angan ongchongmota."

Unon Sninggiparang uamangni Gitelko nikahaon kusi ongbeaha. Jisu uamangni kusi ongbeako nikahaon, Nasimangna tomtom ongchina ine agantaiaha. Jisu antangni ripengrangko Uni tangchapilani Nama Katarangko sakgipinrangna aganskachina nangnike, Jisu uamangna aganaha, "Pagipa angko watataha gita, angaba nasimangko watata."

Uni gimin Jisuni ripengrang Jisuni gimin aganna aro Jisu tangchapilaha aro jringjrotna tanga ine aganskana pilakchinan uamang rena nanga ine uiaha.

Biani :—

Sakprakprakan maikai Jisuni golpoko aro Eastero kusi onganiko aganskaanio bakko rae dakna mangan, uani gimin Isolni dakchakaniko manna bichina.

JAKNI KAM

Saoba Sagipa saksako nina tik kabo. Git No. 58 aro "O Gitel Kristian onгна ska" ko ringna joton kabo. Emmauso meatam chaani noksani gimin agangrikbo aro maikai sagipa mandena ba Kristian onggiagipa nokna agangenchim, uko taribo. Bisarang Jisuni gimin uamang maiko uia uko aganskachina skie rana nanga.

NEPAL ASONG

Skigiparangna :—

Nepal asong Indiani salgrochipak donga. Uko daldalgipa abri-rangchim duulsrangnasia. Uni bimang England asongni bimang

dalani gita onga. Uano lak 85 manderang gnang. Ia asongo gitel Gautama, Buddha atchiahachim. Ian gitchambegipa asong onga. Uno donggipa manderang Hindu ba Buddhist toromko raa. Gipin asong gesaba Nepal asongko amkuja. Nepal asongo je biapoba agre dingja.

Agilsak gimiko uko uamangni mite nok pagodarangni gimin mingsinga. Gipin asongrang, Nepal asongko jarikpac pagodarangko jakkala.

Nepal asongo banga dikbegipa burung bolgrimrang gnang aro manderang uamangni nokrangko rikna bolrangko aro nokkingrang-namangba bolplengrangkon jakkala, aro uamangni kelkirangna aina ba gipin bosturangko jakkalani pal bolko nitobee konggiminkon jakkala. Uamang uamangni nokrangko bolko nitoe solgimin konggiminrangchin nitoata.

Mamanti banga rokomni biteni bolrangan Nepal asongo chaa. Agilsak gimikni gisepo nambatsranggipa merongko ba miko Nepal asongoniko watata. Uamang bangbea merakurangkoa gea. Bangbea mesrang aro dobokrangkoa uano donggipa manderang jila. Uamang banga gana chinanirangkoa daka, aro uamangni noktangrangko jakstemrang, jaksanrang, nachilo gananirang aro gipinrangko mongma wagamonikoba daka. Bolko sole, repe, kongge banga rokomni chonggipa bakosrangko nitoatna jakkala.

Nepal asongni manderang git aro chrokaniko nainnika aro dalnika. Uano banga dingtang dingtang rokomni rong gnanggipa gana chinanirangko abrini dingtang dingtang bakrangko donggipa manderang jakkalronga. Uamang uamangni merakuni abarango kam kamitingo ba uamangni mesrang aro dobokrangko nirikmitingo git ringani aro chrokanian uamangni gisikko kusi ongatani aro katchaataniko manani ongachim.

Banga brigimin manderang aro panterang sinkarini bangbata salrangon sikar kaanio reatachim. Uano banga matcharang, mongmarang, matchokrang, burungni matmarang aro wakburungrangba gnang.

Nepal asongo chibimarang, wari, chibolrang aro chiringrangba banga. Mitam songrangde natok rimanichin janggi tanga.

Uano banga rokomni rokom nitogipa doorangba gnang. Uan ia banga nitogipa doorangni gimin mingsinganiko mangipa ongachim, je U.S.A. ni Chicagoni itihaso sigiminrangko donramni skotonggipa nokni manderang knae, 1949 bilsio Dr. Flemingko Nepal asongona reange, ua doorangoni mitamko chimongchina molmolaha. Dr. Fleming Kristian Missionary onge Woodstock schoolni Headmasterni kamko kaengachim. Ua samrangni Missionary Doctor saksako antang baksa rimangaha. Uamang mail

300 chelako jaachi reangaha aro ua doctor Dr. Flemingni doorangko nikanina bate banga sagipa manderangkon uano nikaaha. Uamangni mikronrang Nepal asongo samrangni gimin dakchakna nangbeaniko nikna oatako manaha.

Bilsil gini jamano Dr. Flemingni jikgipa, jean samrangni doctor ongachim uan un baksa Nepal asongona reangpaaha. Uamang sakgipin Missionary doctor saksakoba antangtang baksa rimangchapaha. Anti chikungna uamang songsaoni songsaona reroroaha aro 1500 mang sagipa manderang ua somoimitingo uamangona rebaaha.

Banga samni bidingo doctorrangni dakchakaniko nangchongmotaniko Nepalni Sorkarina bate uichongmote Dr. Fleming aro uni jik Nepal asongni Sorkarina dakchakani onanirangko onpachina seaha. Bilsil gipino uko onchina hukumko manahachim. Indake nangrimgrikgin Mission 1953 bilsio Nepal asongo abachengataha. Ia msangsoagani National Christian Councilni ningo donggipa pilak mondolirangnan ongachim. Anching Baptistrangba ia kamo C.B.C.N.E.I. gita bakko rapana abachengenga. Jatangni ba asongtangni manderang mangmangkosan uano aganprakna onaiachim, asongtangni manderangan Nepal asongo Kristian gilja nok tesako rikna abachengaienga.

Ia nangrimgrikgin Mission, 1957 bilsio skanggipa schoolko kulichengaha. Dao uano sak 150 mea bisarang napaha.

1958 bilsio mechik bisarangna schoolko kuliaha aro seani gita uano sak 100 mechik bisarang bimung seako manaha. Ia gegnisan Nepal asongo Kristian school ongaienga. Asongtangni manderangan prochar kana aro asongtangni manderangko napbolatna aro Nepal asongni manderangna Kristoko rabana jako rana manaia.

Nepal asongna nangrimgrikgin Missionni mongsongbatgipa kamara samni biding kamosan ongbatachim. Uano Mission hospital gegitam aro gesa sananiko skiani nok gnang.

Jamanchigipa golporangko chapa kaenga maidakode Achik Skigiparang aro bisarang ia kamo C.B.C.N.E.I. baksa nangrimpaanichi bakko rapana nanganiko masibatna mangen. Indake dakanichi anching Baptist mondolirangba Nepal asongna dakchakanio dakrimpagiparang onga mangen.

Lesson 9

NAMA KATAKO ONSKAANI

Skiani Jepang :—

Isolni kasaani aro simsakaniara je biapo donggipa manderangkoba mangopa ine uiatna dakchakna nanga. Africao, Nepalo aroba India aro je asong ba biapo donggipa manderangkoba. Dao uamang Nepal asongo donggenggipa manderang baksaba gitalgipa ripeng onganiko uina nanga.

Sastroni Bak :— Wata. 8:26-28. "Philip Nama Katako Onskapaa."

Mukosto Kae Jakkalna :— Mark 16:15. "Agilsak gimikona reange nama katako aganprakbo."

Noksa Mesokani :— "Philip aro Ethiopiani made."

Skiani gita git :—No. 25.

SKIGIPANI TARISOANI

Primary bisarang, pilak manderangan Isolni onga ine skianiko manna nanga Ua sakantikon antangko uiatna ska.

Philip Jihudi mande ongachim. Indiba ua Samariarangona reange, uamangna Kristoni gimin skiaha. Samariarang Jihudirangni bobil ongachim indiba Philip uamangko Kristoona rimbana nanga ine beberaaha. Wata. 8:5-8. Gisikni dilaniko mane ua uamangni gisepo inditan name kam kaaha je ua manderangni gisikni nanganirangna dangdike onna amgipa ongaha. Wata. 8:12 ko nibo.

Philip Jerusalemni ramako reangchina gisikchi dilanganiko mane uano Africani mande saksako Kristoko uiatna dakchakna manaha. Indake Nama Kata agilsak gimikona giprroangna abachengaha.

Philip aro Ethiopiani mandeni golpoara kandikbegipa onganigimin Nepali bisa saksani gimin golpoko aganna somoi donggen.

GOLPONI ABACHENGANI

Anchingni Bibleo mande saksani gimin golpo gnan, jean Kristian ongchenggiparangoni saksani ongachim. Ua Jisuni rebaani

Nama Katako, antangni onggi jagipa asong gipinni mande saksana bak onpaaha. Ua mandeni gimin angni aganmitingo knatimbo.

GOLPO AGANANI

Philip Jisuni ripeng saksa ongachim. Pilak je mandeba Jisuni gimin uina nanga ine ua uiaha.

Salsao ua Jerusalem songjinmaoni rama dilsako reangengachim. Ua nichaoe, gurerangchi salgipa chaka gegni gnanggipa gesa gari-ni antangchipak salbaengako nikaha.

Saoba rebaenga ine Philip chanchiaha. Ua name niahaon, ua bigil gisimgipa mande saksa onga ine ua nikaha. Uan Africaoni Ethiopiani mande saksa ongnaba donga ine Philip chanchiaha.

Ua mande maikoba poraiengachim. Anga aiao inmana, uara torom nokona reangenba Bibleni kitaprangoni kingsako rabaahama? Ua uko poraina manama? Ua angchiko nijaenga gita nika, indiba ua sepangona sokahaon, anga una dakchakna mangelma ine Philip aiao inmane chanchiaha.

Unon Isol Philipna uni gisikchi aganaha, "Anga ia agital mandeko dakchakna joton kagen," Philip chanchiaha, Uni bigil gisimgipa ongoba aro uni ganding chinding angoni dingtangoba indiba anga beberaa Isol pilak manderangnan kasagipa, angko una dakchakatna ska."

Uni gimin Philip rot garini sepangona reange singaha, "Ripeng, naara nangni poraiengako uiaha?"

Mande agital nigitoaha. "Ongja, anga saoba angko dakchakgipako nanga. Naa rebae angni sambao asonge angna talatgenma?" Ua Philipko okamaha.

Unikoa Philip un baksa gakatangpae, Jisuni agilsako janggi tang-anini aro tangchapilani gimin golporangko una aganaha.

"Mairongpile aiao inmangipa golpo! Uara angnaba ongpaa-ma?" ine Ethiopiani mande aganaha.

"Oe, uan nangna aro Isolni agilsako donggipa pilak jat aro madrangnan onga," ine Philip aganchakaha. "Maina Isol agilsakna inditan kasaaha, Ua antangni saksa kamkam depantekon onjok, maikai uo beberagipa sakantian gimagija jringjrotni janggi-ko mangel."

Oh, angaba Jisuni ripeng onga ska. Angaba Kristian ongpaa ska. Angaba Uni tangani gita tangna joton kagen. Anga uni pilak geetanirangko manigen ine Ethiopiani mande aganaha.

Uochachan uamang badiaba chiona sokbaaha aro ua mande antangko napbolatchina Philipko molmolaha. Philip iako dakna kusi ongachim. Indaken ua Ethiopiani mandeko napbolataha.

Ethiopiani mande antangni ramako reangmitingo kusi ongbeaha.

NOKSA MESOKANI

Philip aro Ethiopiani mandeni noksako mesokbo. Bisarang noksaona rebae talatchina.

GOLPONI JAMANO

Garó Hillsoni agre chelgija asongo, Nepal asong donga. Uano Achik maderangna bateba namen bangbatbea Nepali manderang gnang. Uamang Jisuni aro Uni kasaanini gimin uijachim. Uamangba Ethiopiani mande gita, je baksa Philip agangrikahachim ugitan onga. Uamangoni mitamrangde Jisuni gimin uina sikgenchim indiba uano uamangna aganna gita banggija manderangsan dongaiachim. Indiani mitam Kristianrang Jisuni gimin uamangna aganna Missionaryrang gita reangenga.

DAKE MESOKANI

Mikkang Robibaro anching Nepal asongo donggipa manderangni gimin aro uamang maikai Jisuni kasaaniko nikna mangan indake dakchakengani gimin maiba skianiko mangan.

Mea bisa saksa rebae rot gario asonga dake Bibleko poraienga dakchina. Sakgipin bisa rebae roto asonga dakgipa bisa baksa altugipa katarangchi agangrikchina. Uamang bisarangni manani gita ba uiani gita Ethiopiani mande aro Philip dake, antangtangni katarangchi ua golponi katarang gita agangrikchina.

Lesson 10

NEPAL ASONGO MEA ARO MECHIK BISARANG SCHOOLONA REANI

Skiani Jepang :—

Ia lesson Nepali bisarangba Garó Hillso donggipa bisarang gitan Kristian schoolrangko nangenga ine bisarangko masiatna onga.

Ghik Rastani Golpo :—Luk 2:52. "Nazaretho Schoolchi Reani."

Mukosto Kae Jakkalna :—Mark 16:15, John 20:21.

Noksa Mesokani :—“Gilja Nokni School.”

Skiani gita git :—No. 25.

SKIGIPANI TARISOANI

Ia kitapni lesson 33 gipao, Nazaretho Jisu mea bisa onge schoolchi reani golpoko naa nikna mangel. Daalo naa ua lesson “Skigipani Tarisoani” ingipako poraibo indiba ua gitan skina nangjawa. Naa uko poraimanon Jisu maikai mea bisa onge schoolona reangaha uani gimin chanchibo. Ua Isolni gimin aro uni niamrangni gimin skie raaha. Jisuni mea bisa ongmitingo schoolona reangani noksako daalo mesoke naa chanchiatna nanga jedakode Isol antangni bisarang sakprakkon Jisu bisa gita namao dalrroatna ska ine uamangko masiatna mangel. Luk 2:25 o anching poraia, “Jisu uamano, bilsio aro una Isolni aro mandeni kasaanio batroraaha.”

“Agimikona reange Nama Katoko aganprakebo.” Ia katani gimin Kristian mondoli dakrimpaaniko chanchie nina nangchongmota. Aro Nepal asongba agilsakni bak ba asong damsang onga jeona anching reangna nanga.

GOLPONI ABACHENGANI

Jisu Nazarethni schoolo poraimitingni noksako mesokbo. Ia noksao Jisu maiko dakenga? Uni songtangni bisarangba salanti schoolchi rea. Mai noko uamang school kaaha? Sawa uamangni skigipa ongachim? Mai kitaprangko jakkalaha? Jisu aro uni songtangni bisarangba Isolni kasaanini gimin salanti schoolo uibana manaha. Uamang Isolni niamrangkoba uibana manaha. Nasimangba noktango aro Sunday Schoolo uamang gita skianiko manenga.

Agilsakni asongrangni je biapoba, Isolni manderang Uni aro uni kasaanini gimin skianiko manchina Isolni ska aro namnikani onga.

Garo Hillsoni chelgipa, indiba agre chelgijao. Nepal asong minggipa asong damsang gnang. Garo Hillso donggipa manderangna bate Nepal asong donggipa manderang namen bangbatbea. Uamangoni bangbatarangan mamung saloba Jisuni gimin knapakujachim. Jisu uamangni kasagipa Ripeng ineba uamang uipaja. Ua uamangnaba kasara ine uamang uikuja. India asongoni Kristianrang Nepal asongona reangna abachengenga. Aro uano anchingni Ripeng Jisuni gimin skie rachina mea aro mechik bisarangna schoolrangko kulienga. Daalo anching Nepalni songjinma

damsao mechik bisarangna kulichenggipa Kristian School gesani gimin skianiko mannasienga.

GOLPO AGANANI

Teng, Teng, Teng, Sorkari schoolni kontako dokenga.

Monamaya, nangni adatang Monbahadur gita, nangkoba, anga schoolchi reangatna skachim ine uni magipa aganaha. Indiba songjinmao mechik bisarangna pilakoba biap dongjasrang.

Dongade dongaba ama, indiba anga chanchia naa Mission Schoolona angko reangna onna namnikjawakon ine singani gngang Monamaya aganchakaha.

Anga indakgipa schoolni gimin mamung saloba knakujake; na-ara maikai uani gimin knaaha? Uamanga uano maiko daka aro uara Sorkarini Schooloni maikai dingtanggrik onga? Ua schoolara bano ine magipa singaha.

Busmaya sorok kamachi ongonangaha. Salsao ua gitichamgipa nokona, jeon ruuta somoina mande dongjaengachim, uona ua bat-angaha. Ua mechik bisarangni jakrango kitaprangko rae napang-engako nikaha. Uamang maiko dakenga ine ua uina skaha, uni gimin ua cholguga gita nape reange ua nokona tongtong napang-aha ine Monamaya uni magipana aganaha.

Ua nokoa maia donga aro sawa uko jakkalenga ine magipa uina gisik onaha.

Uano black boardrang, sechakanirang, kuturiantion donga ine Busmaya aganaha. Mechik skigipa saksu rongtalgipa kitap king-saoniko poraiengachim, maina ua "Isol kasaani onga aro anching saksu sakgipinna kasagrikna nanga ine uni aganako ua knaaha. Busmaya darangniba asonggijagipa bangbanggipa biapko mane uano asonge knatimaha. Sorkarini Schoolo dakani gitan uamang kitaprangonikon poraia aro slaterangoba apsan daken sea. Indiba uamang sakprakkon kusi ongkiparang gita nika. Konta dokkuja-na kingking ua sengsoaha, unon skigipa uko schoolchi reama ine singaha.

Uni adatangransan reaia ine Busmaya una aganchakahana.

Ia mechik bisarangni schoolona naa rebana namnikode adita biaprang dongengpiti. Haida nangni ripengrangoni saobaba nang gita schoolo poraina sikgipa dongnaba dongakon ine skigipa una aganaha. Unimgimin Busmaya angko schoolchi rena sikpagenma ine singahachim. Uade jasamancha schoolchi reengaha aro uni adatangrang gitan uaba nokode dongna sikjaha.

Anga nangpa baksa agangrikgen aro ua namnikode naaba knalo schoolchi rena abachengna mangan. Uamang "Isolini kasaani

onga" ine skiode aro naaba sakgipinrangna kasana skie raode, uan pilak Nepalirangni skie rana skenggipa onga ine Monamayani magipa aganchakaha.

Salgipino Monamaya schoolchi reangaha aro uan ua schoolo napgipa sak 100 gipa ongahachim, uon uamang salanti Isolni niamrangko skie raaha.

DAKE MESOKANI

Mechik bisa sakgni aro magipa dakna saksa gimik sakgitam mechik bisarangko rabo. Uamang Monamaya maikai schoolchi reahachim, knagimin golpooni gita sakgipinrangna dake mesokna mangel. Somoi dongode gipinrangba apsan dakangkuna mangel. Manode Nepalini ganding chinding gita bisarang aro magipakoba tariatode bisarangko gisik nangbatatani ongnaba donga. Indiba kasapae kadinganinasa daknabe. Indiba Nepali mechik bisarangni gimin gisiko nange chanchiatani ongchina gitasa dakode nambegen.

Lesson 11

UNI DAKBEWAL GITA ONGACHIM

Skiani Jepang :—

Robibar anti Jisu Isolko olakina reangani gita, pilak je biapo donggipa uni pilak dedrangkon, Isol antangko olakiatna ska. Ua Nepal asongo donggipa manderangkoba antangko olakichina skianiko manna nanga ine miksonga; maina uano banggijasan Uko uia. Pilak bisarang uko olakichina Isolni ska namnikani onga ine masiatna skina nanga.

Sastroni Bak :—Luk 4:16-21, 31-32, 38-44; Reo. 20:8; Deut. 6:4-5; Git. 100:1.

Mukosto Kae Jakkalna :—Git. 86:11 "Angna nangni ramako skie onbo; Anga nangni bebo reruragen," aro John 3:16.

Noksa Mesokani :—Gilja nokni noksarang je rokom nasimango donga. Ba Jihudirangni gilja nok tesako salbo.

Skiani gita git :—No. 6, 7, 8 ba 9.

SKIGIPANI TARISOANI

Daalni golpoara Jisuni gimin Luko mesokanirang gita Jisuni giljachi rerongani dakbewalo pangchaka. Je biapoba Jihudirangni nengtakani sal onga, ua Nazaretho, Kapernaumo ba Palestineni je songjinmaoba ongbo Jisu pangnan giljachi rerongachim. Luk 4:16, 31-32 ona mongsongbate poraibo pod 38 aro 44 koba porai-dapbo.

Daalni Sastroni bakni pilak podrangkon skigipa poraisochengna nanga. Unikoa kosako mesokgimin podrangko skigipachi poraiat-na nanga.

Agilsak gimiko donggipa uni pilak manderangan antangko uichina Isolni skani onga. Git. 100:1. Uni gimin anching Nepal asongo donggipa manderangko Isolko, aro Uni Depante Jisu Kristo, anchingni Jokatgipako uiatna dakchakanio bakko rapana sikgipa ongatna nanga.

Naa Bibleni golpoko aganmitingo golpoo donsogimin Sastroni podrangoniko uamangna poraibo.

GOLPONI ABACHENGANI

Jihudirangni Nengtakani salprakon, jeoba Jisu dongbo, ua gilja kana reangaha. Uani gimin daalo anching chanchinasienga.

GOLPO AGANANI

Jisu Isola mai gita ongachim, uni agananirangchi aro uni antangni onganirangchi manderangna skiaha. Isol antangni dedrangko uni agananirang gita aro uni dakanirang gita tangchina namnika ine ua anchingna skiaha.

Isol antangni dedrangko antio dingtangmancha salsao antangni gimin chanchiatna aro nengtakatna ska ine Jisu uiachim. Bibleo maiko agana knatimbo. (Luk 4:16 ko poraibo. Aro antang dakbewal gita, nengtakani salo ua gilja nokona reangaha). Indakgipa rokomni gilja kaaniona Jisu reangaha. Ua giljao dongmitingo gitrangko ringaha, Bibleoni podrangni katarangko knaaha aro dilgipa Isolo biaha. Unon Bibleko poraigipa mande, uni poraigimin katarangko talatachim.

Basakoba basakoba Jisu dolgimin Bibleoniko poraichina okamako manaha. (Nango dolgimin Sastroni noksa dongode uko mesokbo ba gool gegnio adita rogipa lekako tape, uarangko maikai dole dona aro badala uko mesokbo). Anchingni Niam Gitchamo segimin apsan katarang ua dolgimin Sastorango gnangchim.

Basakoba Jisu uni poraigimin katarangni ortonangko talatchina okamako manaha. Manderang uni katarangko knana namnikahachim. Uni aganani gita uamang darang manderangni aganani-koba knakujachim. Unikoa uamang watgrikani bianiko bie nok-tangtangchi reangaha.

Uni gimin anching uia, Jisu Nengtakani salo pangnan Isolko olakia. Ian Isolni Uni agilsakni manderangoniko, Nepal asongkoba manchape manna kadongsoani onga. Anchingni Bibleo mingsa geetani ba niam gnang (Bibleoniko poraibo). Git. 100:1.

Nepal asongo pante saksas, Kumar minggipa gnangchim, jean uko dakna uipaja. Ua dalgipa songjinmao, jeo saksaba Jisuko aro anchingni salgini Paako uija, uano janggi tanga.

Salsao ua namen bilongbee saaha. Ua ojarangoniko rokomari samrangko raaha indiba ua mamung dakchakanikoba manjahachim. Salsao ripeng saksas agane inaha, anga daosan Kristian hospitalni gimin knaaha. Ua anti charam biapni nalsao donga. Uko mamung gitaba nikja indiba bolrangchi rikgimin dalgipa noksan ongaia. Indiba mitam manderang uanona reangode doctor aro sangiparangba uamangko dakchaka ine anga uia. Uamang mamungsaloba dakchakna jechakja. Je somoioba naa uona reangode uamang nangko sanaigen. Naa sawa onga ukoba uamang chanchijawa. Naa saengode uamang nangko uano done dakchakna joton kaaigen.

Anga Kristianrangni gimin mamungkoba uipajake ine Kumar aganchakaha. Indiba uamang sakgipinrangko dakchakahaode, anga chanchia, uamang angna maiko dakna mana anga reange nigen.

Kumar doctorni name niako manani jamano uan rataniko manna nanggen ine uiaha. Indiba ua hospital gitalsranggipa mangmang ongaiengani gimin ratanina jakkalani bosturangko manpakujachim. Uni uigimin ua dalgipa Kristian hospital gesaona reange, uano rataniko manchina agane onaha.

Kumar indake dakaha. Uan mairongpile namgipa, dalgipa, rongtalgipa hospital ongachim. Salgimik, walgimik doctorrang, sangiparang, uamang nengbeomangba, mamungba chanchigijan sakantikon kusi onge dakchakaiachim. Pring antio uamang katchabee gitrangko ringaha aro rongtalgipa kitaponi katarangko poraiaha. "Isol agilsakna inditan kasaaha, ua antangni saksas kamkam depantekon onjok; maikai uo beberagipa sakanti gimagija jringjrotni janggiko mangen ine uamangni agananiko Kumar knaaha.

Salsao Kristian procharok saksas uni kuturiona rebaaha aro

Kumar uko okamaha. Ia hospitalo sakantian saksu sakgipinko dakchakrikenga aro uamang pangnan kusi onggiparang onga. Uan nangni aganenggipa, ringenggipa Isolni Depanteni gimin ongoode, angaba Uani gimin ska ine ua una aganaha.

Procharok salanti uona rebae, Kumarna Jisuni gimin, uni kasa-gipa Ripeng ongani gimin aro uni Jokatgipaba onga ine aganrong-aha. Ua Jisu agilsako dongmitingo, salgio donggipa anchingni Paa Isolni gimin sakgipinrangna skie reroroaha. Kumar naaba Isolni de saksu onga. Ua Isolan nangko, Antangko uiatna aro uni niamrangko maniatna aro antangko olakiatna skenga ine una aganaha.

Kumar ansengpile Nepal asongo dongenggipa songjinmaona, antangni madrangona reangpilani somoi sokbaaha. Ua mikkang rongchinggipa mande baksa reangaha. Ua, angaba Isolni watatgimin depanteni gimin uia, anga asongtangona uani gimin sakgipinrangna aganskana repilgen ine Kumarna aganachim. Anching Uko olakiram gilja nokko nanggen. Banga dakgnirangba donga. Ia pilakkon Isolna aro angni Jokatgipana dakna anga kusi ongbeenga ine ua agandapangkuaha.

Unon Kumar gilja nok tesako rikna dakchakpaaha. Uni nokni madrangba un baksa indine aganpaachim, "Nangni ramarangko angna skie onbo, O Isol; anga nangni bebeo reruragen."

JAKNI KAM

Gilja nok tesako lekao ba slateo salbo. Ba astechi gilja nok tesako dakna mana. Unikoa git No. 6 ko ringe, gilja nokona kusi onge reangani gita riting dake napangbo. Ongjaoba, anchengni bakoso gilja nok tesako dake, golsrirangchi anchengo mandarangko dake giljachi reangengani gita mesokchina.

Lesson 12

KRISTIANRANG MAIKAI SAGIPAKO DAKCHAKA

Skiani Jepang :—

Jisu sagiparangko dakchakaha gitan anching uni ripengrangba daororoba uamangko dakchakna nanga. Antangtangni songrango ba je biapchiba Kristian dilgiparang rebo anching pilakan ia kamo bakko rapagiparang onga nanga.

Sastroni Bak :— Johan 5:2-9, 13. "Jisu jakoragipa mandeko dakchaka."

Mukosto Kae Jakkalna :— Mati 25:40 "Nasimang angni jong-adarangoni chonbatgipa saksana badita dakaha, angnan dakaha."

Noksa Mesokani :— Jisu jakoragipa mandeko dakchakmitingko aro gipin sagipako dakchakani noksarang aro Missionaryrang aro agilsakni je biapoba manderangni sagiparangko dakchakani noksarang.

Skiani gita git :— No. 115, 42.

SKIGIPANI TARISOANI

Ia antini Bibleni golpoara Jisu sagiparangko dakchake reroroachim ine mesokani onga. Uandake daororoba Kristian dilgiparang skiprakan baksa ansengalnaba nanga. Reanggipa antini golpoo, Jisu uni dangdike onani kamko abachenganio, uni songtang Nazarethni gilja nokona reangaha. Ua somoio uni kam mai ongahachim uani gimin aganaha. Luk 4:18-19 ona poraibo.

Isolni songnokni gimin agilsako aganprakani aro sagiparangko ansengatani damsan rerima. Indakgipa cholchi Jisu janggi tangahachim. "Ua bangbea sagiparangkon ansengatahachim." Mark 1:34.

Uni giminan je biapchi Missionaryrang Jisuni aro uni songnokni gimin aganprakna rea, doctor aro sangiparangba uchin sagipa manderangko dakchakna reangpaa.

Hospitalrango aro dispensaryrango manderang dakchakaniko manahaon uamang Kristianni kasaaniko uibae Kristoko rachakna tarisona mana jean indine aganahachim, "Angan rama aro bebe aro janggi." Johan 14:6.

Nepal asongo Mission kamni abachenganiara hajalni hajal sagipa manderangko dakchakna nangchongmotanini gimin ongaha.

Ua sakgni samni doctorrang Nepal asongona reangon ia nanganiko uiaha. Uamang manderangko dakchakna skaha. Ua skanonisa doctor aro sangiparang dao Nepal asongo dakaha gitan sagiparangko ansengatna dakchakenga.

GOLPONI ABACHENGANI

Daalni Bibleni golpoara, jensalo Kristian doctorrang aro sangiparang uamangko dakchaka manderang ansengpilaniko mana jekon uamang Nepal asongo dakenga. Sagiparangko ansengatani kamchi uamang Jisuni kamko giproroatenga.

GOLPO AGANANI

JISU JAKORAGIPA MANDEKO DAKCHAKA

Jerusalem songjinmao Torom Nokni sepango pokkri damsangnangchim. Uan aningoni chimik nadoaoni ongachim. Pilnipil ua pokkri chi tangdodoe, chimikoni uona gitalgipa chi jokangon pokkrini chiko moatachim. Ua chipakkore moani bakan ua pokkrio auna manchengipaan, ua sagipa ba kanagipa ba jakoragipa ongoba ansengataniko mana ine manderang beberaachim.

Salsao Jisu Torom Nokona reangengachim. Ua pokkriona sokbaon, pokkrini rikamo duule bangbea nangenggipa manderangni sengsoengako nikaha. Uamangoni mitam sagiparang ongachim, mitama kanarangchim aro mitamranga korarang ongachim. Pilakan pokkrini chini moatanina, ansengataniko manna kadonge sengsotokengachim. Pokkriona dakonanggipa jangkini sepango saksaduk mangipa aro dakchakgipa grigipa mande tuachim. Bilsikolatchichetna kingking ua rena manjahachim. Saoba saksauko ua pokkriona salanti rimbaaha indiba pokkrini chi moatako manmitingo uko chio donatna gita uko dakchakpana saksaba un baksa dongpana sikjachim.

Jisu ua jakoragipa mandena duk manchakaha aro uona reangaha. "Naa rerorona namnikgenchimma, angni ripeng? Naa ansenggipa bilakgipa onгна sikgenchimma? "ine Jisu uo singaha.

Jakoragipa mande, uni kosako bangopenggipa kasagipa mikangkanko nigitoaha. Jisu ine uigija ua aganchakaha, "Gitel chikomoatmitingo angko pokkriona donatna gita angko dakchakgiparipeng pilakba gri. Anga uona sokna skangan sakgipin ongonangsoa.

Jisu duk mangipa mandechiko kasae niaha, "Chakatbo, nangni tuchakaniko rae reangbo," ine Jisu aganaha.

Rangsanan ua mande bilakbatako uie uni jaarango chadengaha. Uni tuchakani amko dole uko pakkreo gate reangaha. Ua inditan aiao inmanaha aro kusi ongaha, ua Jisuko mitelmangnaba gual-srangaha gita nika.

Indiba Jisu mitelaniko manna sengsojaha. ansengatako mangipa mandeni mikkango kusi onganiko nikahaon uaba kusi ongpaaha aro mande jinmaona reangpilaha.

NOKSA MESOKANI

Pokkrini rikamo Jisuni jakoragipa mandeko ansengatani noksako mesokbo. Bisa saksa noksaona rebae jakoragipa mandeko mesoke-china. Sakgipin Jisuko, sakgipin pokkriko jeo jokoragipa mande ruuta salrangna tue, dakchakgipana sengsoaha.

GOLPONI JAMANO

Palestineo dakchakaniko manna nangenggipa manderang gitan Nepal asongoba bangbea manderangan donga.

Salsao Nepalni raja songreangaha. Ua uni songnokni banga songranganon reangna skaha, jedakode manderang antangko uina mangan aro uaba uamangko uina mangan.

Song damsao ua bangbea manderangko gureo gakate repakang-engmitingo, uni repakangengako nina bangbea nokrangoni uni nitogipa gureni dongdikako nitimaha.

Raja maina dongdika ine songni mande saksa sakgipin mandeo singaha. Ian chongipa kangalgipa song onga indiba anching uo dakchakaniko bijaha. Saoba saksa uni kusi ongijani gimin uo maikoba biahama? Ua Bishnu Mayachiko niatenga gita nika. Ua nengedikesa rena manaia. Uni jaa samgnian nangchapgrika. Mitam nanderang agana, uni maa paa maiba gualaniko dakaha, uamang antangtangni dakgiminko pangnaba kurachakjaha. Uni gimin miterang uamangna nitogipa demechikko onahaoba indiba uni jaarang gonggegipa ongskaaha.

Anga maiko dakgen ine mechik bisani magipa maamaha. Anga maikai rajako manina mana?

Sal gipinni pringo angko Katmanduona rechakatchina hukumko onaha. Raja, uni songjinmao, jeo Missionaryrang sagipa manderangko ansengatna dakchaka indakgipa biap gnanng ine agana. Uamangni Isol, anchingni isoloni dingtang onga. Ua uamangna

ansengatani bilko ona. Bishnu Mayni bilsi bilsi bri ongahachim. Chinga uko rime reangna nanggen. Uanona reangna sal chet nanggen ine anga uia maina angni mamatang uanona changsa reangmanaha.

Raja una hukumko onahani gimin magipa reangna nangaha. Ua chongipa jonggipa aro dalkalgipa demechikko antang baksa rimangpaaha. Uamang sal chet songrena nanggen ine ua uiachim. Jamano uamang sak brian songjinma dalgipa Katmanduona sokangaha.

"Angni chongipa demechikni jaarangko srongatna ine rajani agangipa Missionni dongram biapara bao?" ine nenggipa, moilarigipa aro okkrigipa magipa, uamangko repakgipa mandeo singaha.

Ia ramakon ongonangbo. Naa dalgipa bolni nokko nikegen; jeo mechikrang bokgipa bararangko gane ichi uchi reruragen. Uan nasimangni nangenggipa nok onga ine mande saksa aganchakaha.

Unon andalahaoba Missionary doctorrang Bishnu Maya, uni magipa, jonggipa aro abitangko nokona rimnapaha. Uamang auchengaha, unikoa uamang miko chaaha aro walgimikon tusiala. Chongipa mechik bisa Bishnu Mayani jaako nitoe srongatna jachet somoi nangahachim. Indita ruute somoiko nangahaoba Isol uamangna dakchakengpitichim, je uko amani ongataha. Isol doctorrang, sangiparang jekoba dakna nanga uko uina uamangko dakchakaha. Uni gimin uamang uko dakchakna manaha.

Dao Bishnu Maya Mission mechikrangni schoolo poraienga. Hospitalo uamang uko dakchakaha maina Isol uamangko Jisu gita reroroe dakchakatna ska aro jerang una kasaa uamangba reroroe indake sakgipinrangko dakchakenga ine ua skianiko manenga.

JAKNI KAM

Slateo, lekao ba anchengo hospital nok tesako sale uano doctor saksa aro sangipa saksako sale mesokbo. Jaa gonggegipa mechik bisakoba salbo. Unikoa ua apsan mechik bisani jaa stronge nampilakoba salbo.

Lesson 13

NAA SAKGIPINRANGNA JEKO DAKA ANGNAN DAKA

Skiani Jepang :—

Nepal asongni ia bonkamgipa golpochi Isolni kasaaniara Nepal asongni manderangkoba mangopa ine chanchiatna dakchakna nanga. Anching Isolna aro sakgipinrangna kasana nanga. Sakgipinrangna dakchakna skaniara anchingni Isolna kasaaniko mesokani onga.

Sastroni Bak :—Mati 22:35-39; Mati 25:40.

Mukosto Kae Jakkalna :—Mati 22:37 “Naa nangni katong gimikchi nangni Gitel Isolna kasabo.” “Nangni songsulnaba antangna gitan kasabo.” Mati 22:39.

Noksa Mesokani :—Jisu kore mandeni jamano sagiparango ansengatani (Kapernaumo jakgitchagigajipa Sal).

Skiani gita git :—Achikni Ringani Git. No. 227.

SKIGIPANI TARISOANI

Mati 25:40 ko ia salni Bibleni golpona jakkalenga. Uano segiinin gita, “Naa sakgipinrangna jeko dakaha, angnan dakaha” Primary bilsu 7 san ongaigipa bisarang iako brigiminrang gita masina amja. Indiba sakantian sakgipinrangko dakchakna nanga inede uamang masina ama. Jisu uko dakaha. Anching uni ripengrangba uko dakna nangchongmota.

Nepal asongo bangbea sagiparang donga aro dakchakani gri onga. Anching Garo Hillso donggipa Kristianrangba dakchakna nanga maikai Nepalirangba ansengatako mangiparang onngen. Iako anching onanirangko one C.B.C.N.E.I. ona watatanichi chusokatna mana. Aro uamangna maiko dakmanaha uani gimin chongmotgipa simsakanichi dakchakna mana. Anching Nepalirangna Jisuo bichakna nanga. Ua uamangko ansengatna aro Isolni kasanini gimin uiatna ska. Uamang Uko aro uni kasaaniko uimano uamangba madrangskarango aro ripengskarango uko uiatna dakchakskana nanga. Indake uamangba sakgipinrangna dakaniara Isolna onga mangan.

GOLPONI ABACHENGANI

Salsao saoba saksa Isolni geetanirangoni dalbatsranggipani gimin Jisuo singahachim. Maina Kristian janggi tanganio minggni dakna nangchongmotgipa kam guang. Angni Bibleoniko poraimitingo uko knatimbo.

Mati 22:35-39 ona poraimanahaon bisarango singbo. Anching Isolna kasaaniko maikai mesokna mana? Anching anchingni song-sulrangna maikai kasana mana? Uamang antangtangan iani gimin maikoba aganchakna mannaba donga. Anching Isolna kasaoda, jedake Jisu anchingna skiaha ua gita dakgen. Aro anching sakgipinrangko dakchakna mangenchim. Mai dakanirangchi uamang dakchakna mangel uamangko aganna onbo.

Anga golpoko aganmiting name knatimbo. Unon nasimang Jisu sakgipinrangko dakchakna maikai dakaha aro Isolna kasaaniko maikai mesokaha uko aganna mangel.

GOLPO AGANANI

Ruutbea bilsirangna skang chonggipa asong Palestineo bangbea kusi onggijanirang dongachim. Banga manderang saachim, ba kana ba kora ongachim. Doctorang dongja, sangiparanga dongja sam onram biaprangba, hospitalrangba dogjasrangchim. Banga duk mangipa manderang sina aro okkriachim. Gipinrang budepa, sikdikdik ripeng gri aro nok gri, jam grichim. Darangba uamangna dakchakgipa grichim. Mitam manderang kusi onggiagiparang ongachim maina uamang antangtangnasan chanchiaigipa, kasinggijagipa aro uamangni songsulrangna dakanirango aro jakkalanirangomangba kakket ongjasrangchim.

Indiba saoba saksa simsakgipa gnangchim. Saoba saksa jean antangni kasaani janggi tanganichi mande jinmako dingtangataha. Sagiparang, kanarang aro korarang uona rebaaha. Ua uamang pilakkon dakchakaha. Kangalrang, nokgrigiparang, budepa, buchumarang, ripeng grigiparang, bara grigiparang aro okkgrigiparang jinma uko duulaha. Chonggipa bisarang Uni jakpongrango rimchaksoako manaha. Gisik ongipa rasong grigiparang aro nitogijagiparangba uni ripeng onganio bak manpaaha. Uni kasaani pilaknan, kasrokatani katarango aro uni kasae dakanirango katchaatako manaha.

Jisu pilak mandenin Ripeng ine manderang aganaha. Ua dakchakgipa Ripeng, ua sakantikong dakchaka. Uan anchingni Jokatgipa onga.

Anchinga Jisu gita onga ska. Anchingba kasaani janggi tanganio tangna ska ine pangnan aganaha. Uni gimin Palestineo

donggipa banga manderangan kusi ongbatahachim. Uamang Jisuni manderango tangna skiaha gitan uamang tangna joton kaaha.

Jisu antangni Pagipa, Isol baksa dongna reangmanahaon, uni ripengrang indine aganaha. Jisuni anchingna donanggimin kamko anching jako raangkugen. Anching pilak biaprangona reange Isolni kasaanini gimin aro Jisuni gimin agangen aro sakgipinrangna onskapagen.

Indake banga bilsirangoni intal daalona kingking bangbea manderang Jisuni gimin aro uni janggi tangani cholni gimin uina manbaaha. Anching anchingni Jisuna kasaaniko maikai mesokna mangen ine banga manderang aganaha. Unon uamang Jisuni skianirangoni mingsako gisik raaha. Angni jongadarangoni chonbatgipa saksana, uandake badita dakaha, angnan dakaha."

Uni gimin manderang sagiparangna simsakna hospitalrangko rikna abachengaha. Uamang budepabegipa aro buchumabegiparangnaba aro ripeng grigipa manderangna machakani nokrangko rikaha. Uamang agilsako saksan watgalako mangipa bisarangna nokrangko daksoaha. Missionaryrang chelbegipa asongrangona aro anchingni asongni banga biaprangona reangmanaha maikai manderangna Isolni kasaaniko uiatna dakchakna mangen aro Jisuni katarangko aganskae manderango uamangni Jokatgipa ine Jisuko rachakatna aro uni tangani cholrango tangatna dakchakna mangen. Aro pangnan uamang ia chelbegipa asongrango dangdike onmitingo ba Americao ba je biapoba nangenggiparangna dakchakanio, uamang Jisuni ia katarangko gisik raa, "Angni ia jongadarangoni chonbatgipa saksana uandake badita dakaha, angnan dakaha."

GOLPONI JAMANO

Manderango dakchakna gita Jisu mairango dakahachim? Missionaryrang Americao, Nepalo aro gipin gipin biaprangno maiko dakenga?

Anchingba Nepali manderango dakchakna mangen. Anching kam kae, dochirangko pale, doorangko pale, ba baritangoni mesurangko pale, tangkarangko mane, Sunday Schoolona rabae, Nepal asongni hospital aro samrangko onram biaprangko dakchakna mana, aro nanga.

JAKNI KAM

Bisarang uamangni tangkako manani cholrangni mingsako salchina jechi uamang tangkako manani cholrangna jakkalna aro Kristian dangdike onaniko Nepal asongo donggipa Sanani biding kamrangna onskapana mangen.

Lesson 14

JISU BAKSA REANI

Skiani Jepang :—

Skanggipa skiani “Jisu baksa Palestinea” ia skianio bisarang Palestineara maikai onga aro maikai ongchongmotengachim uko bisarangko uina dakchaka. Jisuni asongo rejojoanirangko chongmot gita uamangko nikata. Chanchichipe Jisu baksa reaniara bisarangni Una kasaaniko bariata aro Kristianni janggi tanganio Uni kasaaniko talbatatna dakchaka.

Sastroni Bak :— Mark 1:9; 4:1-3; Luk 10:25-37; John 4:3-8; 7:2, 8, 10, 14. “Jisu Baksa aro Uni Ripengrang Baksa Reani.”

Mukosto Kae Jakkalna :— “Nazarethoni Jisu ... namako dake reroroaha.” Watata. 15:38.

Noksa Mesokani :— Jisu antangni Ripengrang Baksa Rero-roani, Jisuko napbolatani, Galili Sagal, Agilsakko, Palestineni bosturang aro Sastroo jakkalanirang.

Skiani gita git :—No. 46.

SKIGIPANI TARISOANI

Sastroni Bak :— Gitelni bilsu gitamo kandike kam kaaniara bangbatan apalosa ongaha. Iano uina mana, donnugimin bilsuara chongmotan Uni Jerusalemona reangchengani aro Uni napbolani gisepgriko donggipa bilsirangara Uni Isol baksa Pagipani agilsako donge nangrimani ongachim. Ianon mande baksa ongteleianini masigrikani, dakchakaniko nanggipa Un baksa duulgipa mande-rangni masina mangipa skianirangko ua chimongaha. Jisu ningtu-bee Isolni kamni gimin manderangna uiatna gita tariaha.

Ua sagalo ringo gakataha aro mande jinma Uni sambao agao, sagal rikamo ongachim. Ua uamangna bange toe agananirangchi agane skiaha aro Uni skiao ua aganaha, “Knabo! satgipa satna reongkataha.” Mark 4:1-3.

Jisuko uinara anching Palestineni chibimarang, chibolrang, abri-rang, sorokrang, songrang aro songjinmarangko uina nanga. Uarangba uni bak ongpaa. Uni janggi tanganiara apalo, agisio, abriini japao ba bario ongachim. Uni skiani aro agangimin golpo-

rangara Uni asongo reroroani aro Galili sagalko nina reangani-rango toe agananirarasa ongaia.

"Balwa jechi ska uchinan bala, aro naa uni gamako knaa, indiba naa basako rebaa aro banona reanga uko uija; indaken gisikoni atchigipa sakantian onga." Johan 3:8.

Johan Napbolatgipa baksa Jisuni gronggrikanio Uni rea rama-kode aganjaha. Jordonni salaram sagal rikam jolrango golpoo jakkalaha maina ua chibimani gimin dingtangmancha ongteleianio gisik nangatani gngang.

Jisu Isolo bina saksan reronggipa biapko Joitun abrina agrede janapa gri. Uanoniko manna nangnikosa janapskaaha.

Jamdapni alaniona Jerusalemchina reaniko minggni aselrangko talatna jakkalaha. Watchangani Alanio Jisu bisani skanggipa Torom Nokona reanganiko talata. Jamdapni Alani ba Torom Tambuni Alanio gee game mangiminrangoniko onpilskaaniko mesokna olakianiko dakaniko manchapa. Ian dakchakaniko nang-giparangna bisarangni chaanirangko rabae mitelpilskaanirangko dakanina nangani uaniko onani onga.

GOLPONI ABACHENGANI

Nasimang bilsil chigni onggipa Jisuni skanggipa Jerusalem Torom Nokona reangako gisik raa. Uni maa paa Mariam aro Joseph baksa Ua maikai songtang Nazarethona reangpilaha ukoba gisik raa. Ruuta bilsirangna Jisu Nazaretho uni madrang baksa donga-ha. Ua ua somoimitingo maiko dakaha Sastroo aganja. Isolni kamna ua somoio tariaha ine chanchichipna mana. Uni dakna mangsonge rebagipa kamko Ua maikai abachengaha uko anga aganna namnika.

Golpo Aganani :—

JISU ARO UNI RIPENGRANG BAKSA REANI

(Mark 1:9; 4:1; Johan 4:3-8; Luk 10:30-37; Johan 7:2, 8, 10, 14.)

Kamao Jisuni kandikgipa golpo ming bonga donga. Uarangko saksan ba nangni classni nanga gita dolo jakkalna mana.

Jisuni dongramoni banga mailrang chelao, badiaba mande saksa Johan minggipa skiengachim. Ia dalgipa aganprakgipako knatimna banga manderang Jordon chibimani rikamona rebaaha.

Anga rena nanga ine Jisu chanchiaha. Ia dalgipa mandeni gisik gnganggipa katarangko knatimna manderang baksa anga rena

nanga. Ian angni janggi tanganio kamni abachengani onga ine ua gisiktango uiaha.

Bakbakan Jisu Nazarethko duule gongge gongdang dakonanggipa ramako reangaha. Ua bakrogipa ramako rechakataha. Ua sal gitam mang rena nanggenchim.

Aditani jamano, Jordon chibimachipak salaramchina sorok mik-kangskaaha. Haida, ua somoion gipin songregiparang Jisu baksa nangrimangpaahakon, anchingba uija.

Anga ua biapona walna skangan sokna nanga ine Jisu chan-chienggenchim. Uano chibima tuaba ongja aro apalaba apalja. Anga chobatna manna nanga ine Jisu chnchiaha.

Jisu name batsotmanahaoara ua walo gipin songregiparang baksa Jordon chibimani rikamo waltuengachim. Pring gipino pringni ua sorok joljol chibimako jarike reangaha.

Jisu rejoljolangmitingo, Jisu Isolni agilsako aiao inmanpilgipa aro nitogipa dakgiminrangni gimin aro uarangko dakgipa Nokgipani antangni dedrangna mangsongsogiminni gimin uni gisiko chanchia nabaaha.

Dao Jisu Jordon chibimani kamachipak sokbaaha. Iano, jeo rama dilgipin naeachim, sagal rikamrang chujachim aro burung dikjachim.

Agisini mande Johanni skiprakaniko banga manderang knati-maha. Nasimangni gualanirangna duk manbo ine ia skiprakgipa aganaha. Nasimang duk manchongmota ine mesokna napbolako manbo. Isolni Depanten rebaanina tarisoba, Uan Rongtalgipa onga.

Johan aganmitingo nigitoa ua Jisuni rebaengako nikaha. Angaba napbolgen ine Jisu aganaha. Johan Uko napbolatahaon, Isolni namnikani ongaha ine Jisu uiaha. Uni dakna nanggni kamko abachengani daon somoi ongaha ine ua uiaha. Ua somoi intalan Jisu Palestineo pilakchin reroroe, skiprkroroe dakchakaniko nang-giparangna dakchakaha.

Nitogipa Galilini sepangon bangen Jisu skiaha. Salsao Jisu ia sagalni anchengarigipa sagal rikamo reroroaha. Bakbakan ua asongaha, haida chibimani rikamo roong dongakon.

Jisu chibolni nitoaniko nie tomtom asonge dongaha. Samgipin-chini chugipa gananggijagipa abrirangko ua niatchengaha aro unon ua chibolni sambachikoba niataha. Saliramchi aro salgro-chipak abri dakonangachim. Chisamo niksenggipa bibalrang aro samsirang chaachim.

Sagal rikamni chiara aina gita chacha grika ine Jisu chanchieng-achim. Indiba chelaode salgi gita tangsime nikachim. Suurich

pindaggimin Hermon abri tangsingipa salgio aro natok rimani gipokgipa chongipa noksarang gita chacha mikronna nina nitoa aro uarangara gualna mangijagipa nikanirang onga.

Ruutgijan manderang Jisu chibolni rikamo onga ine uiaha. Saksa sakgipinna uamang aganrikrikaha, "Gitel chibolni sambao asongenga. Hai anching rena. Isolni gimin bangbate skichina anching uko aganna. Ua anchingna golpoko agannaba donga."

Bakbakan mande jinma Jisuko duulaha. Pilakan knana manna gita Jisu ongonange ringo asongaha. Manderang mitamrang chibolni sambao asongaha aro mitamrang chadengaha. Unon Jisu manderangna skiaha. Uamangni masina mangipa salantini onga kamrangni gimin ua uamangna golporangko aganaha. Indake Dalgipa Skigipa manderangko Isolko uibatna aro maikai salantini janggi tanganio uko kusi ongatna mangan uamangna dakchakaha.

Jisuni janggi tangani bangbata salrangko reatram biapara Galili ongachim. Iano banga ongipa abrirang gnangchim. Jisu abrirangona bina reangrongaha. Uano ua uni mikkangchini asongko niwatrongachim. Saliramchipak chelao sal rongtalode, ua Sagal Dalgipani tangsingipa chiko nikatrongaha. Salgrochipak chelao Hermon Abrini akuchotkoba nikataha. Salgipengchipak abrirangko aro uarangni gisepo songrangko ua nikataha. Salaramchipako nitogipa Galili sagal dongachim.

Isolni ongatgimin agilsako sikdikdiko Jisu saksan Pagipaona sepangbatako masiaha. Jamano ua abri japaona ongonange, uano nengtake antangko bilakataha.

Jisuni reroromitingo unbaksa uni dintangmanchagipa ripengrang repaha. Salsao uamang Palestineni bak Samaria minggipako batsote reangaha. Saljatchio uamang chiakolona rebaaha.

Ua nengaha ine Jisuni ripengrang nike una aganaha, "Skigipa, ia chiakolni sambao asonge nengtakbo. Chinga songjinmaona reange anchingna chaaniko breegen."

Jisu chamgimin roongo asongaha. Bakbakan Samaria mechik saksa aani basingko rae chi kona rebaaha. Chiakoloni chiko ringna onbo ine Jisu ua mechikna aganaha. Uamang agangrikon, Jisu Isolni gimin aro uni dedrangna nama daksogiminni gimin ua mechikna aganaha.

Basakoba basakoba Jisu aro uni ripengrang Jerusalemoni Galiliona reangpilmitingo Jerusalem aro Jerikoni gisepgrikko reangaha. Iakon manderang Jerikoni Rama ine mingachim.

Uan abri aro akongko duulachim. Uan gongge gongdang dake porongronggipa roongrang aro abri giseprangko daksotachim. Dao ua rama daldalgipa dare rongbrakrangni gisepko dakangachim, uatango salan nangjachim. Dao songregiparang chugipa biapona

sokaha. Rangipa sal kamenggipa abrirangko adita mail chelarango-na nikatachim.

Rama ganangjachim. Pangnan sikdikdik ongachim. Janggi tanggipa mamungkoba nikna manbrejachim ine Jisuni ripengrang aganaha. Dokprete ragiparang rongbrakni mitinrango aro rama gonggerango timrongachim. Ia kengnigipa ramako wate apsan gananggipa ramako Jerikoona rena nambata.

Ia kenbegnigipa ramani gimin Jisu gisik rarongaha. Jamano ua aiao inmanpilgipa golpoko uani gimin aganaha. Uan namgipa Samaria mandeni gimin ongachim.

Jisu aro uni ripengrang alaniko manina Jerusalemona reangrongahachim. Basakoba uamang Samaria gita dakgipa sengsotgipa rama gita reaha. Maina mail sotbonga ba sotdokko rena salgni ba sal gitam uamang nangrongachim.

Noksulrang baksa apsan Jisu aro uni ripengrang songrerongaha. Rama bipekrango gitalgipa manderang uamang baksa apsan ongpaaha. Jerusalemo uamang indaken tomdake alaniko dakrongachim.

Pilak chibimarang aro chiringrang ranaha uamang uaragnaba Torom Noko Isolo birongaha.

Jerusalemni cholgugao pilak songregiparang tomdaktokaha. Uamang gitrangko ringesa songjinmaona napangrongachim. Ian gee game mangiminrangna mitelpilkaani ongani gimin manderang mi misi, biterang, mesurang ba paroarangko raangrongachim. Jisu aro uni ripengrangba kusi onge Isolna onanirangko raangrongahachim.

Noksa Mesokani :—

Golpoko aganmitingo noksarangko mesokjolgen.

JAKNI KAM

Golpoo agangiminoniko maiko salna ska bisarango singbo. Gali-lini sagal rikamoni bakko salna skode, uko mingchina. Jedake chibol, sagalrikam, ring, manderang, roongrang, samsi, pulrang, salgi, abrirang ba maiko salna ska mingchina aganbo. Jisu chibolni sambao reroroanikoma, ba sagal rikamo asonganikoma ba ringo gakate skiengakoma? Bisarang sakprakan maiba mingprakkode salna nanggen. Geprakoni Nambatako seoke pilakkon leka kingsao dongope Sunday Schoolni bosturang baksa donate gipin antio uko mesokbo.

Palestineni Noksarangko Salani :—

Golpona kraa noksarangko skangan tarie donsobo. Bisarangko antangtanggriko agangrikate skanggipa changna badia golponi bak salna namgen tik kaatbo. Skanggipa noksana pilakan uamangni changa gita mesokna nanga ine uamangko gisik raatbo. Uamangoniko namnikatangtango agananirangko bibo. Uarangko blackboardo ba leka dalao see rabo.

Haida skanggipa noksa dakanina Jisuni Galili chibimani sambao ongani gimin seoknaba donga. Chibol, sagal rikam, ring, manderang, roongrang, pulrang, bolrang, salgi, abrirang aro chelao donggipa suuriraragipa Hermon Abriko mingnaba donga. Jisu sagal rikamo reako, ba asongako ba ringo gakate skiako mesoknaba donga.

Chuonga gita basena mane noksarangko bisarangni salna skang tableo donbo. Galilini natok rimani ringrang aro Palestineni bararangko gangiparangba dongchapode namgen.

Salako niroke, name salna aro kraa rongrangko nongna dakchakode nama. Sakgni jerangni salarangan nitobatkala aro gisiko nangbatani onga, uarangko skanggipa changna seokbo. Ia sakgni bisarang chalkchi salna abachengon gipinrangba salpaangchina. Mea bisa aro mechik bisarang uamangni salanirangni kri kandikgipa katarangko aganjoljola naba donga. Ia dolni golpoko type kae Robibar chang gipino noksani janggilrangchi tapode nama. Nokchi rena manna gita sakprakni noksarangkon chone bohi koode nama.

Biani :—

Kasagipa Isol, namako dakgipa Jisuna chinga nangko mitela. Uni janggi tanganiko poraina mangipa Sastronaba nangko mitela. Jisu gita ongna, kasana, kasae dakna, gipinrangna dakchakna aro kema kana joton kaon naa chingna dakchakbo. Uni bimungo bia, Amen.

Lesson 15

SOMOIMITINGO PILAKAN NITOGIPA ONGA

Skiani Jepang :—

Ia gnigipa skianio Palestine aro uni samtangtango donggiparangko aro bilsu karirangko Jisu maikai antangni skianio jakkalaha uarangko bisarangko masiatna dakchaka. Ia cholrangchi Jisuko bisarangko masibatatna aro Palestinea chongmotgipa biap ine uina dakchakgen.

Sastroni Bak :— Mati 6:26-33 “Jisu Ritimkario skia.” Mati 13:31-32 “Besual Bitchri.”

Mukosto Kae Jakkalna :— Ua darangkon karitango nitoe dakaha. Aganprak. 5:11.

Noksa Mesokani :— Jisu uni ripengrang baksa reroroani, Jisuni skiani, Jisu abri sepango skiani, Palestineni doorang aro bibalrangni gimin.

Skiani gita git :—No. 46 ago 24.

SKIGIPANI TARISOANI

Sastroni Bak :— Jisu ongtelaianina kasabegipa ongachim. Uni kusikoni “Agilsak Apanin” ingipa git segipani katarang ongkatenggenchim. Ua rongtalgipa dolgimin kitaprangko poraimitingo, uni samtangtango donggiparangni giminba chanchijolenggenchim. Iarang pilakan una Isolni ska aro mangsongani gimin parakenggenchim.

Sastrooniko (Nama Kata) poraie niode Jisuni skianirangoni bangbatan salantio manderangni nikronggimin aro uironggiminrangni giminsan ongbata ine nikna mangan. Dalgipa Skigipani skiani gita dakna skode, anchingba salantio anchingni nikronggenggipa doorang, bibalrang, biterang aro bolrangni gimin aganode nama, maina Isolni aro uni mangsongani gimin indaken uibatatna mangan.

Pilak dakgiminrangan Jisuko uarangko dakgipa Nokgipako gisik raata. Mamungnaba jajrengani grigipa kusi onggipa dodrang Isolni dedrangna kasaaniko uko gisik raatachim.

“Sakoni dodrangko nibo, uarang satja aro raja ba jamo chimong-

ja, indiba nasimangni Salgini Paa uarangna alenga. Nasimang uarangna bate nambatjama?" Mati 6:23.

Jajrenggipana ramasamni Palestineni bibalrang kadimeaniko ona.

"Abani bibalrang maikai chaa, nie chanchibo, uarang satja aro kildingba rikja, indiba anga nasimangna agana, Solomonba uni rasong gimikon iarangoni gesa gita nitoe ganja chinjachim. Isol abani samko indake ganat chinatode, ua nasimangko batesa ganat chinatjagenma?" Mati 6:28-30.

Besual bitchriko songnokni gimin talatna jakkalna joton kaani namgni dongja. Toe skianirangko bilsni ongaigipa bisarang masina nengani onga.

NOKSA MESOKANI

Golpo aganna skangan noksarangko mesokna nanga. Jisuni skimitingko nikatnasigipa noksarangko mesokjolna nanga. Ia noksarango Jisu maiko dakenga? Un salo Jisu maiko manderangna skiaha? Sawa gisik raa?

GOLPONI ABACHENGANI

Ia noksarang Isolni simsakanirangni gimin agana. Apaloniko jakkale skie, Jisu maikai manderangko masibatataha, uko anchingni golpoo agana.

GOLPO AGANANI

RITIMKARIO JISU SKIA

Palestineno adita jaarangna sina. Mikka wae sorokrango chirang gapa aro chiringrangba jokpraka. Pilakan amadipet noktangtango nape dongtokachim.

Namkalmitingo manderang abarangko game aa nomao bitchilrangko sataha. Sosigipa karini gimin uamang kusi ongaha. Arankariona mikkarang aao chasipe aako kasinata. "Chingni manderangde chaanina aro janggi tangani manchanaba sinkarini mikkaosa pangchakaia ine gamgiparang aganaha.

Bonkamao, sinkari badeangaha, mikkaba dongjaha aro ritimkari ongaha ine manderang aganaha. Tangsingipa salgio aram tengsakoba nikjaha. Mikkani jamano balwa name rongtale balachim. Sal agilsakko dingtangataha, aro dingataha.

Jisu aro uni ripengrang sal dingao hawa chae ansengengachim.

Samsi ritimdaldalang tangsekgilgil nitoachim. Bolrango biterang aro bijakrang gitalrang dongenba nitoachim. Bibal gitalrang nito-bee balgaodaldale abarangko nitoataha.

Ia ritimkarini pringo uni ripengrangoni mitamrangde gisiko kusi ongja ine Jisu nikaha. Mitamrang noktangtangni chaanirangna aro gana chinanirangna sintienga ine ua nikaha. Uni gimin ua uamangko abrini sepangona rimangaha. Uamang pilakan roong-rango ba samsio asongtokmanahaoa, ua Isolni simsakanini gimin aganna abachengaha.

Dodrangko nibo ine Jisu aganaha. Sinkarini jamano saru, domaski aro ugita doorang rebapilaha. Uarang chaaniko amanina jajrengja. Isolani chuonga gita agilsako chaanirangko donsomanaha ine uamang uia. Indide nasimang, uni dedrangrangara mainasa jajrenga? Doorangna bate nasimang batjama? (Doorangni noksarangko mesokbo).

Gana chinanina maina sintea? Abani bibalrangko nibo! Uarangko anchingni Paa maikai nitoe ganat chinataha. Solomonba mane chabeoba indake nitoe ganja chinjachim. Chongipa pul balsana ganat chinatnan Isol inditan simsakode, nasimangnade baditan simsakjagen? ine ua uamango singaha. (Pulrangni noksarangko mesokbo).

Jisuni ripengrang jrip jrip dongaha. Nitogipa barachi pindap-gimin gita dakgipa namnamgipa bibalrangko abrichipakoniko ua niataha. Dodrangni bolrango bilrroe chaaniko amako uamang nikataha.

Nasimang chaa ringanina aro ganding chindingna jajrengna nangja ine Jisu aganaha. Nasimangna iarangko pilakkon nanga ine nasimangni Salgini Paa uia. Uni dedrangna krae dongaibo, unon iarang pilakkon nasimangna ongen ine Ua aganaha.

Ripengskarangni mikkangrangko nie uamang kusi ongbatenga ine Ua nikaha. Uamangni jajrengachi gapgipa katongrang ritchengbataha ine Ua nikaha. Isolni simsakaniko uamangna talatna manani gimin ua mairongpile kusi ongaha.

Golponi Jamano :—

Chonchongipa bitchilrangko mitam mesokode namgen, jekai lebu, bilik, karek, baring bilati, akaru ba besual. Chongipa lebu bitchiloni maikai dalgipa lebu bol chaa uamangna aganbo aro akaru bitchiloni dalgipa akaru budu aro dalgipa akaru biteko maikai nanga! Janggiko Isol maikai indake chongipa bitchrio dona! Sosigipa kilchi kamako pindape chongipa dalgaggipa rachakanio bitchriko galbo. Iarang pilakkon anti gimiko sosie aro dingbome rakina nanga, unon anti gipino bisarangna mesokpilna mangan.

JISUNI AGANGIPA GOLPO

BESUAL BITCHRI

Mati 13:31-32 o pangchake.

Chibolo ringoni salsao Jisu golporangko agane manderangna skiengachim. Mingsara besual bipangoni chonbegipa bitchrini gimin ongachim.

Nasimang pilakan uia, besual bitchri inditan chona, ua seengipa ancheng gita ongaia ine Jisu aganaha. Indiba gangipa uko abao saton, ua tangbaa aro dalrroa. Asal gnangode aro sal namode, aaoni ua chabaa. Ua dalbatrroa.

Besual bitchri pilak bitchrirangoni chonbatsranga indiba ua changrobegipa bipangko ongata. Uni cheksirango dodrang bitip-rangko daka. Uarang uarangni bijak giseprango aro rimitgipa bibalrangni gisepo nengtaka.

JAKNI KAM

Meja antio salgimin noksarangko mesokbo—Jisuni skimitingni gimin. Daalo anching Jisuni skigiminrangni gimin salgen. Bisa-rang mingsa ba una bate salgen—doo, bibal, ba chongipa bitchri.

BIANI

Kasagipa Isol, dodrang, pulrang, chongipa bitchrirang aro ugita pilak chongiparangna naa kasaani gimin chinga kusi onga. Uarang nangni gimin aganani gimin aro nangni pilak chanchianirang aro miksonganirangko uarango nikani gimin chinga kusi onga. Uni bimungo bia, Amen.

Lesson 16

JISUNI ASONGNI MES NIRIKGIPARANG

Skiani Japang :—

Jisu Palestine asongni mes nirikgiparango gisik nangani aro uamangni kamko masianini gimin bisarangna ia lessonchi dakchakna nanga. Uamangko Jisu Dalgipa Skigipa ongbebea ine masina aro sakantian Isolnade gamchata ine uiatna nama.

Sastroni Bak :— Toe Skiani:—27:26; Luk 2:8-16; Johan 10:2-5; 7-15. “Namgipa Nirikgipa;” Luk 15:4-6 “Gimagimin Mes.”

Mukosto Kae Jakkalna :— Ua anchingna kasaaha, aro anchingni paprangni asel nangrimatani ongchina antang Depanteko watataha. 1 Johan 4:10.

Noksa Mesokani :— Abrini Japao Mes Nirikgiparang—Palestineni mesrang aro mes nirikgiparang.

Skiani gita git :— No. 24 aro 29.

SKIGIPANI TARISOANI

Golponi pangchakaniara Jisuni skianirangoni onga. Ua antangni gimin mes nirikgipa gita aganaha. Ua antangko mes nolni cholguga gitaba toaha. Uni kakketgipa jarikgiparang mesrang ongachim. Pharisirang, toromko dilgiparang aro Jihudi skigiparang, chaugiparang aro dokprete ragiparang ongachim.

Jisu uamangna ia toaniko aganaha, indiba uni agana mai, uko uamang uijaha. Johan 10:6.

Bilsi snini bisarang ia toe agananirangni ningtugipa ortonangko masigen ine kadongna manja. Palestineni mes nirikgipa maikai mesrangna simsaka aro uarangko pilak asel nanggnioniko jokatna ska, uko anching uamangna talatskana mangan.

“Angan nama nirikgipa. Nama nirikgipa, mesrangni gimin janggitangko onchaka.” Johan 10:11.

Kasagipa Isolna sakantini janggini gamchataniko anching “Gimagimin Mes” oniko uina mana. Ia kakketgipa kataoniko bisarang maikoba nikrikna mangan ine anching kadongna mana. Gimagiminko manpilanio Pagipani katchaani gimin anching masina mana. Achingba, skigiparang onge, anchingna simsakna ongimin-

rangko nolona rimbapilna katchana kraa. Mesrangni nokgipa badiatana kingking mesrangko manpilon kusi onga, unon anching uko nikgen.

"Aro uko nikahaoa ua katchae antang pakreo gate, nokona rae ripengskarang aro songsulrangko okamchimonge uamangko ina, Ang baksa katchapabo maina anga angni mes gimagipako nikaha." Luk 15:5-6.

NAMA NIRIKGIPA PANGCHAKANI

Toe Skiani 27:26; Luk 2:8-16; Johan 10:2-5, 7-15.

Jisu aro uni ripengrang abarangko batsotangmitingo mes nirikgiparangkoba nikangaha. Badiabarangode mes nirikgipara madrangoni chonbatgipasa ongachim. Badiabarangde mane chagiparangni mesrangko nirikchina rakigimin nokolranga ongachim.

Hai anching mes nirikgipa saksa Calebbar Ezarni gimin chanchina. Iani orto Caleb, Ezarni depante ongachim.

Jisu mes nirikgipani gimin namen uiani gimin Caleb pringonin nokoni mesrangko nirikna rebaaha ine nikaha. Walgimiko mes nolo mesrang Ezarni nokni sambao tusiaha. Pring sengon Caleb dogoona reange mesrangko bimung minge okamaha.

Rebabo, Kaltappru! Rebabo, Changbok! Iachi, Kongtok! Iachi, Gipok! Rebabo, Grong komku! Rebabo, Jabok! Indake okamon mesrang uni kurangko knaaha. Ian uamangko nirikgipani kurang ine uarang uiaha.

Abrichipakna Caleb mesrangko moangaha. Ua uamangna skang skang reangaha. Palestineni namgipa nirikgipa mamung saloba mesrangko arikja. Ua skang skang ree rama jokama jokja uko nia.

Calebni mes jako dobokrangba dongachim. Mitam kaltappru, mitam gisim aro mitamrango rogipa aro rinokgipa nachilrang gngachim.

Pring gimikon Caleb uni mes jakrangna chi aro samsi gngaggipa aako abri gimikonikon sandiaha. Saljatchio salakimgipa biapko ua mesrangna ame onaha. Caleb nengtakahaoba, ua tusijaha. Ua abri japa kenbegni onga ine ua nikaha. Rongbrakrango dongnuenggipa matburungrangoniko uni jringipa goldikchi warachakna ua tarie dongachim. Uni jako bengjiuri aro roong ba gngachim.

Angni kam mesrangko angni pagipani nolona rimangpilanian onga ine Caleb chanchiaha. "Anga mes ba dobok bisa mangsa-

mangkoba gimaatna nangja. Uarang pilakan angna ganchatbea. Angni paana uarang nangbeani onga."

Sal kasinangahaon, Caleb uni mesrangko gonggegipa ramarangko moangaha. Mes badiaba akongchi reangode ua antangni goldikchi uko rimbapilrongachim. Badiaba mes gongrake skang reangode uko champengna gita bengjurichi roongko gosotatrongachim. Chongipa mes uni nirikgipako anpile jarikaha. Uni gimin Caleb mesrangna chuonga gita one noltangona mobapilna manahani gimin kusi ongaha.

Caleb uni pagipani nolni dogacholo chadengaha. Uni bimang napramko champengachim. Mangprakpraksa uarangko rena aro napatna ua skachim. Ua uarangko matchrakarangkoba nirokachim. Mesrangko ba jillanirangko chikgnigipa seelrangko ua ari-katachim.

Mes nolo bakkaban jrip ongtokaha. Nirikgipani sepango onge mesrang kenani gri tusiaha. Anga angni mesrangko uia aro angni mesrang angko uia ine Caleb chanchiengachim.

Caleb dogacholchipak tusiaha. Uni sepango uni jrimgipa goldikgnangchim. "Ia doga gita chaugipa rebana manjawa. Saoba chauna ba sootna rebaode rama gipinkosa rebana nanggen. Anga angni mesrangna janggitangko onchakgen." Bakkaban Caleb tusiangaha.

GOLPO AGANANI

GIMAGIMIN MES

Luk 15:4-6

Mes aro mes nirikgipani noksako mesokbo. Mes nirikgiparangoba Jisuni ripengrang donga ine anching chanchina mana. Ua uamangni gimin golporangko aganrongaha. Daalni anchingni golpo Palestineni mes nirikgiparang aro mesrangni gimin Jisuni aganani onga.

Changsao mes mang ritchasa gnanggipa nirikgipa gnangchim ine Jisu aganaha. Nolko watna skang pring antian ua uarangko chanrongaha. Sa, gni gitam, bri, bonga, ritchasa ongjaskal ua uarangko dongchongmotama donchongmotja uko uina uarangko chantokaha.

Salgimikan nirikgipa abri joljol uarangko moangaha. Ua uarangna samsi aro chiko amdilaha. Salakimko nengtakchina ua uarangna ame onaha. Ua uarangko kengnioniko jokatna pangnan tarie dongrongachim.

Atamo ua uarangko nolona moangpilaha. Ua dogacholo chadenge uarangko mangsa mangsa dake napna onaha. Ua sa, gni, ine mag sotskusuona chanaha. Indiba mang ritchasagipa mesara bachi? Mangsa gimaaha!

Nolo dongrikchina sakgipin dakchakgipako ua okamaha. Uni rebagimin ramako ua bakan reangpilaha. Ua reroroangaha. Ua bonkamao "Me! Me!" ine mikoako knaaha. Mikoachipakna nirikgipa jarikangaha. Ua akuang kuchotona reangaha. Ua nionataha. Gimagipa mes roongrang aro busugrimrangni gisepo nengbee maldona manjae kene dongengachim.

Nangipa nirikgipa akuangko malonangaha. Ua kasne, kasne kenenggipa mesko detome uko pakkretango gataha.

Katongo kusian gape ua mesko rime noktangchi reangpilaha. Kenenggipa mes bakbakan mikoaniko dondikaha. Kasanningipa nirikgipani jako ua kenjaha.

Nirikgipa kusi ongbeahani gimin gipinrang noksulrang aro ripengrang baksa katchana nanga ine chanchiaha.

Ua kusi onge aganaha, "Ang baksa katchapabo. Maina anga angni gimagimin mesko nikpilaha."

JAKNI KAM

Skangni salrango Sastroo gita mes nirikgiparangni jakkalgipa bosturang—goldik, bengjuri, cup, bangsi, mes nol aro ugita gipinrangko asteeniko dakbo.

BIANI

Kasagipa Isol, chinga pilakan nangni dedrang aro nangna gamchatbea ine uina kusi onga. Chinga pilakon nangni kasaani donga ine masina chingna dakchakbo. Nangni kasaanini gimin skigipa Jisuna chinga nangko mitelna nanggiparang onga. Amen.

Lesson 17

NATOK RINGIPARANGKO JISU UIAHA

Skiani Jepang :—

Iachi Palestino mongsonggipa kamrangoni mingsara natok rimanian onga aro Jisu natok ringiparangni janggi tanganio nang-ringipa onga ine bisarangko masiatna mana. Galili chibimani gimin aditan uimanoa aro natok ringiparang baksa chongmotan uni sninggiparang baksa nangrimaniara Jisuni ripeng ongani aro uamangni ugita ongrorobaani gimin uia.

Sastroni Bak :— Mark 1:16-20; 4:35-41; Luk 5:1-11. "Jisu aro uni natok ringipa ripengrang."

Mukosto Kae Jakkalna :— Angni geetanirangko nasimang dakode, nasimang angni ripengrang onga." Johan 15:14.

Noksa Mesokani :— Jisu natok ringiparang baksa agangrika, Galili sagal, natok rimani nokrang aro chekrang, Jisuni skoni noksa.

Skiani gita git :— — No. 43.

SKIGIPANI TARISOANI

Kristo antangni sninggiparang baksa dingtangmancha nangrimani gnangchim. Jinmao uni kamko abachengengachim. Unbaksa uko duulgipa manderangko uni kamna tarisona ua skaha. Jisu chadenge Simon aro Andrewko chek galmitingko nikate okamaha.

"Ang baksa jarikpabo, anga nasimangko mande ringiparang dakgen." Mark 1.17.

Aro indake ongaha, Jakob aro Johan, Simon aro Andrew knachake bakbakan jarikaha. Uamang uamangni pagipa Zebedeeko ringo nokolrang baksa watange uko jarikaha. Mark 1:20.

Basakoba basakoba ua ringrango uni ripeng natok ringiparang baksa reronge unmangni duk ba kengnirangko manrimpaaha. Ua uamang baksa salantio ongpaaaha.

Unon uamang jinmako watate, ringo ua jekai dongachim, uandake uko rimbintangaha. Mark 4:36.

Mikka balwao ua maikai kasina aro kengija onge dongaha. Uko mikrakaton mairongpile bilakataniko manaha! Uni kengipa ripengrangko aro kengokanirangko ua Isolni bilchi namataha.

Unon balwa tipaha aro namen tomtom ongaha. Mark 4:39.

Lukni Nama Katao anching nengbegipa natok ringiparangko uni bilchi dakchakaniko aro patianiko nika. Uni bil gnanganiko aro nangrimaniko mesokna ua uni bilko mesoksrangjaha. Uni gimin Primary mea aro mechik bisarangna Jisuni kasachakaniko aro dakchakna skaniko mesokna nanga.

SASTRONI GOLPO

JISU ARO UNI NATOK RIMGIPA RIPENGRANG

Mark 1:16-20; Luk 5:1-11

GOLPONI ABACHENGANI

Jisu aro natok ringipa ripengrangni noksako mesokbo. Noksao mesokgipa manderangara sawa, nasimang uiam? Badia chibolni sambao uamang ongachim? Jisuni dongram asongoni natok ringiparangni gimin chinga aiao inmana. Ia golpo mitam singani-rangna aganchakgen.

GOLPO AGANANI

Johan Napbolatgipani jakchi Jisu napbolatako manani jamano Jisu skiprakna aro manderangko ansengatna abachengaha.

Jisu uni dalram Nazarethona reangpilgija Galili sagalni rikamo Kapernaum songjinmaosa dongaha. Kapernaumo banga natok ringiparang gnanchim aro Jisu uamang baksa meliaha.

Salsao Jisu Simon aro Andrewko natok rimmitingo natok rimengako nikaha. Ua mangni ring tongsade agao aro tongs chiningo ongachim.

Natok ringipa adasako Jisu nie chadengdikahakon. Simon aro Andrew natokrangko manna sengengachim.

Uarang rebanga ine Simon aganaha. Simonni mesokatgipachi Andrew niatenba, chata gita chacha badale ua natokna chekko goataha. Natok dongramona ua uko goataha.

Aiao! Anga jokataha ine Andrew aganaha. Indake aganmitingon chonchongipa natokrang jroe katangtokengachim. Uamang duk onge chekko galtaitaiaha.

Haida ia somoion Jisu uamangna aganahakon. Simon, Andrew, ang baksa rebabo. Angko dakchakbo. Anga nasimangko manderangko ringiparang dakatgen. Naa bilaka aro kadonga ine anga uia. Nang gita dakgipa mandeko angko dakchakna anga nanga. Dambegipa Skigipako uamang kusi ongbee rangsan jarikangaha. Ontisa reangkuon natok ringipa gipin adasako Jisu niktaiaha.

Uamang Jakob aro Johan ongachim. Uamang uamangni pagipa baksa gringimin chekko koengachim. Haida walgimiko uamang natok rimahakon. Uni dingtangmanchagipa ripengrang onгна uamang krabegen ine Jisu chanchiaha.

Johan, Jakob, rebabo ine ua aganaha. Ang baksa rebapae angko dakchakbo. Pagipako gipin nokolrang baksa donange, uni dakchakgipa ripengrang onгна uamang Jisuko jarikangaha.

Sal gipino Jisu chibolni rikamo chandengengachim. Isolni gimin uibatna ske, banga manderang uko jarikaha. Ring bol gni arara dongengako ua nikaha. Iarangara uni natok ringgipa ripengrangni ringrang onga ine ua uiaha. Uamang walgimik natokko rimahachim. Uamang unon chekrangko susrangengachim.

Jisu Isolni gimin manderangna aganna skachim, indiba manderang agrepile sikchepchepani gimin una altua ongjaha. Uni gimin ua Simonni ringo gakate aganaha, "Simon ontisa agaoniko jitpakangbo." Indake Jisu ringo asonge manderangna skiaha.

Jamano manderang noktantangchi reangnakahaon Jisu uni natok ringgipa ripengrang baksa donganguaha. Uamang walgimiko natok rimahaoba mangsaba mankuja ine ua uiaha. Jisu uamangna duk manchakaha.

Simon, ningtubatkalaona choange nangni chekko galatbo ine Jisu aganaha. Chinga walgimiko gale mamungkoba manjaha ine naan uia. Indiba nangni agana gita chinga dakgen ine Simon aganaha.

Ua ningtubatkale choange chekko galattaiaha. Haida Andrewba apsanke dakahakon. Chekko donatari bakan uamang jagokaha. Anga banga natokko rimaha ine Simon aganaha. Angaba bangen natokko rimaha ine Andrewba aganaha.

Angni chek grinnasienga ine Simon aganaha. Angni chekba apsan ine Andrewba aganaha.

Indake uamang chadenge donge Jakob aro Johanko bol gipin ringoniko okamataha. Bakbakan sakbrian uko saldoaha.

Ringrango gapsrangaha! Ringrang dubiangnasipilenga ine uamang aganaha.

Kennabe, ine Jisu aganaha. Ringrang namen agaona sokeaha. Aiao inmanpile, aro uamangni katongrango kasaan gape natok ringgiparang Jisuko jarikangaha.

JAKNI KAM

Dalgipa bijakrang ba lekarangoniko ringrangko dakbo. Mitam bisarang bijakrangko dakbo aro lekako natokrang gita chitna ba ratna mangel.

BIANI

Kasagipa Isol, chingni Apa, chinga Jisuni ripengrang baksa chan-chapako manna ska. Chingko kasana, kema kana aro kasachakna salantio skibo. Jisuni bimungo bia, Amen.

Lesson 18

ABARANG ARO AKAWERANGONI BITERANG ARO MI MISI

Skiani Jepang :—

Ia lessono Palestineo gea gamaniara manderangni kamrangoni mingsa onga aro banga manderangan gea gama ine uiatna dakchaka. Bisarangni nikronga aro uironga bosturangni gimin agane Dalgipa Skigipani gimin uianiko bariata.

Sastroni Bak :— Mati 12:1; 13:3-8; 25:3; Mark 4:28-29; 12:1-9; 13:28; Luk 6:43-44; 9:16; 10:34; 12:16-18; 13:6-9; Johan 15:1-8.

“Agilsakoni Chaani (Pita)”.

Mukosto Kae Jakkalna :—Aro Jisu pilak Galiliona reroroe, uamangni gilja nokrango skiaha, aro songnokni nama katako aganprakaha, aro manderangni gisepo pilak biatirang aro pilak bilgri-rangko ansengataha. Mati 4:23.

Noksa Mesokani :—Jisu antangni ripengrang baksa roani, gam-giparangni, mi misini abarang, Jisuni skiani aro dakchakanirang.

Skiani gita git :— No 43.

SKIGIPANI TARISOANI AGILSAKONI CHAANI (PITA)

Gitrang 194:14c. Mi misiko geanini gimin aro mi raanini gimin Jisuni aganani. Bangbata kamrang, chongmotan bitchri satani, hal weani, mi raani aro chimongani—iarang pilakkon Jisu skianirango jakkalrongaha. Mi nakani aro moani iarangkoba raanio manchapa. Iarangko Jisu aganrongjaoba Sastroo iarangko janapa

gnang, maina Johan Napbolatgipani gimin serikanio uko nikna mangen. Mati 3:12.

GOLPO AGANANI

AGILSAKONI CHAANI (PITA)

Mati 12:1, 13 3-8; Mark 4 28-29, Luk 9 62; 12:16-18.

Jisu aro uni ripengrang biapsaoni biapsaona songreroroaha. Nangenggipa manderangko skie, aganprake, aro dakchake ua salrangko reataha. Uamang jechiba rebo, biaprangko tale uirongaha.

Abarango gamgiparangko uamang nikrongaha. Ia gamgiparang sepang jolni songrango dongachim Sakprakprakon roongarigipa ahri japarango chonchongipa abarang gnangchim Iano ua gom mi ba job miko geaha, uonikon uni nokdangna ua chaaniko mangenchim

Manderangna skion, ua asongo reroroani gimin ua manderangna aganrongaha Antangtangni nikronggimin ongan gimin manderang ia golporangko namnikaha.

Pringsao Jisu aro uni ripengrang sorok joljol reangaha. Mitamrang bitchirangko satengachim Uamangi bigilni jollarangko kee uamang abao reroroaha Uamangni jakrangko jolla ningoni bitchirangko otna sikataha aro ua bitchirangko aao sataha. Mitamrang hal weengachim. Uamangde bitchri satmanahachim. Hal weani bipongara bolni ongachim. Kuchoto silgrakko chatachim. Iako matburung manggnichi salachim—gada, ut ba matchu bolotrangchi salachim Kuchot matsrangipa pal aako chodoe bitchriko aa pindape donangachim.

Jisu uni ripengrangna Isolni chagiparangna daksoaniko aganjoljolangaha. Uamangko masiatna ua golpo mingsako aganaha.

"Gamgipa aao bitchriko sata. Sal uko dingata. Una mikka chiko ona Bitchri dalrorona abachenga. Skang tangsekgipa nakatchenga. Bonkamao japang mangrake jadil sue dalroroa. Gamgipa uni biteni minako uia. Uko ratna namako ua uia. Raani somoi soka. Dao pita ba chaaniko mechikrang tarina mangnok."

Ritimkari gitan Jisu antangni ripengrang baksa rakari somoioba reroroaha. Abarango uamang mi raanirangko nikaha. Sakprakon atchuli gnangchim. Jakasichi mini gatongrangko rime kamao ua jaksamsachi ratachim. Ratgiminko katimgiparang kasotangkaachim.

Mi ramanani jamanoba gamgiparangna banga kam dongkuengachim. Gatongoniko mi birongko dingtangatna nangachim.

Iarangko nake, nakmanahaon, choe bebuko galachim. Namgipa, merong aona gaaktokgimok. Ia namgipa merongan angni nokni manderangna chaani onngen ine gamgipa aganaha.

Chongipa aba gngangipa mande asteni bakosrango miko dona. Indiba dalgipa aba gngangiparangde mi jamrangko rikesa dona-chim.

Rakari somoisao, Jisu aro uni ripengrang mini abako batsotang-engachim. Rana name pilakchin mintokahachim. Anga okkria ine Jakob aganaha. Chingaban ine gipinrangba aganaha. Hai anching miko akna ine Simon aganaha. Niam gitade mana ine Johan aganaha. Indake uamang adita mirangko ake, uko jakpao reprepe, bebuko gale chaaha.

Chinga Jisu baksa rona namnika ine haida uni ripengrang aganahakon. Ua chingna Isolni kasaani aro simsakanini gimin skia.

JAKNI KAM

Asteoniko Palestineni ganggipa manderangni jakkalgipa bosturangko dakna mangan—bitchrirangna jollarang, nanggri, gadarang, matchu bolotrang, atchili, mi nakani ba mi choani.

BIANI

Chingni kasara Apa Isol, Jisu apalnirangko namnikaha. Naa dodrang aro pulrangna simsaka ine Ua skiaha. Jisu chingni ripeng onga. Kristona chinga nangko mitela, Amen.

Lesson 19

AGILSAKO ISOLNI ONGATGIMINRANGONIKO SKIE RAANI

Skiani Jepang :—

Ia lessono uamangni songrango donggipa agilsako Isolni ongat-giminrangan, uamangni beenni dalroroani kri gisikni uianiko bari-roroatnaba namen dakchakbeani onngen. Aro Jisu bisa ongmitingo jedake uianio batrorogipa ongaha uandake ongpana skichong-

motani uamangoba napgen. Maina skie raania uamangni uianiko bariatna Isolni donsogimin chol mingsa onga.

Sastroni Bak :—“Uanio Batroroani.” Luk 2:40,50; Mark 6:46; Johan 3:8; Deu. 6:4-9; 31:10-13.

Mukosto Kae Jakkalna :—O Jihova nangni kamrang mairong-pile banga! Gisik sengao naa ua pilakkon dakaha. Agilsak nangni gamchi gapa.” Git 104:24. Niamko poraiani: Jisu bisamitingo noko aro abri kosako skie raani.

Skiani gita git :—No. 46, 44 aro 5.

SKIGIPANI TARISOANI

Skiani japangna Lukni gnigipa odhaioniko pod gniko rabo. Ia pod gnian Jisuni dalroroaniko see rakiani onga. Skanggipa pod Jisu bilsil chigni ongmitingo Jerusalemona reange Nazarethona rebapilaona kingking uni dalroroani gimin agana.

Aro ua bisa uian gape. dalrroe bilakbaaha, aro Isolni kasara uon dongachim. Luk 2:40.

Gnigipa podara uni Jerusalemona reangaoni uigijagipa bilsil gimiko uni dalroroani gimin onga.

Aro Jisu uanio aro bilsio, aro una Isolni aro mandeni kasaa batroroaha.

Ia podrango nangipa bisa onge dalroroani bewalko janapa, ian jarikchina mesokani ongoba, pilak gipin bisarangni dalroroani gitan apsan ongaia. Indiba bisa Jisuni dalroroania Isolni namnika gita onganil gimin, beeno, uanio gisiko dalroroaniara Isolni bisarangko dalroroatna namnika gita dalroroani onga ine anching uina mana. Uni gimin anching bisarangni skigiparang onge uamangko beeno, uanio, kumong nangrimanio aro gisiko name dalroroatna anchingni simsakanini ningo done uamangko dakchakna nanga. Anching uko dakchongmotna nanga, indiba anching antangtang-sande manjawa. Uni gimin anching Isol baksa aro bisarangni maa paarang baksa kam kana nanga. Dalgipa Skigipa anchingna nangipa mesokaniko onaha maina indake sea gnang. “Unon ua bisa chongipa saksako antangona okame uko uamangni jatchio chadengate aganaha ... Nasimang pile bisa chongipa gita ongo.” Mati 18:2-3.

GOLPONI ABACHENGANI

Banga manderang indake chanchia, chongmotan Jisu bangbata salrango noko dongrongjachim. Ua agilsako Isolni ongatgimin-

rangni gimin chanchirongaha. Ua Isolni giik gnangbee dongi-minko uarango nikaha. Nektangon ua Isolni kamrangni gimin uina aro una kasana abachengaha. Bisa Jisu maikai dalroroaha uko uina ia golpo nangna dakchakbatani onngen.

GOLPONI AGANANI

UIANI BATROROANI

Jisuni dalroroani gimin Sastro anchingna agana. Uni dalroroa-niko serikani gnanggipa podko ang baksa poraipagenma? Luk 2:52, ko pilakan mingpabo.

Chongipa Nazareth songko abrini sambengo rikachim. Bisa Jisu abrini kuchotona dakanggipa rongkrekargipa ramako doang-rongaha. Basakoba basakoba gipin bisarangba un baksa reang-paaha. Basakobade ua saksan reangaha. Uni chadengram abrini sepangkalgipa abarang aro bolgrimrangoni abachenge chelao dong-gipa abirang aro sagalrangona kingking samtangtangchiko ua nikatna manachim. Balwa balani gamako knaon Jisu chanchieng-naba donga, "Anga balwako nikna manja, indiba ia abrini kuchoto anga balwani balengako uina mana. Anga angni Pagipa Isolko nikna manja, indiba ua ang baksa donga ine anga uia." (Bisa Jisuni abrini kuchoto dongengako noksao mesokbo).

Jisu doorangni knatogipa kurangrangko knaon, aro balwana mo-enggipa nitogipa bibalrangko nikon, ua indake chanchiengnaba donga, "Isol doorangna aro bibalrangna inditan simsakode, indide ua antangni dedrangnaba simsakchongmota." Indake Jisu Isolni kasaninggipa simsakaniko uichengaha.

Jisu mes nirikgiparangni uamangni mesrangko abirango niri-kako nikrongaha. Mes nirikgipani antangni mesrangna aiao in-manpile simsakaniko ua nikaha. Mes mangprak nokgipana mai-rongpile gamchata ine Jisu chanchiaha. Namgipa nirikgipani antangni mesna kasaania Pagipa Isolni antangni dedrangna kasaani gita onga.

Pagipani ongatgimin agilsaknirango katchae Jisu banga somoi-rangko reataha. Ian Jisuni uanio batroroani chol minga onga.

Josepni noko Isolko manderaachim. Mi chana skang aro chaani jamano mitele bianirangko biaha. Antiprakni nengtakani salko Sukrobarni atam sal napaoni Sonibarni atam sal napaona kingking ua kasroke reataha. Jisu Mariam aro Joseph baksa torom noko olakina tomaniona reangaha.

Naa nektango aro gilja noko ia bilisio je golporangko knaha-chim ua apsan golporangko Jisuba nektango aro torom noko

knaenggenchim. Ua ua golporangko pilnipil knaahani gimin Mariam aro Joseph gitan uaba ua golporangko uipaengnaba dongachim. Indake Jisu bisani kri noktango antangni jatni daldalgipa manderangni gimin Sastrooniko uigipa ongbaaha.

Jisu noktango banga Sastroni bakrangkoba gisiko donengnaba dongachim ba (mukosto kamanahakon). (Mariamni Jisuna skiengani noksako mesokbo). Ua iako dakchongmotaha ine anching iachi uina mana. Maina bisa sakprakan schoolona reangna skang iako skie geetani niam onga. Maa paarang uko detangna skina aro pangnan gisik rana nangachim. Deu. 6:4-5 ko poraibo.

Ia Sastroni podrangko nokni dogacholni krongo aro cholgugarango sena nangachim. Ia see donchakani bakosko mezuzah mingachim. Aro ian ua nokni manderang Isolna kasagiparang aro uni niamrangko manigiparang onga ine mesoka.

Jisu Sastroni podrangko mingna mangmang skie raiasan ongjaha, ua uarango janggi tangaha, maina Isol uko namnikaha ine Sastro anchingna agana. (Mariamni bosturangko palram dokano aro noko Bisa Jisuni dakchchakengani mesokbo).

Mariam aro Joseph Isolna kasaani gimin jensalo manderang tome Sastroni katako poraia unon uamang Isolni katako knatimna uamang unona reangrongachim. Jisuni somoini Sastroara daororo anchingni somoini Sastroni baksasan ongaingachim, aro uko dolna mangipa bigilosa seachim. Isoni niamrangko segimin bigilni dolarang ua salrango bangjabeachim. Basakoba songjinma damsiona indakgipa bigilni dola dolsasan dongaiachim, uni gimin Isolni getanirangko manderangni skie raani cholara indake hanga manderangna Sastroko poraiatanisan ongaiaachim.

Jisu Niamko poraiani biapona Mariam aro Joseph baksa reangrongaha. Manderang niamni katarangko chusokatna aro uarango skie rana, aro uarango knatimna manna gita measarang, mechikrang aro bisarang damsan tomna nanga ine Sastro agana. (Niamko poraienggipa noksako mesokbo).

Uni gimin, Jisu uanio aro bilsio aro una Isolni aro mandeni kasao batroroaha.

NOKSA MESOKANI

HAI ANCHING GITAL NOKSAKO NITAINA (NIAMKO PORAIENGA)

Ia noksao ua manderanga banoni? Maidakgipa manderang ia dalgipa tomaniona rebaaha? Naa bisa saksamangko nikama? Ua

manderanga maiko dakenga? Ia dalgipa tomaniko maina dakenga naa gisik raama?

“Sastro aro uni Pagipani dakgimin agilsakara Isolni gimin anchingna saki ongipa onga ine Jisu bisa uiachim. Uni ongatgimin agilsakni aiao inmananirango aro nitoanirango Isolko nika ine anchingna agangipa knatobegipa Sastroni podko ua uiahakon.” Git. 104:24 ko poraibo.

BIANI

Chingni kasara Isol, chingni dalrornina nangni gisik gnang-gipa daksoanirangna chinga nangko mitela. Chinga chingni mikronrangko aro nachikolrangko nambatsrange jakkalna changatbo. Chinga chingni gisikrangko namarangko chanchina aro gisik rana jakkalna chingko dakchakbo. Jedake bisa Jisu dalroraaha uagita uianio dalrorna mangen, ia salrango rakbee joton kana chingna dakchakbo, Amen.

JAKNI KAM

Leka kingsako rae uni kuchot samgniko chonchongipa waa tonggnio kachapbo, unon naa lekako waa tongsao ba tonggnioaba remremna mangen. Nangni mukosto kagimin Sastroni podko ua lekao sebo.

Lesson 20

SCHOOL SKIE RAANI CHOL

Skiani Japang :—

Mondolini aro gipin schoolrango je skianirangko mana uarango Karistianni miksonganiko uina bisarangko dakchakna manna nanga. Ua schoolrango uamangni chusokna joton kaaniranga Isolni ongipipa bebe aro nitoaniko nikna Isol baksa kam kapaenga ine bisarangko masiatna manna nanga. Schoolo namako dakna skie rana aro bisarangni dalrornina Isolni tarisoanio un baksa kam karimna skichongmotani gisik uamango dongna nanga.

Sastroni Bak :—2:40,52; Reo. 20:8, 12a; Levi. 19:18b; Deut.

6:4-9; Git. 86:5; 104:24; Aba. 13:1-12; Reo. 2:1-10; 1 Sam. 16:11-13.

Mukosto Kae Jakkalna :— Isaia 1:17. Noksarangko mesokna. Torom Nok aro Torom Nokni School, Abraham, Lot, Samuelni Daudko to nonga aro bisa Jisu Torom Noko.

Skiani gita git :—No. 44 (skanggipa pod) aro No. 46.

SKIGIPANI TARISOANI

Ibrirang uamangi janggi tangani pilak bewalrangko Moseni niamrangko pangchakna antangtango onkangaha ine anching Niam Gitchamo poraimanaha ine anching gisik raa. Uni gimin ua niamrangko manderangna skina aro tale agane onna nangachim. Ua somoio torom nok, toromni biding skianirangko onna mangsongbatgipa tomani biap ongbaaha. Jihudi bisarang bils 6 mang ongon uamangko torom nokona watatrongachim. Uno uamang poraina, sena aro niamrangko gisiko donna skiako manaha.

Nazaretho Jihudi Toromni Schoolo je golpoko Jisu skia manaha, uan Gitcham Sastroo seginin niamrang baksa nangchapgipa ongeggenchim, je Sastroni podrangan bisarangna daororoba skie rana nangani ongenga. Uni gimin Jisu jedake uarangko skie rana, uandake bisarang daororoba uarangko skie rana nanga. Ua katarangko gisiko donaiasan ongjachim, indiba ua bisana krae ua niamrangko geetani gita janggi tangaha.

Nangni paako aro nangni maako manderabo. Reo. 20:12.

Ua uni songsulrangna kasaaha.

Naa nangni songsulna antangna gita chacha kasabo. Levi. 19:18.

Uko Nengtakani Salko maniaha.

Ua rongtala ine rakina Nengtakani Salko manibo. Reo. 20:8.

Jisu bisamitingo una skigipa golpo gitrangni mitam podrang baksa nangrima, je gitko bisa Jisu uni schoolo ringrongaha, (Git. 86:5; 104:24), mitam golporanga bilakgipa daldalgipa Jihudi dilgiparang baksa nangrima, Rabbirang ua golporangko uamangni bisarangna schoolo aganronggeggenchim. Aba. 13:1-12; Reo. 2:1-10; 1 Sam. 16:11-13.

GOLPONI ABACHENGANI

Reanggipa antio Jisu agilsako donggiparangoniko aro noktango-niko Isolni gimin skie raani gimin chanchiaha. Dao anching Jisu maikai Jihudi toromni schoolo skiako manaha uani gimin chanchinasienga.

GOLPO AGANANI

Jihudi toromni school noko Jisuni dongengako nina hai. Schoolo napchengon Jisu badita bilsì ongaha? Bilsì dok ongosa Jihudi mea bisarang uamangni toromni schoolona reanga. Torom noknì pamongko Rabbi mingachim aro uan skigipaba ongachim. Ia nok-sao Rabbiko mesokna saoba saksa rebabo. Rabbi ongipa ampoko asongaha. Ua uni japingo dala dolako donaha. Indakgipa rokomni kitaprangko Jisuni bisamitingo jakkalrongachim. Ia noksao sawa rebae ua dolako nesokgen? Jisu aro ripengrang schoolo mai kitap-oniko skie raaha? Anchingni Sastro minggipa kitaponiko ongachim.

Salsao skigipa (Rabbi) O Jihova agilsak nangni gamchi gapa ingipa gitko ringna chadengaha. Git 104:24.

Unon bisarang ua gitko name mansrangkujana kingking skigipa baksa uko ringpaaha. Unikoa seaniko skiani ongachim. Basakoba basakoba dalkalgipa bisa awaseo dogimin anchengo antangni sea oikorko jarike sechina Jisuna mesokaha. Ongjaoba Jisu antangan antangni bimungko steni bolplengo chongipa repchokgimin goolchi seengnaba dongachim.

Bisa sakantina dolaniko poraichina skiachim. Skang oikor-rangko uichina uamangna skichenga, unikoa katarangko, bonka-mao Sastroni bakrokalgipa bakrangko poraina uamangna skiachim. Sastroni katarangko segimin dolanirangna agre gipin kitap dong-jachim.

Isolni geetanirangko gisiko donna poraianian mongsongbatgipa skiani ongachim. Skigipa (Rabbi) geetanirangko dolaniko poraie uamangna tale agane onachim. Bisarang katarangna krae been-rangko moate geetanirangko damsan mingachim.

Jisu banga singanirangko skigipao singengnaba dongachim. Maina anching uia ua Isolni gimin agangrikna aro chanchina namnikbegipa bisa ongachim. Nazaretho gisik gngangbatsranggipa mandea ua nangipa skigipasan (Rabbi) ongachim. Robibar salni gimin Jisuni poraigimin Sastroni podrangko naa chanchichipna manama? Sawa aganna mangan? (Classni bisarang uko gisik rana manjaode Sastroni Reo. 20:8 ko poraibo).

Bisani maa paana dakna nanggnini gimin Sastroo aganako Jisuni poraigimin podrangko sawa aganna mana? (Gisik rana manjaode, "Nangni paako aro nangni maako manderabo ingipa Reo. 20:12 ko poraibo). Sastroo songsulni gimin maiko agana, sawa gisik raa? (Bisarang gisik rajaode Lévi. 19:18 ko uamangna poraie onbo). "Naa antang songsulna antangna gita chacha kasabo."

Jihudirangni toromni schoolo bisarang maio kusi ongbatenggen-

chim ine naa chanchia? (Uamangni matgrik pagitchamrangni golporang ongachim).

Abrahamni aro Lotni noksarangko mesokbo. Ia noksao nikgipa manderanga sawarang, sawa uia? Uamang maiko dakenga? Maina? (Aba. 13:1-12 ni golpoko uamangna kandike agane onna joton kabo). (Ia noksa dongjaode Abraham aro Lotni gimin janapna nangjawa).

Moseni bisamitingni noksako mesokbo aro ua bisani birmungko bisarango singbo. Uni abitang maiko dakengachim? Uamang ua bisako maina donuaha? Bisa Moseni Isol maikai simsakaha?

Unon raja ongchina Samuelni Daudko to nongengani noksako mesokbo. Maina aro maiko dakenga uko bisarang singbo. Manode uamang uko aganchina. Uamang aganchakna manjaode skigipa sengsote agane onchina.

Jisu ia manderangni gimin aro banga gipin gipinrangni gimin Jihudirangni toromni schoolo skiako manaha.

Lukni seaniko anchinga indake poraina mana. "Jisu bisa uian gape dalroroe bilakbaaha." Nasimangba apsan uian gape dalrorona mangan. "Name dakna skiako rabo." Iako mukosto kana nanga.

BIANI

Salgio donggipa chingni Paa, chinga dalrorona manengani gimin nangko mitela. Chinga maikai kakket aro namani gimin bangbate skie rana mangan chingko dakchakbo. Amen.

JAKNI KAM

Anchengko bakoso done uko akaatbo aro apsan ongatho. Unon anchengko sosiatchengbo. Unikoa bisarangko uamangni mukosto kagimin Sastroni podni katarangko uno sakprakprakko seatbo. "Name dakna skie rabo." Palestineni bisarangni schoolo sena skiani ian mingsa onga.

Lesson 21

ONANIA MINGSA SKIE RAANI CHOL

Skiani Japang :—

Olakianiara bisarangni onanichi Isolko namnikatani onga ine bisarang ia lessononiko skianiko manna nanga.

Sastroni Bak :— Mark. 12:41-44.

Mukosto Kae Jakkalna :— Git 177:1.

Noksa Mesokani :— Onanirangko onenggipa bisarangni noksa. Pai kapsako onenggipa mechik segri.

Skiani gita git :— No. 23 aro 19.

SKIGIPANI TARISOANI

Jisu antangni agilsako janggi tangani bonkamgipa antio chang gitam mang tangka aro onanini gimin aganaha. Tangkachi aro uko jakkalachi Jisu mandeni kakket onganiko uina mana. Anchingni bangani kri ongja indiba uarangko onani gisikni kri—anching Isolna kasaaniko toe niani chongmot onga.

Tangka donchakanio donatgimin tangkara giljani biding kamrangna dakchakani ongachim. Jisu uchiko nie olakigiparangni katongo miksonganiko uina manaha. Mane chagiparangni banga onanirangchi nama dakchakanirangkoba ua uiachim. Unon ua mechik segrini pun kap gniko katchae onako ua nikaha.

Pun kapsa komibatsranggipa paisa onga aro uni gamchata naya paisa pelsa gita ongaia. Aro uan Palestine asongo komibatsranggipa jakkalani paisa onga.

Onanirangni gamchatani chongmotko Jisuni dakaniko ua salo ua antangni katarangchi uni sninggiparangna mesokaha; maina ua aganaha, “Tangka donchakanio pilak dongiparangna bate, ia kangal segri bangbate donaha. Maina pilakan antangtang agitchaoniko donaha, indiba ua antang chuonggijaoni uni pilakkon donaha, chongmotan uni pilak janggi tangani donaha.” Mark 12:43,44.

Ia lessonni baksa gita jakkalna Gitrang 117 ko seaha, maina ua ia lessonni mangsonganiko talatna mangan, aro olakianio bisarangna dakchakani onggen. Aro ua Isolko olakigipa pilak manderang aro jatrangni bewal chongmotko mesokani onga. Isol agil-

sakni pilak antangni manderangoniko olakianiko, kasaaniko nang-nika ine bisarango Isolni gimin uianiko batroroatanian inongsongbatgipa skie onna nangani onga.

GOLPONI ABACHENGANI

Jisu bisa ongmitingo antangni toromni schoolona reangrongaha, aro una skigimin olakianio ringani gitrangko ringaha. Gitrang 117 oniko anchingni mukosto kana seokgimin pod Jisuni ringgipa git mingsa ongachim. "Jihovako mitelbo nasimang pilak jatrang uko demitelbo nasimang pilak manderang." Nasimang poraina manna gita anga ua katarangko black boardo segen. Anching ua katarangko poraitaitaimitingo Isol anchingko maikai antangko olakiatna ska uko chanchina hai.

Iana agre, anching Isolko olakion maikai dakna nanga? (Jisu anchingna donanggimin kamrangko chusokatangna dakchakna anching onanirangko rabana nanga). Anchingni mondolini kamrangna onani gita tangkako rabaania inongsongbatgipa olakani baksa ongchongmota. Maidake onaniko onna nanga uko uina ia Sastroni golpo anchingna dakchakani onngen.

JISUKO KUSI ONGATGIPA ONANI

(Mark 12:41-44)

Salsao Jisu Jerusalemni torom noko dongnitingo tangka donchakanini sepango asongengachim. Uno adita tangka donchakanirang dongachim, uarango manderang uamangni ona tangkarangko dongengachim. Ua onanirangkoa torom noko olakianina aro kamko dakna jakkalachim.

Banga manderang tangka donchakani sepango dongdikaha. Uamangni onanirangko donatnitingo Jisu uamangko niengachim. Tangka donchakanio uamangni tangkarangko donnitingo uamang maiko chanchiengachim Jisu uko uiachim.

Ongiparangoni banga mane chagiparang ongachim. "Angan sakgipinna batede bangbate ongipa ongchongmotgen. Anga badi-tako ona manderang angko uichongmotenggen ine saksa antangni gimin chanchiengnaba donga. Anga adita tangkako donatna nangchongmotgen, ongjaode gipinrang angko jaksramgijagipa onga ine chanchigen ine sakgipin antangni gimin chanchiengnaba donga. Nitogipa chanding chindingko gangipa mande saksa tangka donchakaniona gaoradee reangaha. Sakgipinrangni bange bange tangkako donatako nikama nikja uko ua niwilwalaha. Indiba ua

uni tangkako sakgipinrangko togiesa manaha ine gipinrang aro Jisuba uiachim.

Unikoa tangka donchakanini sambao mechik saksa chadengdik-aha. Uan agilsako sikdikdik ongnikgipa mechik segri ongachim. Haida ua aldumittangna aro ganat chinatna bisarang dongachim, aro uamangna simsakna tangkako manna nengbeesa kam kana nangachim.

Kangal segri antangni monaoniko pun kap gniko bikotaha. Uarangni gamchata komibea anasana bateba komibatachim. Anga Isolna kasara. Anchingni nangnika bostu anchingo donga uko Isol nika ine anga beberaa. Anga uni kamna dakchakpana tangkako onna manani gimin anga katchaa ine ua mechik chanchieng-naba donga.

Uni gimin ua mechik antangni pun kap gniko tangka donchakanio donataha. Antangko jarikgiparangchiko nie Jisu kading-smitaha.

Gipinrangni onanirang gimikna bate anchingni Paa Isol ia kangal segrini onanina katchabata, maina ia onania kasaani onani onga ine Jisu aganaha.

GOLPONI JAMANO

Onenggipa bisarangni noksako mesokbo, unon ua bisarang maiko onenga ine singbo. Isol anchingni maikai onako ama, nasimang aganna manama? (Anching uni kamna katchae onna nanga).

Segrini uni punko onengani noksako mesokbo. Jisu uni onanina maina katchaaha? (Maina uni onania kasaani onani ongachim).

BIANI

O Isol, chinga pilakan, nangni gimin agana, sakgipinrangko dakchakna chinga manako dakpana, chingna bilko onbo. Nangna kasae nangni kamrangna dakchakpana katchae onna chingko dakchakbo. Jisuni bimungo chinga bia. Amen.

JAKNI KAM

Bisarangni onna mangipa bosturangko noksa salbo, chongmotan dobisa, doch, mi, jak (maiba kamo sakgipinko dakchakna anching anchingni jakko jakkalronga), jaa (sakgipin mandeko dakchakna rena anching anchingni jaako jakkalronga), meraku, naya paisa ba tangka.

Lesson 22

SASTROO SEGIMIN SOMOIRANGO JEDAKE MANDERANG ISOLKO OLAKIACHIM UANDAKE DAOROROBA BISARANG INDIAO UKO OLAKIENGA

Skiani Jepang :—

Isolko olakigpa aro Uni Depante Jisuna kasagipa chonchongipa mea bisarang aro mechik bisarang aro dalginin meaparang aro mechikmarang India gimikon donga ine bisarangna uiatna mangsongani onga. Aroba Sastroo segimin somoirango jedake manderang Isolko olakiachim aro torom nokko rikna katchae onachini indakgiparangba donga ineba uiatna mangsongani onga.

Sastroni Bak :—Reo. 25:1-9; 35:4-36:7; 40:17,33. "Torom nokko nanggipa mitam manderang."

Mukosto Kae Jakkalna :—Git. 117:1,2.

Noksa Mesokani :—Indiani gilja nokrang (Achikrangni gilja nokrangna agreba gipin gilja nokrang); Torom tambuna onani.

Skiani gita git :—No. 31 aro 25.

SKIGIPANI TARISOANI

Bisarangko indake uiatna joton kana nanga; chongnotan Indiani dingtang dingtang biaprango Kristianrang banga. Uamangni gilja nokrangni bimumung rang dingtang dingtang donga. Uamang uarangko antangtango donga hosturangchi rikaha. Mitamko itrangchi, mitamko aachi aro mitamko bol aro waarangchi rikaha.

Iani jamano gipin lessono Sastroni dingtang golpoko jakkalania ia bilsion gipin skianiko onna miksongani onga. Ia lessonko naa Kristian bisarangna skia, jerangan gilja nokko rikna katchae aro kimkim mangsonge apsan kam kaa. Jihudi manderangba uamangni torom tambuko rikna manna gita uamango dongako katchae onaha aro apsan kam kaaha.

GOLPO AGANANI

Manode Indiani dingtang dingtang biaprangni manderangni

noksarangko mesokbo aro uamangni gimin aganbo. Uamang uamangni nokrangko rikna jakkalgipa bosturangni gimin, uamangni chaanirangni gimin, uamangni ganding chindingrangni gimin, uamangni gilja nokrangni gimin aro uamang mai kamko kana namnika aro mai kalgrikanirangko kalgrikronga iarangni gimin aganbo. Assamni manderangna agreba Indiani banga manderang Kristianrang onga. Uamangba anching gita Isolko olakia. Uamangba Jisuna Kasara. Indiani salgipengo donggipa mitam meaparang, mechikmarang aro bisarang maikai gilja nokko rikaha uani gimin anga daalo nasimangna aganna skenga.

Angaba angni manako dakpana kusi onga. Sita, Tara aro anga itko dakna megaprangko rabajok. Chingni pagiparang aako choaha aro chingni magipa rang chiko koaha. Chinga chingni gilja nokko manode anga kusi ongbegenchim ine Lela aganaha.

Indiba Lela aro uni magipani uamangni chunchi repigimin aani chongipa nokona sokangon uamang dukni katako knaaha. Pagipako duk ongbea gita nikaha.

Lela chongipa bisako saraona detombaaha. Ambitang megapni amko rae jarikbaaha. Ua ua amko mi suramni sambao anaha aro meatamna gindeko natna asongaha.

Nangpade duk ongenga. Maina anching Kristianrangko gilja nokko rikna bengenga. Kristian ongpagijagipa songni dilgiparang anchingo olakiani nokko dongatna sikjaenga. Anching gilja nokko rikode uamang uko rue galgen ine aganenga ine uni ambitang aganaha.

Banga antirangna nengbee kam kaaha. Namnamgipa itrangko hangen dakaha. Indiba dao chingni Isolko olakina gilja nokko rikna chingko bengaha! Ian mairongpile dukni aro chaktogijani onga ine Lela aganaha.

Kristianrang, sal namode dalgipa bolni salakimo aro mikka waode ba sinbeani salode noko, Robibar anti olakina tomaniko dakaha. Amango ongjaoba amangko gatdogimin gansango asonge uamang mitelani gitrangko ringaha; Isolo biaha; uamangni pamongni Sastro poraiako Jisuni gimin aro uni skigimin janggini ramani gimin skianiko uamang knatimaha.

GOLPO AGANANI

LELA GILJA NOKKO RIKNA DAKCHAKA

Lela aro uni magipa chikoloniko chi koe rebapilengachim. Magipa aani dalgipa basingo chi koe skoo itchilbaengachim.

Hai anching anchingni gilja nok gita nokchi rena ine Lela ku-

mongaha. Kam kagiparang daalo it dakaha aro uarangko mat-chotgen ine apa aganaha.

"Aiao! itrangde bangjok! Jalal aro Bindara bachisa?" Lela singaha. Ua itrangko mesokaha.

Itrang chuongginokma chuongkujawama uko namedake uisrang-na gita uamang uarangko chanenga. Maina gilja nokko rikna banga itrangko nanga, naaba uko uia ine uni magipa agancha-kaha.

Uamang ia duk onгани katako knaani jamano Robibar salo tomon, uamang kadongani gri ongengpitichim.

Anching dontongna nangja, anching gilja nokko rikani cholko ainna joton kaaniko aro uko rikna chanchiangkuna nangchong-mota ine pamong aganaha.

Aro uamang indake dakaha. Saksa Mondolini pamong mondo-lini dilgiparangko okame nokko runa manja ine sea niamko anga nikaha ine pamong jinmana aganaha. Songni dilgiparang nikna skang anchingni gilja nokko matchotna maiba chol dongama?

Ua Kristianrangni dolo namen budepagipa mande saksa gnang-chim. Anching uko dakna mana, indiba anching anchingni kamko siinsakbee sriksrik rakina nanggen ine ua aganaha.

Indiba maikai mangel, budepa? Chingna aganbo ine sakgipin dikdilgiparang uo singaha.

Anching anchingni gilja nokko jajong tengao rikgen ine ua budepa aganaha.

Uamangni mangsonganiko chusokatna mondolini dilgiparang salanti salanti tome chanchiaha. Ua budepani dakchakachi uamang pilakkon tik kana manaha; maiko dakna nanggen, uko maikai dakgen, sawa uko dakgen aro basako, iarang pilakkon uamang tik kaaha. Kristian saksaoni sakgipinona ia mangsonganiko kasne kasne giporoataha. Indiba saksaba ia dongnuaniko parakatjaha.

Ha, Ha, ine songni dilgiparang kadingstekaha. Kristianrang kapongrang. Uamang uamangni gilja nokko rikangkuna kenjok. Uamangni Isol uamang baksa pangan donga ine uamang agana, indioba uamang kenjok, Ha! Ha! ine uamang kadingaha.

Unikoa jatengbatsranggipa jarambongni somoe sokaha. Song gimikan salni tenga gita ongnasipile jasengaha aro manderang jajongni tengmitingo tomtome tusiengachim.

Dao anching renama ine Lela gansango ampatchio tuengaoni aganataha.

Jripbo, somoe ongaha, indiba anching bisako aro ambitangko mikrakatna nangja ine ua gambregija aganaha.

Bakbakan wal ongbaaha aro kasindikdik jrimjrim andalbaaha, unon maa paarang aro mea bisarang aro mechik bisarang gilja

nok riknasienggipa biapona tombaaha. Mamung ontisa gamakoba knajaha. Sakprakan antangni dakna nanga kamkosa uiaiaha.

Pakma sambrina aako chin dakaha. Aako choe gansangna gatdona kam kagiparang aako choe rabaaha aro uarangko akaataha. Aako apsan ongate akaatna gita sakantian simsakbee gae reaha.

"Dao anchingni pal ongjok," Lelani magipa nachilo pae kasinbee una aganaha. Uni kam maia aro maiko dakna nanga Lelaba uko uiengachim. Ua gita gipin bisarang aro uamangni magiparangba dakpaaha. Pakma sambrina tarigimin biapona uamang itrangko gongrake, indiba gamatgija rikgaaha. Dolsa nengahaon dol gipin uamangni biaprangko raskae itrangko bone rikgakujana kingking uamang kam kaaha.

Pangchakgipa ritingode changbatgipa rikgiparanga itrangko dongen, uko name nibo ine magipa Lelana aganaha. Gipinrang bonkamgipa ritingrangko gatna uamangko dakchakpagen ine ua aganaha.

Anga nipaenga ine Lela aganaha.

Itko gatgipa sakprakko dakchakna adita dalkalgipa mechikrang aro mea bisarang gnang, uamang itko rabae aro itrang magaprikatna repianiko repie uko dakchakako ua nikaha. Uamang maikai dolsani nengtakmitingo dolgipin kam kaaha ukoba ua nikaha. Mitain mechikmarang kam kagiparangna chi kotimaha. Sakgipinrang sepango kombolo tuatenggipa chonchonggipa bisarangko nitimaha. Jamankitiko Lelaba tusina ska amjae gitile magipani chinani barao tusiaha.

Pakmarang kasne kasne churorobaaha. Indiba pakma samtangtande matchurang aro achakrangni napako champengna mangmangsan chua chuongaiengpitichim. Uarango balwa jokna gita kolgrangrang dongenga, dotgimik ongkujachim.

Saliramchipakni pakma gipinrangna bate chubataha. Uarangoni bangbatan itrang dotgimik ongachim, indiba chisolni bimangko dakna jatchio akolrangko donaha. Bonkamao mande saksa mangmangsan rikaiaha. Uarangoni bangbatan itrang dotgimik ongachim, indiba chisolni bimangko dakna jatchio akolrangko donaha. Bonkamao mande saksa mangmangsan rikaiaha. Ua pakmano bonchotsranggipao itko donengachim.

Magipa uni chonggipa mechik bisako kasinbee doktope, Lela, Lela ine demesaaha.

Lela mikrake, chuao pakmani bonchotao kam kagipani bonkamgipa it dot gniko gatako nigitoaha. Walsano jajong tengao gilja nokko rike matchotaha.

Manderang uamangni olakiani noko rangsan tomtokaha. Aako rake tarigimin asongchakanio uamang sronge riting dake

asongaha. Pringni tengsuanichi tengdapgipa, chisolni bimangko akolrangchi dakgipa saliramni pakmako mikkangchake uamang asongaha.

Pamong Isolo biaha. Unomiting gilja nokko rikna ongijagipa ua songni dilgiparang uno chadenge uamangko gitok dee niatengachim.

Maina Kristianrang kadongbegiparang ongaha. Uamang asongni dongimin niamko pegiparang ongjaha ine ua dilgiparang uiaha aro nasimangni gilja nok jokaha ine uamang aganaha. Dao nasimang tomtome olakina mana. Nasimangni gilja nokko pilakba ru-jawa maina ian songni niam onga ine uamang aganaha.

Kristianrang ia kurachakaniko knaahaon uamang katchae inchroaha. Bonkamao anching, Isolna mitelaniko ringna aro Isolni dedrangna krae janggi tanganiko skie rana tomna anchingna aro anchingni dedrangna olakiani nokko manaha ine uamang aganaha.

Ia golpoara antangan dakmesokani gita onga. Uni gimin bisarang ia golpooniko dakmesokna mangipa seoke rachina. Indiba gilja nokko rikgipa mande dolprakni pal bisarangko donskana aro uamangna badine aganna nanga uko tarina uamangko dachakna nanga. Ia golpoko changsa dakmesokani jamano, uko maikai nambate mesokna inangen class chanchigrikchina. Golponi bakrangko rae mesokgiparang sregrike bakko rae mesokna mana. Skanggipa somoio uko matchotna manjaode gnigipa somoioba joljol mesokangchina.

IA GOLPONI GIMIN AGANGRIKANI

Naa jajong tengao rikgipa gilja nok aro Lelani golpoko namnik-ama? Naa ua golponi badia bakko namnikbata? Pialakan antangtangni kusi ongbatgipa bakko aganchina. Maina ua golponi bakprakan indake mesokani onga chonginotan agilsak gimikon Kristianrangni olakiani biaprang donga, jerango manderang Isolo bia, aro una mitelanirangko ringa; uni gimin anching mairongpile katchagiparang onga nanga ine mesokna manna gita bisarangna chanchichina somoiko onna nanga. Agilsakui dingtang dingtang biaprango bangbea Kristianrang donga; uamangan agilsako mondoliko giproroata aro ua mondolini skotong Kristo onga ine uie anchinga katchagiparang onga nanga ine bisarangna aganbo. Kadonggipa Kristianrangko dalnike aganna gualnabe; uamangan uamangni chanchia gita Isolni skako chusokatna mamung saloba kenjaha. Uamangan mondolirangko rikaha, Isolko olakiaha aro kengni dongoba uko minggija Jisuni gimin aganprakaha.

BIBLENI IA GOLPOKO JAKKALBO

1 Kor. 8:6 ko poraibo. Je podko ia lessonni abachengao janapaha, uan onga katani pal “tanga” katako donsabo. Ia Sastroni pod, Indiani Lelani gimin, uni nokni madrangni gimin aro uamangni jajong tengao rikgipa gilja nokni gimin, angko chanchiata.

Ia podni skanggipa bakko poraitaibo. “Ua katarang anchingko Lela aro Indiani Kristianrangni gimin mairongpile gisik nangata? Oe, Isol uamangni pagipa ongode, Lela aro uni nokgimik Isolni dedrang ongbebea. Pilak Kristianrang, angil aro jatni gimin chanchigija agilsako Isolni nokni madrangni, jong-ada aro no-abirang ongtoka. Indiani manderang, jensalo uamang Kristian onga, agilsak gimikni Kristian nokdangni madrangni manderang onga.”

Ia podni gnigipa bakko poraibo. “Isol anchingna pilakkon ona. Ua anchingna namgipa onanirangko ona, anchingnasan onga, indiba ua pilak agilsakni dedrangna, uni pilak nambatsranggipa onanirangni gisepo antangni depante Jisu Kristoko agilsak gimikna onaha. Indiani bangbea manderangan Jisuna kasagipa ongbaengani gimin anching katchagiparang onga ine anga uia.”

Bonkamgipa chanchiani ian onga. “Isol anchingko antangna janggi tangatna ska. Ian nangko aro angko aro Americani manderangkosande mangsongja. Isol antangni nokni madrangko antangko kusi ongatani bewalrango janggi tangatna ska. Lela aro uni Kristian maa paarang aro ripengrang Jisuni kakketgipa jarikgiparang ongaha maina uamang Isolna aro uni depantena kasaani gimin bebeko dakna kenjaha.

GOLPONI JAMANO

Naa Lela aro jajong tengao rikgimin gilja nokni golpoko namnikama? Naa ua golponi badia bakko namnikbata? Agilsak gimikon Kristianrangni olakiani biaprang gnang, uarango uamang git ringna, bina aro onanirangko onna tomdakronga maina uamang Isolko mitelna aro Jisuni ginin aganna namnikgiparang onga. Skangni salrango manderang Daudni gitrangoni banga bakrangko ringrongachim, ine anching Sastrooniko uina mana. Reanggipa antio anchingni poraigimin gitrang 117 ni katarangko naa gisik raama? Skanggipa podko mingtaibo aro gnigipa podko rae skibo.

Ruuta chasongrang reangaha ua katarangko ringgipa Ibri manderanga biapsaoni biapsaona reroroengachim. Uamang olakiani torom nokko nangnikaha. Uni gimin Isol uamang baksa dole rabitna mangipa torom tambuko dakna mangel ine uamangna agan-

aha. Ua torom tambuko dakna banga bosturangko nangachim. (Torom tambuna onanirangko noksao mesokbo). Manderang mai onanirangko rabaenga? Uamangko simsake nibo, unikoa slateko rae naa dongpagenchim ongode torom tambuna naa jerangko onna namnikengchim uarangko sebo. (Jedake nitogipa bara, jaksan, jaksitem aro matburungni bigil).

BIANI

O chingni kasara Isol, antangtangna gilja nokko rikgipa Indiani salgipengni manderangko aro ruutbea chasongrang reangaha Sastro gitchamo torom tambuna katchae ongipa manderangko gisik rana chingko dakchakbo. Chinga maikai Jisuko mitelpilna sikiparang onna mangan chingko dakchakbo. Iarangko Jisuni bimungo bia. Amen.

Lesson 23

MAINA ANCHING GILJA NOKRANGKO NANGA

Skiani Jepang :—

Daalo bilsni ongnasigipa bisarangna, Primary dolni gnigipa bilsiko abachengenga. Anching uamangna chongmotgipa uianiko bariatna skenga. Daalni skianichi, gilja nokara, nok mangmangsan ongaija, indiba Isolna kasagipa manderang madrangsan gita tomdake Uko olakiran biap onga ine masiatna dakchakgen. Anching uamangko monolitangni dakgni kamrango bak rapana kusi ongatna dakchakna nanga.

Sastroni Bak :—Reo. 25:1-9; 35:4-36:17,33. "Gilja Nokko Nanggipa Badiaba Manderang."

Mukosto Kae Jakkalna :—Git. 100:4-5.

Noksa Mesokani :—Torom Tambuna Onanirang.

Skiani gita git :—No. 5 ba 6.

SKIGIPANI TARISOANI

Sastroni golpoko agana tarisoaniara Reongkatao jeko seaha, uko name poraisona nanga. Ia noksao nitogipa rongrangchi aro uni

ongani chongmot obostako illenggipa dake mesokani gita chacha mesokenga uko name nibo. Naa antangko uamangni onanirangchi aro dakanirangchi aiao inmanpile gisiko muni nangatbo. Manderangni gisiko nange onanirangko aro kam kaanirangko aro uamangni torom tambuona Isolko olakina kusi onge rebaaniko masukjana kingking naa Sastroko name poraibo.

Torom tambu, daororo anchingni olakiani biaprang gita Isolni manderang baksa dongpaaniko aro uni dakchakaniko mana ine uina nanga. Manderang onanirangko rikanina onna nangachim. Unon Mose manderangna aganaha, "Nasimang nasimangni giseponiko Jihovana onaniko rabo; gisiko onna namnikgipa Jihovana onaniko rabachina; sona aro tupa aro pitol. Reo. 35:5. Uamang uamangni ska gita aro sapa changani gita rabachina. Nasimangni giseponi katongo uigipa sakanti rebae Jihovani pilak geetgiminrangko dakchina. Reo. 35:10." Uni gimin daalo anching banga songrangni manderangna ongimin obosta gita apsangipa golpoko manaha. Haida uan nangni mondolini ba gilja nokni abachengani baksa apsan ongnaba donga. Indake kusi ongipa manderang uamangni onanirangko rabaaha. Reo. 36:6-7, ona name poraibo.

Indake torom tambuko matchotaha, tambuni nok, jeko manderang uamangni dongramko jitode ukoba jitna mana aro dongdikode uamangni atipni jatchio uko donna manachim. Uandake ua salo uamang mairongpile ua torom tambuko manchengani salo kusi ongbeenggenchim, aro banga kusi onganirangko dakaha ine chanchina mana.

GOLPONI ABACHENGANI

Dao anching badiaba gilja nokko nanggipa manderangni golponi gimin knanasienga. Nasimang namedake knatime chanchirikode maina ia manderang gilja nokko nanga uko name uirikgen.

GOLPO AGANANI

Sastroo anching Ibri manderangni gimin poraia. Changsao ia bangbegipa dolni manderang bakrobegipa songreaniko songreaha, uamang ruuta bilsirangna nangahachim. Rama chela aro nengani gimin manderang nengnikaha aro kusi ongjaha. Uamango bangbea nengnikanirang aro namgijarang dongachim. Isol uamang baksa dinggipa agisirango dongpaenga ine uamang chanchina gualaha. Uamang Isolko olakijaha aro rongbrako aro anchengo jagidotoba Uan dilgen ine uamang chanchijaha. Dao Ibri manderang gisik gnangbegipa dilgipa Mose minggipako manaha. Uan Isolko gisik

ragipa aro Uo bironggipa ongachim. Isol Moseni gisikko torom tambuko rikchina naataha, jedakode uano manderang Isolni kasan gimin chanchina aro uni simsakanirangna Uko mitelna mangel.

Mose manderangko okamchimongaha aro manderang apalbegipa biapo damsan tomdake uamangni dilgipa maiko agana uko knatimaha. Unon Mose anching jeo tomdake Isolko olakina mangel uandakgipa nokko rikna nangenga ine aganaha. Anching ruute tambuo donge songreanio, anchingni olakiani nokba tambuni nok onгна nanggen. Jedakode anching anchingni dongramko jitode ukoba jitna mangel aro dondikode ukoba dondikpana mangel. Ua tambu ba Gronggrikani tambu namgipa aro nitogipa onгна nanga. Nasimang uko rikna dakchakpagenma? Onanirangko one kamko kapagenma? Oe, chinga kusi onge onanirangko ongen aro kamko kagen, jedakode chinga Isolni noko ba torom tambuo Isolko olakina mangel ine manderang aganchakaha. Unon manderang tambutangtanchi reange gamchatgipa onanirangko rabaaha. (Onanirangni noksako jinmani nikkango mesokbo).

Ian rinokgipa aro namgipa bol onga ine mande saksa rebae aganaha. Anga ia pitolni pul donchakgipa gegitaniko kusi onge ona ine sakgipin aganaha. Iakai anga gipokgipa seengipa mosina barako rabaah ine mechik saksa aganaha. Ia inathigilrang nokkingrangna namgen ine sakgipin rabaaha. Mitamrang gitchakmarang, gitchak aro tangsim rongrangko bara aro bigilrangko rong simna rabaaha. Mitamrang gamchatgipa ripokrangko, jaksanrangko aro jaksitemrangko onaha. Nasimang gisiko sikbee aro miksonge onanirangko nangana batpilen chuonge rabaaha, uni gimin dondikboaha aro rabanabeaha ine Mose aganaha.

Banga salrangna manderang damsan kumonge torom tambuna kamko kaaha. Sakprakan antangtangni bil ama dipet kamko kaaha. Saoba bolrangko solaha, saoba similgipa chachatna aro chakina nongani toko dakaha. Mitam mechikrang seengipa nitogipa mosinani bararangko dake rabaaha. Mitamrang dobok kimil aro mosinani bararangko rong simaha. Sakgipinrang namnambee aro nitobee pul degimin bararangko rabaaha. Indake uamang bimchipe aro kusi ongee torom tambuko matchotkujana kingking kamko kumonge dakaha.

Matchotahaon manderang skanggipa salo ua cholguga gita apalgipa torom tambuni saraona napange chadengdulon mairongpile kusi ongbeenggenchim. Uamangni bakrobegipa songreaniko songremitingo Isol maikai uamangna simsakaha uko uamang chanchiaha.

Uamang ua salo knatogipa gitchamgipa olakiani gitko jinma damsan mingtaitaiaha ba ringtaitaiahakon. Ua git ian ongachim.

"Demitela gnang Uni cholgugarango aro mitela gnang uni sararango napbo.

Uko Mitelbo aro uni bimungko namchina inbo.

Maina Jihova nama aro uni kasae dakanian jringjrotna onga."

NOKSA MESOKANI

TOROM TAMBUNA ONANIRANG

Noksao uamang jerangni gimin gisik nangatakomanaha uarango bodol bodol dake mesokna aro aganna bisarangna cholko onbo. Bisarangna noksako mesokmitingo manderangni kusi onгани mik-kangko mesokna dakchakbo.

Ia pringo anching Ibri manderangni skango torom tambuko ba tambuni nokko rikani gimin chanchimanaha. Ia manderang maina torom tambuko nanga, nasimang nikengama? Iako singbo. Oe, uamang Isolko olakiram nokko nanga. Nasimang gilja noka mai onga uko chanchie niahama? Bisarang rikgimin nok mangnangni giminsan chanchie aganchakaiode uamangko masiatna joton kabo. Banga mondolirang mondolini dakchakaniko nangenggipa memberrangna chaaniko ba bararangko ona. Mondolirang skiprakgiparangko Jisuni gimin skiprakchina aro aganprakchina watata. Indide doktachi aro waachi rikgimin nok mangmang indake dakchakaniko onna amgenma? Indide sawasa madrangni nanganina dakchaka aro Jisuni golporangko skipraka ba knapaa? Uamangan Isolna kasaa aro Isolko olakiram nokko rika, uamangan banggipa madrang gesan, uan mondoli aro mondoliko rikgiparang onga. Uamanga meaparang aro mechikmarang, mea bisarang aro mechik bisarang gilja nokona Isolko olakina rebaa.

Indide maina anching rea aro uno maiko daka? Oe, anching gilja noko skango Ibri manderangni torom tambuo Isolko olakia gita, anchingni gilja nokoba Isolko olakia. Nango noksarangko mesokna dongjaode, giljao maikai Isolko olakia uko chanchiatna maiba cholrangko dake masiatbo.

JAKNI KAM

Lekachi ba esalchi gilja nokko dakbo.

Lesson 24

ANGNI MONDOLI ANGKO DAKCHAKA

Skiani Jepang :—

Ia lessono anching bisarangni mondolini bewalrangko masiroroe dalroromitingo, mondolini memberrang apsan Isolko olakian baksa, Jisua Isolni Depante onga ine skie rana dakchakgen. Aroba mondolia uamang sakantikon "Paani Noko" kusi ongani aro namnikataniko manatna cholrangko nikatna dilgen.

Sastroni Bak :— Luk 2:40-52. "Jisu Bisa Torom Noko."

Mukosto Kae Jakkalna :— Git. 122:1.

Noksa Mesokani :—Jisu Bisa Torom Noko.

Skiani gita git :—No. 5 ba 6.

SKIGIPANI TARISOANI

Skanggipa Sastroni golpoko tarisoanio skigipa antangan Luk 2:40-52 ona segimino Jisu bisamitingo maiko dakaha uko masi-chengna nanga. Jihudi jatni bewalo uamangni Jerusalemona songreanio maikai dakbewal ongachim uani gimin Sastroo mamung janapani dongja; maina uan uamangni uigiminrangnasa seaiaha. Jeba ongbo Watchangani Alaniko madrang noko aro torom noko manianiko Jisu Bisani dake uipaaniko anching nika. Ia lessonni miksonganio anchingni uia gita minggni aselrangni gimin nikgen. Skanggipa, Jisu Bisani torom noko olakimitingo bak manpaani onga. Gnigipa, Sastro skigiparang baksa agangrikani onga.

Salantion torom noko olakiani tomani gngangchim. Ia mingsing-gipa olakianiko manianio kragipa aro knatogipa gitrangko ringaha. Kamalrang gitrangko mingaha. Matburungrang, doorang aro min-chenggipa biterangko Isolna onna rabaaha. Uamangni onanirang aro manianirang mongsongbate ia Watchangani Alanio namgipa onani aro gisiko nange maniani ongachim.

Skanggipa changon Jisu Bisaba uni maa paa Joseph aro Mariam baksa torom nokona olakina reangon kusi onge, bebe aro kakket onghongmotanio Isolni sararang Isolko olakiaha.

Watchangani Alani somoimitingto kamalrang aro Sastro skigipa-rang aro dilgiparang nitogipa torom nokdringo mikkim gnange

asongachim. Uano uamang bebeko amgiparang pilakkon rimchak-soachim aro uamangni gisepo, Nazarethoni Jisu uamang baksa asongpaaha. Uni ia dilgiparang baksa agangrikna skaniko salsao ia golpoo mangan. Luk 2:46-47.

GOLPONI ABACHENGANI

Nasimang golpoko knatimon, Jisu Torom nokona reangahaon maiko dakahachim uko nikrikna manana, nibo.

Palestine asongo ritinkari ongbaahachim, aro unomiting somoio agimikni manderangni dalbegipa Jerusalem songjinmaona reangani somoiba ongachim. Bilsil antio ia songjinmao dalbegipa alaniko dakrongachim. Bangbea songregipa manderang songjinna gimiko aro songjinmani sorokrango gapaiachim aro nitogipa Torom nokona reangrongachim.

Jisu Bisaba bilsil chigni ongahaoa, ua torom nokona reangpana nangahachim. Joseph aro Mariam aro Jisu Bisa, uamang gipinrang baksa Jerusalemona reangpaon, mairongpile uamangna ua salara kusi ongbceenggenchim. Jisu pilakna bate torom nokko aro Jerusalem songjinmako nikchengon, mairongpile aiao inmanenggenchim.

O ama, anga torom nokona reangani somoiona kinkging sengsona nengnika ine Jisu magipana aganaha. Anga uano Isolko olakina ska. Aiao! manderang baksa Sastro skigiparang agangrikengachim ine naa chanchiana? Uano anga bangbea singanirangko anchingni Pagipa Isolni gimin singna ska.

Joseph aro Mariam aro Jisu Bisa torom nokona gongrake reangaha. Aiao, mairongpile nitobegipa marbleni pakmarang aro sonarang mairongpile salni tengao chingchaka ine Jisu Bisa aganaha.

Bakbakan uamang dalgipa dogi gita nitogipa torom nokni saraona rebaaha. Uano uamang bangbea manderangni reangengako aro rebaengako nikaaha. Uamang tangkarang, mesrang, paroarang, dokrurang aro gipin onanirangko Isolna onna rabaaha. Apalbegipa torom nokni sarao git ringgipa dolrang anchingni Bibleo donggipa knatobegipa gitrangko ringengachim. Haida Jisuba uamang baksa uano ringpaahakon.

Uamang ia gitrangko ringaha, chongmotan:—

“Demitela gnang Uni cholgugarango, aro mitela gnang Uni sararango napbo, Uko mitelbo, aro Uni bimungko namchina inbo; Maina Jihova namgipa onga Uni kasae dakara jringjrotnan aro uni bebe dakara pilak chasongranganon onga.” Sastroni podrangko mingan baksa aro knatogipa gitrangko ringan baksa bangsirang-

ko sikaha aro sika moanirangko sika moaha. Haida Jisuba uamang baksa kasne jarikpaahakon. "Jihovani nokona reangna hai ine aganon anga katchaaha."

Ia pilakan nitobea, Torom nokni sararango olakina nama ine Jisu aganaha. Uamangni salrango Jisu Bisaba Jerusalemni barandaona reangrongachim. Iano Sastro skigiparang manderangna Isolni gimin skiaha. Jisuba ruuta salna uano knatinpaaha. Singani mingprakprakko Jisu aganchakaha aro Jisuba uamango singskaaha. Haida Joseph aro Mariam Nazarethoni Sastro skigiparangba uarango aganchakna manjahakon. Torom noko donggipa skigiparang ia bisani singanirangko aganchakna kusi ongaha maina ua bisani skie raani gimin kusi ongaha. Jisu namen kusi ongaha aro noktangchi repilani gimin gisik rajarangaha. Mariam aro Joseph repilangnitingo Jisu bisaskarang baksa reangpaenggen ine chanchie mamungkoba sandijaha, indiba chele reangmanoa uko nikjaha. Unon uamang rangsan rebapile nioa, torom noko Uko nikeaha. Chinga nangko ambeoba nikjaha, naa maina indake dakaha ine Mariam aganaha. Jisu uamangko jajrengatna mangsongjachim indiba ua gisiko nangbeahani gimin pilakkon gualahachim. "Naa angko angni Pagipani noko dongna nanga ine uijama?" ine Jisu singaha. Indake Josep aro Mariam aro Jisu Bisa songtang Nazarethona reangpilaha. Uni jamano Ua antangni Torom noko kusi ongan salrango gualjaha aro pilnipil uni katongo ia gitko agantaitaiaha. "Jihovani nokona reangna hai ine aganon anga katchaa."

GOLPONI JAMANO NOKSA MESOKANI

Ongna amode agangimin golpo gita Jisuni torom noko dongningni noksako mesokbo. Jisu torom noko maiko dakaha? Uko singbo. Uamang aganchakchina. Anga nasimangna daalo ia golponi bakko, Sastro Luk 2:46-47 ona poraigen. Unon bisarang Jisu Bisamitingo maiko dakaha Uko nikgen. Name knatimbo aro gisik onbo. Unon Jisuni mondolina dakchakaniko nikgen. Unon bisarang Jisuni skie raani gimin singanirangko aro aganchakaniko ia ming gitam skie raniko nikgen.

Sastro Mukosto kamitingo bisarangko chadengatbo.

BIANI

Kasabegipa Isol, chinga chingni mondolina nangko mitela. Chingko pilak kamon sakprakpraknan mondolini dakchakengana.

nangko mitela. Chinga kakket aro bebeo rena chingko dakchakbo. Jisuni bimungo bia. Amen.

JAKNI KAM

Bisarangko slateo ba lekao mondolini jakkalani bosturangko salatbo.

Lesson 25

ANGNI MONDOLI TANGKAKO NANGA

Skiani Jepang :—

Anchingni ragimin lessonrangoni, jerangan Isolko apsan olakia aro una kasaa aro uamang je kamoba mondolio dakchaka uamangan Isolni madrang ba mondolini memberrang onga ine bisarangko uiatmanaha. Uamangni dalroroan baksa mondolini kamo gisik onataniara, mondolini kamo jakdangdikpaani onga. Ia antio uamangni uina nanggnia, je kamko kaoba tangkako nanga; aro ia onaniko onanina mondolini kamo dakchakpaani chol mingsa onga ine uiatani onga. Uamangni onenggipa tangkako, mondoli mai mai kamrangna jakkalenga aro indake onanichi mondoliko maikai rakienga uko masiatani onga.

Sastroni Bak :— 2 Raja. 22.1-7; 23:25; 2 Serikani 34:1-3, 8-13, 29-33 Torom Nokko Rikpitaiani.

Mukosto Kae Jakkalna :— Git. 96:8.

Noksa Mesokani :— Torom nokko taritaiani aro una onna rabaanirang.

Skiani gita git :— No. 8.

SKIGIPANI TARISOANI

Ia antini golpoko aganani, Juda asongni chibongagipa raja Josiani gimin onga. Ia nambegipa raja uni dambemitingonin uni atchutang Daud gita namako dakna joton kaaha; aro ua Isolni nikanio kakketgipa aro namgipa raja ongachim. Uni sason aro bewalrang uni panteonin namachim. Ua mite dakanirangko ga-

lataha. Uni golpoko talbate aganna 2 Raja. 22:3-7 ona name poraibo. Naa antangan uni gimin 2 Serikani 34:8-13 ona apsan golponi gimin segiminko nisusae poraibo. Ia lessono anching Josia maikai onanirangchi torom nokko rikpilitaiaha aro uko rongtalataha uko nikgen. Uamang indake Jerusalem tomdake beberagipa Isolko olakitaiaha; aro indake Josia rajani dalbegipa Isolna dakgimin kamko serikgimin onga.

Aro Mose pilak niam gita, uni katong gimikchi, aro uni bil gimikchi Jihovana anpilgipa una skang ua gita pilak rajaba grichim; aro uni jamanoba ua gita pilakba ongakajaha. 2 Raja. 23:25.

GOLPONI ABACHENGANI

Anchingni mondolio anching bangbea kamrangko dakna ba kana nanga, aro mondoliba anchingko dakchaka ine nika. Anchingni mondoliko dakchakna anching maikoba dakama? Bisarang aganchakchina. Anga nasimangna Sastroni golpo mingsako badiaba manderangni maiba cholrango mondoliko dakchakahani gimin agangen.

GOLPO AGANANI

Josia nunggipa dambegipa rajasan ongachim. Ua bilsil chetsan ongaingpition uni manderang uko raja songaha. Josia Isolna kasagipa ongachim aro uni janggi tanga gimiko ua uni namnikaniko dakna joton kaaha. Ua uni dalroromitingon uni manderangni Isolko gualae namgija kamrangko kaaniko nikaha. Uni gimin ua duk manaha. Minggipin ua uamangni olakiram nokni gruanganiko nika dukko manaha. Ua ruutha chasongo Isolko olakina rikgimin noksa ongachim. Pakmarang bepruangengaha aro nokkingrang olduangengahachim. Itni pilengrang aro begimin roongni moelan gapaiachim. Grugimin torom nokko nika raja duk manbeaha. Jensalo Josia raja bilsil 26 ongaha, ua uni manderangko dakchakna tariaha. Ua uni kadongna mangipa nokolko okame, Anchingni Isol chongmotgipa Isol onga ine uina nangenga, ine aganaha. Uamang namgipa Isolko olakiram nokko nangenga, jeo uamang rebae damsan Isolko olakina nangenga. Anching torom nokni pakmarangko aro nokkingrangko taritaina nangenga. Ia torom nokko anching changsa nitogipa ongattaina nanga. Unon manderang rebae uni sararango uko demitelgen.

Gisik gnanggipa raja torom nokko taritaina aro pakmarangko repitaina banga tangkarangko nanggen ine uie, antangni nokolko

okame kamal dalbatgipaona reange banga onanirangko rachina aganchina watataha. Uni nokol rajani geeta gita dakaha aro kamalrangba rajani agana gita dakaha. Bolni mistrirang aro roongni mistrirangna tangkarangko onaha. Uamang bebegipa aro namgipa manderang ongachim. Ia tangkachi chinga banga boltongrangko bregen ine bolni mistrirang aganaha. Ia tangkachi chinga roongrangko dokgen ine roongni mistrirangba aganaha. Indake uamang dol gnian Jihovani olakiram nokko rikna kusi onge kura-chakaha.

Indake uamang torom nokko rikpiltaiaha aro uko rongtalataha. Kam kagiparangba bil ama dipet bimbhipe kaaha. Manderangba uamangni kusi onge ongimin tangkachi changsa torom nokko rikpiltaina manahani gimin kusi ongbeaha.

Josia rajaba kusi ongbeaha, maina ua grugimin torom nokko rikpiltai e antangni manderangko changsa Isolko olakiattaina manaha, aro uan Josia rajani uni sason kaa gimiko Isolko olakiatna sikaningachim aro indaken chusokaha.

NOKSA MESOKANI

TOROM NOKKO RIKPILTAIANI

Agangimin golpo gita bisarang maiko nika nichina. Kam kagiparang maikai kamaloniko tangkako rachakenga uko nichina. Kam kagipa mandeni chongipa mea bisaba pagipana onatgimin tangkako raengako aro madrangoni saksa Isolni gimin chanchigrikna torom nokko rikpiltaina onna sigkipa tangkako mesokchina aro uko nichina. Indake uano bisarangna bangbea gisiko nangatani donga.

BIANI

O Isol, chingni mondoli banga kamrangna tangkako nanga. Chinga mea aro mechik bisarang, meapa aro mechikmarang gita nangni kamo bakko manpana Robibar salantio onaniko rabana chingko dakchakbo. Jisuni bimungo bia. Amen.

JAKNI KAM

Asteko rae bisa sakantiko maiba bostuko dakatbo. Jeko gilja nokna rabae onanio uni mondoliko dakchakna mangan. Jekai pulrang, kitaprang, noksarang aro uandake mesu samjakrang.

Lesson 26

ANGNI MONDOLI ANGKO NANGA

Skiani Japang :—

Jensalo anching mondolini member ongaha, unon anching mondolio maiba bakko rapana nanga ine anching uia. Reanggipa antini lessono onanirangko onanichiba mondolini ripeng onge dakchakpaani chol mingsa onga ine chanchiataha. Ia antio uamangko masiatania mondolio kamko kapaanian mongsonggipa kam mingsa onga ine masiatna aro kusi ongatani onga.

Sastroni Bak :— Wat. 16:1-3; 2 Timothy 1:5; 3:10-11, 15. Timothy Chongipa Mea Bisa Dakchakgipa.

Mukosto Kae Jakkalna :— I Korinti 3:9.

Noksa Mesokani :— Giljachi Reani aro Bisarangni Giljao Kam Kapaani.

Skiani gita git :— No. 6 aro 21.

SKIGIPANI TARISOANI

Timothy gimin skina tarisona Watatarangoniko aro Paulni sea chitirangoniko poraibo. Uni bisamitingni gimin uina Paulni 2 gipa Timothy 1:5; 3:15 ko poraibo. Iani mangsonga Timothy bisamitingo uni magipa Eunice aro uni anbitang Loischi name skie dalatako manaha. Uni magipani gimin Sastroo mamungkoba janapja uan Greek Jihudi onga inesan janapaia. Wat. 14:8-23 ona segimino gita Timothy aro uni nokgimik, Paulni skanggipa wenroromitingon gisik pilatako manaha. Timothy Kristianni bewalrangko Paulni seokgimin brigimin manderangchi Lystra mondolio skie raaha. Wat. 16:2-3 ona name poraibo. Unoni intalsa Timothy Paulni nangipa ripeng aro dakchakgipa ongbaaha. Gni-gipa, Paulni kadongna mangipa ongbaaha. 2 Timothy 1:1-4 ona poraibo. Indake Paul Timothyko gipin mondolirangko dakchakna watataha. Mongsongbate uko mondoli gegitamko dakchakna watataha. 1 Timothy 4:11-13 ona poraiode Timothy banga dakna nanggni kamrang ko janapaniko nikgen. Paulni Timothy sea chitiko name poraie uko kasagimin de ine mingahachim dambegipa pante maikai mondolirangna dakchakani ongaha, chanchi-

bo. Nasimangoniba saoba sagkipin Timothy ongpana sikgenma Je bisarangan Jisuna dangdike onna ska uan sakgipin Timothy onngen.

NOKSA MESOKANI

Giljachi reani noksako mesokbo, ua bisarang maiko dakenga? Uamangni giljara anchingni gilja baksa apsan ongama? Uamangko dakchakani cholrang mai? Uamangni giljao dakchakpana maiko mangel? Noksako mesoke singbo. Jekai gitalgipa memberrangko rimchaksoani, noksarangko donani, pulrangko donani, kelkirangko oani, gipin bisaskarangko rimbaani, aro leka ba maiba bichritrangko kolame galani indagkiparangko mesokna mangel.

GOLPONI ABACHENGANI

Daalo anching mondolio maiko dakchakpana mana uko chanchitaiani onga.

Anching Timothy minggipa chongipa mea bisani gimin Sastroo poraiaha Ua uni songo ba mondolio uni dalroromitingo maikai Kristianni kamrango dakchakaha ine naa name knatimode nikgen.

TIMOTHY MEA BISA DAKCHAKGIPA

2 Timothy 1:5; 3:10-11, 15. Watatarang 16:1-3 ona poraibo.

Saksa mea bisa Timothy minggipa magipa Eunice aro ambitang Lois baksa dongachim. Uamangni nok namgipa aro kusi ongkipa nok ongachim, maina uamang Isolna kasaachim aro Isol uamang baksa dongachim.

Timothy bisa intal Isolna kasana aro salantio uni namnikanio janggi tangna joton kachina skianiko manaha. Uni magipa aro ambitangba una Sastroni golporangko aganrongachim. Indake ua chonningonin Sastroni golporangko uia aro Sastroni podrangko mingna uiachim. Timothy bisa intalan Jihudi mea bisa sakprakni skie raa gita, Naa nangni katong gimikchi Isolna kasabo aro Nangni songsulna antangna gita kasabo ingipa skianirangko uiachim. Ua jegrikgijagipa Abrahamni golpoko, aro namgipa gisik gnanggipa dilgipa Moseni golpokoba aro kadonggipa mes nirikgipa Daudni golpokoba tale uiachim. Timothy, chinga nangni gimin uni skianio janggi tangna skie raanina rasong chaa ine magipa aganaha. Naa Sastroni golporangko aro sona podrangko uie raanina rasong chaa; indiba nangni Abraham gita Isolna kasana aro mes nirikgipa Daud gita uo kadonge pangchakanina kusi ong-

bata ine uni ambitangba aganaha. Timothy chonmitingo Jisuni gimin knakujachim maina uni magipa aro ambitangba Jisuni gimin mamungkoba uikujachim. Jihudi manderang Isolna kasa-achim, indiba uni Depante Jisuni rebaanini giminde uikujachim.

Salsao mande agital sak gni uamangni songona rebaaha. Uamanga Paul aro Barnabas ongachim. Uamangoni Timothy, uni ambitang aro magipa Jisuni gimin skianiko manchengaha. Ia skiprakgipa sak gnini reangna skang Timothy magipa Eunice anga Kristian onгна ska ine aganaha. Ambitang Loisba angaba Kristian member ine chanako manna ska ine aganaha. Angaba Jisu gita onгна joton kapagen aro Lystra mondolio Uni kamko kana dakchakgen ine Timothyba aganaha. Changgipino Paul Timothy songona rebataiaha Unonitingo Timothy chonengpiti-chim indiba Paul ua bisani nangipa onganiko manderangni agan-aniko knaaha. Haida, manderang uni mondolio ua maikai dakchakaha, maikai ua Jisuni gimin manderangna skiaha, aro nang-enggiparangna dakchakaha uani gimin Paulna aganahakon. Unon Paul Timothyko aganaha. Anga nangni gimin nangipa agananirangko knaaha. Timothy, naa angni kamo dakchakgen-na? Anga dambegipa dakchakgipako biapsaoni biapsaona song-reanio nangenga. Nang gita Jisuna kasagipako aro uni kamko kaanio dakchakgipako, jerangan Jisuni kasaanirangni gimin knakuja aro uikuja indakgipa manderangna dakchakna nangenga. Naa rebae angko dakchakgipa onggenma ine Paul singaha.

Indiba uni magipa Eunice aro uni ambitang Lois aro Timothy Paulni skia gita dakna kurachakaha. Indake Timothy Paulni nangipa ripeng aro dakchakgipa ongbaaha. Timothy noko jekai kiinkim aro bebegipa onga, mondolioba ua kimkingipa ongachim. Indake ua Isolo pangchake gipin mondoliko dakchakna reangaha; aro uni ripeng Paul Isolni nangipa ripeng ongaha.

BIANI

Kasabegipa Isol, chinga chingni mondolio bakko rapana mananina nangko mitela. Chingko name aro rongtale rakina dakchakbo. Chinga maikai nangni manderang onga ine masigen aro gisik ragen chingko dakchakbo. Jisuni bimungo bia. Amen.

JAKNI KAM

Pulrang aro doorang gnange uamang baksa agangrikenga gita noksako salbo. Je bisaan Sunday Schoolona rebaja, ba sagipana, buchuma ba budepa ba maa paana, ba Kristian onggiagipana maiko ongenchim uko chanchiatbo.

Lesson 27

CHINGA APSAN KAMKO KAA

Skiani Jepang :—

Ia bonkamgipa lessono mondolini dakna nanggni kamko kandike mongsongbatgipa kamrangko mesoke uiatna nanga. Bisarangba mondolini bak ongpaanio Jisuni uni ripengrangna dakna donang-gimin kamrango rengsiko manpaa ine mesokna nanga. Uamang-ni mondolio kamko kapaanio uamangko chuongnike kusi ongatna joton kabo.

Sastroni Bak :—

1. Reo. 25:1-9; 35; 4-36:7; 40:17, 33. Gilja Nokko Nang-gipa Manderang.
2. Luk 2:40-52. Jisu Bisa Torom Noko.
3. 2 Raja. 22:1-7; 23:25. Torom Nokko Rikpiltaiiani.
4. Watata. 16:1-3; 2 Timothy 1:5; 3:10-11, 15. Timothy Mea Bisa Dakchakgipa.

Mukosto Kae Jakkalna :— Lesson 23-26 ona kagimin pod-rangko mingattaichina.

Noksa Mesokani :— Lesson 23, 24, 25, 26. Bisarang aro dal-giminrangni giljao kam kaani aro uamangni skie raani.

Skiani gita git :— Git. No. 5, 6 aro 18.

SKIGIPANI TARISOANI

Ia bakni gimin skimitingo ming gitam Sastroni golporangan Torom Tambu ba Torom Nokni gimin onga. Ibri manderangni uamangni olakiani biapni gimin.

GOLPO AGANANI

Ia anti nipilani onga. Uni gimin lesson 23, 24, 25 aro 26 ko nipilmitingo noksarangko mesokbo. Noksaringan ia lessonrangni mongsongbatgipa skiani onga. Uarang bisarangko gisik raatgen aro masiatgen. Noksa kingprakko mesokon, golpoko gisik raatna singanirangko singbo, aro mukostorangko mingatbo. Unon bisarang nangko golporangoni mingsako aganattaiode aganbo. Naa

noksarangko mesokon golpo antini gimin mingsa ba minggni singa-nirangko noksaantonikon singbo.

1. Jekai skigipa noksao Gilja Nokko nanggipa manderang. Maina Jihudi manderang gilja nokko nanga? (Aganchakani Olakianina). Uamang maikai uamangni olakiram Torom tambuko rikna onanirangko rabaaha? (Gisiko nange aro kusi onge).

2. Gnigipa Noksa:--Jisu Bisa Torom Noko.

Jisu Bisa Torom Noko Maiko dakaha? (Aganchakani--Isolko olakiaha, knatinaha, singanirangko aganchakaha; aro antangba singskaaha.)

3. Gitangipa Noksa :-- Torom Nokko Rikpiltaiani.

Josia raja Isolko olakiatna aro uko gisik rapiltaina uni manderangko maikai dakchakaha? (Aganchakani--Ua torom nokko ni-toatna aro rongtalatna dakchakaha.)

4. Brigipa Noksa :-- Timothy Mea Bisa Dakchakgipa.

Timothy maikai uni mondoliko dakchakaha? (Aganchakani--Jisuni gimin manderangna skiaha; gipin manderangko Kristian ongatna dakchakaha aro mondolirangko nirokaha. Singanirangko singanichi bisarangko kakketgipa aganchakamiko manatna joton kaatbo. Uamang singaniko singon aganchakgen. Indake uamangko chanchiatani cholrangko dakna mangen aro uamangni mondoliko dakchakgen.

BIANI

O Isol, chinga nangko chingni knagimin golporangna mitela, maina jechi naa chingko nanggipa dakchakgiparang ongatna mesokaha. Uni kamko kana bangbata cholrangko chingna mesokbo. Jisuni bimungo bia. Amen.

JAKNI KAM

Bisarangko noksarangko salna ba maiba bijakrangko chite bosturangko dakatbo maikai bisarang mondolitango dakchakna mana, mesokbo.

Lesson 28

ISOLNI AGILSAKNA SIMSAKNA DAKCHAKANI

Skiani Japang :—

Gitai bakni ia skanggipa skianiara Isolni dakgimin kamko chanchiatna aro uni ongatani kamo bimchiye dakkuenga ine masiatna dakchakna nanga Agilsakko kusi ongatna aro nambatgipa biap ongatna gita uamang un baksa kam karimpana cholrangko amna nanga.

Sastroni Bak :— Aba. 1:1-31; 2:1-3; 8-10, 15. Isolni Agilsak.

Mukosto Kae Jakkalna :— Angni pagipa kam kakuenga aro angaba kam kaa. John 5:17 ba 1 Tim. 6:17 ba IKor. 3:9.

Noksa Mesokani :— Isolni agilsakna simsakna dakchakani Isolni apalni agilsakni noksarang aro bisarangni banga dintang cholrangchi Isol baksa kariimpaani noksa.

Skiani gita git :— No. 49 aro 91.

SKIGIPANI TARISOANI

Anching Isolni agilsakni nitoanirangni gimin aro Ongatgipani gisik gnangani aro namnikgimin chanchianio simsakbatna nanga. Agilsakni nitoania, aiao inmananirangna aro tik dongiminrangna anchingni mikronrang aro katongrangko oe Pagipani simsakaniko mesokchongnota ine aro uarang pilakan Uni gimin aganani gnang ine chanchie nina nanga. Pilnipil Dalgipa Skigipa, Pagipani agilsakni aiao inmananirang aro uni nitoanirangni gimin Isolni kasani aro simsakanini gimin aganimiting jakkalaha. Mati 6:28-9 ona poraibo.

Gipin Robibaro Abachenga odhaisa aro odhai gnio talatani gita aro anchingni daalo nikmangiminrang gita Isolni ongatgipa kam gimikni gimin chanchiatna bisarangko dakchakna joton kana nanggen. Nangni nambatgipa tarisoania antimiting (Robibarna skang) apalona mana dipet reongkatna nanggen. Gitalgipa aro rongtalbatgipa nikgni nikanirangchi aiao inmananirangko nikna joton kabo. Nangni nikenggiparangni gimin Bibleo banga pod-rango ringanirangni gimin chanchibo. Uarang, Git. 8:1, 3-4; 19; 65:9-10; 104:10-15. "Salgirang Isolni rasongko aganpraka; Bang-bangan uni jakni kamko mesoka. Git. 19:1.

Nangni apalni nikanirangchi uidapaniko manmano noktangona reange Aba. 1:1-2:15 ona poraibo. Uano mongsongbatgipa podrangni ortoko rimbo.

"Isol salgi aro Aako ongataha—Aro Isol antangni dakgiminko niktokaha aro nibo uan nambejok." Aba. 1:1, 31.

Ruutbea chasongrangna skang agilsakko ongatani matchotantal, daororo Isolni una kam kaenganiko Bibleo mesokja. Banga Daudni Gitrangko poraie nibo. Isol agilsako daona kingking kam kaenganiko gisik onbo. Jisuba apsan dakaha ine gisik nange chanchibo. Doorangni gimin ua aganaha, "Nasimangni salgini Paa uarangna alenga." (Alduaha ine ongja). Bibalrangni giminba ua indake aganaha, Isol abani samrangko nitoe ganat chinataha" Uni gimin anching skigiparang, Isol agilsakna daona kingkingba anching manderang gitan kam kakuenga ine masiatna bisarangko dakchakna nanggen, aro uamang mai cholrangchi uko dakchakpana mangan uamangko chanchiatna dakchakna nanggen.

GOLPONI ABACHENGANI

Anchingni dilgipa, apalgipa, nitogipa, aiao inmangipa agilsakni abachengani Bibleni skanggipa golpoko nasimang uama? Ia golpoko knatimmitingo, anchingni Pagipa Isol, agilsak abachengaonin, Uni dedrangni kusi onganina maikai daksoaha. uko aganna chanchirikbo.

GOLPO AGANANI

Ruutbea chasongrangna skangon agilsakko dakchengaha. Ua agilsakni abachengani ongachiin. Agilsako songrang, nokrang dongna skang aro bolrang, pulrang aro doorang, jeba dongna skangan ua ongachim aro Isolba uanon gnangchim.

Dao Isol uni agilsako, measarang, mechikrang, mea bisarang aro mechik bisarang pilak donggiparangan kusi onge dongna manna gita nitogipa aro ansenggipa biap ongatna skachim. Uni gimin ua ritchagipa, gitchakmranggipa aako pindapani gita, uano tangsekgipa samsirangko chaataha. Salakimatna aro biterangko chana gita nangchina ua changrogipa aro nambegipa bolrangko chaataha. Ua bolni cheksirango doorang bac uarangni knatobegipa gitrangko ringchina donaha. Ua chimikrangko, chiringrangko, dalgipa chibimarangko, chagipa tangsekgipa sam bolrangna aro uni dedrangna daksoahachim. Sagalrango rokomari natokrangko aro aao jakkaltogipa bangbea rokomari matburunrangkoba ongate gapataha.

Agilsakko nitobatna Isol rokomari rong gnanggipa pulrang, gitchak tangsim, rimitsrang, rimitmrang, gitchakmrang, tangsimprang aro rokomni rokom bibalrangko aro pulrango bilroroe dime rochina, mamanti rokomni inepiliprangkoba dakdapkuaha. Pilakni kosako agilsakko dingatna salko, kasinatna aro dongtoatna bangbango balwarangko ua dakaha. Unon agilsak nitobejokchim.

Una agreba Ongatgipa, bisarangna, pagipa magiparangna aro pilaknan nengtakaniko aro tusianiko nanggen ine uie tomtomgipa walkoba daksoaha. Walo banbango tengsuchina ua jajong aro chingchetgipa askirangkoba donaha.

Isol karirangkoba donsoaha. (Balsalkari) ba Ritimkarini jamano dingkari (wachikari) gegat-gamgatkari, ian bilsini gisepo ansengbatgipa salrang onga. Ia jaranga September, October aro November onga. Ia jarangni jamano sinkari onga. Kariprakan Isolni donsogimin gita antangtangni somoiko jarikbaa. Karitang gita nitoanirangkoba rabaachin. Somoitango ba karitango pilakon nitogipa ongchina Isol dakaha. Indagipa agilsakko anchingna jakkalchina aro kusi ongchina Isol daksomanaha.

Agilsakni abachengaon, ongatgipa Isolni uni dedrangna gipin gisik gnanggipa mangsonganirangkoba donsoaha. Ia dalgipa, apalgipa, nitogipa aiao inmangipa agilsakko ua anchingna onanisan ongaija indiba una simsakanio anchingna bakkoba onpana ska. Isol uko kusi ongkipa, ansenggipa nitogipa biap ongatna rakichinaba anchingko dagkipa ongatna ska. Maina skangoni taltal daona kingkingba Isolni kam matchotkujaenga. Bilsin antin bibalrang bal-taienga, mepiliprang bilroroenga, doorang bolgrimo mikoenga bolrang aro gipin rokomari chagiparang aro rokomari matburungrangna anchingna gana chinani aro chaani ringaniko matchotgijan onenga. Agilsakko kusi ongatna aro nitoatna Isol anchingnan kadongsoa.

Iamang pilakan anchingni Paa Isolni anchingna gisik gnanggipa daksoanirang onga maina ua anchingna kasara aro anchingni kusi onge tanganiko namnika.

GOLPONI JAMANO

Apalo donggipa bosturangni gimin bisarangko agangrikchina onbo. Isolni kasaaniko mesokgipa noksako mesoke, uano maichi mesoka uani gimin singbo. Noksaoniko aganna manjaode apalo donggipa uamangni nikronggiminrangni gimin chanchiatbo. Uarangchi Isolni kasaani aro simsakanini gimin chanchina man-naba donga. Uni agilsako Isolni simsakani sakkirangko uimanon, uamang Isolni onani, chaani, gana chinani, dongchakani, chi, aro

abrirango, warirango, bolrango, mi misirango, mes aro matchu jakrango, bibalrango aro gipin gipinrango uamangni uianiko bangen aganna mangel.

Ia singanirangkoba singe, uamangni knagimin golpoko chanchiatna dakchakgen. Anchingni kusi onganina Isolni daksoanirangni gimin golpoo maiko nikna manaha? Anchingna uni skang-gipa chanchiania mai? Isolni uni dedrangna mai gipin daksoanirangko dakaha? Isolni anchingna daksogimin gita nitogipa agilsakna simsakna mai cholrangchi mangel? Iarangna agre gipin singanirangko jakkale bisarangko Isolni agilsak aro ongatgiminrangni gimin uibatatna dakchakbeani ongen.

BIANI

Kasagipa Isol, chingni nitogipa agilsakna nangko mitela. Chinga uko nambatgipa aro kusi onghatgipa biap ongatna nangko dakchakpana manani gimin kusi onga. Bebena chadengna, kam kana aro chingni bil gimikchi nangko dakchakpana chingko patibo. Jisuni himungo bia. Amen.

JAKNI KAM

Isolni aiao inmangipa agilsako bisarang antangtangni gisik nangbatgipa mingsani giunin slateo salna mangel.

Lesson 29

ISOLNI ONANIRANGKO SAKGIPINRANGNA ONSKAANI

Skiani Japang :—

Ia skianichi anching manderang aro jatrang sakgipinrangna onskaanio cholrangko nikbatna bisarangko dakchakgen. Aroba Isolni namgipa onanirangko sakgipinrangna onskapaanichi maikai uamang Isol baksa karimpana mana uko nikatgen.

Sastroni Bak :—Neh. 8:1-12. "Bak Onpaani Mitelani."

Mukosto Kae Jakkalna :—Angni Pagipa daona kingking kam kaa angaba kaenga. Joh. 5:17.

Gisik Raatani Podrang :— “Agilsak Gitelni kasae dakanirang-chi gapa.” Git. 33:5. “Agitalrangko kasae soka chakna Jamangna-be.” Ibri 13:2.

Noksa Mesokani :— Alaniko bak manpaani. Daororo anching-ni agilsako, manderang aro jatrangni namgipa onanirangko onskani, Missionaryrangni kamo.

Skiani gita git :— No. 17.

SKIGIPANI TARISOANI

Jensalo naa Bibleni golpoko agana tarisoa, ua golponi pangchakani Bibleni katarangko namedake poraichengna nanga. Namgipa skigipa uni dolna jakkalanina bate bangbatako uina antangan joton kasoa. Ua bisarangni masina aro gisik rana kadongna mangnigipa nangringipa aro ramrangipa onganirangni gimin uianiko namen bangen chimongsona nanga. Iani aselan kandikgipa Nehe-miani kitap gimikkon poraitoksrangsoode dakchakbeani onngen. Aselrangni apalbatgipa nikani, jamano agangnigipa ia antini golpoo dilangna nangni antangni Bibleni gimin uianiko bariatgen aro Kristian gita ba bisarangni skigipa gitaba minggnion dalrorona nangna ondapgen.

‘Ua odhai, anchingni golpoko jeoniko raaha, uan Nehemia aro Ezrani toromni namatanirangoni mitamrangko talatna onga. Cholgugani apalo jinmani tomdakanio Niamni kitaponiko Ezra poraiaha. Jeko poraiengachim uni ortoko Levirang jinmana talate onskaaha. Manderang antangtang papko dakaha ine chanchie uie grapna abachengaha. Indiba uamangni dilgipani Isolni namanini gimin gisik raatanio uamang kadimeatako mane, uamangni kalimania katchaaniona pilatako manaha. Nangni Bibleni golpoko bisarangna agangnigipara Ezrani geetaniko mangrakatani onga.

“Mamungba tarisoani grigiparangna bakrangko onatbo.” Neh. 8:10.

Uni dalgipa mangsonganiara, duk mangiparangna ba nangenggiparangna onpaanian, Isolni namanina Mitelani onanirangoni baksa gita onga ine bisarangni uianiko bangbatatna aro uni ortoko masiatna onga.

Ia uidapaniara skango bisarangni Isolni namgipa onanirangko onskapaaniko nikna manode ine mangsongani ongbata.

Uamangni dilgipani kupatiani baksa gita, skangni salrango Mielani Sale ia gamchatgipa, dakchakani onggiipa chanchianiko mesokani onga ine anching nika.

“Gitelni katchaania nangni bilakani onga.” Neh. 8:10.

Ian Kristian skigiparangna nambegipa kupatiani onga. Anchingba Gitelni katchaanichi gapatmangiparang onga nanga. Anchinga beenni, gisikni aro janggini bilakbataniko nanga. Maiko "Gitelni Katchaani" ine minga. Ia katchaaniko anchingni Isolni anchingna gapatanisa ine mangsongani ongja. Banga dake nigiparang iakon uichongmotaha je, gisiko nanganisa beenni gisikni aro janggini bilakaniko rabaa. Indakgipa kamsa kusi onganiona pilatgipa onga.

GOLPONI ABACHENGANI

Mitelani onanirangna bisarang mai cholrangko dake tangka, paisarangko chimongenga, uani gimin agangrikbo. Uamangni katchaani aro nitelani onanirangni rabagniko aro uan Isol baksa karimpaani chol onga ine chanchiatna dakchakbo. Anchingni Bibleo, agilsakko kusi ongatna, Isol baksa kariimpagipa manderangni golpo mingsa gnanng. Uamang anchingni dakenga gita tiktak dakaha. Uamang Mitelani Onani Salo, Isolni namgipa onanirangko sakgipinrangna onskapaaha.

GOLPO AGANANI

MITELANI ONANIKO ONSKAPAANI

Jerusalemni manderang changsao kusi ongbegiparang onga-chim. Indiba bobilrang uamangni guarerangko peaha, cholgugarangko waalchi soaha aro uamangni nokrangkoba nisiataha. Indake ongani gimin ruuta somoirangna uamangni songjinma gimagimin ongaha. Indiba uamangni dilgipa Nehemia, uamangni guareko riktaina aro nokrangko rikpilna uamangko dakchakaha.

Unon pilak manderang sonjinmani cholgugani sepango donggipa bangbanggipa biapo tomchimongaha. Uamangni kamal Ezra chubatgipa biapo chadenge Bibleko poraiani aro Mitelani Onani tomaniko uamangko dilaha.

Unikoa uamangni gisik gnanggipa dilgipa Nehemia aro Ezra kamal manderangna indine aganaha, "Ia sal katchabeani sal, ia sal Mitelani Onani Sal onga. Dao nasimang noktangtangona reange alaniko taribo. Isolni anchingna kasae dakani kamrangko chanchie salgimiko kusi ongbo. Nasimangni noktangtango mitelani alaniko chana asongon Isolko mitelbo. Indiba kangalgiparang-koba gualnabe. Alaniko dakna manpagijagipa mitamrangba dongnaba donga, saobarangde okkriengnaba donga ine gisik rabo. Indakgipa nangenggiparangna nasimangni alani bakrangoniko onpa-

chongmotho. Indakesa nasimang Mitelani Onani katchaani salko manna amgen.

Manderang noktangtangona reange, kusi ongbee alanina tari-soaha. Beenrangko angaha, mirangko ginde dakaha, mitam bae, mitam ritchae dawilgipa kekrangko dakaha, dobok sokoniko mak-kon dakaha, mesurangko songaha aro gitalgipa dumbur biterangko kejur biterangko chimongaha.

Banga nokrangon magiparang bolni rachakani aro gipin dal-dalgipa rachakanirangko raongkattokaha. Dao naa maiko dak-nasienga ine bisarang singaha. Sepanggipa sorokni sambao dong-gipa manderangna iarango chaaniko gapatnasienga ine magipa aganchakaha.

Bisarang magipani nomgipa been aro songgimin mesurangko rabaaniko nitimaha. Uamang uni namgipa makkon aro bagipa ru-tirangko rachakanio donengako nikaha. Rachakaniko chaani-rangchi dakchakpana uamang mairongpile kusi ongachim.

Noksulni bisarang ia gitachakgipa, nitogipa dalimrangko nam-nikbegen ine bisa saksu aganaha.

Anga chanchia, ia mitingipa rangimin draka bite, kismis aro chigipa kejurrangkon namnikbatnaba donga ine sakgipin bisaba aganaha.

Uamang ringna skon, ia kasingipa draka bitchi aro bitchia-rigipa narangkon, pilakna bate ringtonibatgen ine sakgipinba agankuaha.

Sorokni kamao chonggipa noko donggiparangni noksako dakna mairongpile kusi ongbeani onggenchim!

Sorokni kamao chonggipa noko donggiparangni noksako dakna mairongpile kusi ongbeani onggenchim!

Unikoa pagipa bosturangchi gapatgimin rachakaniko detoma-ha. Bisarang pagipani sorokni kamaona reangako nikaha. Uni jamano pagipa, magipa aro bisarang uamangni alaniko chana asongaha. Isolni namgipa onanirangni gimin aro uni kasae daka-nirangko gipinrangna mesokna cholko mananio Isolko mitelna uamangni skorangko bamgopon, uan kakket olakiani ongchongmo-ta gita nikaha.

BIANI

Kasagipa Apa, chingni agilsakko nitogipa, ansenggipa biap ongatna nangbaksa kam kapana mamani gimin chinga kusi onga. Ia anti gimiko chinga nang baksa karimpagiparang onga ine gisik rana chingko dakchakpabo. Jisuni bimungo bia. Amen.

JAKNI KAM

Ua salo bisarang kangalgipa aro duk mangiparangna, sakprak je kasae onaniko rabana mangenchini, rabachongnotchina. Jedake, tee, meraku, merong, terik, mesurang, matchu sok aro jekoba mana rabana nanggen aro skigipa aro bisarang chanchi-grike jerangna onna kraa, indakgiparangna bisarangni jakchin watatna tariode namgen.

Lesson 30

GIPINRANGKO KUSI ONGATNA DAKCHAKANI

Skiani Jepang :—

Ia skianichi antangnasan kaaigija sakgipinrangko kusi ongat-na kam kaanian Isol baksa karimpaani nambatgip chol onga ine bisarangko nikatna dakchakna nanga.

Sastroni Bak :— Luk 10:25-37. "Namgipa Samariani Mande."

Mukosto Kae Jakkalna:— Luk 10:27.

Noksa Mesokani :— Onanirangko rabaani, Namgipa Samaria Mandeni, Bisarangni sakgipinrangko kusi ongatna kam kaani noksarang.

Skiani gita git :— No. 18.

SKIGIPANI TARISOANI

Ia mikkang Robibaro jakkalgnigipa golpoara pilak somoirang-onina bate nambatsranggipa onga ine uiatnara skigipa, ua golpoko aganani somoio ba chasongni onga obostarangni gimin uigipa onga nanggen, chongmotan Jihudi aro Samariarangni gisepo ritcha bilsirangna mitchigrikani aro bobil onggrikanini gimin ine mangsonga.

Ia uiani itihaso jadal suatako manaha. Assyriarang Israelni songnokko ame uamangko ringgittangon manderangko rimbaaha. Ia agital manderang banga dingtang dingtang jatrangoni ongachim. Uasanba ongaija, uamang antangtang baksa antangtangni jatni isolrang aro toromtangni olakiani bewalrangkoba ranapbaaha. Jamanosa ringgittanga mangipa Jihudi kamal saksako uano Isolni gimin skiechipa watataha. Uamang uani agananiko

knatime beberaaha, indiba Isolko olakiani baksa, uamangni kitgimin mite dakanirangko olakianichi brinataha. (Uni orto, mitam Isolko olakiani aro miterangko olakiani bewalrangko).

“Uamang Jihovana kenachim, aro uamangni rimgittangbaako mangipa jatrangni dakbewal gita, antangmangni isolrangko mania-chim.” 2 Raja 17:33.

Jihudirang uamangni rimgittangaoni pilbaon, mite olakiani biding pilakonikon antangtangko rongtalatsrangahachim. Jerusalem gilja nokko rikpiltaianio Nehemia Samariarangni dakchakaniko rana jechakaha. Untalan Samariarangba olakiani biding mamung kamonikoba antangtangko dintangatsrangaha. Iako dakani aselan, uamang (Jihudirang) antangtangko anchini bidingo aro toromni bidingoba rongtale rakiachim. Ia dol gnini gisepo pangnan jegrikani ongkataha aro indakachin uamangko bobil ong-atgrikaniona dilangaha aro charim ringrimani aro soka chakgrikaniona dakani bidingoba mitchigrikbeani ongahachim. Jisuni kam kamningo Jihudirangni Samariarangko chanchiani gisika, uamangko chonikani binungchi “Samariarang”ingipa katachin mesoka.

“Jihudirang aganchake inaha, Naa Samariani mande aro kore mangipa onga inc chingni agananiara kakket ongjama?” Johan 8:48.

Uni gimin Jisu ia golpoko aganaha maikai ia saknaako mangipa, chonnikgimin jatko repakangmitingo dongdike pilak uni amani gita dakchakanirangko onanichi kasae dakani gita manderang mondolini Mikkim ba rasongko rakina aro dakna nangani chongmotko masiatna mangan.

GOLPONI ABACHENGANI

Isolni namgipa onanirangko sakgipinrangko kusi ongatna onskapaani aro dakskaapaanian Isol baksa kam karimpaani chol mingsa onga. Salsao Jisu, Isol baksa karimpaani minggipin cholko nikmangipa mande saksani golpoko aganahachim. Uni agangipa golpoko knatimbo. (Ba naa ua bisarang ua golpoko uia ine chanchiode) indake aganskabo, “Nasimang namgipa Samariani golpoko uia mo? Sawa ua golpoko agangen?”

GOLPO AGANANI

NAMGIPA SAMARIANI MANDE

Changsao saksu mande, dokprete ragiparangni dokaniko mane abimanduni ramasamo tuengachim. Uamang uni tangkarangko,

bararangko ratoke, ukode matate, saknaate ramasamo galangaha. Ia mande ua abimandu ramako reangkuna gita agre saknaaniko manahachim. Uni gimin ua saoba ia rama gita repakbae angko dakchakpagenma ine chanchiengachim, aro tomtom tue knatimeng-achiin.

Ruutani jamano ua jabirangko knasoaha aro bakbakan songregipani rebaaniko chelao niksoaha. Ha gose! ine duk mangipa mande skimaha, "Ia mande Jerusalemni torom nokni kamal saks a onga, ua angko dakchakgen." Ua ontisa antangko dedoe chrikaha," Dakchakbo, dakchakbo, kasapae angko dakchakbo."

Kamal ua abimandu ramako niwilwale dokprete ragiparang dongkuengakon, uamang rebapilnaba donga, ia mandeko dakchakna ango somoi dongja, anga bakbakan skele rena nanggen ine gisik-tango chanchiaha. Bakbakan ua ua ramako gipin ramako reang-skaaha.

Saknagipa mande kadonga gri onge tugoptaipilaha. Saoba kasabatgipa mande ia ramako rebachongmotgen ine ua chanchie knatinaha. Bakbakan ua jabirangko knasotaibebeaha.

Saksa mande sorok gonggeaona sokbaengachim. Ua Levi mande, ua Torom noko kamalko dakchakgipa onga. Ua angko dakchakchongmotgen ine mata bua inane saknagipa chanchisoaha.

Indiba ua Levi mande uko nikataha. Anga ia mandeko uija, ua angni ripengba ongja. Anga uko dakchakna dongdikna inan-jawa ine antangna aganari uaba gipin rama gitasa chele reangaha.

Saknagipa mande ramamon tue dongkuangaha. Ua bilgri onghatroroangaha. Ua kadongani gri ongaha. Saoba angko dakchakna rebapajahaode anga ia abimandu rainao saksan siaiginok ine ue chanchiahachim.

Unikoa ua matburungni reani jabirangko knasotaiaha. Saksa songregipa antangni chonggipa gadao gakate ua saknagipa mande-chipakan rebaengachim.

Saknagipa mande kadongjabeaha. Ia jat gipinni mande anga Jihudi mandeko mamung saloba dakchakjawa. Ua Samariani mandesa, angko dakchakjawa. Jihudirang aro Samariarang ruuta intal bobil onggrika. Uamang saks sakgipinko dakchakjawachim. Danang! ia mandeba angko dakchakjawa ine ua chanchiaha.

Indiba Samariani mande uko nikon dongdikaha aro antangni gadaoni ongone, sagipa mandeni sepongo jasku dipane uko niaha. Ua aganaha, "Mamungba ongjawa, anga nangni ripeng, anga nangko dakchakgen."

Samariani mande uni matarangko tarie katipaha. Ua uko antangni gadao gate soka chakani aldaona rimbaaha. Uano ua walgimikan ua Jihudi jatni mandeko sanbeaha.

Pring senghahaon Samariani mande reangkuna nangachim. Reangna ahang ua aldani nokgipako okame aganaha, "Ia tangkako rabo afo angni ripengko sanbo. Angni donanggipa tangkarang chuongjaode, anga rebapilon nangna chotpilgen." Indine agane ua reangaha.

Sagipa mande tomtom uni palango tue, uko dakchakgipa ka-sagipa ripengni gimin chanchiengachim.

GOLPONI JAMANO

Jisuni golpo ua mande maikai Isol baksa karimpaaha ine singbo. Jisu uni golpoko matchoton aganaha, "Reangbo naaba ugitan dakbo." Anchinga ua nangipa Samaria mande gita maikai onngen? Jensaloba anching nanggiparangna dakchakaniko ona, un-on ugita dakenga ine nikatna bisarangko dilna nanggen. Uamang saoba mea ba mechik saknaataniko manode maikai dakchakna mangen uani gimin chanchichengna nanggen. Maina uan golpoo aganani gita nambatsranggipa dakani onga. Gipin dakmesokanirango aro uarango uaming maikai dakchakna mana bisarangko chanchidilbo.

BIANI

O salgio donggipa, chingni Apa, chingaba Jisuni skiani gita duk mangiparang aro nangenggiparangna maikai kasae dakchakna cholko uigen aro dakna sikgen chingko dakchakpabo. Jisuni bimungo bia. Amen.

JAKNI KAM

Nangipa Samaria mandeni saknagipa mandeko gadao gate raangni noksa salsogiminko rong nongna mangen ba astechi uko dakna altubatnikode dakna mana.



Lesson 31

KAKKETKO DAKNA SEE RAANI

Skiani Jepang :—

Ia bakni ia bonkamgipa skianichi, kakketko dakna see ra-anian Isol baksa karimpaani nambatgipa chol mingsa onga ine nikatna bisarangko dakchakna nanga. Isolni ongatna namnika gitan, agilsakko ansengbatgipa aro nitobatgipa ongatna dakchak-anio uamangni mangsonganirangko chusokatanio katchaaniko uinaba uamangko dilgen.

Sastroni Bak :— Wat. 5:12-42 aro Johan 21:15-17. Pitor kak-ketko dakna see raa.”

Mukosto Kae Jakkalna :— Deut. 6:18.

Noksa Mesokani :— Reangginin anti gitamo jakkalgimin nok-sarang aro Bisarang kakketko dakna see raani noksa.

Skiani gita git :— No. 39 ba Achikni Ringani No. 269.

SKIGIPANI TARISOANI

Nama Katarango aro Watatarango, anchingni poraiani gita, Pitorni golpoara mande ongan chongnot gita dakaniko agana. Sninggiparangni gisepo uan namnikako manbatgipa onga ine chan-chia, haida uan uni chusokgijanirang aro krenganirang anching-nin gita ongan gimin ongnaba donga.

Uni jonggipa Andrew uko Gitelona rimbachengaha. Jamano Jisu uko uni natok rimaoniko uko jarikchina okamaha. Untal ua sak chigni seokgimin sninggiparangni saksa ba dingtangmancha chatro gita ongbaaha. Anchingni poraiani gita, Pitor Jisuoniko skie rae uko dakchakahaon, sikbegipa, rangsan dakninggipa aro name mangsonggipa mande onga ine nika. Pitor namgipa sninggipa onga skachim. Basakoba ua nikninggipa ba uininggipaba onga-chiin.

“Naa Tanggipa Isolni Depante Kristo.” (Mat. 16:16) Ua aganchengaha. Jisuko antangko chisol siaoiko jokatchina mol-molgipaba Pitoran ongtaichim. Gethsemani bario Jisu rimako manon, Pitoran tonualchi warachakna joton kagipa saksa ongachim.

Pitor aro Johon mangmangsan Jisuko aro uko rimanggiparang-ko jarikangaiahachim. Indiba Jisuni janggiko rana sikgiparangni

mikkango ua chadengon Pitor kenan gape Jisuko uija ine jechakahachim. Uan antangni dagiminni gimin chanchie nipilaheon dukko manbeaha.

Anchingoni bangbatan Jisuni Pitor baksa agangrikani kata-rangko uia jekon ia antio Bibleoniko poraigen. Basakoba, maibakai, anching uni chakatpilgimin Jisu baksa agangrikna cholko manani aselko nikchangronga. Anching uni minggni kandigipa pangchakanirangko nika. Jensalo Emausona songregiparang Jerusalemona reangpile uamangni Gitel baksa agangrikani katchaaniko aganahachim, uamangna indake aganaha, "Beben Gitel tangchapilaha aro Simonna mikkang paaha." Luk 24:34.

Paul Korinthirangna seon, chakatpilani jamano Pitornan pilak sninggiparangna skangde mikkang pachengaha ine mesoka. I Kor. 15:3-5. ona poraibo.

Ua gronggrikanio uamang maiko agangrikaha anchinga tik-takde uija, indiba antangko rongtalatna aro bilakatna Pitorna cholko onchongmotaha ine anching changchina mana. Jamano Galili sagal rikamo, sninggiparang damsang tomdakon, manderangna uni dakna nanggrikanio Jisu una pakwataha. Untaltalan Pitor 'rongbrak' ongbebeaha ine anching nikna mana maina ua uni Gitel nokgipana kimkim chadengaha. Uko patokchi, dokanirangchi aro sootna kamikenanirangchiba kenatna manjaha. Tangpilgijan ua Gitelni nikanio namako aro kakketko dakna see raaha.

GOLPONI ABACHENGANI

Pringsao Jisu aro uni ripengrang, sagalni rikamo, waal soao asongdule, Jisuni uamangna tarigimin mepring, pita aro natokko chengachim. Uamang walgimikon natok rimengachim, uni gimin uamanga nenggen aro okkrigen ine Jisu uiaha. Uni kasagipa ripengrangna iako dakna ua kusi ongachim.

Anga Bibleoni golponi tongsako nasimangna porainane, Johon 21:15-17. Iano Jisuni Pitorna aganani miksonganiara, "Angni mesrangko nirikbo." Sakgipinrangna kasagipa aro kasachakgipa ongbo. Nanggiparangna simsakbo. Kakket dakna, sakgipinrangko skie onbo. Pilakkon angni bebegipa ripengrang ongchina skie onbo ine orto ongachim.

GOLPO AGANANI

PITOR KAKKET DAKNA SEE RAA

Pitor Jisuni bonkamgipa katarangko pangnaba gualna manjaha. Ua skango kakket onga ine uioba uko chusokatna bebegipa

ongrongjachim. Indiba ua dao dingtang mande ongbaaha. Isol uko kadonggipa aro bilakgipa dakchakgipa mande ongbana dakchakahachim.

Pitor aro uni ripengrang Jisuni gimin manderangna skiaha aro aganprakaha. Sagiparangkoba ansengataha. Uamangni kamni biteara, banga manderangkon Jisuna kasagiparang ongbaataha Jerusalem mondoli ongbaaha aro Jisuni ripengrang katchabeaha. Indiba banga salon Jisuna kakketgipa kadonganikoba manna nangaha.

Jerusalemo donggipa mitam manderang uamangni dakani-rangko namnikjachim. Torom nokni Skigiparang aro dilgiparang kaonangbeaha. Anching Jisuko sootaha aro uoni jokaha, dao uni sninggiparangba uani gimin aro uni skigimin katarangko skina nangjawaha ine uamang chanchiaha. Bangbea manderangan Jisuko jarikode, anchingkoara sawasa jarikginok ine mitam mikbugipa manderang aganaha. Uni gimin salsao Pitor aro uni ripeng-rangoni mitam rinako mane patoko chipako manaha.

Indiba Isol uamangko gualjaha, aro ua walon Pitor aro uni ripengrang patokoni jokako manaha. Pring gipino pring walnin uamang Torom nokona tongtong reangaha. Uano uamang Jisuni gimin skiangkuaha aro sagiparangko ansengataha. Chinga sason kagiparangna kenja. Chinga jean kakket onga ine chingni uianiko dakna chingko kadonggipa aro bilakgipa ongatchina Isolo bimanaha. Isol chingko watgaljawa, Uaba uni palko dakgen ine uamang aganaha.

Sason kagiparang melana tomchimongaha. Uamang jajreng aganaha, "Anchinga ia manderangko mai dakgen?" Unon uamangko patokoniko rimongkatbachina manderangko watataha.

Watatako mangiparang rebapile aganaha, "Nasimangni patoko chipgimin manderangde Torom Nokosajok. Uamang Jisuni gimin manderangna skiangkuengpiti." Sason kagiparang kaonangbee, uamangko rimbachina geetaniko onaha.

Bakbakan mitam sipairang Pitor aro uni ripengrangko melaona rimbaaha. Chinga nasimangko Jisuni gimin skijachina bengmanaha, indiba daoba nasimang ukon dakanguenga ine sason kagiparang uamangko inaha.

Pitor kenjahachim, batesa ua sason kagiparangchiko tongtong nie kengija aganaha, "Chinga manderangna bate Isolko manina nanga." Batesa ua sason kagiparangmangnaba Jisuni gimin aganana abachengaha. Ian Torom Nokni sason kagiparangko kaonang-atbeaha. Uamang aganaha, "Hai anching ia manderangko sootsrangna."

Bonkamao dilgiparang Pitor aro uni ripengrangko dokaha.

Nasimang Jisuni gimin mamungkoba skitajachina, nasimangko bengaha ine uamang agane Pitor aro uni ripengrangko watataha.

Uamang noktangtangchina pilangon, jean bebe kakket onga ine uamangni beberaaniko kadonge aganprakna manahani gimin kusi ongbeahachim. Salantion, ua Torom Noko Jisuni gimin skiaha. Salantion, uni kakket aro bebena chadenganiko nikna manachim aro salantion ua Jisuna bebegipa ongachim. Bisani git. No. 106 ko ringe chanchiatbo.

BIANI

Kasagipa Isol, naa ching baksa pangnan dongenga ine chinga uia. Nangni nikanio kakket aro namako dakna dakchakpabo ine nango bia. Jisuni bimungo bia. Amen.

DAKE MESOKANI

Bakrangko rana jakkalna bisa sakgitamko rabo.

Skanggipa dake mesokani :—

Ua bisarang songram noko donga dakchina.

Bisa saksu, "Hai anching waalchi kalgrikna. Ai dongjaba, ua uijawa" ine aganchina.

Sakgipin aganaha, "Ai mamungsaloba waalchi kalgrikjachina anchingko bengaha. Anching songram nokko kamatnaba donga. Ongja anching kalgrikna nangjawa."

Sakgipin aganaha, "Nasimang kengiparang onga."

Gnigipa bisa aganaha, "Anga waalchi kalgrikjawa. Singchina. Sawa ia gisik gnanggipa seokaniko dakaha?"

Gnigipa aro gitangipa bisarang :—Uamang schooloni kasne rebapilenga gita mesokchina. Saksu aganaha, "Chinga class gimik gesa nitogipa asteni pul donchakaniko brena bilsini abachengo antio tangkako koros kaaha indiba dao ua beaha."

Saksu aganaha, "Chingaba uano pulko done nitoatna somoiko jakkalaha. Uara ramrangipa bostu ongjachim. Sakgipin aganaha, "Saoba uko beataha indiba aganjaha."

Skanggipa bisa aganaha, "Sawa uko beatahachim angade uijaenga."

Gnigipa bisa aganaha, "Angan uko beataha aro anga duk onga."

Gitangipa bisa aganaha, (gisiktangosa) "Angasa uko beatachim, indiba anga kurachakna sikja." Iako sakgni bisarangni reangmano agana dakchina.

Iako dake mesokmano skigipa jamano singna nanggen. Sawa kakketko see raaha?

Uni jamano ia bonkamgipako dake mesokbo aro matchoton skigipa singchina.

1. Saksa bisa uni sambao asongrimgipa bisa saksani seaniko nikna manahaon maikai kakketko see rana nanga uko dake mesokbo.

2. Bisa sakgni school nokni doktao adita tangkako nikaha. Uamangoni saksa indine aganaha, "Anga uko nikahani gimin anga uko rakina mana."

Sakgipin aganaha, "Uan anchingni ongjaba, anching uko skigipana onna nanga." (Skigipaona tangkako onea dakchina) Sawa kakketgipa seokaniko seokaha?

Lesson 32

JISU UNI NOKTANGO

Skiani Japang :—

Ia skanggipa skiani japang katao Jisu bisa chongmot onge noktango dakchakgipa aro gipin bisarang gita kusi onge kalgrikpaa-chim ine chanchiatna dakchakna mangsongani onga. Ian Nazaretho uni noktango janggi tanganiko chanchie nikatna dakchakbeani onga.

Sastroni Bak :— Luk 2:39-40, 51-52; Deu. 6:4-9.

Mukosto Kae Jakkalna :— "Naa nangni katong gimikchi aro nangni janggi gimikchi aro bil gimikchi nangni Gitel Isolna kasa-bo." Deu. 6:5.

Noksa Mesokani :— Nazarethni noko Jisu bisa uni noko, Palestineni nokrang, nokginikni janggi tangani.

Skiani gita git :— No. 46.

SKIGIPANI TARISOANI

Golporang aro Sastroni podrangko jerangan ia japang katao donga, uko uni songtang Nazaretho janggi tanganiko uiatanichi bisarangko Jisu chongmot ine uiatna jakkalani onga. Jisu nok-

tango dakchakani aro gipin mea aro mechik bisarang baksa kalgrikpaani gimin chanchina un baksa nangrimani gimin uianiko bariatgen.

Sakanggipao Jisuni gimin chongmotko uiani bangbreja gita nika. Luk odhai gnigipao uni bisamitingni golpo mingsa donga. Indiba Palestineo ua salrango apsan apsan bostu aro bewalrangko Sastroo banga dingtang dingtang mesokanirangchi aro Jisuni skianirangchi aro uni janggi tanganichi uni bisa ongmitingni gimin uina altubata.

Unon salaramo donggipa asongni bewal aro jatni dakbewalrangba kasne kasne dingtangbaroroaha. Janggi tangani bewalrang asongrang aro asongrangni obostarang Jisuni ia agilsako dongmitingo chelgipa asongrango bilsu hajal gnina skang ongaha gitan ongaichim. Uni gimin anching uia Nazareth songo salantini janggi tangani aro nokrangni ningo Palestine songni janggi tanganiara daaloba apsan onga. Ia nikania Bibleni chatrorang aro songregiparangna gisiko nangatani onga.

Anching uia Jisu bisa kalgrikna namnika, maina Luk 2:52 uni dalrorobaaniko sea. Ua noktango dakchakgipa onga ine anching uia, maina dakgni seanio Isolni namnikako manaha inc agana.

Aro ua bisa uian gape dalroroe bilakbaaha, aro Isolni kasara uno dongachim. Luk 2:40.

Jisu uianio aro bilsio, aro una Isolni aro mandeni kasao batroroaha. Luk 2:52.

Anching uia Jisu bisa noktangni olakianio olakigipa ongaha. Uni pagipani noko uni kusi ongan, Torom nokona uni skanggipa reanganian ia geetani gita tangaha ine saki onga. Luk 2:49 o sea.

Naa nangni katong gimikchi, aro nangni janggi gimikchi, aro nangni bil gimikchi nangni Isol Jihovana kasana nanga. Deu. 6:5.

GOLPONI ABACHENGANI

Jisu Nazaretho uni noko dongani noksako mesokbo. Anchingni gitalgipa noksa Jisu bisa ongjaha ine anchingko gisik raata. Ua senggipa bilakgipa mea bisa onge dalbaaha. Anchingni Bible iako anchingna agana. Luk 2:40 o maiko agana angni poraimitingo knatimbo. "Ua bisa uian gape dalroroe bilakbaaha aro Isolni kasara uon dongachim."

(Palestine songni nok gesani noksako mesokbo).

Ia noksa jeo Jisu janggi tangahachim ua manderangni dongchakgipa nokrangni noksa onga. Indakgipa nokon Jisu bisaba dongachim ine anching chanchina mana maina Joseph mistri ongachim. Ua dalgipa nokko manna ampajahakon.

GOLPO AGANANI

JISU NAZARETH SONGO UNI MEA BISA ONGANI

Jisu mea bisa ongmitingo ua mai gita ongachim uani gimin naa aiao inmanama? Ua salrang gimiko ua maiko dakahachim uani giminba naa aiao inmanama? Ua Isolko aro ripengrangko namnikataha ine anchingni Bible agana. Bisa Jisu noktango dakchakgipa ongaha. Haida ua pringantio tuchakgipa amrangko dole donna uni magipako dakchakaha. Uni pindapanirangko teme bakoso donnaba donga. Ua antichi reange merongko aro mesurangko breenggen ba biterangko akna bariona reangenggenchim. Ua gadana chiko kanenggen aro gitalgipa megaprangko chikongo donengnaba donga. Beik kaani salrangna chankolko dingatna ua rangimin samsirangko chimongenggen. Jisu Mariam baksa abrini sanbengni chimikona Nazareth songni apalchi jrimgipa basingrango chiko kona magipako dakchakrongaha. Jisu uni magipako kusi onatbeaha ine anching uia.

Jisu Josephkoba dakchakchongmotaha. Ua mistrini dokanona reangrongaha. Ostrorangko tik donpilna aro renda onani bisemsemrangko itroke rongtalatna una chonggipa kamrang dongachim. Joseph una altugipa kamrangko dakna onahachim. Bakbakan Jisu ostrorangko jakkalna uiaha ine anching chanchina mana maina ua dalahaon mistrini dokano kamko kaaha.

Indiba Jisu uni pilak somoirangko kami kaanio aro sakgipinrangko dakchakaniosan reataijaha. Ua Dalgipa Skigipa aro Dakchakgipa ongbaahaon, uni dakginin aro agangiminoniko ua pilnipil gipin bisarang baksa antidano kalgrikna aro Nazareth songko duulgipa rongbrakarigipa abrirangko maldoe rona reangaha ine anching uia. Songjinmana bate chubatgipa biapo ua uni ripengrang baksa kate aro bilchroke roaha ba kamao donggipa soroko badinggipa manderangni reruraaniko nie roaha.

Abrini janggilchi sal onchokangahaon Jisu aro uni ripengrang noktangtangona rechakatbaaha. Noko napna skang ua dogacholni jakrachipak donggipa silni bakos ba mezuzaho dongdikaha. Uan Isolko gisik raatna uko dakchakaha maina uni ningo Isolni niamrang gnangchim. Bisa Jisu ua niamko uiachim Mariam uko una skiahachim.

Uni gimin ua uni jaksi kuchotchi mezuzahko dangtape biaha, "Isol angni reongkatako aro napbaako rakichina."

Meatamko chaanio Joseph chaanirangna Isolko mitelaha. Mairongpile Jisu kam kaani aro kalgrikani jamano uko chatonikbeaha. Unon nokking kosako madrang sal napangako nitimaha,

unon wal ongbaaha. Joseph Bibleoni golporangko aganenggenchim. Mariam uni Depanteni bianiko knaaha. Jisu Isolni kasaa-nini gimin Bibleni katarangko mingenggen. Indake kusi ongkipa salsako bonatahachim.

BIANI

Biani gita, "Gitel anga Kriatian onгна ska." ia gitko ringna nanga.

JAKNI KAM

Palestineni nok tesako asteniko dakbo. Lekako dakna, skode, gro gipeng apsangipa lekako bak gitam dake aro grokoba pedembo. Mikkangchakgrikgipa gegnini temani waringrango chitbo ba kesi-chi ratbo. Gitangipa chelaniko pedeme napatbo. Unikoa atta tape ba pinchi tekkape donbo.

Lesson 33

JISU SCHOOLO

Skiani Jepang :—

Ia skianio Jisu bisa, uni Torom nokni schoolo uianichi bisa-rangni gisiko nanganiko aro un baksa ripeng dakna skaniko bariatna mangan ine kadonga.

Sastroni Bak :—Deu. 6;4-9; 10:12-13; 11:1; Reo. 20:8-11; Levi. 19:33-34, 23:3; Aba, 13:1-12; Reo. 2:1-10; 1 Sam. 16:11-13; 17:34-37; 18:1-5; Git. 86:5; Luk 2:52. "Nazaretho Schoolchi Reani.

Mukosto Kae Jakkalna :— "Naa Gitel, nama aro papko wat-na tarie donga." Git. 86:5.

Noksa Mesokani :— Gilja nok School.

Skiani gita git :— No. 46.

SKIGIPANI TARISOANI

Uiatani golpo, "Nazaretho schoolchi reani "Jisuni chasongo Jihudini poraiania unon pangchaka, sastro skigiparangni gilja nok-ni schoolrango jakkalgipa Sastro Gitchamni kitaprang seokgimin-rang onga. Uni miksongania bisa Jisuni schoolo janggi tangani

gita nangko aro bisarangko dakna onga. Jihudirangni gilja nokko skianina aro olakinaba jakkalachim. Songo madrang nok chikung ba una batode gilja nokko rikachim. Ia schoolo bilsa bongaoni bilsa chibongaona bisarangko antio sal dok skirongachim. Pagipa antangni bisako gilja nokni schoolona watatna drajachim. Draatani niam grichim. Indiba ua Joseph gita olakigipa Jihudi ongode, antangni bisako niamko aro gipin Sastroni mangsonganiko masiatna watatna sikgenchim.

Aro angni nangna daalo geeta ia katarang nangni katongo dongna nanga; aro naa uarangko nangni derangna skitaitaina nanga, aro nangni noko asongmitingo, aro ramako remitingo aro tudengdalmitingo aro chakatmitingo, uarangni gimin naa aganrikna nanga. Deu. 6:6-7.

Jihudirangni gilja nokni schoola toromko uiatchengani, skanggipa school ongachim. Skiani nongsongbate agananichi ongbatachim. Poraiani niaman mukosto kaani ongachim, aro mongsonggipa skiani miksongania ranta kaani ongachim. Schoolni miksongania niamko skina aro Jihudi toromko gisiko donatna ongachim.

Ia indakgipa schoolona bisa Jisu singna sikkbegipa gisikchi reangaha. Uni noktango toromko skianiara niamko masiatani gitrang aro manderangni itihasko gilja noko (Jihudini tomani) ni schoolo skiachim, Biblean bisamitingo mongsonggipa aro gamchatgipa bak ongbaaha. Mairongpile daao maa paarangna aro skigiparangna gisik nangbeani!

GOLPONI ABACHENGANI

Gital noksako mesokbo—Jihudirangni gilja nok school. Ian bisa Jisuni schoolo dongani noksa onga. Ua nangni school gita onga-ma? Ua maikai dingtanga? Bisarang maiko dakenga? Ia gita noko schoolko kaa. (Jihudirangni gilja nokko mesokbo). Uan Jihudirangni gilja nok onga, uni gimin ua schoolko Jihudirangni gilja nokni school minga. Daalni anchingni golpo bisa Jisuni schoolni gimin anchingni singanirangna aganchakna dakchakgen. Ian Bibleni golpo ongja indiba Jihudirang iarangko Jisuni chasongo dakaha aro uaba uarangko dakpaaha ine mesoka.

GOLPO AGANANI

NAZARETH SONGO SCHOOLCHI REANI

Nangni schoolona rechenggipa salko gisik raama? Ua salo naa maikai onga naa gisik raama? Nangni uno dakgiminko naa gisik

raama? (Uamangni uidapgiminrangni gimin agangrikna somoiko onbo).

Pilak bilsu bonga aro bilsu dok ong-gipa bisarang schoolchi reang-chengna kusi onga. Uni gimin anching beberaa bisa Jisuba schoolchi rechengani pringo kusi ongenggen. Haida Mariam antangni bisana gital cholako kruataha. Unon Jisu antangni rogipa cholako kruaha. Mariam rong gnang-gipa kangkare kaanichi uko akete kaataha. Dao ua chongipa, dawilgipa tupiko stike bigilni jakopko gae tariaha.

Joseph bisa Jisuko jako rime gilja nokona roongarigipa ramako dilangahakon. Kokimao apalgipa jangkirangko uamang gilja nokni dogacholona chugipa bomronggipa krongrangni gisepko reangaha. Salni tengani jamano nokdringni ningo chongipa, chugipa kelkirang andala aro kasina gita nikachim.

Bisa Jisu antangni jakoprangko oke roongni wasao bara andapani kosako gipin bisarang baksa jaako pedeme asongaha. Bak-bakan Joseph watangaha, indiba Jisu simsakjachim. Ua bisarangko uiaha. Skigipa uni ripeng ongachim.

Skigipa ongipa ampoko asongaha. Uni japingo dalgipa dolgipa lekako donaha, uan Niam Gitchanko seachim. Ua bisarangko gitko ringna skiengachim. (Lekako donani noksako mesokbo). Naa Gitel nama, kema kana taria ine skigipa ringaha. Naa, Gitel, nama aro kema kana taria ine bisarangba ringaha. Pilak bisarang gitko ringna mankujana kingking indaken skiangkuaha.

Unon seani lessonko skiaha. Dalkalgipa bisa maikai rongtale Jisu antangni seanirangko doktao gipokgipa anchengo jarikna nanga uko mesokaha. Ua chongipa petchokgipa goolchi steni plengo antangni bimungko serongachim. (Steni pleng aro petchokgipa chongipa goolko mesokbo). Pilakna bate mongsongbatgipa skiania Isolni niamrangko mukosto kaani ongachim. Skigipa bisarangna banga niamrangko skina dolgipa kitaprangoniko poraia-chim. Isolko maniani aro kasaani gimin niamrang bangachim, nengtakani salko gisik raani agitalrangna kasaani, nanggiparangna dakchakanirang gnangchim. Skigipa niamrangko poraiaha. Unon pilak bisarang uko jarike mingpaaha, uamang wasao jaarangko pedeme asonge jinma damsang apsan katarangko mingaha.

Bisa Jisuba dolgimin kitaponiko poraina skie raaha. Skang oikorrangko poraina skiaha, unon katarang, jamano Bibleni banggipa bakrangko skiaha. Bibleni dolgipa kitaprang uni kitaprang ongachim. Indiba golpoko aganani somoia gilja nokni schoolni nambatgipa bak ongachim. Unon skigipa bisarangna Jihudi mandarangni aro dilgiparangni namgipa golporangko aganaha, ua apsan golporangko anching anchingni Biblerango poraiaha aro an-

chingni mondolini Sunday Schoolrango knaaha. Dao nasimangni namnikbea gita uamangba golporangko knana namnikaha. Jisuba ia golporangko knarongaha, indiba anching beberaa ia gitchambe-gipa jejgrikigijagipa namgipa Abraham, manderangko dalgipa dil-gipa Mose aro mes nirikgipa Daud Rajani golporangko knataitaina kusi ongaha.

Jisu skigipao banga singanirangko singenggen. Anching uia ua Isolni gimin agangrikna aro chanchina namnikbea. Nazaretho skigipana agre saksaba gisik gnannggipa dongjachim. Bisa Jisu unbaksa agangrikna skachim. Namgipa skigipa Isolni gimin una aganna manachim. Ua gilja nokni schoolo maiko skiaha uni gimin Jisu chanchiaha. Ua podko ua antangni gimin pilnipil chanchi-ahakon, "Naa, Gitel, nama aro kema kana taria." Isol namgipa aro kasagipa onga ine bisa chanchiaha. "Ua namgipa pagipa gita kema kaenga."

BIANI

Kasagipa Isol, chinga chingni katongrangko Jisu gita ongatna ska. Chingni nokrangko, schoolo aro kalgrikao jakkaltobegipa ongna ia antio chingko dakchakbo. Uni bimungo chinga bia. Amen.

JAKNI KAM

Steni chongipa plengko Jisuni schoolo jakkala gita dakbo. Ia kitapni dala gita amko ratbo. Stechi paksachiko rinokate pindapbo. Bisa sakprakon petchokgipa gool dongna nanggen. Bisa sakprakan antangni bimung ba oikorrangko goolchi plengo sena mana.

BA

Dalgipa bakoso rangimin anchengko donbo. Uko gapatbo. Bisa-rang pala pala dake antangtangni bimungrangko sechina ba ong-korangko anchengo uamangni jaksirangchi sechina.

Lesson 34

JISUNI SONGREANI

Skiani Jepang :—

Daalo anching uni bisamitingni uianiko chanchipae Jisu baksa bisarangni nangrimpaaniko ningtubate mesokatna mangan ine ka-donga.

Sastroni Bak :— Git. 100:4-5a; 122:1; Luk 2:41-52. "Bisa Jisu aro Torom Nok."

Mukosto kae Jakkalna :— Anching Jihovani nokona reangna hai ine angna aganon anga katchaaha." Git. 122:1.

Demitela gnang uni cholgugarango. Aro mitela gnang uni sara-rango napbo aro uni bimungko namchina inbo. Maina Jihova nanggipa onga, uni kasae dakaniara jringjrotnan, aro uni bebe dakaniara pilak chasongranganan onga. Git. 100:4-5.

Noksa Mesokani :— Jisu Torom Noko.

Skiani gita git :— No. 6.

SKIGIPANI TARISOANI

Jisuni bisamitingni mongsongbatgipa aselrangni gimin seahani gimin anching Lukna gro nanggipa onga. Ua bilsil 12 ongachim, ua bilsimitingo Ibri torom gita, uni bisa onganil dalgimin bilsiona batangengachim. Bilsil gipino ua bilsil chigitam ongginok. Unon ua Niamni depante ongaha aro toromni dolo mongsonggipa bakko rapagipa mande ongpaaha. Maina ua niamko poraina manaha, ua antangni kamrangna chanchiaha. Jerusalemni Toron nokona doangania Niamni Depante onganil baksa ongachim. Ia Jisuni Pagipani Nokona skanggipa reangania gualna amgijagipa uiani ongachim.

Mingantian uni gisiko dongkamgenchim. Salanti songreanio cheani gitrangko uni gisiko kusi onganiko ringe rebaachim. Uni skanggipa watchanganil alao, uni bakko singanina raaha. Ia wala gipin walrangoni maina dingtang? Aro Joseph Egyptoni Israelni jokani golpoko aganaha. Chanchirakgipa bisani gisiko nangbeani onggenchim. Indiba Torom Nokni nitoani aro gisik gnanggipa skigiparang baksa agangrikna chol mananian uni gisik katongna uni skanggipa songreanio una mukut gita ongachim.

Ia dikdiksa somoini onganio uni chusokgipa uidapanichi uni manisranganiko uni bewalni kakket onganichi mesoka. Bisa Jisu aganna skie raasan ongaigija indiba uni katongo tangnaba ua skie raaha.

"Naa nangni katong gimikchi, aro nangni janggi gimikchi, aro nangni bil gimikchi, nangni Isol Jihovana kasana nanga." Deut. 6:5.

GOLPONI ABACHENGANI

Dao Jisuni bisamitingo ongginin mangsonggipa kamona anching sokbaaha. Ua chele reaha. Naa songreanio aiao inmanaha gitan uaba indaken ongaha. Ua kusi ongachim. Maia uko inditan kusi ongataha anga aiao inmana. Knatimbo.

GOLPO AGANANI

JISU BISA ARO TOROM NOK

Ritimkario Jerusalem songjinmao dala alani ongachim. Alani salantio banga rebagiparang nitogipa torom noko olakiachim. Pilak Palestineoni manderang alaniko manina torom noko damsan olakina rebaaha.

Bilsiantian Bisa Jisu reangna skaha. Ang bilsil chigni ongon ang gaba Jerusalemona regen ine Jisu antangan aganaha. Angni maa paa uko kurachakaha.

Unon Jisu bilsil chigni ongaha. Ritimkarini salsao banga songregiparang songrena chiring samo tariengachim. Gadarang aro utrango chaani katomrang, tuchakani amrang, songchakanirang aro rongtalgipa chimikni chiko dobokni bigilni dokrarango gataha. Songregiparang roong gnanngipa abrini rikam gita dakgipa rama joljol ongonangna abachengaha. Mairongpile katchaani aro kusi onganio Bisa Jisuna ongachim maina Mariam aro Josephba reangengachim! Chinga rechakatengaha ine Jisu aganaha. Mairongpile bakrogipa rama! Nazarethoni Jerusalemona mail sotchet chelachim. Chinga ramao sal gitam ba sal bri nanggen!

Mariam aro gipin mechikrang gadarango gakataha. Joseph aro gipin measarang jakoprangko gae gananggijagipa ramako reaha. Bisarangba gnanngchim, mitamrang magiparang baksa, mitamrang pagiparang baksa aro mitamrang ripengskarang baksa reangachim. Songregiparang roongko changipa chiringrangkoba batsotna nangachim. Basakoba basakoba mitam dalgipa bolrangni salakimo nengtakaha. Bisa Jisu pilakon kusi ongnikaha.

Bakbakan ramako dona nangaha. Ua roongrarabatgipachim. Skoni kosako sal rakachim. Reani kasinbatna abachengaha. Unon nenggipa songregiparang git ringna abachengaha.

"Anching Jihovani nokona reangna hai ine aganon anga kat-chaa' ia gitko ringaha.

Git ringania uamangni nengako gualatachim. Bisa Jisu ia gitko uni gilja nok schoolo skiaha. Kusi onge gipinrang baksa ua uko ringpaaha.

Waltingo jinma dongdikaha. Tamburangko pingaha. Ambolko chimongaha. Waalko sikna abachengaha. Chaani katomko engaha. Jisuba atip dakani kamko kapaaha ine anching beberaa. Mairongpile namgipa chaani, been, cheese, bite aro chiko tonik-beaha. Haida Bisa Jisu Isolni chaaniko patianina bina seokako manahakon. Waltingahaon Jisu antangko antangni chola rogipao romromaha. Unon ua Mariam aro Josephni sepango aao tuaha. Ua askirangko nigitoon ua antangni Paa, Isol sepangbeao onga ine uiaha.

Salanti jinma abirangni gisepko daggipa rama joljol reaha. Unon salsao kusi onggiipa chrikatani ongaha, "Jerusalem! Jerusalem!" Oe, dalgipa songjinma aro antangan chinggipa Torom Nok. Changsa manderang ringtaiaha.

"Demitela gnang uni cholgugarango, aro mitela gnang uni sararango napbo." Git 100:4 ia gitko ringaha.

Jensalo Torom Nokona nina Joseph aro Mariam baksa rena somoi ongaha mairongpile Jisu kusi ongenggenchim. Dalbegipa cholgugarang gita uamang reangaha. Dao uamang torom nok aro guarerangni gisepo apalgipa sararangni damsao napeaha. Uni name uigimin katarangni gitrangko kusi ongbee ringaha.

"Una mitelaniko onbo, uni bimung namchina. Maina Gitel nama."

Salanti Bisa Jisu torom nokona reangaha. Ua Isolna mitelani gitrangko ringpaaha. Ua torom nokni barandarango gisik gnanggipa skigiparangni Isolni gimin manderangna skianiko knatimaha. Unon Nazarethona repilani sal ongaha. Jisu jinmao donga ine Mariam aro Joseph chanchiaha. Jensalo uamang uko nikjaha, uamang bisako amna Jerusalemona pilbaaha. Uamang dalgipa songjinmao Jisu saksan ongaha ine chanchiahaon, uamang duk ongaha aro jajrengaha. Indiba bonkamao uamang uko torom noko nik-eaha.

Mariam aro Joseph mairongpile aiao inmanaha. Maina Bisa Jisu skigiparang baksa asonge uamangko knatime dongengachim, uamangni aganako masie uamangni singanirangna aganchakaha aro singanirangko singaha! Uamang Bisa Jisuna ian kusi ongbatgipa

sal ine uamang uiaha. Maina Jisu antangni namnikbatgipako dak-engachim, pilakkon knae antangni Pagipa Isolna dakani nambatgipa ongachim.

Mariam singaha, "Naa maina iako dakaha? Chinga nangna jajrengaha."

Jisu aganchakaha, "Anga angni Pagipani noko dongna nanga ine naa uijama?"

Uamangni jajrengana Jisu duk ongaha. Joseph aganaha, "Nama ang de. Naa chingko jajrengatna mangsongja." Chinga kusi onga naa namenga ang de ine Mariam aganaha. Dao rebabo. Anching Nazarethona repilna nanga. Aganchakgija Bisa Jisu maniaha. Jisu Isolni aro manderangni namnikao uanio aro bimango dalroraaha ine Bible anchingna agana.

BIANI

Kasagipa chingni Isol, chinga chingni Bibleo Bisa Jisuni golpona aro uni gimin segimin pilak golporangna nangko mitela. Dakchakgipa aro bebegipa onga cholrangko chanchina chingko dakchakbo. Jisuni bimungo, chinga bia. Amen.

JAKNI KAM

Jerusalemona Jisuni reangako gisik rana—hisarang bol bijakrangchi ba megapchi ba astechi dakna mana. Jisu aro uni pagipa aro magipa uamangni songreanio rabbitanggipa gada, nanggipa bigilni dokra, tambu, chaani, chonggipa natok aro goldikko dakna mana.

Lesson 35

KAMRANGKO JISU GISIK RAAHA

Sklani Jepang :—

Ia bonkamgipa lessono maikai Jisu bisamitingo uianirang uni jamangipa janggi tangani aro skianirango gisiko nangbeanirango dakaha uko masiatna bisarangna dakchakgen.

Sastroni Bak :— Luk 15:8-9; Deut. 6:4-9; Levi 19:18c; Mark 12:28-31; Reo. 20:8-12a; Mati 11:16-17; Luk 4:15-22. "Dalgipa Skigipako Gisik rana."

Mukosto Kae Jakkalna :—Nangni paako aro nangni maako manderabo. Reo. 20:12, Naa nangni songsulna antangna gita kasabo. Levi 19:18.

Uko rongtala ine rakina nengtakani salko gisik rabo. Reo. 20:8.

Noksa Mesokani :—Nazaretho bisarangni kalgrikani, bia kano skoo tariani, chaki, dolgipa kitap, tiluni bangsi, anti charam biap, torom nok.

Skiani gita git :—“Gitel, anga Kristian onga ska.” Achikni Ringani No. 227.

SKIGIPANI TARISOANI

Jisuni jamangipa janggi tanganio uni skianirang aro Nazaretho dongmitingni bewarangko nipiltaina gisiko nangbeani onga. Dalgipa Skigipa songtang noktangni gamrangchi toe skianirangko jakkalaha. Uarangan uni bisamitingo uidapanirango jadil suaha. Galilini Nazaretho salantini janggi tangani kamrango Jisuko chongmot ine bisarangna nikaniasan onga, indiba uamang Kristoni katako dangdike onani kamko masina abachenganio bilakrorona dakchakgen.

Gimagimin suki kapsako nikpilako golporangni mingsao “Gimagimin suki” mingaha. Uan nokni asel onganiko mesoka, Nazarethni je mechikba ongbo, haida Mariamnaba ongnaba donga. Uko nanganiko mesokna aganaha.

Aro Pharisirang aro Sastro skigiparangba miteng miteng inaha, “Ia mande papirangko rachaka, aro uamang baksa charima.” Luk 15:2.

Jegrikani aro chakchikna angijanirang gnanachim aro mandeni bewal gita manderaani komibeachim. Dalgipa Skigipani niksongania Pagipa Isolni nikanio mande sakprakni gamchataniko masiatna Pharisirang aro Sastro skigiparangko dakchakna ia golpo ongachim.

Changgipino antangko knatimgiparango mingsa singaniko Jisu singaha aro uko antangni bisamitingo uianiko aganchakahakon.

“Indiba anga ia chasongko mai baksa togen? Uan bajalo asonge ripengtangrangna indine inwatgipa bisarang gita. Chinga nasimangna bangsi sikachim, indiba nasimang chrokjaha: Chinga au au grapachim, indiba nasimang kaako dokjaha.” Mati 11:16-17.

Jinmarang bisarangni kalgrikao ia chonggipa golponi mangsonganiko masininggen. Namgija dakbewal aro miknenge gisegrikaniko chanchiatna uamangko dakchakna Jisu joton kaengachim. Niam gita tik kamchi dakujaode ba ugita janggi tangchongmotkujaode

uko name skia mankuja ine Jisu uiaha. Ua bisa ongmitingo brigipa geetaniko dakanichi skiako manaha.

Uko rongtala ine rakina nengtakani salko gisik rabo. Reo. 20:8. Dakmajoani jamano uni songjinmatangona rebapilaniko serikaniko chanchichipnaba donga.

Aro ua antangko dalatram Nazarethona rebaaha; aro antang dakbewal gita nengtakani salo gilja noko nape poraina chadengaha. Luk 4:16. "Uni dakbewal gita ongachim." Mairongpile Joseph aro Mariamni kanrangko niani onga! Bisa Jisu antangni bisa-mitingo Isolko olakiano pangnan dongna dakbewal ongachim. Ua bisaintal brigipa geetanio janggi tangna abachengaha.

GOLPONI ABACHENGANI

Jisu pangnaba atangni skanggipa Torom nokona reanganiko gualna manjawa ine anching beberaa. Ua dalahaon Nazaretho uni bisamitingni salrangko gisik raenggen ine anching chanchia. Salantio uni nikgimin bosturang aro bisamitingo chongipa song-jinmao aro samtangtango donggipa asongrango jeko nikaha aro dakaha uarangko ua gualjaha. Uni jamanni janggi tangani aro skianirangni bak ongbaaha ine anchingni golpoo daalo agana.

GOLPO AGANANI

Jensalo Jisu dalaha ua skigipa ongaha. Pilakna bate ua Dalbatgipa Skigipa ongachim.

Jisu golporangko aganachi skina namnikachim. Ua changsao, Isol antangni dedrang sakprakna maikai simsakaha ine manderangko uiatna skaha. Anchingni Pagipa Isolna maikai sakprak-an gamchatgipa onga uko masiatna manderangko golpo dakchakgen ine ua antangna aganahakon. Mai golpo iako masiatna uamangko dakchakgen? Unon Jisu uni bisamitingo Nazaretho ong-gininko gisik raaha.

Palestineo, jensalo mechik bia kaa uni segipa una sonani bia kaani jaksitemko onjachim. Uni pal duulgipa tangka gong chikungko mana. (Bia kaani mechikni skoo tarianiko mesokko). Ua antangni skoni kosako gana. Uan uni nambatsranggipa gam ongachim. Suki kapsa gimaode bia kaani skoni tariani nosto ongaha ba namjahachim.

Uni gimin Jisu gimagimin sukini golpoko aganaha. Salsao ine Jisu aganaha, maikai mechik saksa uni skoni tarianioni suki rongsako gimaataha. Uan antangni skoko tariani chinggipa tangkani suki ongachim. Ua chongipa nokni andalgipa noksikan-

tioniko simsake amaha. Ua donchakani kokimaoniko amaha. Ua noksiko chadenge waseoni dolgimin amrangko jitaha. Ua asteni chakiko soe pilak kolgipurangoniko simsakbee amaha. Unon ua bolcheksirangoniko dakgimin selako rae nokko simsakbee itrokaha. Bonkamao ua gimagimin sukiko nikaha. Mairongpile ua kusi ongaha! Ua inditan kusi ongaha, ua antangni noksulrangko okampilaha! Ang baksa kusi ongbo ine mechik chrikaha. Anga angni gamchatgipa gimagimin sukiko nikaha!

Mejalo onggimin gitan Jisu pilakkon nikna manachim. Ua gipin Nazarethni nokmechikni banga apsan kamrangko dakaniko gisik raaha. Uni gimin sukini golpoko Dalgipa Skigipa aganaha. Maikai mande sakprak anchingni Paa Isolna gamchatgipa onga ine masiatna manderangko dakchakgen ine ua uiaha.

Anching Bibleo Jisuni janggi tangani golpoko poraion Bibleni niamrangko aro geetanirango jekon ua bisamitingo skie raahachim uarang uni kuchilon dongtokachim ine anchinga pilnipil nika. Ua gilja nokni schoolona reangna skang Josephni una noko skigimin niamrangko pangnaba gualjaha. Uamangni nokni cholgugani jakrani krongo ua katarangko tapachim. Bibleo uarangko angni poraimitingo knatimbo. (Deut. 6:4-5 ko poraibo). Schoolo skigipani skigimin niamrangko ua gisik raaha. Changsao ua aganaha pilakna bate dalbatgipa niam minggni gnang. Ua minggni Bibleni niamrangko nasimang uia. Angni uarangko Bibleoniko poraimitingo nasimang ang baksa uarangko agangenma? (Mark 12: 30-31 ko poraibo). Naa nangni pilak katongchi, aro nangni pilak gisikchi, aro nangni pilak janggichi aro nangni pilak bilchi nangni Gitel Isolna kasabo. Minggnigipa ian, Naa antang songsulna antangna gitan kasabo. Iarangna bate dalbatgipa minggipin geeta gri. Ia minggnian Bibleni niamrang onga. Jisu bisaintalan uarangko gisik raaha.

Nazarethni sorokrang aro antitam bisarangni kalgrikna namnikbatgipa biaprang onga. Bisa Jisu gipin bisarang baksa uarango pilnipil kalgrikrongaha. Basakoba bia kaa dake kalaha. Saksa bisa antangni chongipa bangsichi knatoe sikaha. Mitam bisarang bia kaanio chroka gita kusi onge chrokaha. (Nazaretho bisarangni kalgrikani noksako mesokbo). Basakoba gopao dakaniko dakaha. Bangsi siggipa antangni bangsichi duk onganiko sikaha. Mitamrang gopao daka gita duk onga dakaha. Mitam bisarang ia kalaniko kalna sikjae nosto karongachim. Unon kusi onganiko nosto kagipa bisarangko okamaha, "Chinga kusi onganik kurangrangko sikenga, nasimang bia kaani kalaniko dakpajawama? Chinga duk onganik gitko ringa, nasimang gopao dakaniko dakpajawama?

Changsao Jisu skiengmitingo ia maikai ongaha, ua gisik raaha. Ua aganaha, "Adita dalgimin manderang daalo ripeng gri bisarang gita onga. Uamangko kusi ongatna manja. Uamang gipinrang baksa nangrimna manja."

Jensalo Jisu dalaha, maikai Nengtakani Salko antangni song Nazaretho reataha ua gisik raaha. Mariam aro Joseph maikai gilja noko olakiani aro nengtakani rongtalgipa sonoiko Sukrobarni sal napaoni aro Sonibarni sal napaona maiko dakaha ua gisik raaha.

Uni ginin Jisu Nengtakani salanti gilja noko olakiani dakbewalo dongaha aro olakiahachiin. Basakoha uko dolgimin Sastroko poraina ba manderangna aganna okamaha. Niam Git-chamoni gitchambegipa niamrangko Josephni poraiani kurang gita ua knamanahakon, "Nangni paako aro nangni maako manderabo," a "Uko rongtale rakina, Nengtakani Salko gisik rabo." Jisu ia minggni niamrangko gualjaha. Uatanga uni janggi tang-anio mongsongbatgipa bak onachim.

GOLPO AGANANI

JISU BISA SONGTANG NAZARETHO

Luk 2:39-40, 51-52; Deut. 6:4-9. Jisu bisa ongmitingo ua mai gita ongachim naa aiao inmanana? Ua salmadrang maiko dakahha naa aiao inmanahama? Ua Isolna aro antangni ripengrangna kasaaha me anchingni Bible agana. Bisa Jisu noktango dakchak-beachim. Haida ua pringanti tuchakani anrangko dole aro uarangko done magipako dakchakaha. Ua andapani bararangko pedeme uarangko bakosni kosako donaha. Ua antichina chaani aro mesurangko brena reangaha ba biterangko akna bariona reangaha. Ua gadana chiko koaha ba nolo gital megapko donaha. Songani salrango apalo donggipa chudapko dingatna rangimin samsirangko chimonggengenchim.

Jisu Mariam baksa abri sambengni chiringona Nazarethni apalchi jrimgipa basingrango chiko kona uko dakchakna reangnaba dongachim. Anching uia Jisu antangni magipako kusi ongataha.

Jisu Josephna dakchakchongmotaha. Ua mistrini dokanona reangrongaha. Ostrorango tiktak donna aro uarangko epakna uni chongipa kam ongachim, Joseph bisana altua kamko onaha. Anching chanchia Jisu bakbakan antangni ostrorango jakkalna skie raaha, maina ua dalahaon ua mistrini dokano kamko kaaha.

Indiba Bisa Jisu kam kae aro gipinrangko dakchake antangni pilak somoiko reatjaha. Jensalo ua Dalgipa Skigipa aro Dakchakgipa ongbaaha ua uni dakgimin kamrangonikon aganaha ine an-

ching uia, ua antidamona gipin bisarang baksa kalgrikna ba Nazarethko duule donggipa ronbrakarigipa abrirangko maldona reangaha. Songjinmana bate chubatao ua antangni ripengrang baksa katenggen aro bilchrokanggenchim ba kokimao sorokrango mandelangni reruraaniko nitimenggenchim ba nienggenchim.

Sal chelgipa abrirangni nalsachi napangahaon Jisu aro uni ripengrang nokona rechakataha. Noko napna skang, ua dogacholni jakrao silni bakos (mezuza) o dongdikaha. Uan Isolko gisik raatna uko dakchakachim, maina uo Isolni niamrangoni mingsa gnangchim. Bisa Jisu ia niamko uiaha. Mariam uko una skiaha.

Uni gimin ua uko antangni jaksini kuchotrangchi dangtape biaha," Isol angni ongkatako aro napbaako rakichina."

Meatam chao, Joseph chaanina mitelaniko biaha. Antangni kamko kaani aro kalgrikani jamano mairongpile Jisuna chatonikbeaha. Unon nokkingni kosako madrang salni napangako aro andalbaaniko nitimaha. Joseph uamangna Bibleni golporangko aganaha. Mariam antangni depanteni biako knaaha. Kasagipa Isolni gimin antangni Bibleni podko mingaha. Uandaken kusi onгани salko reataha.

MUKOSTO KAANI POD

Naa nangni katong gimikchi, aro nangni janggi gimikchi, aro nangni bil gimikchi, nangni Isol Jihovana kasana nanga. Deut. 6:5.

JAKNI KAM

Astoniko chakiko dakbo, ba chongipa goolrangko dainsan kae selarang dakchina.

Gimagimin sukina—bia kaani skoni tarianiko dakbo, ana chetni sukini dala gita card boardko dawile ratbo aro tinko ratdule pin-dapbo—geprako akolko dakbo, kilding kabo—mikkangni knio kana manna gita kildingni roa skoko kadulna chuongna nanga.

Lesson 36

DAUD MES NIRIKGIPA

Skiani Jepang : —

Daalni skianichi Daud golopsan onga indiba chongmot onga ine uni noktango dakchakanirangko skie raanio bisarangko beberaatna dakchakna nanga. Git 23 chin uni mes nirikgipa ongani noksa gita jakkalna nangen. Ia skiani Daudni noktango dakchakani gita dakpana aro uni Isolni kasaanio aro simsakanio katchaaniko rapana aro Bibleko nannikatbatna ba ganchatnikatbatna dakchakgen.

Sastroni Bak :— I Sam.16:1-13; 17:12,15,20,34-37,40; Git.23. "Daud Namgipa Nirikgipa."

Mukosto Kae Jakkalna :— "Jihova angko nirikgipa onga, angna nangani dongjawa." Git.23:1. "Anga mamung nangijana kenjawa maina naa ang baksa donga." Git.23:4 (Podsa gita mingdimbo).

Noksa Mesokani :- Daud Mes Nirikgipa.

Skiani gita git :— No. 21.

SKIGIPANI TARISOANI

Daudni git ringani gisepo Git 23 an namnikbatsranggipa aro pilaknin uigimin ongbata. Unon pilaknan aro pilaknin chanchi-aniko aro kadonganiko mana maina uano Isolni kasaani aro simsa-kanio kadonggipa beberagipa mandeni gimin ningtubegipa talatani gngang.

Naa uko uibegimin ongomangba, uko kasne podprak prakni gimin chanchibewale aro nangni ningtugipa beberaanio aro antangko Isolna onkanganio poraitaibo.

Git 23 oni pod gni bisarangna mukosto kana naina ine donaha. Uarangko seokaha maina uarangno bisarangna nambegipa ortonang. Podsao Isol maikai uamangna kasaani simsakanio uamangni pilak nanganirangkon onenga ine uamangko chanchiatna dakchaka. "Anga mamung namgijana kenjawa maina naa ang baksa donga." Ia katarangara Isol uamang baksa pangnan dongani gimin uamang mamung saloba kenna nangjawa ine uiatna dakchaka.

Kamao Git 23 ni mangsonganirangko kandike talatenga maikai naa antangan uarangko tale masimano aro ia nirikgipani Isolo be-beraani aro uo kadongani aro uni kasae dakanirangna uni janggi tangani salrang gimikon Isolko manderae aro uko dalnike janggi tangna kurachakani gimin bisarangna, uamangni uiani kri talatna mangen.

Pod sa :—Mesrangni banga nanganirang gnan, chaani, chi, nengtakani aro chelchakani. Namgipa nirikgipade antangni mesrangni nangani gimiknan simsakgipa onga. Isol ua gita onga. Ua anchingna kasara aro simsaka, uan uni dedrangni nanganirang gimikkon ia agilsako donsomanaha.

Pod gni :—Namgipa nirikgipani skanggipa kamara uni mesrangna sam gnanngipa biaprangko amanian onga. Pringni kasin-miting somoio mesrang tangsekgipa samsirangko chaamna namnika aro chaama, indiba sal dingbeahaon mesrangna kasingipa salakim biapko nanga. Nirikgipa ua somoina simsaksoa. Mesrang tangsekgipa samsirangni kosako salakimo tue antangtango kasinata aro nengtaka.

Mesrang kenrakgiparang onga. Uarang mamung saloba ganggipa aro tarake jokanggipa chioniko chiko ringjawachim. Uni gimin nirikgipa dimpenge chiko tomtom dakata. Unonikosa okkakujana kingking mesrang chiko ringgen maina salo changsasan uarangna chiko kanna nanga.

Pod gitam :—Salmitingo nainen nitimna nangachim. Je biapoba mesrangna asel nangani gnanachim. Rongbrakarigipa abri akuangrangchi gaaknaba donggenchim. Mesrang gaakode nirikgipa uni jaman jarikange, gaakongipa mesko antangni pakreo gate rabaachim. Indake nirikgipa mesrangni janggi ginagnioniko jokatachim. Uakon Daud mangsongaha.

Mesrangna namgipa rama gnan jeon uarang name rena mana aro namgijagipa ramaba dongachim jeon uarang gimaatanikoba mangenchim. Indiba Daud namgipa nirikgipa ongan gimin ua mesrangna skang skang ree namgipa tik ramako redilrongachim.

Pod bri :—Basakoba kakket rama ongoba, asel nangani gnanngipa, bakrogipa, andalgipa, akaweni apchangketgipa ramako rena nangnaba donga. Ua rama gananggijagipa aro retogijagipa ongon, chikrakgipa matburunrang mes bisarangko chikna timsonaba donga indiba mesrang nirikgipani sepangchape reskaa. Andalsim-singipa biaprangko remitingo nirikgipani tiluni bangsini knatogipa kusi ongatani kurangchi kadimeataniko manachim. Uarangni ni-

rikgipa sepangon dongani gimin uarang kenmangija ongachim.

Nirikgipani jringgipa monggotchi, uarangko chikgnigipa matburunrangko uan sootgen ine kadongachim. Uni goldik uarangko dilgen aro jokatgen. Andalbatgipa biaprangko remitingo, uarangni dilgipako nikjaoba nirikgipa antangni monggotko rakgipa roongni kosako dokani kurangko aro chelao rogipa goldikni kuchotko nikatomangba kadimeataniko manachim.

Pod bunga :— Basakoba nirikgipa uni uironggijagipa biaprangona mesrangko chaamatna moangode, ua mesrangko uni jaman done, antangan skang ree uan asel nangani grigipa biap ongama, ine nichengrongachim. Uano bisi gnanggipa samrang, chikrakgipa matburunrang, sugnigipa chipurang dongja ine antangan uichongmotosa ua gital samsi nangipa biapo chaamatachiin.

Atam salniahaon mesrangko noltangona mobapilahaon nirikgipa antangan cholgugao chadenge, mesrangko tomchimonge, chugimik dongama dongja uko nironga aro mes mangprakni skoo aro mikango, mes grongoni joitun toko rudaprongachim.

Nengbegipa, nombokgipa, ringna sikkipa mes mangsa dongode, nangipa nirikgipa, rimchakani gegni gnanggipa ringchakanio chongmotan rangkareo chiko koc onrongachim. Ua duk mangipa mes chiko ringna antangni kusikko rangkareo ningtue sikkbronchi suake jokpakangachim indiba ua kasingipa aro rongtalgipa chiko ringe bilakataniko manachim.

Pod dok :— Dao mesrangko nolo chipnanaha. Unon Daud antangni kenninggipa mesrangni gimin chanchiengachim. Ia bilgrigipa mesranga nirikgipa griode mai onggenchim aro nangipa nirikgipa ongjaode baditan duk onggenchim. Ua salgimiko uarangna banga rokom cholrangchi simsakanini gimin chanchiaha. Dao uarang nolo tomtom joke dongaha. Ua pilakkon chanchie ua Isolni gimin chanchiaha. Uni gimin Daud uni gitko Isolko manderaanio, olakianio, uni tangani salrang gimikon tanggen ine kura-chakanio matchotataha. Ian uni Isolko, uni simsakanina aro kasaanina mitelani chol onggenchiin.

GOLPONI ABACHENGANI

Mes nirikgipa Daudni noksako mesokbo. Pilak Jihudi mea bisarang Daudni golporangko knaahani gimin Jisuba knapaaha ine anching uia. Anchingba dao mikkangchi anti bongana kingking Daudni golporangko knanasienga.

GOLPO AGANANI

DAUD NAMGIPA NIRIKGIPA

Daud uni bisamitingo chongipa song Betlehemo uni pagipa Jeseni noko dongachim. Ua nokara abri sambengo donggipa roongrangchi rikgimin ongachim. Indakgipa nokon Jisuba bisamitingo dongachim, haida ua nok dalbatnaba donga maina Jesseo nokni madrang bangachim aro mes aro dobok jakrangba bangachim. Daudan chonbatgipa depante ongachim aro uan uni pagipani mesrangko nirikachim.

Pringanti Daud sal nana skangan pringwalnin chakate bakkaban mesrangko abri sambengona moangna tariachim.

Daud jakoprangko gae, uni cholako kangkareo kaanichi kae, chaani gnannggipa chongipa katomkoba kachape raaha maina ua salgimikon noko dongjawachim. Uni kangkare kaanion ua bengjuri, dokrao rimiltritgipa roongrangko sike, monggot minggipa jrimgipa gantongko kachapachim. Pakkreoba Daud rinokgipa dinggipa mesni bigilko gate raaha maina ua walgimikon uni mesrang baksa dongpana nangnaba dongachiin. Kumangchipak komkugipa rogipa goldikkoba rae mes nolona reange mesrangko moongkataha.

Hai-ah, Hai-ah! ine Daud uarangko kasne okamaha. Kenninggipa mesrang uko duulaha. Bakkaban uarang Daudko jarike, roongarigipa sorokko uarangni chongipa jaarangchi rikkep rikkep gamate jripgipa ramako reangaha. Daud uarangko Bethlehem songjinmani cholguga gita moongkate, roongarigipa abri japaona modoangaha.

Daud badita reangaha inditan mesrangba jarikangpaaha. Aditani jamano Daud tangsekgipa samsiarigipa biapona mobaaha. Mesrang rebildange samsirangko chaaha, ua antangara bol salakimo asonge, dalgipa rongbrakni kosako ruti, makkon, joitun bite aro dumbur biterangko donaha. Ua charoroe mesrangni chaamako nitimaha. Ruutgijan ritiingital sam dangsaba dongpilgijan uarang chatokaha.

Hai-ah, Hai-ah! ine Daud mesrangko okamtaiahaon uarang rebatokaha. Ua gipin biapona uarangko moangengon mesrang tangsekgipa samrangko chajoljole Daudko jarikangtokaha.

Sal dingbeaahaon ua bolrangni salakimo uarangko moange nengtakataha. Uano sal dingbemiting kakketo uarang nengtakahachim. Daud antangba dingani gimin tusidimuna skaha indiba ua mesrangko nitimna nangani gimin tusisrangnade kadongjawachim.

Rangsanan uano mesni chrikako knaaha. Uano mapil mangsa

bolgrimoni ongkate, uni dalgipa jakparangchi chongipa mes bisa-ko rimengachim. Daud rangsan rongbrakona bildoe, uni bengjurio roongko done antangni skoni kosako wingwinge goataha. Bengjurini roong mapilni mikkingo tiktak nangeahachim. Mapil aona gaakarion ua chaange antangni rabitgipa gantongchi mapilko doke siatsrangaha. Mes bisako detome nioa uni mikkangko mapilni jakskilchi bilonge matataha ine ua nikaha.

Danang mes Bisa! ine Daud agane, antangni jolonggaoni segun bolni sekkiko dakgimin samko raongkate matarango nonge, mes hisani mataoni anchi joka tipkujana kingking detomaha.

Hai-ah, Hai-ah! ine Daud mesrangko okantaiaha. Dao atam ongbaengachim. Mesrang okkaaha, nengtakaha. Dao uarang-na chiko kanna nangachim. Uni kenninggipa mesrang, abrioni jokonbagipa, tarakgipa chiringni chikode ringjawa ine ua uiachim. Uarang chio gaakode, uarangni chatgipa kimilrang sosigen ba balpakangnaba donggenchim. Uni gimin Daud tomtomgipa chionu uarangko moangaha. Uan rongtalgipa kasingipa chikongni chongachim. Daud tomtom tuchina mesrangna chinko onaha. Uarang tomtom tomdakaha, changgipno ua gipin chinko ontaiaha, unon pilak mesrang chakate doldol dake, kasingipa chiko ringna rebatokaha.

Unon Daud noktangchipak anpilaha. Chongipa mes bisa chugipa dare rongbrak sepangona brangangengachim. Daud antangni rogipa goldikchi uko salrikaha. Daud antangni mes jakko andalgipa apchongipa akawe gita moangnitingo, uarang kenjachim maina uarang uarangni nirikgipani sepango tomdake salni tengsua, jasenga biapona soktaikujana kingking reaha.

Bonkamao Daud Bethlehemo donggipa uni pagipa Jesseni noko-na uni mes jakko name mobaaha. Daud mesrangni dogacholo chadengaha. Mangprak prak dake ua nolo napataha. Mesrangoni maiba matarang dongode ua segun bolniko dakgimin samko nongaha. Badiaba mangsa nengbeode aro nomode, joitun toko uni skoo aro mikkango nongahachim. Badiaba mes chi ringna sikbeode unaba ua antangni mesrangni ringchakanio gape chiko koe onachim, unon ua bilakataniko manaha.

Daud mesrangko mangprak prak chane niaha. Mangsaba gimakuja ine ua uaichim. Pilakan okkae, tomtom, namgipa nirikgipa Daudni mes nolo nengtakaniko mantokahachim.

BIANI

Kasagipa Isol, chinga Biblena aro uo segimin golporangna aro nangni gimin skie rana aro maikai tangna nanga uina chingko

dakchakgipa Bibleni podrangna nangko mitela. Jisuni bimungo bia. Amen.

JAKNI KAM

Slateo ba lekao salna mana. Daudni jakkalgipa bosturang, jedake, goldik, toni grong, ringchakani, monggot, bangsi, bengjuri, goldik, knal aro dokra ba jolongga.

Lesson 37

DAUD RAJAKO GRONGA

Skiani Jepang :—

Daalo anching bisarangko Daudko masiatbatna dakchakna nanga, maina uamang maikai Isolna uni kasaania gipinrangna dakchakna uko dilaha skie rana aro maina uamang gipinrangko kusi ongatna nanga uni uanio bak manpaa.

Sastroni Bak :— 1 Sam.16:12a, 14-23; 17:12-13,15. "Daud antangni gitko ringani."

Mukosto Kae Jakkalna :— Anga Jihovana ringgen; angni janggi tanga dipet Git. 104:33.

Noksa Mesokani :— Daud Saulni mikkango Knalko Salani.

Skiani gita git :— No. 21.

SKIGIPANI TARISOANI

Dauda Jihudi manderangni bewal gita dakna chanchiani gnangchim. Uko uni poetryo, gito aro ningtugipa toromni bidingo dilanio nikna mana. Ia miksonganiranga agilsakni gipinrango uni mesrang baksa banga somoina apalo donganichi bilakatako manaha. Uni gitrang aro knal Isolni kasaani aro simsakanio uni ong-telaigipa katchaaniko talata, jekon ua Isolni dagkiminni nitoanirang aro aiao inmananirangoniko poraiaha. Salo abrirango aro walo Syriani askirangni kokimao Daud antangni Isolo pangchake janggi tanganio uni katong gimikchi olakie, demitele uni gitrangko ringaha. Uni giminan Daud indakgipa ongbaaha ine uia, jedake Israelni changbegipa git segipa 2 Sam. 23:1.

Jihova katongtang gita mandeko antangna anaha. 1 Sam. 13:14. Saulni saani mongsongbate gisikni dukni jrimanichi onga-chim. Jensalo Daud antangni knalko salaha Saulni duk onggipa gisik nampilaha. Uni andalgipa gisikko Daudni knatogipa gitan ansengataha, uko git segipani Isolni agilsakna aro uko Dakgipana kasaanio nikskaa jeni gimin ua seahachim.

Angni katong tik kagimin onga, O Isol, angni katong tik kagimin onga. Anga ringgen, oe, anga mitelanirangko ringgen.

Anga nangko mitelgen, O Gitel, manderangni gisepo;

Jatrangni gisepo anga nangna mitelanirangko ringgen.

Mukosto kana gitalgipa pod ongoba Daudni bewalko mesokja, uan uni janggi tanganio dakanisa onga.

Gitni Bibleni pod 104:33. Anga Jihovana ringgen, angni janggi tanga dipet.

GOLPONI ABACHENGANI

Jesseni dedrangni gisepo Daud chonbatgipa depante ine an-chinga uia, ua pagipani mesrangko nirikachim. Indiba Daud gipinrangna dakchakani minggipin cholko nikaha. Daalni anching-ni golpoo Daud sakgipinrangko kusi ongatna maiko dakaha uko agangen.

GOLPO AGANANI

DAUD UNI GITKO BAK ONPAA

I Sam. 16:12a, 14-23; 17:15.

Pringsao Daud antangni mesrangko nirikna moangengachim. Ua antangni dokraoniko chongipa bangsiko bikotaha. (Noksako mesokbo). Ua tiluni gatongko dakachiin. Ua badia chiringrang-ni rikanona moangna nanga uiachiin. Ua maikai tilurangko denna aro uarangko kana nanga uiachiin. Kuchoto spoani akol aro jaksirangna bano akolrangko sopuna nanga ua uiachim.

Daud bangsiko antangni kusiko done knatobegipa sulko sikaha. Bilchrokgipa chongipa mes bisarang sepangona knatimna rebaaha. Retegiparang ramatangona rebaaha, Daud bangsi sike mes jak-rangko redilaha.

Gitalgipa dindok dindok chagipa nomgipa samsirang iakai ine Daud dalgipa kaltapru dakgipa rongbrako asonge aganaha. Mes-rang kandikgipa tangsekgipa samsirangko chana abachengahaon, Daud antangni tiluni bangsiko donaha.

Dao pakkre samsao Daud chongipa knalko rabbitengachim. (Nok-sako mesokbo) Ua uo jakko done kildingrangko moaha. Mai-rongpile knatobegipa gitni sulko ua moaha! Uan doorangni mikoani kurang gita rongbrakrangni kosakko chiringni ontimani gama gita aro balwani bol bijakrango nangchake aganmitua gita gamachim.

Unon Daud git ringna abachengaha. Uan uni mes nirikani git ongakon, "Jihova angko nirikgipa onga; angna nangani dong-jawa." Ua antangni mes jakko nitimmitingo uarang namgipa nirikgipani sepango kenmangija chaamunitingo ua gitko ringaha, "Anga mamung namgijana kenjawa; maina naa ang baksa donga." Ua Isolni antangni dedrangna sinsakaniko chanchiengon ua mitelani gitko ringaha," Angni janggi tanga dipet anga Gitelna ringen." Uochachan Daud saksa mandeni abriko katdobaengako nikaha. Uan antangni pagipa Jesseni watatgipa mande ongachim.

"Gitel pante" ine ua chakol aganaha, naa nokona babbakan rena nanga. Raja nangko rimna watataha. Pilak mesrang nolona sokbatokna manna gita anga uarangni jaman jarikgen.

Babbakan Daud antangni song Bethlehemona sokeaha. Uni pagipa Jesse sengsoengachim. Ang de, babbakan naa rajaona reangna nanga ine Jesse aganaha. Ua nangko nangenga. Nangni knalko raangbo maina naa knalko una mona nanga. Nangni rajaona raangna nanggni kasae onanirang iakai.

Daud Saul Rajani atipona rechakataha. Uni namnikgipa knalko ua pakskeaha. Gadaba uni sambao, ruti, dobok been aro matbigilni ningo draka bitchiko gata gnang repaaha.

Uni andalgipa tambuo Saul Raja Daudko sengsoaha. Ua ansengjachim. Ua dukko mane kusi ongjachim. Jrungipa chanchianirang aro jajaanirangan uo gapachim. Ua kadingsmijtjaha. Ua pangnaba kadingjaha. Uni gisikni saaniko mamungba namatna manja gita nikaha.

Jensalo Daud duk ongkipa rajani gario dandanako nikaha, ua una duk manchakaha. Ua uni knalni kurang rajako kusi onkatgen ine kadongaha. (Bisarangni mikkango ia lessonni nok-sako donbo). Dikdikšana uamang uko nichina. Unon golpoko matchotatbo.

Daud knalni budurangko dangdike mona abachengaha. Uan totomtome nengtakgipa abrini sambao samsi gnannggipao okkae donggipa kadongna mangipa mesrangna uni mes nirikani git ongachim.

Kasne, kusi onggiagipa, duk ongkipa Saul Rajani mikkang dingtangaha. Ua antangni mikronrangko oe knal mogipako nitat-

aha. Daud uni mikkango sronge chandengaha. Uni perang gitchakachim. Uni mikronrang rongtalachim. Raja kusi ongakalaha. Daudba kusi ongpaaha maina uni git rajako kusi ongatbatna dakchakahachim.

Pante, naa ang baksa donggenina ine Saul singaha. Nangni knatogipa knalni kurangko anga nangtainaba donga. Daud rajana knalko moe onna kusi ongbeaha. Anga angni rajako kusi ongatna manode anga kusi onga ine Daud aganaha. Anga donggen ine ua aganaha.

Jensalo Saul uni saani chaobataiaha, Daud antangni knalko raaha. Ua antangni jakrangchi kildingko name moahaon, tangsekgipa chaamramrang aro tomtomgipa chirang. Isolni antangni dedrangna kasaani aro simsakanini gimin uni knalchi knatogipa gitko ringaha. Unon raja tomtomaha aro ansengpilitaiaha. Daud kusi ongaha maina ua Raja Saulna uni gitni kusi onganiko bak onpana manaha.

Indiba Daud antangni mesrangko gual jaha. Sastro agana (1 Sam. 17:15 ko poraibo). Dao Daud Bethlehemo donggipa antangni pagipani mesrangko nirikna Sauloni reruraachim.

NOKSA MESOKANI

SAUL RAJA ARO DAUD

Rajani sonani mukut aro uni nitogipa kangkareo wentonggipa aro dalgipa rogipa cholako nibo. Uko kusi ongbea gita nikja. Maikai ua Daudko kaonange nienga nibo! Daudni knalko nibo.

Daud maikai rajani mikkango jasku dipana, nibo! Ua kandikgipa cholako krua, bigilni jakopko gaa aro uni tangsekgipa tupiko kotip kadapa. Maikai Saul Rajako ua namnikbee nidoa, nibo! Uni ringanirang ba knatoe moanirang rajako kusi ongattaina mangen ine ua kadongaha.

BIANI

Kasagipa Isol, chingni Bibleoni namgipa golpona chinga nangko mitela. Daud gita chinga nangna, Isolna kasabatrورونا onpabo. Gipinrangko kusi ongate nangna kam kaani cholrangko nikna chingkoba dakchakbo. Jisuni bimungo bia. Amen.

JAKNI KAM

Sanaba gital gitko ringe bakko onpana skibo. Basako aro bao ia gitko ringgen agangrikbo, skigipa ringaniko dongen. "Anga Jiho-vana ringgen, angni janggi tanga dipet."

Lesson 38

DAUD ARO RAJANI DEPANTE

Skiani Jepang :—

Ia lessono Daud aro Jonathonmu namgipa ripeng onгани gol-poko gamchatnikatna bisarangko dakchakgen, aro uamangni kam-rangchi saksa sakgipin baksa ripeng onganiko mesokna sikatgen.

Sastroni Bak :— 1 Sam. 18:1-5; 19:1-7; 20:4-42; 23:14-18. "Daud aro Jonathon."

Mukosto Kae Jakkalna :— "Ripeng pilak salon kasara." Toe Ski. 17:17.

Noksa Mesokani :— Daud aro Jonathon.

Skiani gita git :— Sastroni podni git.

SKIGIPANI TARISOANI

Daud aro Jonathonni ripeng dakania namgipa mesokgipa golporangoni mingsa onga. Bibleo segimino poetry gitasa uko mesoka.

Jonathonni janggi Daudni janggi baksa nangrimaha; aro Jonathon janggitangna gita una kasaaha. 1 Sam. 18:1.

Daudni bimungni orto "Kasagimin" onгани gitan Jonathonni kasaaniko manna kragipa onga ine serikanio nika.

Daud pilak antangni reanio gisik gnange dakaha; aro Jihova un baksa dongachim. Jensalo ua gisik gnange dakaha ine Saul nikaha ua una kenaha. Indiba pilak Israel aro Juda Daudna kasaaha. 1 Sam. 18:14-16.

Raja pante Jonathon Daudna kakket onganiko antangni ripengna warachakanio mesokaha.

Jonathon antangni pagipa Saulna Daudni gimin namako agane inaha. Raja antangni nokolni kosako, Daudni kasako, pap kajachina; maina ua nangni kosako pap kakuja; aro uni nangna dakarang nambeaha. 1 Sam. 19:4.

Daud Saulko duk onjana jechakani, "Gitelni to nongani" iako 1 Sam. odhai 24 aro 26 o nikgen. Nasimangni bobilrangna kasabo ine Kristoni geetna skangan agananiko mesokaha. Daudni kema kaani gisikko bobilrang Daudna Saulni katarangchi mesoka.

Naa angna bate kakketbatgipa onga; maina naa angna nam-

ako dakaha, indiba anga nangna nangijako dakaha. 1 Sam. 24:17.

Ia knatobegipa gitchambegipa golpoko bisarangna skina skangan naa name masina gita 1 Sam. 18-26 odhairangona poraina nanggen.

GOLPONI ABACHENGANI

DAUD ARO JONATHON

1 Sam. 18:1-5; 19:1-7; 20:4-42; 23:14-18.

Pante bisa Daud dao rajana knalko motingipa ongachim. Ua knatogipa moanirangchi rajako kusi ongatna kamko kaachim.

Jamano gipin maibachiba Daudko kusi ongataha. Uan rajani depante, Jonathon baksa ripeng dakanian ongachim. Rajani depante, Daudni kadonge antangni mesrangko niirikani kamrangko aro jamano Saul Rajani sipaini kotoko nape kadonge dakanikoba knaaha. Kusi onggiagipa rajana maikai uni knatogipa gitrangchi Daud kusi onгани bakko onpaaha, ukoba ua uaha. Uni gunin Jonathon Daudna kasabeaha aro Daud nanggipa raja pantena kasaaha.

Salgipino Daud Saul Rajani nokona dongna rebaaha, Jonathon Daudko antangni sambao donaha. Daud ine ua aganaha, "Anga nangna angni janggitangna gita kasara. Iako mesokna anga nangna angni rogipa chola aro angni silchidarerangko onenga." Unon Jonathon antangni cholako oke uko Daudna ganataha. Ua uko antangni kangkareo kaanichi kaataha. Ua Daudna antangni tonual, chri aro brarangkoba onaha.

Dao anching ripeng onga ine ua aganaha. Anga antangna kasaa gita nangna kasaa ine uina pangnaba gualnabe.

Aditani jamano Daud aro Jonathon rakbea kumonggrikaniko dakaha. Je obostarang ongoba anching saksa sakgipinna bebe onggrikgen ine uamang aganaha. Anching janggi tanga dipet Isolni dakchakachi dakchakrike kasagrikgen. Anching nangni aro angni bisarangnaba kasae dakchakgipa onngen.

Dao raja pante Jonathon antangni kurachakgimin gita tangna banga cholrang ongaha. Uni pagipa, Saul Raja, Daudko miknengna abachengaha. Uni katongo una mitchian gapaha. Uni manderang rajana kasaana bate una kasabataha. Angni depante Jonathonni pal angni siani jamano Daud raja onngen ine uamang aganenga. Anga Daudko sootgen.

Ua sal intal Saul Daud aro Jonathon sakgninan nangijako

dakaha. Daud rajani nokko watna nangaha. Ua sepanggipa abirango Saulna dongnuaha. Jonathon duk ongbeaha. Ua antangni pagipa aro antangni ripengnaba sakgninan kasaachim.

Jensalo rajani sal gitam alani ongaha, Daud uno dongpagen ine chanchiaha. Ua aro Jonathon Daudna dongimin biapni gimin agangrikengachim. Daud alaona rebana kasokjaha. Saul uko kaonangkamaiode Saul maikai onga uko Daudna uiatna Jonathon mangsongaha.

Alani gitamgipa pringo Jonathon ua mangsonganiko chusok-ataha. Uni chri aro brarangko rae ua Daudni dongnugipa abani sepangona reangaha. Chongipa mea bisa un baksa gngangchim.

Katbo bisa, ine Jonathon aganaha. Angni goatgimin brako dao amebo. Chongipa mea bisa katangahaon, raja pante uni kisangchi brako goattaiaha. Ua braona sokangchina ua bisana sengaha, unon ua okamaha. Nangni kisangchi bra ongjama? Ia kataranga kumonggrikani chinrang ongachim. Uamang dalgipa roongni nalsachi dongnugipa Daudna aganaha, "Raja nangko sootna ankungu." Chongipa mea bisa ia somoio uni nokgipani miksonganiko uijaha. Jensalo ua antangni brako rae rebapilaha, Jonathon uko antangni ostrorang baksa songjinmaona watatpilaha. Daud dongnuaroni ongkataha.

Jonathon aro Daud sakgnian duk ongbeaha, maina uamang damsan dongna manjawahachimi. Uamang ekgrikna skang, ia nangipa sakgni ripengrang uamangni janggi tanga dipet saksa sakgipinna dakchake kasagrikna kumongtaiaha. Indake uamang kumongasan ongaijaha, uamang saksa sakgipinni madrangnaba pangnan kasae dakchakna kumongaha. Unon raja pante Jonathon songjinmaona reangpilaha. Indiba Daud abrini rongkolrango dongnuanguaha.

NOKSA MESOKANI

LESSONNI NOKSA, DAUD ARO JONATHON

Iako bisarangni mikkango donbo. Anching nika ia noksao Daud aro Jonathon gngang. Anchingni golponi mai bakko ia noksao anching nika? Jonathon aro Daud bano gngang? Daud bano dongnuenga ine naa chanchia? Badia Jonathon onga ine naa chanchia? Maina? Badia Daud onga? Maina? Uamang sakgni maiko agangrikenggenchim? Bisarang antangtangni katarangchi sakgni ripengrangni kumonggrikanirangko aganna dakchakbo.

Anchingni Bibleo ia sakgni ripengrangna kragipa pod gnang.
 “Ripeng pilak salon kasara.” Bibleni podoniko skibo.

BIANI

Kasagipa Isol, maikai Jisu gita tangpana nanga uko Bibleni golporang aro podrango chingko skiana chinga kusi onga. Jisuni bimungo chinga bia. Amen.

JAKNI KAM

Black boardoniko sebo aro mukosto kagimin sastroni podoniko lekao ba slateo seatbo. Unon anching maikai anchingni ripengrangna kasana mana, uamang baksa agangrikbo.

Lesson 39

DAUD RAJA KURACHAKAKO RAKIA

Skiani Japang :—

Anchingni miksongani minggni onga. Daudni Isolna kasaania maikai gipinrangna dangdike onna uko dilaha uko uiatna bisarangko dakchakna. Kasaani aro ripeng dakaniko mesokna bisarangna cholrangko onna.

Sastroni Bak :—I Sam. 13:14; 20:42; 2 Sam. 4:4; 9:1-13.
 “Daud antangni kurachakako gisik raa.”

Mukosto Kae Jakkalna :—Kasaachi nasimang saksara sakgipinni nokol ongrikbo.” Gal. 5:13.

Noksa Mesokani :—Daud aro Mephibosheth.

Skiani gita git :—Bibleni podni git.

SKIGIPANI TARISOANI

Daud Raja antangni bobilrangko amani jamano Jonathon baksa songgigrikaniko chusokatna ua cholko bangbate manaha. Ua aganaha, “Anga Jihovani kasachakaniko angni tangmitingosan nangna mesokna nanga indake ongja; indiba pangnan angni nokininaba, oe, Jihova aani mikkangonin Daudni pilak bobilrangko bonatahaon nangni kasaako bonatna nangja.” 1 Sam. 20:14-15.

Daud Raja onge Mephiboshethko jakkalani golpoa uni giticham

bobil Saulni madrangko kema kana masianiko mesokani onga. Uni Isolna kasaania gipinrangna kasana aro kam kana uko dilani ongachim ine minggipin mesokani onga.

Isolna kasaania Daudni janggi tanganio chakchikna amani ongachim. Saul uko sootna cholko manahaoba uko sootaoniko rakiaha.

Ua Jihovani to nonggimin ongani gimin una angni jak deako Jihova angoniko chelatchina. 1 Sam. 24:6.

Jensalo Jonathonni depante uko jasku dipane olakiaha, ua masianio aro manipilano antangni jakrangko badalaha. Untal ia pante rajani depanterangoni saksu gita uni kangalgipa jakoragipa jaa-rangko rajani mejni kokimao donnue raja baksa chapaaaha. Maina Daud aganaha," Anga una Isolni kasaako mesokna manna gita, Saulni machongoni dongspa dongjahama?" 2 Sam. 9:3.

Daud Salaramni raja ongachim, indiba dakna nanggniko masie Isolko mesokgipa onge antangko dukoniko rakiaha. Gital raja singhasono gakatahaon gitchangipa rajarangni pilak madrangko sootaan uamangni dakbewal ongachim. Daudni Mephiboshethko jakkalania rajani namgipa kamko mesoka.

"Sronggipa katongchi aro kusi ongkipa gisikchi uko manibo." 1 Serik. 28:9.

Daud chusoksranggipa ongjachin. Ua banga namgijagipa pap-rangko dakaha. Indiomangba uni katong ningtue Isolna kamko kana aro kasana skaniranga uni katongko kamata. Daud iako uijachim, chongmotan kasaachi nasimang saksara sakgipinni nokol ongbo, indiba jamano ua gita tangaha.

GOLPONI ABACHENGANI

Reanggipa Robibarrango jakkalgimin kinggitam Daudni noksa-rangko jinmani mikkango donbo. Uamangoni saksako sulsul donchina geetbo. Aganbo "Daud banga dakchakgipa ripeng onga-ni kamrangko dakaha. Daud aro raja pante Jonathon sakprakan kumonggrikaha ine nasimang gisik raenggen. Daalni golpo, Daud ua kurachakaniko chusokataha. Knatimbo."

GOLPO AGANANI

DAUD KASACHAKANI BA KUMONGGRIKANIKO GISIK RAA

Sastroni Bak :— Sam. 13:14; 20:42; 2 Sam. 4:4; 9:1-13.

Ruuta salrangna Daud dongnue dongaha. Unon salsao Saul

Raja aro uni depante Jonathon dakgrikao sootako manaha ine knaataniko manaha. Daud duk ongbeaha. Ua antangni bobil Saulna aro antangni kasagipa ripeng Jonathonna kalimaha.

Dao Daud Raja ongaha. Ua antangni manderangna kasaaha, indiba pilakna bate ua Isolna kasaaha. Ua Saulni jamano raja onгна seokako manaha, maina ua katong rongtalgipa mande ongachim.

Daud antangni kasagipa ripeng Jonathonko pangnaba gualjaha. Raja panteni una kasaaniko mesokaniko ua pangnaba gualjaha. Ua aro Jonathon saksa sakgipin baksa kumonggrikaniko gisik raaha.

Anching pangnan saksa sakgipinrangna kasagrikna nanga ine Daud Raja aganaha. Chinga saksa sakgipinni bisarangna kasana nanga ine kumonggrikaha. Jonathonni madrangoni saoba tangkuengama?

Daud Raja antangni ripengrangoni saksako uona okamaha. Saulni madrangoni saoba tangkuengama? Anga Jonathonni pal una kasaaniko mesokgen.

Ziba dongenga. Ua Saulni noko nokol ongachim ine uni ripeng aganchakaha. Ua uigenchim. Uni gimin Zibako Saulni nokolko rimbachina watataha.

Saulni madrango saoba tangkuengama? Anga una Isolni kasaako mesokgen ine Daud Raja Zibao singaha.

Oe, ine Ziba aganaha. Jonathonni depante tangkuenga. Uni bimung Mephibosheth onga. Ua jasamgnian kora onga. Jensalo Saul aro Jonathon dakgrikao siaha ine knaaha, kenatako mangipa uni sangipa ukoba sootgen ine kene uko rime katangaha. Ua sket bakket dakachi bilsa bonga ongгipa mea bisako gaakataha. Untal Mephibosheth jakora ongaha.

Pante dao bano ine Daud Raja singaha. Ziba rajana aganaha, "Mephibosheth, Jonathonni depanteona reange uko angni nokona rimbabo."

Mephiboshethko uni mikkangona rimbaahaon Daud Raja Jonathonni depante jakorana uni katongo rinok rinok dake kasaaha. Indiba Mephibosheth jasku dipane uni mikkango waseo bangopaha. Maina Saul Raja, uni atchutang rajani bobil onгani gimin una kenaha.

Mephibosheth, ine Daud kasae aganaha. Angko Rajani nokol dakbo ine pante aganaha.

Kenabe, Mephibosheth maina nangni pagipa Jonathonni gimin anga nangna kasaaniko mesokchongmotgen ine Daud Raja aganaha. Nangni atchutang Saulni mangimin aarangko anga nangna onpilgen. Naa angni noko donge angni mejo chagen.

Saulni nokol Zibana Daud Raja aganaha. Naa aro nangni depanterang aro nangni nokolrang Mephiboshethna Saul Rajani aarangko simsakna nanggen. Nasimang dao uni nokolrang onga.

Uni gimin Mephibosheth Daud Raja baksa uni noko dongpana rebaaha. Ua rajani mejo chaaha. Ua antangni pagipani ripengni kasaaniko mane kusi ongaha.

Daud Rajaba kusi ongachim. Ua Jonathonna antangni kura-chakako mesokaha. Gipinrangko kusi ongate ua Isolna kamko kaaha. Ua Isolni katong gita dakgipa mande ongachim.

DAUD ARO MEPHIBOSHETHNI NOKSA

Noksako nichina jinmako aganbo. Unon singbo, "Maina Daud Mephiboshethna inditan dakchakaha aro kasaaha? Oe, ua kora mande ongan giminisan ongaijaha, indiba ua uni pagipa Jonathonna aro uni atchutang Saulnaba kasaahani gimin ongaha. Daud Raja Mephiboshethna dakchakaha, maina uni katong Isolna kasaanian gapachim.

Jensalo anching anchingni ripengrangna dakchaka aro kasaa, uamangna aro Isolna kasaani gimin, anching uamangna dakchaka. Bible agana anchinga uamangni nokolrang onga. Knatimbo. Galati. 5:13b ko poraibo.

JAKNI KAM

Mesrangni nolko rongrangchi dakbo aro samsirang aro bolrangko dakbo. Mesrang aro mes nirikgiparangko, goolrangko jakkale dakbo. Ba lessonni noksarangko nie bisarang Daud aro Mephiboshethni noksako salatbo.

Lesson 40

DAUD RAJA ISOLNA KASAGIPA

Skiani Jepang :—

Ia bakni ia bonkamgipa skianio Daud Isolko namnikatgipa aro raja gita antangni manderangko Isolna kasaatna sikkipa mande onga ine bisarangko chanchiatna dakchakgen. Iachi bisarangna Isolna kasaaniko aro Una nambate dangdike onna skaniko bariatgen. Aroba ia Bak gimikni skie ragiminrangko gisik raattaina ba nipiltaina dakchakgen.

Sastroni Bak :— 2 Sam. 7:1-29; 1 Serikani 22:2-19; 28:1-20; 29:1-20. "Daud Raja aro Torom Nok."

Mukosto Kae Jakkalna :—"Kasroke Jihovana dangdike onbo." Git. 100:12.

Noksa Mesokani :— Ia bako jakkalgimin noksarangko mesokbo. Aro git. No. 21.

Skiani gita git :—"Apa, Ia walna chinga nangko mitela." aro git No. 21.

SKIGIPANI TARISOANI

Daudni golpo aro Torom Nokko rikna uni skania Daudni Isolo pangchake donganiko mesoka. Daud mande onge bilgrianirang aro chusokgijanirangko, uni nangipa gunrang, aro banga rajani nangipa kamrang baksa Bibleo serikani gita, uni dondikgija tikkela-niara janggitangna kakket ongan nambatgipa mangsonganirangko Isolni kasaachi chusokatna manaha ine parapeata. Samuelni aganani gita, Daud Isolni katongtang gita dakgipa mande onga-chim.

Daud budepa ongahaon, uni Isolna kasana aro kam kana sik-beania Torom Nokko rikna skani ongachim. Uni manderangna aganani mingsa ian ongachim. Anga angni kasaaniko angni Isolni noko dona—1 Serikani 29:5.

Daud pilakna bate bangipa aro bimchipgipa Isolni nokol ine Nathan katchinikgipani agananiko manianian mesokani onga. Uni Torom Nokko rikna sikbeaniko Isol jechakaha. Daudni Isolni skaniko chuginik rachakanian uni depante Solomonna dakchakna kupatianian uni kakketgipa skaniko mesoka.

Sronggipa katongchi aro kusi onggipa gisikchi uko manibo—1 Serikani 28:9. Daud Raja uni manderangni toromni dilgipa ongbaaha. Jinmana olakianiko dakdilanian antangni somoiko aro gisikko onaniko bangbate onna nangaha. Gitrangan Daudni janggi tanganio toromo ningtuaniko mesoka. Olakiani tomanirango uamangni jakkalani jatrangni gisikni bidingko altue salatna mana. Ua antangni bil gimikko Isolna kasagipa manderangko nambatatna uni dakanirangchi mesokaha.

"Ansenga ua manderang jerangni Isol Jihova onga." Git. 144:15. Bibleni golpoko aro nangrimanirangko Daudni gisikni miksonganirang gita ongsrangjana kingking poraibo. Daud Solomonna Torom Nokko rikchina pakwataniko 1 Serikani 22:5-16 ona aro antangni manderangni onanirangna Daudni biani 1 Serikani 28:2-9 ona aro

atangni manderangni onanirangna Daudni biani 1 Serikani 29:10-19 ona poraichongmotbo. Anching skigiparang katong gimikchi Daud gita Isolni kamko kana, uni katchaani aro gisiko nangani gita anchingni katongba ongchina.

GOLPONI ABACHENGANI

Anching ia bonkamgipa golpoo Isolna kasagipa raja, Daudni Isolna dangdike onani minggipin cholko aro uni Isolna kasabeani-ko mesokaniko nika.

GOLPO AGANANI

DAUD RAJA ARO TOROM NOK

2 Sam. 7:1-29; 1 Serikani 22:2-19; 28:1-20; 29:1-20

Daud Raja ongani jamano, Jerusalem songjinmaan uni dongram ongaha. Uano ua nangipa eres bolni nitogipa rajani nokko rikaha.

Salsao Daud Raja antangni namgipa gital nokko nidulaha. Unon Nathan katchinikgipana aganaha. Anga ua chanchianiko namnikja maina anga ia nitogipa noko donga, indiba jeo uko olakia Isolni nokde tambusan ongaia. Angni katongni sikchongmotaniara angni Isolko olakina torom nokko rikna skani onga. Nathan ia kaino Isolni mangsonganiko masiatna rajako dakchakaha. Ua aganaha. "Naa una kasaani aro kam kaani gimin kusi onga. Isol nangna patigen. Ua nangko dalgipa raja dakgen aro nangni depanterangoni saksa nangni jamano raja ongrikgen. Uan anchingni Isolna Torom Nokko rikna seokgimin onga.

Dao Daud antangko Isolni katong gita onggipa mande ine mesokaha. Torom Nokko rikana bate ua Isolko namnikbatna aro uko manianichi mande ra-na sikbataha. Pilak gipinna bateba ua uni kasagipa Isolna kamko kana skaha.

Jamano Daud aganaha." Ang de Solomon dambe onga. Isolna riknigipita nok nitobegipa aro aiao inangipa onga nanga, jedakode uko asongantin uigen. Anga ia Torom Nokko rikna manjaode, anga uko rikna angni depantena pilakkon tarie dongen."

Uni gimin Daud namgipa bosturangko rabachina geetaha. Uo paknarangna roongrangko solgipa aro dogarang aro dogacholrangna namgipa eres bolrangko solgipa manderang gnanchim. Ua silgrak, pitor, sona aro rupa, aro gamchatgipa roongrangko Isolni nokko kimkimatna aro nitoatna chimongaha. Ua sapgipa changgipa kam kagipa manderangko rimbaaha.

Unon Daud aganaha, "Anga pilakna bate Isolna kasabata anga antangni gamko uni torom nokko rikna ongen. Uni gimin Daud olakiram nokko nitoatna sona aro rupako bangbate onaha.

Daud antangni manderangna aganaha, "Nasinangoni sawa sawa anchingni Isolna Torom Nokko rikna nasimangni gamko ongen?" Kusi onge skatang manderang uamangni onanirang—sona aro rupa. *pitor aro silgrak aro gamchatgipa roongrangko rae rebaaha. Namen katchabeani ongaha maina Daud Raja mitelani bianichi antangni manderangko dilaha.

Nitogipa Torom Nokko rikna banga bilsirang nangaha. Daud Raja uko matchotna skangan siaha. Uko Solomonni Torom Nok ine mingachim, indiba manderang maikai Solomonni pagipa uko rikna tariaha uko uiachim. Uamang Daud Rajako pangnaba gualjaha. Uamang uko raja gita gisik raaha, jean Isolna kasaa aro una dangdike onachim. Ua antangni manderangkoba Isolna kasa-china aro kam kachina dilaha.

BIBLENI PODNI GIMIN CHANCHIANI

Gitrangoni mingsao, ba anchingni Bibleo demitelani gitrang agana, "Kasroke Jihovana onbo." (Git. 100:2).

Daudni golpoo maikai Daud Raja ia geetaniko maniaha uni gimin chanchina. Saul Raja aro mes nirikgipa bisa Daudni golpoo ua maikai ia podko rakiaha ukoba chanchina. Daud Raja aro Mephiboshethni golpoo ua maikai Gitelna kusi onge dangdike onaha uani giminba anching chanchina.

Bisarang uamangni chanchianiko onmano, uamang skigiparang-na dangdike onmitingo katcharoroaniko manchina Isolo bidilbo.

JAKNI KAM

Daud Isolni nokko rikna chimonggipa bosturangko lekao ba slateo dakbo—iarangko—dogarang aro dogacholrang, pakmarangna solgiinin roongrang—sona ba rupachi dakgiinin bosturang—jaksi-temrang, jaksanrang, tangka aro paisa.

Lesson 41

ANGNI BAKKO DAKNA DALA CHOUNGAHA

Skiani Japang :—

Bisarangko ia skanggipa bako uamangni dalrroaniko chuongnikate, rakbatgipa dakna nanggnirangko dakna manpaaha ine aro maiba kadongna mangipa kamko kapana manpaaha ine aro indake dakanio Kristianni ortoko dakanirangchi uiatna.

Sastroni Bak :— “Maikai Jisu dalrrobaaha.” Mati 3:17; Luk 2:39-52.

Mukosto Kae Jakkalna :— “Jisu uanio, aro bilsio aro una Isolni aro mandeni kasaa batrooaha.” Luk 2:52.

Noksa Mesokani :— Kasagimin depante, Toromni school, Nazareth songjinna, Nazaretho bisarangni kalgrikani, Jisu Kristoni nokoni, schoolni, Torom nokni, kalgrikani noksa, Sastroni bisarang jean Isolo kadonga, jedake Samuel, Miriam, Daud Naamanko dakchakgipa mechik bisa.

Skiani gita git :— No. 44.

SKIGIPANI TARISOANI

Daalni lessono Sastroni bak aro podrang maa paarangna aro to-romo dilgiparangna indake masiatani onga, chongmotan anchingni simsakanio, bisarangni dalrroanio, uamangna Sastroni bak aro podrangko masiataniko dakna nangani onga. Ian anching sakan-tini dakna nangni chongmotan dalrrobaenggipa bisa sakantiko Jisu Kristoni bisamitingni kamko skie uamangni katong aro gisiko dongkamatna nangani onga. Anching anchingni bisarangni beeno aro gisikni uanio dalrrobaaniko nitimna nanga, maikai uamang Jisu Kristoni beeno aro gisikni uanio toromo aro nangrimanio dalrrobaaha gita uamangba dalrrobaapana mangan.

“Jisu uanio, bilsio aro una Isolni aro mandeni kasaa batrooaha”. Luk 2:52.

Ia Sastroni pod anchingna, anchingni bisarangna dakna nang-niko tale mesokanio anching jerangan toromo bisarangko dilenga aro bisarang antangtanga iako skie rana nanga. Ia katako ding-tangmancha gisik rana nanga. Luk 2:52, bonkamgipa “Jisu uanio

aro bilsio aro Una Isolni aro mandeni kasaanio batroroaha. Ia katani bak indakgipa skianiko batroroataha aro mangrakatbataha. Anchingni chongipa mea bisa aro mechik bisarang Jisuko Isolni aro mandeni kasaa dalrooraniko jarikna nangode, uamang Isol baksa nangrimanio aro uko masianio uamangni dakna nanggni bakko uina aro uko dakna nangchongnota.

GOLPONI ABACHENGANI

Ian Jisu Kristoni chonmitingni noksa jeko anching Sastroo uni bisamitingni gimin poraia. "Jisu dalroroe bilakbaaha." Ian Luk 2:40 o segipa "Uni been dalroroe bilakbaaha." Uan Jisu bisani gimin agana. "Jisu uian gapaha." Uni uiani batrorobaaha, maina ua Isolna anchingni dakna nanggniko Isolni kadongsoa gita dakna gisik raaha aro chanchiaha. Jisu Kristoni maiba gipino dalroorani gnangkua. Knatimbo. Isolni kasara uon dongachim. Jisu dalroorobaanio Isol uko nannikaha aro uni ripengrangha Uko nannik-beaha.

GOLPO AGANANI

Jisu jensalo Palestineo bisa ongengachim, ua antangni magipako dakchakaha. Ua chiakoloni chiko rabaachim. Ua chiko chi kochakanio rabaaha. Ua ambolko rabaachim. Ua antangni pagipa Josephko uni mistrini kamo dakchakachim. Pilak bisarangan antangtangni pagiparangko je kamoba dakchakachim. Jisu uamangni gisepo dalbatgipa ongani giuin sakgipinrangna bate dakchakna nangachim. Jisu mistri onгна skie raaha.

Ua antangni kamko matchotahaon, antangni songni bisarang baksa kalgrikachim.

Ua salanti schoolchi reaha. Uni schoolara gilja noko ongachim aro uko Torom Nok mingachim. Uni skigipa Pamong ongachim. Uamang anching gita kitap dongjachim, indiba uamangni leka samsioniko tarigimin ongachim, uko dolna aro badalna inanachim aro segiminranga ua dolgimino ongachim. Ua lekao segiminko Dolgimin leka ine mingachim aro uarangko dingtanginancha bakoso donachim. Jeon ua dolgimin lekako dona, ua bakosni mikkango Torom noko pangnan waalko soe donachim. Ua waalko saloba aro waloba sokamaiachim.

Jensalo schoolni somoi onga, skina donsogimin pamong nokking kosakchi reange mes bipani grongni singgako sikrongachim. Unon bisarang schoolni somoi ongaha ine uiachim, aro Robibar salo ia

apsan mandean singgako sikachim unon pilak manderang Robibar sal onga ine uiachim. Jisuni bisa ongmitingo nengtakani sal Sukrobarni atamni sal napaoni abachenge Sonibarni atamo bonachim.

Jisu jensalo bilsu chigni ongachim unon ua bakrobatgipa songreaniko dakaha maina dala chuongahachim aro ua uko gisik rana inanahachim. Ua uni song Nazarethoni Jerusalemona uni maa paa baksa reangaha. Uamang Jerusalemni Torom nokona reangachim. Uan mail sotchet chelachim. Jisu ramako reangaha. Jisu dala chusokahachim aro uko songrena uni bil chuongahachim.

Jisu jensalo Torom nokona reangaha, ua uno pamong aro uni skigiparangni skianio inditan gisiko nangachim, ua antangni songko aro nokko gualpilaha. Ua basako Nazarethona reangpilna nangachim uko gualaha. Mariam aro Joseph uko pilakchikon amro-roaha. Jensalo uamang uko Torom noko gisik gnanggipa manderangni skianiko knatime, singenga aro aganchakenga aro uamangni skianiko chanchienga, beben ua gisikni uianio bariroroaha. Ua uni gisikko gisik rana aro chanchina jakkalaha.

Jensalo ua Torom nokko watani onga, ua uni maako kusaba aganchakgija uni maa baksa reangpaaha. Mariam aro Joseph kusi ongbeaha. Uni pagipa Isolba kusi ongbeaha. Beben ua Isolni aro mandeni kasaanio batroroaha.

NOKSA MESOKANI

Jisuni Torom noko dongani noksako mesokbo aro bisarango Jisu maiko toromko skigiparango singengachim singbo. Skibo Luk 2:52.

JAKNI KAM

Bisarangko astechi Jisuni bisao jakkalgipa chini jug, mistrini ostrorag, Dolgimin leka, Palestineni nokko dakatbo ba salatbo.

SASTRONI PODNI GIMIN CHANCHIANI

Jensalo Jisu bilsu chigni ongachim, ua bakrobatsranggipa songreaniko songrechengaha, aro ua uko gisik rana gualahachim. Ua songreania baona ongachim naa uama? Uan Jerusalemni gilja nokona ongachim. Uan Nazarethoni Jerusalemona mail sot chet chelachim aro Jisu ua rama gimikkon jaachi reangaha. Jisu beben beenni dalroroanio dalroroaha aro ia songreaniko dakna dalahachim.

Gilja noko mai ongaha, naa gisik raengama? Jensalo Jisu gilja noko uigipa manderangni agananiko knatime, singengon aro aganchakengon, Mariam aro Joseph maikai uko nikeaha, naa gisik raengama? Oe, Jisu uanio batroroaha aro ua uko gisik rana aro chanchina jakkalaha. Ua gisikni uanio bariroroaha.

Jensalo ua gilja nokko watani onga, Jisu maiko dakaha, naa gisik raengama? Jisu antangni maako kusaba aganchakgijan maniaha. Mariam aro Joseph kusi ongbeengachim. Uni pagipa Isolba kusi ongbeengachim. Beben ua uanio bilsio aro Una Isolni aro mandeni kasaanio batroroaha.

Dao anching iarangni gimin chanchina aro Sastrooniko Jisuni dalroroani gimin chanchie poraitaina. Luk 2:52 ko poraibo.

Lesson 42

ANGNI BAKKO RIPENG ONGE DAKNA

Skiani Japang :—

Ia lessono maiba jegrikanirangko tomtome namatani. Ian bisarangko tomtome donganiko dakanio uamangni joton kana nangani onga aro uamangni indake dakania Jisu Kristoni skianiko jarikenga ine mesokani onga.

Sastroni Bak :—Aba. 13:1-12. "Abraham tomtomaniko dakgipa."

Mukosto Kae Jakkalna :—"Tomtom donggrikbo." Mark 9:50c. "Nangrimatgiparang ansenga." Mati 5:9a.

Noksa Mesokani :—Kasagimin depante, Abraham aro Lotni noksa.

Skiani gita git :—No. 44.

SKIGIPANI TARISOANI

Abraham aro Lot, Daudni bonkamgipa salrang gita onggiija, reroroe mes jakrangko nirikgiparang ongachim. Uamang dongkamgipa nokrang dongjachim, indiba biapsaoni biapsaona uamang dobok aro matchu jakrang baksa reroroachim aro uamang dobok kimilni tambuko daggimin tamburango dongachim.

Uamang jeo dongachim, ia biaponi salaramchipak songreangon,

bangbea gamko manaha, chongmotan bangbea jillanirang aro uarango nirikna bangbea chakolrangko manahachim. Aditani jamano, Abrahamni aro uni gritang Lotni matchu aro dobokni jakrangko damsan dondime nirikangkuna nengnikani ongahachim.

Aro ua asongo uamang dongrimna apchakajok; maina uamangni gam bangbeachim, aro Abrahamni jillanirangko. ... songdongengachim. Aba. 13:6-7.

Unon Abraham antangko dalgipa beben onga, tomtomaniko namnikgipa aro ripeng onganiko namnikgipa ine mesokaha, maina ua antangna chanchigijan Lotko skanggipa basee raaniko dakna onaha aro ua mamungba chanchigijaan basee galgiminko raaha. Ia indake bamaniko dakanio Abraham minggitam upadhiko manaha ine Sastroo mesoka.

"Aro ia aganani Sastro chusokaha, aro Abraham Isolo beberaa, aro uko torom ine una chanaha, aro Isolni ripeng ine uko chanaha." Jakob 2:23.

Ia golpo bisarangna rongtale mesoka maina bisarang iako uanio uamangni kalgrikani somoio antangtangnasan chanchiaina nangja ine mesokgen. Abrahamni indake Lotna kasae dakani aro jakkalania Jisu Kristoni Sastro minggni toe skianio nambegipa skiani onga ine daalni lessono mana. Beben ua Jisu Kristoni chasongna skang ruuta bilsion dongahaoba Abraham Kristian Janggi tang-aniko mesoka.

GOLPONI ABACHENGANI

Daalo anga nasimangna Sastroni golpoo mande saksa maikai gipinrang baksa dongrimna uia, uani gimin aganna namnika. Iakai noksa. Abraham aro Lotni dalgipa noksako jinmani mik-kango sikebo ba gesako bisani kitapo tapbo.

GOLPO AGANANI

ABRAHAM NANGRIMANIKO DAIKPA

Aba. 13:1-12

Ruuta bilsirang reangaha, mes nirikgipa sakgni dongachim aro uamang damsan songreangengachim. Uamangoni dalbatkalgipa Abraham ongachim. Ua chonkalgipa Lot ongachim.

Uamang sakgnian mane chaachim. Uamango bangbea tangka, sona aro banga mes aro dobok jakrang aro bangbea utrang aro matchurang dongachim. Ia matchu ba mes jakrangna gitalgipa

chi aro samsirangko nangani gūnin Abraham aro uni gritang Lot biapsaoni biapsaona rerorona nangachim. Uamang banoba dik-diksana dongdikna nangun, gipin mes nirikgiparangni skango dakaha gita tamburango dongna nangachim.

Salsao Abraham maiba katako knaaha aro uan uko duk ongatani kata ongachim. Uan uni aro Lotni dobok aro mes jakrangko nirikgipa manderangni gisepo jegrikani ongachim.

Chingasa ia samsiarigipa bakrako nikchengaha ine Abrahamni nirikgiparang chrikaha.

Chinga chingni mes, dobok aro matchu jakrangko iano cha-amatgen ine Lotni manderang aganaha.

Ia chiakol chingni dobok aro mes jakrangua onga ine Abrahamni manderang aganaha.

Chingni matchurangba iako ringgen ine Lotni manderang chrikaha. Dao Abrahamde nangrimani aro tomtomaniko dakgipa ongachim, uni gimin ua Lotko okamaha aro inaha. Angmu aro nangmu mamungba jegrikani ongjachina ine ua Lotna aganaha. Uni gimin anga nangko moluola, angmuung nangnung aro angni jillaniko nirikgiparanguung aro nangni jillaniko nirikgiparang-mung manenggrikjachina, maina anchinga madrang onga.

Unon ua Lotko uamangni dongenggipa tambuni sepango dong-gipa chugipa abri kuchotona rimdoangaha. Iano pilak aako nik-soka kakket nikwatachim.

Anchinga bangbea nokol chakoliang aro mes jak, dobok jak aro matchu jakrang dongaha aro dongrimna manjawaha ine Abraham aganaha. Anching chelgrikna aro ekgrikna nangaha. Naa jakasichi reangode, indide anga jakrachi reanggen aro naa jakrachini aako raode anga jakasichini aako ragen.

Lot jakasichiniko niataha. Ua apalbegipa tangsimgipa samsini bakrako aro chini uarangko jokdulengako nikataha. Ua jakrachini-ko niaton bangbanggipa rongbrakni abriko nikataha.

Anga jakasichi reanggen ine Lot aganaha. Ruutgijan ua uni tamburango teme aro uni bosturangko rae utrango gate, uni manderango rime, matchu aro mes jakrangko moe salaramchi-pakni tangsimgipa aro chi jokenggipa bakraona reangaha.

Abrahamba bakkakan uni nokgimik baksa, uni manderang baksa uni tamburango rae aro matchu aro mes jakrangko moe saliram-chi rongbrakni abrini bakraona reangaha. Iano banggija samsi-rangsan aro banggija chiakolrangsan dongaiachim. Indiba Abraham nangrimani aro tomtomaniko dakgipa kusi ongachim. Ua jegrikaniko dakna jechakachim. Ua nangrimani aro tomtomaniko dakaha.

MUKOSTO KAE JAKKALNA

Bisarang Abraham aro Lotni noksako nitaion, Mark 9:50c ko poraibo. Abrahamni chasongni ruutani jamano, Jisu ia geetaniko uni ripengrangna onaha. Hai anchinga pilakan uko damsan mingna aro Abrahamni gimin chanchina (podko mingtaibo). Maikai Abraham jegrikaniko namataha? Ua maiko dakkuna nangachim? Badia dukko gimaatna altuachim? Maina ua rakbatgipa cholko baseaha? Ua mes nirikgipa sakgnioni sawa nambatako baseaha? Lot basena cholko onon ua maiko chanchienggenchim, chanchi-chipna manama? Abraham Lotna basechengna onon, maiko chanchienggenchim, naa uiama? Oe, anga chanchia, ua kusi ongenggenchim. Jisu changsao aganaha, "Nangrimatgiparang ansenga." Chongmotan nangrimatgiparang kusi onga. Hai anching indake minggnikon agana. Mati 5:9a mingtaibo.

BIANI

Kasagipa Isol, chinga kusi onga, maina chinga agilsakko kusi ongatbatna nangko dakchakna mangel. Chinga kalgrikani somoio nang baksa kamko kana cholko uina dakchakbo. Jisuni bimungo bia. Amen.

JAKNI KAM

Roongni chiakolko taribo jekon bisarang rabagenchim. Lekani mesko taribo.

Lesson 43

ANSENGGIPA ARO BILAKGIPA ONGNA ANGNI BAKKO DAKANI

Skiani Jepang :—

Ia tomanio bisarang beenni ansenganina chaani chongmotko uina dakchakbeani ongen. Bisarangko iako dakanichi uamangni ansenganina antangni bakko dakenga aro Isolni ongimin niamrangko jarikenga ine masiatna nanga.

Sastroni Bak :—"Daniel chaani chongmotko seoka." Daniel 1:1-21.

Mukosto Kae Jakkalna :—Jihovani nikanio sronga aro namako dakna nanga. Deut. 6:18.

Noksa Mesokani :—Daniel aro uni Ripeng sakgitam.

Skiani gita git :—No. 102.

SKIGIPANI TARISOANI

Daniel aro uni ripeng sakgitam Jerusalemoni Babylonona rim-gittanganiko manpaaha. Uamang sakgitamko dingtangmancha rajani machongni gita nikachim. Daniel 1:3. Uamang gisik gnanggipa aro ningtue uigiparang ongachim. Daniel 1:4. Uamangko Ibrirangni minggimin bimungrangko gale dingtang bimungrangchi mingskaaha. Uamangko uamangni kamni kri binungrangko onaha. Jihudirangni mamu Jihudi manderangko amani chaaniko chajachina bengani gnangchim. Babylonni bangbata nama chaanirangan benggumin chaani ongachim. Un baksaba uamangna ongipa chaaniara mite dakaniranena ongimin ongani gumin rongtalgi jagipa chaani ongachim. Iarangoni apsangipara chu ongachim.

Daniel rajani namnamgipa chaanichi aro uni tingrongani chuchi antangko marang nangatjana mangsongaha. Daniel 1:8.

Danielni gisik gnangani aro uni kakket onaniara chubatgipa gadangona dedoako manaha. Isol Danielna aro uni ripeng sakgitamna dingtangmancha kasae dakchina pamongna gisikko patiaha. Daniel 1:9. Ia nina dakanio Daniel chusokgipa ongaha. Daniel 1:16-19.

Ia sakbri panterangni kadongani aro kakket onaniara uamangna namgni ongaha. Uamang been bimangsan ongaija gisik gnanganikoba mandapaha. Isol uamangna uiani aro gisik sengani aro pilak skiani aro gisik gnanganiko onaha aro Daniel pilak nikanirangko aro pilak jumangrangko masiaha. Daniel 1:17.

Uamangko tarisoani sal chusokahaoa ia pante sakbri rajani songnoko chugipa kamko kachina seokako manaha. Indake uamang gisik gnanggipa aro uigipa manderang baksa chanchapako manpae rajana kupatigiparang ongbaaha.

Raja antangni songnoko donggipa montol dakgipa aro peliki dakgiparangna bate uamang duna chikung nambata ine nikaha. Daniel 1:20.

GOLPONI ABACHENGANI

Anching badita dalroroa inditan rakbatgipa kamrangko mamung jegrikani gri nambate kana mana ine anching uina mana. Iarang

pilakan Isol baksa kam kaani cholrang onga. Angni nasimangna agannasigipa golpoa anchingni bakko dakani gipin cholni gimin anchingko chanchiatna dakchaka.

GOLPO AGANANI

DANIEL CHONGMOTGIPA CHAANIKO SEOKA

Changsao mea bisa sakbri uamangni songjinmaoniko pangnaba nikkujagipa song damsiona rimangako manaha. Uamang uamangni kasagimin Jerusalemoni chelbegipa biaposa onghachim. Uamangoni saksako Daniel mingachim.

Dao ua asongni raja antangni ningo kamko kaatna gita tariatna panterangko nangbeengachim. Indiba ua panteranga nitogipa, been ansenggipa, gisik gnganggipa aro rajako manderana changgi-parang onga nangachim.

Ruutgijan rajani nokol banga panterangko rajani mikkangona rimbaaha. Uamangni gisepo Jerusalemoni rebagipa Daniel aro uni sakgitam ripengrangba ongachim. Ruutgijan ia ripeng sakbri naimen jajrenganio ongbaaha.

Raja antangni dalbatgipa nokolrangni pamongko uamangna antangni chaaniko onchina aro rajani ringani chuko onchina aro bilsu gitamna skie tariani matchoton uamangko antangona rimba-china geetaha.

Daniel aro uni ripengrang rongtalgipa chaaniko chana aro rongtalgipa chiko ringna skiako manahachim. Ia rongtalgipa chaaniara Isolni ongimin niamrang gita chaani aro ringani onga ine uamang uiachim. Jean kakket onga ine anga uia ukosan anga dakgen ine Daniel chanchiaha.

Mi chaani somoi ongahaon rajani nokol saksu rajani namgipa chaani aro chuko uamangna rabaaha. Uamang rachakanio gapgipa chaaniko nike okkriaha. Indiba uamang maiko dakna nanggenchim?

Daniel uamangna simsakchina dongipa rajani mandeko okame aganaha. Chinga ramram chaani aro rongtalgipa chiko ringna skianiko manaha. Ia namnamgipa chaani aro bilakgipa chu chingna namgijani onga. Uni gimin ia namnamgipa rajani chaani aro ringani chuko raange chingna mesu samjak aro chiko onbo.

Rajani nokol uko dakna kenaha. Ua uamangna aganaha, "Nasimang rajani chaaniko chajaode been bilgri onge been rame bokdalgeppen; unode raja angko kaonanggen."

Indiba Daniel sal chikungna kingking dake nichina biaha. Indake dakanichi sawa ansengbatgipa aro bilakbatgipa ongachim uko nichina aganaha.

Bonkamao Danielni bia gita dakaha. Sal chikungna kingking nokol uamangna mesu samjakrang aro chikosan rabaiaha. Indiba gipin panterangnade rajani chaani aro chuko onaha.

Sal chikungni jamano rajani nokol antangni ningo donggipa pilak panterangko nisusae nion pilak gipinrangna bate Daniel aro uni ripengrangan je rokomoba nambatgipa onga ine nikaha. Uamangni mikronrang rongchinga aro uamangni perang gitachak-achiu.

Indake Daniel aro uni ripeng sakgitam uamangna simsake rakki-gimin namgipa chaani aro ringaniko uamangni silrorognina onchina geetaniko manaha. Uamang gisik nange poraiaha. Uamang skianirangko uiningaha. Uamang ua asong gitalni kusikko sena aro poraina skiako manaha.

Bili gitamni jamano pilak panterang jerangan skie raaniko manna dongengachim pilakan rajani mikkangona rimbaako manaha.

Raja uamangko niaha aro uamang baksa agangrikaha. Pilak panterangna bate Jerusalemoni rebagipa pante sakbrian nambatgiparang onga ine raja aganaha. Uamangni mikronrang rongchinga. Uamangni bimangrang mangraka. Uamang rajana dakchakna kragiparang onga ine raja aganaha.

Raja antangan Daniel aro uni ripengrangna gisiko sontolgiparang aro gisik senggiparang onga ine nikaha. Ua pante sakbrian ua asongo donggipa pilak gisik gnanggipa manderangna bate chang chikung sengkata ine raja aganaha. Indake je bisarangan Isolni dongimin niam gita jarike cha ringachim uandakgiparangan kadongna mangipa biapko mana.

GOLPONI JAMANO

Deut. 6:18a ko poraie aganbo. Daniel jean kakket onga ine gisiktango uaniko dakaha. Anchingko ansenge aro name rakina mai gipin ansengani niamrang gnang? Noktango aro schoolo uamangni skie ragimin ansengani niamrangni gimin dolo donggipa bisarang janapchina. Iarangan anchingni manina nanggipa Isolni niamrang onga ine mesokbo. Indake anchingni been bimangko ansenggipa onge rakina niamrangko donanian Isolni dakani bak onga. Anchingni bakara anchingko ansenge aro bilake dongna niamrangko rakianian onga.

BIANI

Kasagipa Isol, chinga jean kakket onga una kakketgipa onгна ska. Ia anti gimiko nangni namnikaniko dakna chingko dakchakbo. Jisuni bimungo bia. Amen.

JAKNI KAM

Anchingna kragipa nangipa chaaniko slateo ongjaode lekao sale mesokbo.

Lesson 44

BILGRIGIPA MANDERANGNA ANGNI DAKNA NANGGNI BAK

Skiani Jepang :—

Ia bakni bonkamgipa skiano bisarangko bilgrigipa manderangna dakchakna nanganiko aro sakgipinrangni namgnina aro ansengnina anchingni bilko jakkalna Isolni mangsonganiko chusokatna chanchiatna onngen. Sagiparangna chipchangako mangiparangna aro kanagipa manderangna dakchakani cholrangko mesokna nanga. Indake dakanichi uamang Isol baksa karimgipa onгна minggipin chol onga ine masiatna nanga.

Sastroni Bak :— II Samuel 4:4; 9:1-13. "Daud antangni kura-chakaniko rakia."

Mukosto Kae Jakkalna :— "Kasaachi nasimang saksara sakgiminni nokol ongbo." Gal. 5:13.

Noksa Mesokani :— Daud aro Mephibosheth.

Skiani gita git :— No. 18.

SKIGIPANI TARISOANI

Ia Daud aro Mephiboshethni golpoko iana skang skiani bongagipa bako Daudni golporango jakkalmanaha. Iano anchingni miksonganiara indake Daud maikai Isolna kasaani gimin sakgipinrangko dakchakna uko dilaha uko mesokna onga. Ia bako apsan golpoko jakkalaha maikai bilgrigiparangni namgnina aro kusi

onggnina dakna nanganiko Isol bilgrigiparangna kadongsoa ine masiatna bisarangko dakchakgen.

Anching bilakgiparang antangtangni namnikako dakgija bilakgijagiparangni bilgriako ripena nanga. Rom. 15:1.

Masibatatna gita dintang dintang dakchakani gnannggipa Bibleni golporangko jakkaltaitaina nangchongnnota. Indake daknichisan bisarang uarangko uichongmotna mangen. Ia golpoko bakbakan agantaianara, ia chango bisarangni dakrinpaaniko gisik raattaina mangsonganl onga. Sastro gitalni podrango iako jana-pani gri. Galatirangna 5:13 ko skanggipa jao apsan golpoko jakkalahani gimin gisik raattaiani aro uni ningtugipa ortoko gisik raattaiani onngen. Indiba ian bilsini ongenggipa mea aro mechik bisarangna masina amgijagipa pod onga. Uni gimin uko changni chang banga dintang himangrango, uamang uni mangsonganiko uisrangkujana kinking jakkaltaitaina nanggen.

Isaia 28:10 o katchinikgipani agansoginin gita, Geete donani kosako geete donani, niamni kosako niam aro iano ontisa uano ontisa onga.

NOKSA BAKSA GOLPOKO NIPILANI

Isol antangni ongimin nianrangko manianichi beenrangko an-senge rakichina anchingna onmanaha ine aganbo. Ua anchingko anchingni dakani bakko ansenge aro bilake rakina dakchina kadongsoa. Daniela indakgipa cholchi Isol baksa karimpagipa ripeng ongachim.

Ia noksa Bibleni gipin ripeng onga, uan agilsakko namatbatna aro kusi ongatbatna kamko Isol baksa kariunpaachim. Ia Bibleni ripengara bilgrigiparangna jerangan dintangmancha anchingni kasaani aro simsakaniko nangachim indakgiparangna dakchakna nangani dakgniko uiaha. Daud aro Mephiboshethni noksako bisarangna mesokbo. Nasimang ia noksao nikenggipa mande sakgniko uiama? Uamanga ia noksao maiko dakenga? Daudara maina Mephiboshethko okamataha? Ua maidake jakorako dakchakaha? Daud Rajara maina Mephiboshethna inditan kasaaha? Daud Raja jakoragipa mandena kasabeani gimin dakaha ine bisarangko nikatna dakchakbo. Uni Isolna aro uni ripeng Jonathonna aro jakoragipa mandena kasaanian jean simsakaniko nangachim uan Mephiboshethna kasae dakna nanganiko Daudko uiataha. Ia dambegipa pante uni bilgrigipa aro dakchakani grigipa onganio dakchakgipa ripengko nangnikachim. Daudan indakgipa ripeng ongbaaha. Ua uko kusi onge aro altuae janggi tangatna uni bilo pilakkon dakaha.

MOKOSTO KAANI

Galati. 5:13 ko poraibo. Sakgipinni nokol onga ine miksongania nangni bilgrigipa ripengrangna kasae dakchakanian onga. Daudba Mephiboshethna dakchakaha. Daud antangni ama gita Mephiboshethko kusi onge janggi tangani cholrangko dakaha, maina ua jakoragipa inandena kasabeaha. Nasimang ang baksa ia podko poraigenma? Gal. 5:13b ko bisarangko poraidilbo.

BIANI

Kasabegipa Isol, chinga nambate janggi tanganiko manna bia. Chingko bilgrigiparangna jerangan ching gita bilgrigiparang onga uamangni gimin chanchina dakchakbo. Chingko nangni sepango dongna, nangni gimin chanchie nangni dedrang onga dakchakbo. Jisuni binungo bia. Amen.

JAKNI KAM

Isolni kasaani gimin sakgipinrangna mesokna manna gita maiba kamko dakbo. Jedake bilgrigiparangna dakchakani, jerangan an-ching gita bilakpaja. Maiba kasae dakchakani gimin chanchibo, jedakode bisarang altue uie uko dakna mangen.

Lesson 45

JISUNI PALESTINEO JANGGI TANGANI

Skiani Jepang :—

Jisu Kristo biapsaoni biapsaona reroroani, sagiparangko anseng-atani aro banga skianirangko onania, chongmot Jisu Palestineo janggi tangchongmotachim ine uibaatna dakchakgen. Minggipin Palestine mai dakgipa asong onga uko uamangni pilak janggi tangani obostarang aro jakkalanirangchi talbate masiatgen.

Sastroni Bak :—Mark 4:1-3; Johan 4:3-8; Mark 1:29-34 aro Luk 5:1-11.

Mukosto Kae Jakkalna :—Watata. 10:38b “Ua namako dake, aro Diabolni duk onako mangiparangko ansengate reroroachim.”

Noksa Mesokani :— Jisu sagipa bangbeako Kapernaumo anseng atani.

Skiani gita git :— No. 44 ba 42.

SKIGIPANI TARISOANI

Ia bilsini abachengachibara uamang anti bongana kingking Jisuni Palestineo janggi tanganini gimin skianiko manmanaha. Indiba uarang uamangoni mitamrangna, uarang golposan ongaia aroba uan agilsakni biap dandsao onga ine chanchikuengakon. Maina bilsu 7 aro bilsu 8 onggengipa bisarangna uan beberana aro chanchisokna amgijani gita ongpila. Haida uamang Jisu agilsako janggi tangbebeahaoba, dao ruutbea bilsirang reangmanahani gimin dao ua Jisuni rerorogimin biaprang dongjawaha ine chanchiengakon. Ba saoba saoba uarang salgiosa ine chanchichipkuengakon. Uni gimin skigiparang daalni skianirangchi Jisu agilsako mande onge atchichongmotaha aro Palestine asongo dongachim aro ua Jisuni asong agilsako onghongmotachim ine noksarangchi aro Palestineni nok aro jakkalanirangko mesoke uamangko beberaatna dakchakna joton kana nangen. Palestine asong daoba dongkuenga. Banga manderang bilsiantio ua Jisuni rerorogimin biaprangko reange nina manenga, nasimangba dalahaon, cholko manode Jisuni asongko nina reangbo. chongmot nasimang uko nikna manchongmotkugen ine aganbo.

Jisu chongmot mande bisa gita atchiaha, dalroroaha, mande gita chaaha, ringaha, tusiaha, mikrakaha, kalgrikaha, kam kaaha aro biapsaoni biapsaona rerorochongmotaha ine beberana gita noksarang aro bosturang dakchakgen. Aroba uamang gnigipa skianiko mananichi beberabatna mangan.

Indake bisarang beberaahaon uamangni Jisuna kasaaniko batroatna mangan ine kadonga.

NOKSARANG

Ia noksarangko mesoke uamangko chanchitaiatna dakchakbo aro singanirangko singbo. Mitam noksarangko uamang gisik ragen indiba mitamrangko gualgenkon. Indiba skigiparang noksao donggipa biap aro manderangko jotdike singode, uamangni mikronrangchi nie masibana mangan. Skigiparang antangtangan uan maini noksa onga ine agansonabe. Bisarang aganchina. Uamang ua noksarangko nikmanahani gimin, ontisa gualengoba bakbakan uibana mangan.

- (1) Jisuni sagal rikamo mande jinmana skiani.
- (2) Jisu aro Samariani mechik.
- (3) Kapernaumo sagipa bangbeako ansengatani.
- (4) Sninggiparang banga natokrangko ringopani.

BOSTURANG

Palestineni Nok, Chi koani basing, uamangni tuchakani amrang, moida dakatani jata, mea bisa aro mechik bisani cholarang, mes, gada, aro gipinrang. Iarang Jisuni asong Palestineo donggipa jakkalanirang ine talatna mangan.

BIANI

O, salgio donggipa Paa, Jisu ching gita bisa onganio chingni duk aro sukrangko uie chingko dakchakna manani gimin nangko mitelbea. Jisuni bimungo ia. Amen.

JAKNI KAM

Mea bisa ba mechik bisani cholako salna ba salgiminko rong nongna mangan. Ba astechi mea ba mechik bisako dake Palestine songni ganding chindingko ganatna mangan.

Lesson 46

DALROROANINA ISOLNI DAKSOANI

Skiani Jepang :—

Ia skianichi bisarangni skiako mananina kusi onganiko manatna uamangni uia gita dakrinpaatna aro Isolni dalroroanina miksonga-ni baksa dakpana dakchakna aro mikknng janggi tanganio nangipa Kristian janggi tanganio tangatna dilangna onga.

Sastroni Bak :—Luk 2:40, 52; Git 104:24; Deut. 31:10-13.

Mukosto Kae Jakkalna :—"Name dakna skiako rabo." Isaia 1:17a.

Noksa Mesokani:—Nazarethni schoolo aro Torom Noko Sastro skigiparango skie raani.

Skiani gita git :—No. 58.

SKIGIPANI TARISOANI

Daalni skiani reanggipa lesson 19-22 ona nipilani gita onga in-diba bisarangna uko janapna nangani ongjawa. Uamang jerangko skie ramanaha uarangko gisik raattaina gita je cholrang donga uarangko jakkalna tarisona nanggen. Maina ia bilai 7 ba 8 onggi-pa bisarang gisik rakamna amkujagipa bisarang ongengpiti. Uni gimin uamangni jakni kamrang, noksarang, gitrang aro golpo-rangchi gisik raattaina gita, kandike. Jisu maikai noktango aro apalo ripengrang baksa Isolni agilsako dalroroachim aro mamantiko skie raachim, schoolo aro Torom Noko mairangko skie raahachim aro uarango ua maikai jarike Isolni aro mandeni namnikanio dalroroachim uarangko gisik raatna dakchakna nanggen. Jisu "Namako dakna skie raachim". Nasimangba schoolo aro Sunday Schoolo jerangko skie raaha uarangko kusi onge dakna aro jarikna joton kana nanggen ine masiatbo.

Isol agilsako aiao inmananirangko bangen dakaha. Uarangni gimin skie rana aro Isolko mitelna aro mandeskarang aro Isol baksa dakrimpana kusi ongatna bisarangko skie tarina skigiparangni aro maa paarangni kain onga.

Isol Uni aiao innangipa agilsako, "Uni Dalroroanina Daksoanio" kusi onge uibatroroe janggi tangchina gita bisa sakpraknan onna ska.

GOLPONI ABACEHNGANI

Banga manderang Jisu uni bangbata somoirangkon apalo reataha ine chanchia. Ua Isolni agilsakni gimin pangnan chanchi-bewalaha. Ua Ongatgipani gisik gnanggipa daksoanirangni gimin skie raaha. Chona intal ua noktango Isolko uina aro Una kasana skie raaha. Anching daalo Jisu maikai uanio, bilsio, mandeni aro Isolni namnikanio dalroroaha ua golpoko knataina.

GOLPO AGANANI

Lesson 19 ni "Jisuni Gisik gnanganio Dalroroani" ingipa golpoko agantaibo.

GOLPONI JAMANO

Daalni golpoo Jisu minggitam cholrango gisik gnanganiko skie raaha aro dalroroaha ine uia. Bisa Jisu maikai skie raaha, anching chanchitaina. Nasimangoni saoba mingsako janapna manganma? (singbo). Sakgipin minggipinko janapchina.

Jisuni atimboni kosako donge Isolni agilsakni gimin maiko skie raaha, ua noksako nie chanchitaina. Balwani gimin, doorangni, bibalrangni aro mesrangni gimin Jisu maiko skie raaha. (Bisarango singbo).

Pile, ua noktango uni maa paaoniko mairangko skie raaha an-ching chanchitaina. Jihudini dakbewal gita noktango toromni bidingo, chaani, ringaniprakna Isolko mitelanirango Sastroko poraiano aro Nengtakani salko maniano Jisu mairangko skie raaha? (Bisarango gisik raatna agangrikbo).

Bisa Jisu Bibleo aro Uni Pagipani aiao inmangipa agilsako Isolni kasaani gimin bangbeako skie raaha. Unon ua Git 104:24 ko uni mukosto kagimin gita Isol pilakkon ongatbebeaha ine skie raaha.

Bisa saksa ba skigipa Git 104:24 ko classo poraie inatchotatbo.

BIANI

Kasagipa Isol, chingni dalroroanina nangni gisik gnanggipa daksoanirangna nangko mitela. Chingni mikronrang aro nachil-rangko nambate jakkalna onbo. Chingni gisikrangko name chanchina aro name gisik rana chingko dakchakbo. Jisu gita gisik gnanganio dalrora chingkoba bilakatbo. Amen.

JAKNI KAM

Isolni ongatgiminrangoni mingsako, bibal, doo ba jekoba salna ba salgiminko rongchi nitoatna mangan.

Lesson 47

ANGNI MONDOLI ARO ANGA

Sklani Japang :—

Ia skianichi anchinga maina mondolirango donga, maikai bisa-rang mondolini mongsonggipa madrang onga, maikai uamangni mondolia uamangni sakprakkon dakchaka, aro uamang Kristian nangrimgrikanio olakianichi, poraianichi, kam kaaniachi, onanichi aro damsan tomrimanichi katchaanio janggini nangrimgipa bakko manpaa ine masiatna dakchakani ongen.

Sastroni Bak :—Ex. 25:8; 40: 33; Luk 2:41-52; II Raja. 22:3-7; I Kor. 3:9a; I Thim. 4:11-13; aro Git 100.

Mukosto Kae Jakkalna :—Git 122:1.

Noksa Mesokani :—Jisu Torom Noko.

Skiani gita git :—No. 5 aro 6.

SKIGIPANI TARISOANI

Ia skianiara bilsu 7 ba 8 onggipa bisarangko mondolini gimin aro uamangni un baksa nangrimpaanini gimin masianiko batatna dakchakna mangsongani onga. Uamangni chanchianio, uianio aro dakanio maikai mondoliko dalnikna mangen indake dilangna nanggen.

Mondoli ba gilja nokara, nok mangmangsan ongaija, indiba meapa, mechikina, pante, metra aro bisarang jeraungan Isolna aro Jisuna kasara indakgiparangni jinma tomchimonge olakiani aro Isolni gimin uibatna skie raani aro una kam kaani biap onga. Mondoli ba gilja nok Jisuna kasagiparang madrangsan gita nangrimgrike kamko kaangna dakchakani onga ine bisarangna masiatna nanga.

Una agreba, bisarangba mondolini madrang ongpae olakianio, poraianio aro kamo jak onpagiparang onga kusi ongatna skina nanga.

Mea aro mechik bisarangba olakianio, skie raanio aro kam kaanio dakpana uamangnaba bakrangko onpana nanga. Jedake, onanio, ripengrangko rimbaani, rebagijagiparangko didiatani kamo aro pilak mondolini dakni kamrango kusi onge dakrimpaanian Kristian janggi tangani chongmot onga ine uamangni uianiko bariroroatna nanga.

Uamang anti bongana, "Anching maina mondolirang donga," "Angni mondoli angko dakchaka", "Angni mondoli tangkarangko nanga," "Angni mondoli angko nanga." "Anching pilakan damsan kam karima" ia lessonrangko skango skie rananahani gimin daalni skiani uamangna masibatani ongen.

BIBLENI GOLPORANGKO GISIK RAPILTAIANI

Dingtangmancha golporangko aganani pal, ia salo, reanggipa session brio jakkalgimin noksarangko mesokanichi Bibleni golporangko gisik raattaina nanggen. Ua noksarangchin bisarang aro manderangni dakani chongmotko nikanichi bisarang antangtangni dakna nanganiko masibana mangen ba skie ragen.

(1) Torom Tambuna onanirangko rabaani noksa.

- (a) Manderang maina gilja nokko manna ska? (Isolko olakina).
- (b) Gilja noko sawarang olakina mangen? (Je bilsini manderang).
- (2) Jisu Torom Noko dongani Noksa.
- (a) Jisu Torom Nokona maina reangaha? (Olakiaha, knati-maha, singanirangko singaha aro aganchakaha).
- (b) Jisu maiko skie raaha? (Isolni gimin bangbatako skie raaha).
- (3) Torom Nokko Taritaiani Noksa
- (a) Gilja nokna ba mondolina tangkarangko maina nanga-chim? (Gilja noko ba mondolio kam kaenggiparangna aro skigiparangko dakchakna).
- (b) Angaba onna nangenma? (Oe, Kristian sakprak kusi onge Isolni kamna onpana nanga).
- (4) Timothy aro Paulni noksa
- (a) Ia noksao Timothy maiko dakenga? (Paul baksa aganprakna reangpaenga).
- (b) Timothy mondolio kam kapaama? (Paul mondolio Jisuni uigiparang aro bilgrigipa nangenggiparangna dakchakgipa ongachim ine Sastroo sea).
- (c) Angaba mondolio kam kana nanggipa ongama? (Oe, Isol nangni kusi onge kam kaaniko amenga aro nannik-bea).

Iarangna bate, bisarangni uiani gita singanirangko tarisona mangen. Mesokna gitasan iano seaha.

BIANI

Kasagipa Isol, chinga bisarangba mondolio dakchakgipa ongpana naa cholko onanina nangko mitela. Chinga mondolini madrang ongpaani giminba kusi onga. Mondolio bangbate dakchakpana amna gita chingna cholrangko mesokpabo. Jisuni bimungo bia. Amen.

JAKNI KAM

Gilja nok tesako uamangni bohio, salsogiminoniko salna mangen.

Lesson 48

KRISTIAN JANGGI TANGANI

Skiani Japang :—

Ia antini skianichi, bisarang sakprak ba mande sakprak, antangtangni uiani aro bilni kri mandeskarang baksa aro Isol baksa dakrimpaanichisan Kristo gita janggi tangna nanganiko masiatgen.

Ua gita janggi tangani gimikon dakanikon Kristian janggi tangani ine minga ine uibatniko onna gita dilangna nanga.

Sastroni Bak :—Johan 13:34,35; 14:15,21,23 aro Gal. 5:13-14.

Mukosto Kae Jakkalna :— Johan 13:35.

Noksa Mesokani :— Daud aro Mephibosheth ba Jisu sagipa jinmako dakchakani.

Skiani gita git :— Git No. 102.

SKIGIPANI TARISOANI

Daalni lessonni subject bils 7 ba 8 onggi ba bisarangna masina nengnikani ongen. Maina maiko Kristian janggi tangani ine minga adita antirangna skangsang "Angni Bakko Dakani" ba "Antangtangni Bakko Dakani" ingipa skiani baksao anti brina kingking skaniko manmanahani gimin. daalni skianirangko knahaon adita masibana mangen.

Antangtangni dalroroani aro sakgipinrang baksa nangrimpaani ia ninggniko manderaanian Kristian janggi tangniko ongatna dakchakani onga.

Bisarang sakprak dalroroan baksa rakbatgipa kamrangko dakbana, antangni dakna nanganiko kadonge dakna, antangni aro sakgipinrangni ansenganina simsakna aro kakket onganiko gisik gnange seokna joton kaanian Kristian janggi tangani cholrang onga ine mesokna skina nanga. Antangko barnatani, kakket seokna antangko krenge joton kaani, ripengrangni jeako aro namnikgijaniko manoba kakket dakna kadonganiko bisarangni gisiko dalrroatna nanga.

Uamangni skia mangimin gita, sakgipinrangna kasaani, antangna bate sakgipinrangko dalnikani, jegrikani pal tomtomani aro nangrimgrikani, duk mangipa aro antangna bate bilgribatgiparanga kasae dakchakna skani aro mandeni namnikakosan ongaigija Isolni ska aro namnikaniko chusokatanian namnikbatgipa onga ine nikani

ba chanchianiko bisarangni gisiko ongbaatna joton kana nanga.

Jisu bisa intal noktango, apalo, ripengrang baksa kalgrikao aro kam kaanio ua gita janggi tangna abachenge uni siaona kingking Isolni ska aro manderangni namgnina kam kagipa ongachim ine mesokna onga.

Agilsakni pilak bisarangan Isolni kasagipa dedrang onga. Agilsako Uni pilak ska aro namnikanirangko chusokatna sakanti bisarangkon watataha aro sakantini chusokataniko manna kadongsoa. Uko chusoke jरिके janggi tanganikon Kristian janggi tangani minga. Uko dakna Sastro anchingko dilgipa onga aro Jisu antangan dake mesokangaha. Johan 13:35 ko mukosto mingatbo.

GOLPONI ABACHENGANI

Daalo anga je golpoko agannasienga ua golponi bisarang maikai Jisu gita tangna joton kaahachim uko nasimangna uiatani onngen Uko knatimbo.

JISU GITA TANGNA JOTON KAGIPA BISA

Achik songni salgrochipakni song damsao bilsil 12 onggipa bisa sakgni dongachim. Saksani binungko Kiljan aro sakgipinni bimungko Rongjan ine mingachim. Rongjan bilsil 11 ongnitingo Jisuni sninggipa ongpama mangsonge napbolaha aro mondolio bimung seako manmanahachim. Kiljande songsarekni desa ongachim. Indiba uamang sakgnian schoolchi rea aro kasagrikigipa ripengrang ongachim. Sakgnian apsan classo poraia aro jechiba roa, jekoba daka meligrikbeachim.

Salsao uamang sakgni sal kasinmitingo sorok joljol roangengachim. Adita chelangan uamang adita mea bisarangni sakgipinni barioniko sriksrik tegatchu minako ake chaengako nikaaha. Uamang Kiljan aro Rongjanko rebae chaepachina okamataha. Kiljan antangni ripeng Rongjanko inaha, "Hai ripeng, anchingba uamang baksa tegatchu minako ake chapana. Mairongpile tegatchu minbeenga."

Ripeng, anga nangni ripeng onge, pilak namarangkode jechakgijan daka. Indiba gipin barioniko chaue chanade anga rena sikja ine Rongjan aganchakaha.

Sakgipinrang chana manode anchinga maina chapana manjawade ine Kiljan singaha.

Angade reanggipa blision Jisuni sninggipa ongpama mangsonge napbolaha aro angni janggi tangani gimikon bil amadipet namgijako dakjana krengna mangsongmanaha, angade chajawa, naaba

angni ripeng onga, chaepanabe ine Rongjan antangni ripengko jako sale rimbadraaha.

Kiljan gisiktango suk ongbrejaha. Indiba uni ripengni chana repajani gimin rebapaaiaha.

Jasamangni jamano mail gni mang onggipa song damsaona uamang sakgnian Rongjanni madrangni nokchi rona reangengachim. Ramao uamang kana mande saksani sae ramasano tuengako nikeaha. Uara maambeengachim. Rongjan ua saenggipa kana mandeni obostarangko uo singoa, uan mail 8 mang chelgipa songoni Rongjan aro Kiljanni reanggipa apsan songonan uni madrangonan repaengachim. indiba salsagipa mtalan sachange rena amjae ua biapon walginik waltuaha ine uina manaha.

Rongjan uni obostako knae kasachakbeaha aro antangni ripengtang Kiljanko inaha, "Ripeng anchinga ia kana saenggipako kasne kasne dile uni madrangona rimangna hai."

Naara ua mandeko uiana? Uigija mandenara naara maina kasachakade, madrang, ba uigimin mande ongosa. Angade sikjaenga ine Kiljan aganchakaha.

Ripeng knatimbo, chinga Sunday Schoolo nanggipa Samariani mandeni gimin skiako manaha aro Jisu agana, "Reangbo aro naaba ua gita dakbo." Jisu antangba uni uigimin, uigijagipa pilakkon, Uoni ansengatani aro dakchakaniko bigiparangna kasachake daka. Naa gongjaode, drajawa, naara resoe angni madrangni noko rosobo. Anga ia mandeko dakchake rimanggen ine Rongjan aganaha.

Kiljan adita chanchie aganchakaha. "Angaba nangko saksan galede maikai reanggen maina anchinga ripengrang onga. Sikjaoba nangko dakchakpanan nanggen."

Uamang sakgnian saksu samsachi aro sakgipin samsachi dilkepe, madrangona sokjana kingking rimangaha. Indiba uigija mandena uni ripengni kasaani gimin pangnan gisiko chanchiangkuaha.

Kiljan songsarik bisa onge Rongjanni daka kainrangko masina amrongjachim aro gisiktango aiao innane chanchirongachim. Indiba ua Rongjan baksa ripeng dakaniko watna sijkachim.

Kiljan aro Rongjanni obostarang adita namachim. Rongjan kangalbegipa bisarangna gisep gisep uni chola, half pant aro chinani aro basakoba schoolo kitap ba pencil ba maiba nanganirangko brena amgijagiparangna paisarangkoba onrongachim.

Kiljanba uni ripengni dakanirangna kratchapile, uaba gisep gisep ripengrangna dakchakpaachim.

Uamang panterang ongbaengahachim. Salsao Kiljan gisiko dongtojae Rongjano indine singaha, Ripeng, naara maina sakgipinrangna uigimin uigija, madrang onga, onggijarangna kasae dakna ska?

Rongjan mamungkoba aganchenggija Johan 13:35 ko mukosto mingaha. Ua jamano ua Jisu maikai tangahachim una somoi manaantion una golporangko aganrongaha.

Jamankitiko Kiljanba uni ripeng gitan Jisuni sninggipa ongpana mangsonge napbolaha.

Uamang sakgnian uamangni janggi tangani gimikon sakgipinrangko dakchake aro namgijarangko regele janggi tangchongmotaha.

JAKNI KAM

Sagipa ba duk mangipa bisarangna maiba dakchakanirangko onna mangenma chanchigrike mikkang changsa Robibaro rabana didiatchina.

Lesson 49

CHRISTMASNI GIMIN CHINGA RINGA

Skiani Jepang :—

Christmasni gimin ia skanggipa skiani bakara, ritcha bilsirangna banga asongni manderang Christmasni sokbaaniko gitrangchi aganna maikai katchaa uko bisarangna uiatna dilangna nanga. Uamang antangtangan Christmasni gitrangko ringanio aro skie raanio chongmotgipa katchaaniko nikgen.

Sastroni Bak :—Sagrerangni git Luk 2:8-14.

Mukosto Kae Jakkalna :— “Maina Isol agilsakna inditan kasaaha, ua antangni saksa kamkam depantekon onjok.” Johan 3:16.

Noksa Mesokani :—Abrini japao Mes Nirikgiparangni noksa.

Skiani gita git :— No. 119.

SKIGIPANI TARISOANI

Anchinga Lukko mitelna nanga, maina uasan mangmang Jisuni atchianini gimin koborko knagipa mes nirikgiparangni gimin aro uamangni Bethlehemona reanganini gimin seaha. Uni serikani-ranga pilak Kristianrangna katchaaniko aro mitelskapilaniko gapata.

Bibleni katarangko naa antangna poraie, sagreni katarango kusi onganiko rabaaniko uia.

"Nibo, katchaani naina katako anga nasimangna rabara." Luk 2:10.

Mes nirikgiparangni gongrake nina reangna skani aro uamangni katchaaniara mairongpile aiao inmanani ongachim, uamang uko donnunan amjaha uko chanchibo. Luk 2:20 ko poraibo.

Anchingba Isolko rasong chaatgen aro Uko mitelgen aro ua katchaani nama katako anchingni dedrangna aganna nanggen.

Johan 3:16 ko bisarangna poraitaibo ba mingtaibo.

Ia Christmasni gimin lessonrangko skimitingo ua Johan 3:16 ni skanggipa bakni ningtuaniko bisarangni gisiko napate mangrakatbo. Skigiparang uko gisik raattaitaina nanggen maina ua Agilsakni Jokatgipa ongchina Isolni antang Depanteko agilsakona watatani dalgipa mangsonganiko bisarangna talatani onngen.

GOLPONI ABACHENGANI

Christinas onga changantion anching skanggipa Christmasni gimin Bibleni knatogipa golporangko knatimtaina namnika. Uarangoni mingsako anga nasimanga agannane.

GOLPO AGANANI

SAGRERANGNI GIT

Chongipa songjinma Bethlehemni apalchipak adita mes nirikgiparang antangtangni mesrangko nitimengachim. Ua wal namen rongtalbeachim aro askirangba tengsubeachim. Balwaba tomtom-beachim aro uamung golmalba grichim.

Abrini japao uamang waal soe chakengachim aro antangtangni surichikgipa jak aro jaksirangko waalo ange, aiao waalara mairongpile nama ine agantokengachim. Ua kasingipa walo antangtangko dinge rakina gita mesrang aro bisarang sepangchapgrike tuengachim. Uarangni ritchagipa kimilrangan uarangko dingat-achim.

Mes nirikgiparang tomtom asonge chanchienga aro aiao inmanengachim. Haida uamang antangtangna janggiko ongipa Isolni gimin chanchiengakon. Ba uamang manderangni gimin aro uamangni dakchakgipa Jokatgipa jean uamangko sinjetaoniko jokatgenchim uarangni gimin chanchiengnaba donga.

Isolara antangni manderangna Jokatgipa ba Dakchakgipako watatna kurachakachim ine mes nirikgiparangoni saksa aganaha.

Uara basako rebaginok ine sakgipin aganaha. Ua rebachong-

motoba anchinga Uko maikain uiginok ine sakgipinba singangkua-
Unon ranggitik chinga uamangko tengsuduulaha. Salo gitan ua
bakra tengsuachim. Nirikgiparangde kene bilchrokaha. Ua ching-
anioara sagre saksa chadengengachim.

Kennabe, kusi ongbo! Pilak manderangna katchabeani Nama
Katakoo anga nasimangna aganna rebara ine sagre aganaha.
"Daawalo, Bethlehemo Jokatgipa, Isolni Depante atchiaha. Aro
ian nasimangna chin; Nasimang barachi remreme chikongo tugipa
Bisako nikgen."

Unon rangsan sagre jinma gitko ringaha. Mes nirikgiparang aiao
inmane nidoaha. Uamang kusi ongbee Isolko mitele gitko ringenga-
chim. Ua git ian ongachim.

"Chubatao Isolna rasong,

Aro agilsako namnika manderangna tomtomani."

Mes nirikgiparang sagerangni git ringani matchotkujana king-
king aiao inmane tomtome knatimaha. "Anching ia bisako amna
nanga, jekon Isol anchingni Jokatgipa aro Dakchakgipa ongchina
anchingna onmanaha."

Uamang Bethlehenni chikongona tongtong skele reangaha. Ua-
mangan skanggipa Christinasni gitko ringaniko knachenggiparang
ongaha aro uamangni katongrango katchaan gapaha.

GOLPONI JAMANO

Uamangni uiginin Christmas gitrangko ringode ba mangijagi-
parangko skisoode Christmas salo kusi onge ringna mangan. Indiba
uarangko sulni giminsan ringaijachina skigiparang dakchakna
nanggen maikai bisarangni katongrang daalni skiani miksongani
gita ua gitrangchi katchaaniko mangan. Ia gitrangko ringna nang-
gen. 117, 118, 71 aro gipinrang.

BIANI

Kasagipa Isol, Christmas sal chingna sokbataiani gimin chinga
kusi onga. Christmas sal Jisuni atchiani sal onga ine gisik rana
chingko dakchakbo. Aro ia salo kasaani aro onani sal dakna ching-
ko skibo. Jisuni bimungo bia. Amen.

JAKNI KAM

Mes nirikgiparang baksa mesrang gnange salsogiminko rongchi
nitoatna mangan. Aro Christmas salna nitoatanirangko daksona
mangan.

Lesson 50

ANCHINGA CHRISTMAS NOKSARANGKO NIA

Skiani Jepang :—

Daalni skianichi banga ritcha bilsirangna dingtang dingtang asongni noksa dakgiparanga nambegipa Christunasni golporangko aganani onga ine masiatna dakchakna nanga. Ian uamangko Christnas noksarangko namnikatna aro Bibleni golporangko talbatatna dakchakani onngen.

Sastroni Bak :—Luk 2:15-20.

Mukosto Kae Jakkalna :—'Ua anchingna kasaaha aro Uni Depanteko watataha I Johan 4:10.

Noksa Mesokani :—Mes nirikgiparangni sokbaani.

Skiani gita git :—No. 118.

SKIGIPANI TARISOANI

Je alda noko Joseph aro Mariam napaha ua nokara roongchi rikgimin gadangsasangipa nok ongnaba donga. Gro gipeng apsan onggiipa padapgijagipa sarao jillanirangko donachim. Ningo gadanggni dakachim. Gadangsa onbata aro gadangsa chubata daka-chim. Chubatkalgipao songregiparang tusia aro onbatgipa bako jillanirangko rakia indiba uarangni gisepgriko mamung dimchang-gipa pakma grichim. Haida ua jillanirangko donrama abrini japao donggipa rongchunrangchi dondulgimin rongkol ongnaba donga, maina daororoba indakgipa alda nokrangko Palestineo nikronga. Songregipa manderangni dongram biapo sokgiparang gapahaode badinggiparang jillanirang baksa dongpana nangachim.

Jillanirangni chachakaniko nolni pakmao dalgipa akol gita konggrange dakrongachim. Indakgiparangoni gesaon bisa Kristoko rongtalgipa megapni kosako tuataha. Union Mariam antang dejakra depanteko baaha; aro uko barachi remreme chikongo tuataha, maina sokgipa chakanio uamangna apchakjachim ine Bibleo sea. Luk 2:7.

Ua atchigital bisako gro gipeng apsan onggiipa barachi namedake remremaha. Maina uamang indake bakgitchak bisako remremrongachim. Basakoba ua dalgipa barachi remremmani kosakoba chongipa rodinggipa barachi remremdapkuachim jedakode uan

namedake tiktak onгна mаngеn. Uаn Jihudi mаnderаngni dаk-bewal оngаchim. (Noksао dоnggipа Jisu bisаkо remremаnikо bisаrаngnа mesоknа mаngеn).

Nirikgiparаng Bаkgitchаkko, Mаriаm аrо Jоsephkо аme nikeаhа. Uаmаng аntаngtаngni аiао inmаngipа nikanirаng аrо knаani-rаngkо uаmаngnа аgаnаhа. Аrо knаgiparаng аiао inmаnbeаhа. Indibа, "Mаriаm iа pilаkkоn chаnchiе uni kаtоngо rаkiаhа."

GOLPONI ABACHENGANI

Reаnggipа аntiо, Nirikgiparаng Bеthlehemоnа reаngnа mаng-sоngеngаchim ine аgаne аngа gоlpоkо mаtсhotаtаhа. Dааlо аngа uа gоlpоni tоngsаgipаkо nаsimаngnа аgаnnаne.

GOLPO AGANANI

NIRIKGIPARANGNI NIKEANI NOKSA

Luk 2:15-20

Sаgrerаngni git ringmаnсhotоn nirikgiparаng reаngnа sikbeаhа. Rebаbо, аnсhing uа bisаkо аmnа nаngсhоngmоtа ine uаmаng аgаnаhа.

Uаmаng gоngrаkе аbrini sаnbеng jоljоl Bеthlehemоnа dаkаng-gipа rооngаrigipа аrо retоgijаgipа rаmаkо kаtоnаngаhа. Uа tоm-tоmgipа wаlо uа сhоngipа sоngjinmаni mаnderаngа tоmtоm, jrip jrip tусitоkеngаchim. Bеthlehemni mаnderаngde uаmаngni Dаlgipа Dаkсhаkgipа, kurасhаksоgimin Jоkаtgipа, uаmаngni sоngjin-mао аtсhiаhа ine mаmungkоbа uijаchim. Indibа Nirikgiparаngde uiаchim. Hаi аnсhing gоngrаkе rеnа. Sаgrerаng uа bisаrа сhi-kоngо оnggеnсhim ine аnсhingnа аgаnаhа.

Jаmаnkitiko uаmаng uа nоlоnа sоkаngаhа, jео kаsаgipа Jоseph аrо nеnggipа Mаriаm bаnggijа kоntаrаngnа skаngmаng mаngsаn uаnо mасhаknа nаpаhаchim.

Iаn uа biр, hаi аnсhing nаpаngnа ine uаmаng аgаnmitugrik-аhа.

Kаsinbee nirikgiparаng nоlоnа nаpаngе, nоkniningоnа sоkаhаоn dоngdikаhа. Dinggipа nоlni аndаlао сhоngipа Bisаrа tuеngаchim. Nirikgiparаng uа сhоnbegipа bimаngni rоngtаlgipа mеgаpо tuеng-аkо nikаhа. Uni сhоngipа bееn gimikkоn bоkgipа bаrао rem-remаchim. Uni jаа jаkrаng uа remremаni bаrаni ningo tоmtоmе dоngаchim. Uni сhоnbegipа skоmаngmаngkоsаn niknа mаnаiа-chim. Dаmbegipа mаgipа Mаriаm uni сhоngipа bаkgitchаkko

kasabee nionaha. Joseph magipa aro Bisani sepangchape, chelchak-gipa gita chadengachim.

Nirikgiparang ua nikaniko miktuatgija nie sepangbate rebaaha. Nibo, ua tusienga ine saksa aganaha. Aiao dao ua jumangchi kadingsmitenga ine sakgipin aganaha.

Nitogipa noksao Nirikgiparang niaha gitan uamang andalgipa rongkolo donggipa bisako gisikni mikronchi pangnan nikkamaha. Uamang Bethlehemona Mariam aro Josephko rabagipa, chongipa, kaltapprugipa gadakoba sepango nikaha ine anching chanchina namnika. Haida uamang alda nokgipani gitchak gipok tokgipa matchu bimani megapo tuakoba nikaha. Una agre kaltaprugipa paroarangni nolni bilbangrango bac mikoarangkoba knaanguahakon.

Bisa Jisuko mikrakatjana gita Nirikgiparang Bethlehemni apalchi uamang jerangko nikaha aro knaaha uarang pilakkon kasingipa kurangchi Mariam aro Josephna agantokaha. Uamang jedake kasinbee napaha indaken tomtonggipa walni andalaonaba reongkatangaha. Kurachaksogimin Agilsakni Jokatgipa, Jisuni rebaanina Isolko mitele, uamangni mes jakrangona uamang reangpilaha.

Indiba Mariam chikongo tuenggipa Bisako nitimmitingo Nirikgiparangni una agangimin katarangui gimin aiao innane chanchibeaha.

BIANI

Kasagipa Isol, Christmas somoio Jisuni rebaani nangipa katako sakgipinrangna uiatna chingnaba bakko manpaani gimin nangko mitela. Ua somoio chingni ripengrangna onpaanichi Jisuni kamko abachengatna dakchakpana amna gita onanirangko chimongpana joton kana chingko dakchakpabo. Uni himungo bia. Amen.

JAKNI KAM

Christmas salna nitoatanirangko tarisona mangan aro sakgipinrangna dakchakna onanirangko chimongsona mangan. Ba Christmas cardrangko bisarang tarisoe, sagerarangni gitko cardrango sesona mangan.

Lesson 51

CHRISTMAS GOLPORANGKO CHINGA NAMNIKA BA CHINGNI NAMNIKGIPA CHRISTMAS GOLPORANG

Sklani Japang:—

Ia antio Christmasni gipin golporango katchaatna bisarangko dilani onngen. Bibleo donggipa golporang aro gipin chanchichip-gipa golporangni dingtang onganiko uina skie ragen. Indake Kristo bisana ningtubatgipa kasaani aro Christmasni mangsongani chongmotko masiatna dilangna nanga.

Sastroni Bak :—Mati 2:1-12 “Uigipa manderangni Golpo.”

Mukosto Kae Jakkalna :—Johan 3:16.

Noksa Mesokani :—Gisik Gnanggipa manderangni Rebaani.

Sklani gita git :—No. 121.

SKIGIPANI TARISOANI

Gisik gnanggipa manderangni golpoara Bibleo serikani gita illengenggipa noksa tiktak gita ongachim. Banga noksa salgiparangko nitogipa rongrangchi nitoate salna gisikko salata. Salna changbegipa saksa Mati 2:1-12 o sea gita nitogipa noksako salaha. Ia Sastroni bakni kataranga suugipa poido aro knatobegipa gitni kurang gita ritcha bilsirangonan gamanguenga. Uni bijatchio chongipa Bisara Gisik Gnanggipa Manderangni chelbegipa nisanko rangsan salopaha, jerangan antangtangni katongko kakket olakia-niona onaha aro uamangni onna manna gita nambatgiparangko Una onaha.

Unon uamang tuchikope uko olakiaha; aro antangtangni gam donchakanirangko oe onanirangko, sona aro kunduru aro murko onaha. Mati 2:11 o seachim.

GOLPONI ABACHENGANI

Pilak gipin golporangna bate Jisuni atchiani Bibleni golpoara knatobatsranggipa onga ine banga manderangan chanchia ine anching skie ramanaha. Iani giminan uamang salanirangchi, git-

rangchi aro noksarangchi ua golpoko agantaitaina namnikbea. Una agreba manderang skanggipa Christmasni gimin antangtangni chanchichipani golporangkoba sena aro aganna namnika. Uamang Kristo Bisana, Nirikgiparangna aro Gisik Gnanggipa Manderangna maidake ongenggenchim banga rokom chanchianirangkoba chanchina namnika. Indiba daalo anga Sastroo seginin Gisik Gnanggipa Manderangni Bisa Jisuna Onanini golpokosan agangen.

GOLPO AGANANI

Ruutbea bilsirang reangaha, Salaramo gisik gnanggipa minggipa mitam manderang gnangchim. Ia manderang askirangko nirongaha aro uarangko porairongaha.

Walsao uamang saliramo gitalgipa aski rongsako nikaha. Ua askiara, Raja saksa atchiaha ine aganani onga ine uamang aganaha. Hai anching uko amna ine uamang inaha. Bakbakan gisik gnanggipa manderang rechakatangaha. Uamang utrango gakate, tengsugipa askini dila gita anchengarigipa agisini ramako bate reangaha ine anching chanchia. Utrang chaani aro chiko rabitangaha. Uamang Bakgitchak Rajana onanirangkoba raangaha.

Uamang askiko jarike chele reangaha. Uamang walo walo reangaha indiba sal dingbemitingo uamang nengtakaha. Banga salrang songreani jamano uamang Jerusalem songjinnaona sokbaahachim. "Jihudirangni Raja atchigipara bao?" ine uamang singeaha. "Chinga uni askiko nikmanaha aro uko olakina rebaaha." Jerusalemni raja uamangko Bethlehemona watataha.

Ua aski dongdikkuja, dilanguenga ine Gisik Gnanggipa Manderang aganaha. Askiko jarikkue uamang ruutgijan Bethlehemona sokbaaha. Nibo aski tomtom chadengengaha ine uamang agantaiaha. Ia songon onga nanga. Ua aski je noko Joseph, Mariaan aro Bisa Jisu dongengachim uni tongtong tomtome tengsuahachim.

Uamang nokningona napangon mairongpile kusi ongbeenggenchim. Uamang magipa baksa Bisako nikaaha. Uamang jasku dipane uko olakiaha aro onanirangkoba onaha.

Unon uamang atchigital Raja bisako nikahani gimin kusi ongbee songtangtangchi reangpilaha.

BIANI

Kasagipa Apa, Isol, Jisuna chinga nangko mitela jean chingni Skigipa Dakchakgipa aro Ripeng onga rebaaha. Sakgipinrangna Christmasni katchaaniko bak onpana chingko dakchakpabo. Jisuni bimungo bia. Amen.

JAKNI KAM

Christmas salo sawarangna aro mairangna onna mangan listko daksochina. Sunday Schoolni gita onanirangko onna manna gita bisarangni rabaanirang dongode, uarangko chimongna mangan.

Lesson 52

CHRISTMASNI KATCHAANI KO SAKGIPINRANGNA ONPAANI

Skiani Jepang :—

Christmasni gimin skiani ia bonkamgipa bako, Christmas salo onanini katchaaniko uibatatna aro Jisuni rebaani katako sakgipinrangna onskana gita gitrangchi, noksarangchi aro golporangchi olakianio kusi onge dakrimpana bisarangko dakchakgen.

Sastroni Bak :—Mati 2:1-12; Luk 2:8-14; 2:15-20.

Mukosto Kae Jakkalna :—Mark 16:15. "Agilsak gimikona nasi-mang reange pilak dakgiminna Nama Katako aganprakbo."

Noksa Mesokani :—Reanggipa anti gitamo jakkalgimin Christmasni noksarangko jakkalchina.

Skiani gita git :—No. 116.

SKIGIPANI TARISOANI

Christmasni sal batangmanahaoba, Christmasni kasaani gisik aro nanggipa skianiranga bilsu gimiknan dongkamgenchim. Nangni bisarangna ua uianiko uiatna dakchakna skang naa antangan ia kasaani aro onani gisikko uichengchongmotna nanggen. Naa antangan Christmasni katchaani aro kusi onganiko antangni janggi tanganio chingkame, tangkame rakina gita cholrangko amna nangchongmota. Naa sagrerangni gitko katongtango knakamna nanga.

"Chubatao Isolna rasong, aro agilsako manderangna tomtomani je mande baksa ua namnika." Luk 2:14.

Naa Gisik Gnanggipa Manderangni Kristo bisako nikahaon maiko dakaha, uko gisik rakamna nanga.

"Unon uamang tuchikope uko olakiaha; aro antangtangni gam

donchakanirangko oe onanirangko, sona aro kunduru aro murko onaha." Mati 2:11.

Chongmot, anchingba bilsu gimikon uko olakigen. Anching jeko sakgipinrangna kasae ona aro daka uan Una kakket rachakgnigipa onani onga ine gisik rae, chongmot, anchingba Una onanirangko onpana sikna nanggen.

Naa antang gisiko hanga uianiko manua ua antimitingo, Isaia 9:6-7 ona pilnipil poraitaitaina nanggen. Naa badita Isolni kasa-begimin Depanteko agilsakona Uni watatani gimin gisik one, ningtue chanchia inditan Uni kasaani aro onani gisikni gamchat-aniko antangna talbate uina mangen. Aroba naa badita uani gimin anti gimiko poraia, chanchia aro chanchibewala inditan nangni bisarangni gisikko bilsu gimiko Christmasni gisikni janggi tanganiko chanchiatna cholrangko mesoke dilangna manbatgen.

GISIK RAATTAIANI

Ia jao jakkalenggipa Bibleni podrangara Christmas, Jisuni atchiani Salko maikai maniaha ua cholrangko gisik raatani onga. Anching daalo uarangko agantaie, Christmasna daksoanirango anchingko maikai dakchakaha uarangni gimin agantaina.

Anching pilakan Johan 3:16 ko agantaina. Ia podara Christmasni gimin chanchisoanirangni gimin maiko chanchiata? Bisarang uamangni kasagiparangna onanirangni gimin aganna mana.

1 Johan 4:10 ko anching damsan agantaina. Reanggipa antio Jisuni rebaanini gimin golpoko maikai sakgipinrangna bakko onpaaha? Git. No. 117 ko poraibo ba ringbo.

Pilakan Mark 16:15 ko agantaina. Anching maikai Jisuni bonkamgipa geetaniko ia Christmaso rakiha? Git. No. 121 ko ringbo. Noksarang Jisuni kamko abachengatna dakchakna uamangni dingtangmancha onanirangko bisarangko gisik raatgen.

CHANCHIATANI

Gisik Gnanggipa Manderang Jisuna onanirangko onaha. Ia Christmaso anchingba Jisuna onanirangko onani chol gnang. Anching ia Christmaso maikai Jisuna onna mana nasimang uiaha? Nasimangoni maitam Jisuni kamrangna dingtangmancha onaniranga Jisuna chongmotgipa onani onga ine uinaba donga. Jensalo anching tangkarangko Jisuni kamrango dakchakpana ona, unon anchingna Uni donanggimin kamko chusokatna onpaanian Jisuna onani gita apsan onga. Uan changsao Jisuni antangni ripengrangna agananani gita bebe onga ine anching uia. Anga uko Bibleoniko

praigen. Mati 25:40 ko badalbo. "Nasimang angni ia jongada-rangoni chonbatgipa saksana uandake badita dakaha, angnan dakaha." Ian jensaloba naa ba anga saoba saksana kasae daka uan Jisuna kasae dakani onga ine ua mangsongaha.

Hai anching uko gisiko donsrangna mankujana kingking agantaitaina. Mati 25:40.

BIANI

Kasagipa Isol, ia Christmaso sakgipinrangko dakchakpana naa chingna cholko onani gimin kusi ongbea. Jisu chingna kasagipa, kasachakgipa aro dakchakgipa ongchina mesokna rebaahani gimin-ba nangko mitela. Daalni tomani olakiano chingni nangna kasaa-niko mesokna bilko onpachina Jisuni bimungo bia. Amen.

JAKNI KAM

Sakgipin kangalgipana, magri bisarangna ba saoba dakchakaniko nangchongmotgiparangna onanirangko katomna mangan.

8779.
154.96.
Shig

